

宋五家诗钞

朱自清

文硕阁

wenshuoge.com

目录

关于我们	3
欧阳修	5
王安石	29
苏轼	69
黄庭坚	121

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

欧阳修

欧阳修，字永叔，吉州永丰人。仁宗天圣中进士。补西京留守推官。召试学士院，为馆阁校勘。以书诋谏官高若讷，贬夷陵令。徙乾德，改判武成军。迁太子中允，馆阁校勘，集贤校理，知太常理院。出通判滑州。庆历初，擢太常丞，知谏院，拜右正言，知制诰。以朋党，出知滁州。迁起居余人，徙扬州、颍州。复龙图阁直学士，知应天府。宋以宋州为应天府，建南京。今商丘南。母忧，起复，判流内铨。以翰林学士修《唐书》，加史馆修撰。勾当三班院，判太常寺，拜右谏议大夫，判尚书礼部。又判秘书省兼龙图阁学士，权知开封府。《唐书》成，拜礼部侍郎，枢密副使。未几，参知政事。定议立英宗。以观文殿学士刑部尚书知亳州，徙青州、蔡州。以太子少师致仕。卒，赠太子太师，谥曰文忠。其诗如昌黎，以气格为主。昌黎时出排募之句，文忠一归之于敷愉，略与其文相似也。以上据《宋史》本传。

南宋胡柯所为《庐陵欧阳文忠公年谱》（《四部丛刊》影印元刊本《欧阳文忠公文集》）：先生生于真宗景德四年（1007），卒于神宗熙宁五年（1072），年六十六。

《东坡志林》三：欧阴文忠公尝语：“少时有僧相我：耳白于面，名满天下；唇不着齿，无事得谤。其言颇验，耳白于面，则众所共见；唇不着齿，余亦不敢问公，不知其何如也。”

《六一题跋》十一：予为儿童时，得唐《昌黎先生文集》六卷，读之，见其言深厚而雄博。然予犹少，未能悉究其义，徒见其浩然无涯，若可爱。是时天下学者，杨、刘之作，号为时文；能者取科第，擅名声，以夸荣当世，未尝有道韩文者。予亦方举进士，以礼部诗赋为事。年十有七，试于州，为有司所黜。因取所藏韩氏之文复阅之。则喟然叹曰：“学者当至于是而止尔！”后七年，举进士，及第，官于洛阳。而尹师鲁之徒皆在。遂相与作为古文。因出所藏《昌黎集》而补缀之，求人家所有旧本而校定之。其后天下学者亦渐趋于古，而韩文遂行于世。至于今，盖三十余年矣。学者非韩不学也。可谓盛矣。

《六一诗话》：退之笔力，无施不可。而尝以诗为文章末事。故其诗曰：“多情怀酒伴，余事作诗人”也。然其资谈笑，助谐谑，叙人情，状物态，一寓于诗，而曲尽其妙。此在雄文大手，因不足论；而余独爱其工于用韵也。

永叔《再和圣俞见答》云：嗟哉我岂敢知子，论诗赖子初指迷。子言古淡有真味，太羹岂须调以醢。怜我区区欲强学，跛鳖曾不离污泥。问子初何得臻此，岂能直到无阶梯。如其所得自勤苦，何惮入海求灵犀。周旋二纪陪唱和，凡翼每并鸾凤栖。有时争胜不量力，何异弱鲁攻强齐。（《宋诗钞》）

永叔《书梅圣俞稿后》：余尝问诗于圣俞，其声律之高下，文语之疵病，可以指而告余也。至其心之得者，不可以言而告也。余亦将以心得意会，而未能至之者也。

葛常之《韵语阳秋》一：欧公一世文宗，其集中美梅圣俞诗者，十几四五。称之甚者，如“诗成希深拥鼻讴，师鲁卷舌藏戈矛。”又云：“作诗三十年，视我犹后辈。”又云：“少低笔力容我和，无使难追韵高绝。”又云：“嗟哉吾岂能知子，论诗赖子初指迷。”圣俞诗佳处固多，然非欧公标榜之重，诗名亦安能至如此之重哉？欧公后有诗云：“梅穷独我知，古货今难卖。”而圣俞《赠滁州谢判官诗》亦云：“我诗固少爱，独尔太守知。”皆言识之者鲜矣。

《后山诗话》：欧阳永叔不好杜诗，苏子瞻不好司马《史记》，余每与黄鲁直怪叹，以为异事。

苏轼《居士集叙》：欧阳子论大道似韩愈，论事似陆贽，记事似司马迁，诗赋似李白。此非余言也，天下之言也。

《雪浪斋日记》：或疑六一居士诗，以为未尽妙，以质于子和。子和曰：“六一诗只欲平易耳。”（《宋诗纪事》十二）

魏泰《临汉隐居诗话》：余每评诗，多与存中合。余顷年尝与王荆公评诗。余谓凡为诗当使挹之而源不穷，咀之而味愈长。至如永叔之诗，才力敏迈，句亦雄健，但恨其少余味尔。荆公曰：“不然。如‘行人仰头飞鸟惊’之句，亦可谓有味矣。”然至今思之，不见此句之佳，亦竟莫原荆公之意。信乎所见各殊，不可强同也。

叶梦得《石林诗话》上：欧阳文忠公诗始矫昆体，专以气格为主。故其言多平易疏畅。律诗意所到处，虽语有不伦，亦不复问。而学之者往往遂失真，倾困倒廩，无复余地。然公诗好处，岂专在此？

《苕溪渔隐丛话》后集：欧公作诗，盖欲自出胸臆，不肯蹈袭前人。亦其才高，故不见牵强之迹耳。

《西江诗话》：王荆公编杜少陵、李太白、韩昌黎、欧阳庐陵为四家诗集，以欧公居太白上，当时已有定评。按文忠公天分既高，而于古人无所不熟；故能具体百氏，自成一家。或曰，学昌黎；或曰，学太白；或曰，不甚喜杜；或曰，有国初唐人风气；能变文格而不能变诗格。皆非知公者也。公诗字字珠玑，篇篇锦绣，如昔人所论杜诗，无可拣汰，亦无可称赞。荆公云：“近代诗人，无出欧公右者。如‘行人举头飞鸟惊’之句，酷有天趣，第人不解耳。”

王士禛《古诗选凡例》：宋承唐季衰陋之后，至欧阳文忠公，始拔流俗。七言长句

，高处直追昌黎，自王介甫辈，皆不及也。

刘熙载《艺概》二：东坡谓欧阳公“论大道似韩愈，诗赋似李白”。然试以欧诗观之，虽曰似李，其刻意形容处，实于韩为逼近耳。

又：欧阳永叔出于昌黎，梅圣俞出于东野。欧之推梅，不遗余力，与昌黎推东野略同。

《昭昧詹言》十二：学欧公作诗，全在用古文章法。如此，则小才亦有把鼻涂辙可寻。及其成章，亦非俗士所解。逆卷顺布，往往有两番。逆转顺布后，有用旁面衬，后面逆衬法。盖上题用逆衬者，无非避正避老实，正局正论，致成学究也。

《朱子语类辑略》：欧公文字，敷腴温润。

《臞翁诗评》：欧公如四瑚八璚，止可施之宗庙。

《扞虱新语》：欧公语工于叙富贵。

永叔《梅圣俞诗集序》：予闻世谓诗人少达而多穷，夫岂然哉！盖世所传诗者，多出于古穷人之辞也。凡士之蕴其所有而不得施于世者，多喜自放于山巅水涯之外；见虫鱼、草木、风云、鸟兽之状类，往往探其奇怪。内有忧思感愤之郁积，其兴于怨刺，以道羁臣寡妇之所叹，而写人情之难言，盖愈穷则愈工。然则非诗之能穷人，殆穷者而后工也。（《集》四十二）

胡柯《庐陵欧阳文忠公年谱》后记：文忠公年谱不一。惟桐川薛齐谊、庐陵孙谦益、曾三异三家为详。虽用旧例，每岁列其著述，考文力之先后，然篇章不容尽载，次序宁免疑混！如公曾孙建世之告勅宣札为编年，尚多差互。况余人乎？今参稽众谱，傍采史籍，而取正于公之文。凡《居士集》、《外集》，各于目录题所撰岁月，而阙其不可知者。奏议表章之类，则随篇注之。定为《文集》一百五十三卷。《居士集》五十卷，公所定也，故置于首。《外集》二十五卷，次之。《易童子问》三卷，（原注：《诗本义》别行于世。）《外制集》三卷，《内制集》八卷，《表奏书启四六集》七卷，《奏议》十八卷，《杂著述》十九卷，《集古录跋尾》十卷，又次之。《书简》十卷终焉。考公行状，惟阙《归荣集》一卷。往往散在《外集》，更俟博求。别有《附录》五卷，纪公德业。此谱专叙出处，词简而事粗备。览者当自得之。庆元二年二月十五日，郡人登仕郎胡柯谨记。

周必大《欧阳文忠公集跋》：《欧阳文忠公集》自汴京、江、浙、闽、蜀皆有之。前辈尝言公作文，揭之壁间，朝夕改定。今观手写《秋声赋》，凡数本，《刘原父手帖》，亦至再三；而用字往往不同。故别本尤多。后世传录既广，又或以意轻改

，殆至讹谬不可读。庾陵所刊，抑又甚焉。

又：《居士集》经公抉择，篇目素定。而参校众本，有增损其辞至百字者，有移易后章为前章者。

又：既以补乡邦之阙，亦使学者据旧鉴新，思公所以增损移易；则虽与公生不同时，殆将如升堂避席，亲承指授，或因是稍悟为文之法。此区区本意也。（《四部丛刊》本欧《集》）

忆山示圣俞

吾思夷陵山，山乱不可究。

东城一堠【土堡，或记里土坛。】余，高下渐冈阜。

群峰迤迳接，四顾无前后。

忆尝祇【承也】吏役，巨细悉经覩。

是时秋卉红，岭谷堆纈【结纈彩为文】绣。

林枯松鳞皴，山老石脊瘦。

断径履颓崖，孤泉声清溜。

深行得平川，古俗见耕耨。【锄田也。《孟子》：“深耕易耨。”】

涧荒惊麋【鹿属】奔，日出飞雉雊。

盘石屡欹眠，绿岩堪解绶。【解绶，用左思《招隐诗》“聊欲忘吾簪”意。】

幽寻叹独往，清兴思谁侑。【助也，酬也。】

其西乃三峡，嶮怪愈奇富。

江如自天倾，【一作‘泻’】岸立两崖斗。

黔巫望西属，越岭通南奏。【辘、湊同】

时时县楼对，云雾昏白昼。
荒烟下牢戍，百仞寒溪漱。
虾蟆喷水帘，甘液胜饮酎。
亦尝到黄牛，泊舟听猿狖。
巉巉起绝壁，苍翠非刻镂。
阴岩下攒丛，岫穴忽空透。
遥岑耸孤出，可爱欣欲就。
惟思得君诗，古健写奇秀。
今来会京师，车马逐尘瞽。
颓冠各白发，举酒无蒨【茜草，可染红色。】袖。
繁华不可慕，幽赏亦难遘。
徒为忆山吟，耳热助嘲诟。

①《居士集》目录：诗作于庆历元年（1041）。永叔时修《崇文总目》，年三十五。圣俞年四十。永叔以仁宗景祐三年（1036）出为峡州夷陵令。时年三十，十月至贬所。次年十二月移光化军乾德县令。

永叔有夷陵九咏：二《下牢溪》，三《虾蟆碚》，六《黄溪夜泊》，九《下牢津》。《下牢津》云：“依依下牢口，古戍郁嵯峨。入峡江渐曲，转滩山更多。”

哭曼卿

一作吊石曼卿①

嗟我识君晚，君时犹壮夫。
信哉天下奇，落落不可拘。

轩昂惧惊俗，自【一作“似”】隐酒之徒。

一饮不计斗，倾河竭昆墟②。

作诗几百篇，锦组联琼琚。

时时出险语，意外研精粗。

穷奇变云烟，搜怪蟠蛟鱼。

诗成多自写，笔法颜与虞。

旋弃不复惜，所存今几余。

往往落人间，藏之比明珠。

又好【一作“爱”】题屋壁，虹霓随卷舒。

遗踪处处在，余墨润不枯。【潘岳《悼亡》：“翰墨有余迹”】

胸山顷岁出③，我亦斥江湖。

乖离【一作“睽”】四五载，人事忽焉【一作“有”】殊。

归来见京师，心老貌已癯。

但惊何其衰，岂意今也无。【《论语·雍也》：哀公问弟子孰为好学。孔子对曰：“有颜回者，好学。……不幸短命死矣，今也则亡。”】

才高不少下，阔若与世疏。

骅骝当少时，其志万里涂，

一旦老伏枥，犹思玉山刍④。

天兵宿西北，狂儿尚稽诛⑤。

而今壮士死，痛惜无贤愚。

归魂涡上田，露草荒春芜⑥。

① 曼卿，名延年，宋州宋城人。仁宗康定二年（1041）卒，年四十八。欧《集》二十四有《石曼卿墓表》。据欧《集》目录，此诗作于庆历元年（1041），永叔年三十五。

《六一诗话》：石曼卿自少以诗酒豪放自得。其气貌伟然，诗格奇峭。又工于书，笔画遒劲，体兼颜、柳，为世所珍。余家尝得南唐后主澄心堂纸。曼卿为余以此纸书其《筹笔驿》诗。

② 陶渊明《语山海经十三首》之三：西南望昆墟。

③ 欧《石曼卿墓表》：通判海州，即朐山也。

④ 曹操《步出夏门行》之四：老骥伏枥，志在千里；烈士暮年，壮心不已。晋王敦每酒后，咏“老骥”四语，以如意打唾壶为节，壶边尽缺。见《晋书》本传。玉山，西王母所居。此用《穆天子传》。

⑤ 《宋史·仁宗纪》：是年，赵元昊屡寇边。

《墓表》：自契丹通中国，内外弛武，三十余年。曼卿上书言十事，不报。已而元昊反，西方用兵，始思其言。召见，稍用其说。籍河北、河东、陕西之民，得乡兵数十万。曼卿奉使籍兵河东。还，称旨。赐绯衣银鱼，天子方思尽其才，而且病矣。既而闻边将有欲以乡兵扞贼者。笑曰：“此得吾粗也。夫不教之兵，勇怯相杂。若怯者见敌而动，则勇者亦牵而溃矣。今或不暇教，不若募其敢行者，则人人皆胜兵也。”

⑥ 涡河经河南入安徽。

杜甫《送孔巢父谢病归游江东兼呈李白》诗：富贵何如草头露。

《墓表》：呜呼！曼卿宁自混以为高，不少屈以合世，可谓自重之士矣。若曼卿者，非徒与世难合，而不克所施，亦其不幸，不得至乎中寿，其命也夫！其可哀也夫！

水谷夜行寄子美、圣俞

水谷【水谷口，今河北定县。】夜行寄子美、圣俞①

【影元刊本云：“一本题上有‘补成’字”。】

寒【一作“晨”】鸡号荒林，山壁月倒挂。【伍，挂也】

披衣起视夜，【苏武诗：“征夫怀往路，起视夜何其。”】揽辔【《世说·德行篇》：“陈仲举（藩）……登车揽辔，有澄清天下之志。”】念行迈。【一作“遐”。《诗·王风·黍离》：“行迈靡靡。”】

我来夏云初，素节今已届。

高河泻长空，势落九州外。

微风动凉襟，晓气清余睡。【一作“色清余暖”】

缅怀京师友，文一作“有”酒邈一作“邀”高会。

其间苏与梅，二子可畏爱。用赵盾“夏日可畏，冬日可爱”语。

篇章富纵横，声价相磨一作“摩”盖。

子美气尤雄，万窍号一噫。《齐物论》：“夫大块噫气，其名为风。是唯无作，作则万窍怒号。”

有时肆颠狂，醉墨洒霏霏。

譬一作“势”如千里马，一作“足”已发不可杀。

盈前尽珠玑，一一难束通“拣”汰。

梅翁事清切，石齿漱寒濑。

作诗三十年，视我犹后一作“后犹无”辈。

文词愈清新，心意虽一作“难”老大。

譬如妖韶女，老自有余态。

近诗尤古硬，一作“淡”咀嚼苦难噉。

啮也初如食橄榄，真味久愈在。

苏豪以气轹，一作“烁”，一作“铄”。举世徒惊一作“尽”骇。

梅穷独我知，一作“我独奇” 古货今难卖。一作“今谁买”

二子双凤凰，百鸟之嘉瑞。

云烟“云烟”句谓子美一翱翔，羽翮一摧铄。

安得相从游，终日鸣啾啾。马铃声。《诗·小雅·采芣》：“鸞声啾啾”。

问胡一作“相问” 苦思之，对酒把一作“把酒对” 新蟹。

① 据目录，诗作于仁宗庆历四年（1044），永叔年三十八。

《年谱》：是年“四月……命公使河东，计度废麟州，及盗铸铁钱，并矾课亏额利害。七月，还京师。”

此论诗诗。以譬喻作品目，盖始于汉末之月旦评。尔后论诗评书论文，多用此体，今所谓印象批评也。

永叔有《苏氏文集序》，作于仁宗皇祐三年（1051），见《集》四十一。又有《湖州长史苏君舜钦墓志铭》，作于仁宗嘉祐元年（1056），见《集》三十一。

《六一诗话》：圣俞、子美，齐名于一时，而二家诗体特异。子美笔力豪隽，以超迈横绝为奇。圣俞覃思精微，以深远闲淡为意，各极其长。虽善论者，不能优劣也。余尝于《水谷夜行诗》略道其一二云：“子美气尤雄……古货今难卖。”语虽非工，谓粗得其仿佛。然不能优劣之也。

读《蟠桃诗》寄子美

读【一本有“圣俞”字】《蟠桃诗》寄子美①

韩孟于文词，两雄力相当。一本有“偶以怪自戏，作诗惊有唐”两句。篇章缀谈笑，雷电击幽荒。众鸟谁一作“不”敢和，鸣凤呼其凰。孟穷苦累累，《史记》：“（孔子）累累然如丧家之狗。”累累，衰悴貌。又扬雄《反骚》称屈原为“湘累。”韩富浩穰穰。《史记·淳于髡传》：五谷蕃熟，穰穰满家。”韩《进学解》：“作为文章，其书满家。”穷者啄其精，富者烂文章。发生一为宫，掀聚也，束也。

《后汉书》：“揪斂九藪之动物。”斂一为商。二律虽不同，合奏乃锵锵。天之产奇怪，希世不可常。寂寥一作“寞”二百年，至宝埋无光。郊死不为岛，圣俞发其藏。患世愈不出，孤吟夜号一作“号清”霜。霜寒入毛骨，清响哀一作“乃”愈长。玉山禾《太平御览》三十六引《山海经》：“（昆仑）上有木禾，长五寻，大五围。”鲍照诗：“诚不及青鸟，远食玉山禾。”难熟，终岁苦饥肠。我不能饱之，更欲不自量。引吭和其音，力尽犹勉强。一本有“嗟我于韩徒，足未及其墙，而子得孟骨，英灵空北邙”四句。“孤吟”句以下八语，皆从上文“凤凰”一喻来。诚知非所敌，但欲继前芳。近者蟠桃诗，有传来北方。发我哀病思，藹如得春阳。从“冬日可爱”断章取义，兼用“皆如挟纊”语意。欣然便欲和，洗砚坐中堂。墨笔不能下，怵怵一作“恍恍”若有亡。老鸡嘴爪硬，未易犯其场。不战先一本作“辄”自却，虽奔一作“然”未甘降。更一作“便”欲呼子美，子美隔涛江。其人虽憔悴，其志独轩一作“昂”昂。气力诚当对，胜败可交相。安得二子接，挥锋两交鋟。从上文“不战”来我亦愿助勇，鼓旗噪其旁。快哉天下乐，一觴饮酒尽也宜百觴。乖离难会合，此志何由偿。

① 目录：诗作于庆历五年（1045），永叔年三十九。是年八月，降知制诰，知滁州。十月，至郡。

今梅《集》无《蟠桃诗》，疑当时亦以新题为世所重，与《河豚》之作略同。永叔此诗，又见梅《集》二十四，盖误编也。

《邵氏闻见后录》：圣俞谓苏子美云：“永叔要作韩退之，强差我作孟郊。”虽戏语，亦似不平也。

梅《别后寄永叔》诗：荷公知我诗，数数形美述。兹道日未湮，可与古为匹。孟、卢、张、贾流，其言不相昵；或多穷苦语，或特事豪逸。而于韩公门，取之不一律。乃欲存此心，欲使名誉溢。窃比于老郊，深愧言过实。然于世道中，固且异谤嫉。交情有若此，始可论胶漆。（《宋诗钞》）

欧《太白戏圣俞》：（一作《读李白集效其体》）。下看（一作“视”，一作“堪笑”）区区郊与岛，萤飞露湿吟秋草。（《宋诗钞》）

《王直方诗话》：刘壮舆云：欧阳公自谓“吾畏慕不可及者，圣俞、子美。”及赠诗云：“文会忝予盟，诗坛推子将。”又曰：“维诗于文章，泰山一浮尘。”既曰：“郊死不为岛，圣俞发其藏。”又曰：“堪笑区区郊与岛，萤飞露湿凝秋草。”是其自谓不如者，乃所以过之也。（《宋诗话辑佚》上）

啼鸟

穷山候至阳气生，百物如与时节争。官居荒凉草树密，撩乱红一作“乱红殷”紫开繁英。花深叶暗耀《诗钞》作“辉”，此从《集》本。朝日，日一作“一”暖众鸟皆嚶鸣。见《诗·小雅·伐木》鸟言我岂解尔意，绵蛮但爱声可听。写鸟声皆就其声之效用言之南窗睡多春正美，百舌未晓催天明。黄鹂颜色已可爱，舌端哑咤如娇婴。竹林静啼一作“啼尽”青竹笋，深处不见惟闻声。陂田绕郭白水满，戴胜布谷也谷谷催春耕。谁谓鸣鸠拙无用，雄雌各自知阴晴。雨声萧萧泥滑滑，草深苔绿无人行。独有花上提葫芦，劝我沽酒花前倾。其余百种各嘲哢，嘲哢见《琵琶行》异乡殊俗难知名。我遭谗口《诗·小雅·十月之交》：“谗口嚣嚣。”“我遭谗口”句以下，翻用《琵琶行》“我从去年辞帝京，……如听仙乐耳暂明”一节意境。身落此，每闻巧舌宜可憎。春到山城苦寂寞，把盏常恨无娉婷。花开一作“间”鸟语辄自醉，醉与花鸟为交一作“友”朋。花能嫣然顾我笑，鸟劝我饮非无情。身间酒美惜光景，惟恐鸟散花飘零。可笑灵均楚泽畔，离骚憔悴愁独醒。

① 目录：诗作于仁宗庆历六年（1046），是年永叔年四十，自号醉翁。

《韵语阳秋》十六：人之悲喜，虽本于心，然亦生于境。心无系累，则对境不变，悲喜何从而入乎。欧阳永叔先在滁阳，有《啼鸟》一篇。意谓缘巧舌之人谪官，而今反爱其声。后考试崇政殿，又有《啼鸟》一篇，似反滁阳之咏。其曰：“提葫芦，不用沽美酒，宫壶日赐新拨醅，老病足以扶衰朽。百舌子，莫道泥滑滑。宫花正好愁雨来，暖日方催花乱发。”末章云：“可怜枕上五更听，不似滁州山里闻。”盖心有中外枯菀之不同，则对境之际，悲喜随之尔。啼鸟之声，夫岂有二哉。

梅有《和欧阳永叔啼鸟十八韵》云：南方穷山多野鸟，百种巧口乘春鸣。深林参天不见日，满壑呼啸谁识名；但依音响得其字，因与《尔雅》殊形声。我昔曾有《禽言诗》，粗究一二啼嚎情。苦竹冈头泥滑滑，君时最赏趣向精。余篇亦各有思致，恨未与尽众鸟评。君今山郡日无事，静听鸟语如交争。提壶相与来劝饮，戴胜亦助能劝耕。我念此鸟颇有益，如欲使君勤以行。劝耕幸且强职事，劝饮亦冀无独醒。杜鹃蜀魄哭归去，小人怀土慎勿听。城头春鸠自谓拙，鹊巢辄处安得平！高巢乔木美毛羽，哢吭叶底无如莺。口中调簧定何益？下啄蚯蚓孰曰清；自余多类不足数，一一推本烦神灵。我居中土别无鸟，老鸦鸛鸽方纵横。教雏叫噪日群集，岂有劝酒花下倾。愿君切莫怨啼鸟，啼鸟于君无所营。（《宋诗钞》）

梅有《禽言》四首，其四为《竹鸡》，云：“泥滑滑，苦竹冈。雨潇潇，马上郎。马蹄凌竞雨又急，此鸟为君应断肠。”其二为《提壶》，云：“提壶卢，沽美酒。风为宾，树为友。山花撩乱目前开，劝尔今朝千万寿。”其一其三为《子规》及《山鸟》，从略。（《宋诗钞》）

吴闿生《昭昧詹言评本》：诗有赋情。

菱溪大石

菱溪大【一本无“大”字】石①

新霜夜落秋水浅，有石露出寒溪垠。苔昏土蚀禽鸟啄，出没溪水秋复春。溪边老翁生长见，疑我来视何殷勤。爱之远徙向幽谷，曳以三犊载两轮。行穿城中罢市看，但惊可怪谁复珍。荒烟野草埋没久，洗以石窦清冷泉。朱栏绿竹相映掩，选一作“邀”致佳处当南轩。南轩旁列千万峰，曾未有此奇嶙峋。乃知异物世所少，万金争买传几人。山河百战变陵谷，何为落彼荒溪滨。山经地志不可究，遂令异说争纷纭。皆云女娲初锻炼，融结一气凝清纯。仰视苍苍补其缺，染此紺碧莹且温。或疑古者燧人氏，钻以出火为炮燔。苟非神圣亲手迹，不尔孔窍一作“穴”谁雕剜。又云汉使把汉节，汉使斥张骞。《汉书》本传：“（匈奴）留骞十余岁，予妻，有子，然骞持汉节不失。”西北万里穷昆仑。行经于阗得宝玉，流入中国随河源。沙磨水激自穿穴，所以镌凿无瑕疵。嗟予有口莫能辨，叹息但以两手扪。卢仝韩愈不在世，弹压百怪无雄文。韩诗：“百怪入我肠。”又《石鼓歌》：“少陵无人谪仙死，才薄将奈石鼓何！”争奇斗异各取胜，遂至荒诞无根原。天高地厚靡不有，一作“有定”丑好万状奚足论。惟当扫雪席其侧，日与嘉客陈清樽。

① 目录：诗作于庆历六年（1046）。永叔年四十。

② 《菱溪石记》：菱溪之石有六。其四为人取去；其一差小，而尤奇，亦藏民家；其最大者，偃然僵卧于溪侧，以其难徙，故得独存。每岁寒霜落，水涸而石出。溪旁人见其可怪，往往祀以为神。菱溪，按图与经皆不载。唐会昌中，刺史李漬为《苻溪记》云：“水出永阳岭，西经皇（一作“黄”）道山下。”以地求之，今无所谓苻溪者。询于滁州人。曰：此溪是也。杨行密有（一作“据”）淮南，淮人为讳其嫌名，以“苻”为“菱”。理或然也。溪旁若有遗址。云，故将刘金之宅，石即刘氏之物也。金伪（一作“为”）吴时贵将，与行密俱起合肥；号“三十六英雄”，金其一也。金本武夫悍（一作“骁”）卒，而乃能知爱赏奇异，为儿女子之（一作“所”）好。岂非遭逢乱世，功成志得，骄于富贵之佚欲而然耶？想其陂池台榭，奇木异草，与此石称，亦一时之盛哉！今刘氏之后散为编民，（一作“氓”）尚有居溪旁者。予感夫人物之废兴（一无此字），惜其可爱而（一有“反”字）弃也，乃以三牛曳置幽谷。又索其小者，得于白塔民朱氏。遂立于亭之南北。亭负城而近，以为滁人岁时嬉游之好。（《集》四十）

《丰乐亭记》：修既治滁之明年夏，始饮滁水而甘。问诸滁人，得于州（一作“城西”）南百步之近。其上丰山。……下则幽谷。……中有清泉。……于是疏泉凿石，阔地以为亭，而与滁人往游（一作“还”，一有“于”字）其间。滁于五代干戈之际，用武之地也。

《昭昧詹言》十二：从韩《赤藤杖》来，不如坡《雪浪石》。

“皆云”十四句，平叙中入奇，议以代写。吴评云：无甚奇意，颇嫌其繁。

韩《和虞部卢四汀酬钱七徽赤藤杖歌》：赤藤为杖世未窥，台郎始携自滇池。……途经百国皆莫识，君臣聚观透旌麾。共传滇神出水献，赤龙拔须血淋漓。又云羲和操火鞭，暝到西极睡所遗。

苏《次韵滕大夫三首》之一《雪浪石》：千峰石卷蠹牙帐，崩崖凿断开土门。竭来城下作飞石，一炮惊落天骄魂。承平百年烽隧冷，此物僵卧枯榆根。画师争摹雪浪势，天工不见雷斧痕。离堆四面绕江水，坐无蜀士谁与论？（王氏《集注分类东坡诗》八）

苏舜钦《和菱磎石歌》：滁州信至诧双石，云初得自菱水滨。长篇称夸语险绝，欲使来者不复言。画图突兀亦颇怪，张之屋壁惊心魂。麒麟才生头角异，混沌虽死窍凿存。琅琊之郡偏且僻，得此固可骇众观。予尝飞帆入震泽，穷探异境登龟鼃。（太湖二山名，最出怪石）居民百户石为业，日夜采琢山不贫。山前森列战白浪，犹似万百铁马群。雨昏浪打岁月古，千株万穴僵复奔。自嗟才力本衰弱，安敢抵敌为之文！况兹出产极易致，乡俗见惯不甚尊。彼以至少合贵重，胡为久弃如隐论？偶逢精识见奖拔，众目今乃称奇珍。百人拥持大车载，城市观走风涛翻。立于新亭而幽谷，共为澡刷泥沙痕。凉泉下照嘉树阴，翠影澄澹留烟云。褒以篇章绘缣素，积岁汨没一日伸。苟非高贤独赏激，终古弃卧于穷津。世人爱憎逐兴废，使我吟叹伤精神。（《宋诗钞》）

紫石屏歌

一本作“月石砚屏歌寄苏子美”①

月从海底来，行上天东南。正当天中时，下照千丈潭。潭心无风月不动，倒影射入紫石岩。月光水洁石莹净，一作“彻”感此阴魄来中潜。自从月入此石中，天有两曜分为三。清光万古不磨灭，天地至宝难藏缄。天公呼雷公，夜持巨斧堕《集》作“隳”崭岩。堕此一片落千仞，皎然寒镜一作“生”在玉奁。虾蟆白兔走天上，空留桂影犹杉杉。一作“毵毵”，毵，毛长貌。景山得之一作“虢州刺史”惜不得，赠我意与一作“比”千金兼。白云每到月满时，石在暗室光出檐。大哉天地间，万怪难悉谈。嗟予不度量，每事思穷探。欲将两耳目所及，而与造化争毫纤。煌煌三辰行，日月尤尊严。若令下与物为比，扰扰万类将谁瞻。不然此石竟何物，有口欲说嗟如钳。吾奇一作“知”苏子胸，罗列万象中包含。不惟胸宽胆亦大，屡出言语惊愚凡。自吾得此石，未见苏子心怀惭。不经老匠先指决，有手谁敢施镌鐫。刻文字于上也呼工画石持寄似，一作“此”幸子留意其无谦。此与前作，皆能用所谓持

久的想象者。永叔似恐创意太新，足以惊世骇俗，故两诗末幅，均以常理自衡其说；就诗论诗，实蛇足也。此篇涉及苏子美诸语，当是挑战的索和之意，亦未必真向其请益也。

① 目录：诗作于庆历七年（1047）。永叔年四十一。

《月石砚屏歌序》：张景山在虢州时，命治石桥小版。一石中有月形，石色紫而月白。月中有树森森然，其文黑，而枝叶老劲，虽世之工画者不能为。盖奇物也。景山南谪，留以遗予。予念此石古所未有，欲但书事，则惧不为信。因令善画工来，松（一作“摸”）写以为图。子美见之，当爱叹也。其月满，西旁微有不满处，正如十三四时。其树横生一枝外出。皆其实如此，不敢增损，贵可信也。（《外集》十五）

苏子美《永叔石月屏图》：日月行上天，下照万物根，向之生荣背则死，故为万物生死门。东西两交征，昼夜不暂停。胡为虢山石，留此皎月痕常存。桂树散疏阴，有若图画成？永叔得之不得晓，作歌使我穷其原。且疑月入此石中，分此两曜三处明。或云蟾兔好溪山，逃遁出月不可关；浮破穴石恣所乐，嫦娥孤坐初不觉。玉杵夜无声，无物来捣药；嫦娥惊推轮，下天自寻捉，绕地掀天踏山岳。二物惊奔不复见，留此玉轮之迹在青壁。风雨不可剥，此说亦诡异，予知未精确。物有无情自相感，不问幽微与高邈。老蚌向月月降胎，海犀望星星入角。彤霞烁石变灵砂，白虹贯岩生美璞。此乃西山石，久为月照着；岁久光不灭，遂有团团月。寒耀笼笼出轻雾，坐对不复嗟残缺。虾蟆纵汝恶嘴吻，可能食此清光没。玉川子若在，见必喜不彻。此虽隐石中，时有灵光发；土怪山鬼不敢近，照之僵仆肝脑裂。有如君上明，下烛万类无遁形，光艳百世无亏盈。（《宋诗钞》）

梅《读月石屏诗》：余观二人作诗论月石。月在天上，石在山下，安得石上有月迹！至矣欧阳公，知不可诘不竟述，欲使来者默自释。苏子苦豪迈，何用强引犀角蚌蛤巧辨析！犀蛤动活有情想，石无情想已非的。吾谓此石之迹虽似月，不能行天成纪历。曾无纤毫光，不若灯照夕。徒为顽璞一片圆，温润又不似圭璧。乃有桂树独扶疏，嫦娥玉兔了无觅。无此等物岂可灵，只以为屏安足惜！吾嗟才薄不复咏，略评二诗庶有益。（《宋诗钞》）

梅《和吴冲卿学士石屏》：吴夫子，佩银龟，乘天马，素怪奇。忽得虢略一片石，其中白色圆如规；又有树与鸟，画手虽妙何能为！吴乃持向欧阳公，比公曩获尤可疑。疑不为辨赋以诗，诗辞粲粲明星垂。复遣賁来使我和，坐上钜公旁睨之。范侯实有扬雄学，咸云此理难究推。我归洺虑反复思，义虽不经聊解颐：月与太阳和朔时，阳鸟飞上桂树枝，枝上作窠生群儿。人不知天公（疑“天公”下脱“知”字），天公欲俾世间见，影着石面如粘黣。鸟既不得去，月亦不可移。留为千古作好玩，慎勿倾朴同玉碑。（时在唐书局，与欧阳永叔、王元叔、范景仁会食，得所示诗

。)（《宋诗钞》）

王令《寒林石屏》：虢山之远数千里，虢石之重难将持。舟车虢来每苦重，釜盎尚弃不肯携。苟非世尚且奇怪，孰肯甚远载以来？何况虢人自珍秘，得一不换个琼瑰？流传中州盛称尚，主以诧客客见祈。世人贱真珍贵假，见者喜色留肤皮。（《宋诗钞》）

答原父

一作“答刘廷评”①

炎歊气上蒸也，热气也。郁然蒸，午景炽方焰。子来清风兴，萧萧一作“肃肃”吹几簟。又如沃琼浆，遽饮不知厌。嗟予学苦晚，白首困铅槧。铅，所以书；槧，木板。《西京杂记》：“扬雄怀铅提槧。”危疑奚一作“何”所质，孔孟久已窆。群儒窒自私，惟子通且贍。幸时丐赢余，屡得饱饥歉。严严一作“落落”春秋经，大法谁敢觐。一本有“譬犹天之苍，乃欲学而染”两句。三才失纲纪，一作“纪纲”五代极昏垫。《书》：“下民昏垫。”因水灾而昏惘下溺也。盗窃恣肱一作“发”篋，英雄争夺（奋）剑。兴亡两仓卒，事迹多遗欠。一作“贬”才能纪成败，岂暇诛奸僭。闻见患孤寡，一作“陋”是非谁证验。尝一作“常”欣同好恶，遂乞指瑕玷。反蒙华袞褒，《春秋序》：“一字所嘉，有同华袞之赠。”如誉嫫母黄帝第四妃艳。救非当在早，已暴一作“暴恶”何由敛。苟能哀废痼，何休著《公羊墨守》，《左氏膏肓》，《谷梁废疾》。郑玄著《发墨守》。其可惜针砭。风舲小船有窗牖者或许邀，湖绿方滟滟。

① 目录：诗作于仁宗皇祐二年（1050）。永叔年四十四。敞年三十二。

《年谱》：皇祐元年正月，自扬州移知颍州。乐西湖之胜，将卜居焉。四月，转礼部郎中。八月，复龙图阁直学士。二年七月，改知应天府，兼南京留守司事。是岁，约梅圣俞买田于颍。

永叔《集贤院学士刘公墓志铭》：公举庆历六年（1046）进士。中甲科。以大理评事通判蔡州。公于学博，自六经百氏，古今传记，下至天文地理，卜医数术，浮图、老庄之说，无所不通。其为文章，尤敏贍。熙宁元年（1068），卒，享年五十。有文集六十卷。其为《春秋》之说，曰《传》，曰《权衡》，曰《说例》，曰《文权》，（一无三字）曰《意林》，合四十一（一无此字）卷。又有《七经小传》五卷。而《七经小传》今盛行于学者。（《集》三十五）

《宋史·刘敞传》：欧阳修每于书有疑，折简来问，对其使挥笔答之，不停手。修服其博。长于《春秋》，为书四十卷行于时。

原作不见《三刘文集》。

梅《寄滁州欧阳永叔》：仲尼著《春秋》，贬骨尝苦答；后世各有史，善恶亦不遗。君能切体类，镜照嫫与施。直辞鬼胆惧，微文奸魄悲。不书儿女书，不作风月诗，唯存先王法，好丑无使疑。安求一时誉？当期千载知。（《宋诗钞》）

《丛书集成》本《公是集》九《观永叔五代史》：大均运元和，万物分一气；相杂以成文，自然故为贵。道衰三王末，议出百家沸。仲尼日月也，薄食为之既。《春秋》曰笔削，天地复经纬。大法初粲然，乱臣以为畏。微言迨秦汉，变雅从晋魏，逐末竞锥刀，浇淳玩花卉。安知述作本，庸识文章意？中间马与班，二子称仿佛。犹云崇货力，尚或排刚毅。才难乃其然，可以长歔歔。退之不为史，于道其犹未。胡为体明哲？曾是回怨诽？国典竟芜杂，唐风亦隐靡。陵夷九易姓，祸乱森如蝟。儒术骇中绝，斯民迟攸暨。纷纭混朱紫，清浊谁泾渭！龙飞真人出，虎变斯文蔚。天意晚有属，先生拔乎汇。是非原正始，简古斥辞费。哀善伤获麟，疾邪记有蜚。处心必至公，拨乱岂多讳。何必藏名山，端如避罗蔚？曰余仰炉冶，有意自剝荆；踵门投耒耜，假荫亲蔽芾。所望窥册府，无宁辱调飨。狂者实进取，日中固必隳。饮河虽非量，满腹尚自慰。演孔幸受经，居斋窃忘味。

盘车图

一作《和圣俞〈盘车图〉呈杨直讲》

【《唐书·艺文志》：董萼，字重照，开元人，画盘车图。】

浅山嶙嶙，乱石矗矗，山石硣磬同礲车碌碌。山势盘斜随涧谷，侧辙倾辕如欲复。出乎两崖之隘口，忽见百里之平陆。坡长坂峻牛力疲，天寒日暮人心速。杨褒一作“生”忍饥官太学，得钱买此才盈幅。爱其树老石硬，山回路转，高下曲直，横斜隐见，妍媸向背各有态，远近分毫皆可辨。自言昔一作“古”有数家笔，画古一作“久”传多名姓失。后来见者知谓谁，乞诗梅老聊称述。古画画意不画形，梅诗咏物无隐情。忘形得意知者寡，不若见诗如见画。乃知杨生真好奇，此画此诗兼有之。乐能自足乃为富，岂必金玉名高赀。朝看画，暮读诗，杨生得此可不饥。此杂言也。须留意诗中散文句。

① 目录：诗作于嘉祐元年（1056）。永叔年五十。是年在京师。

梅《观杨之美盘车图》：谷口长松叶老瘦，涧畔古树身枯高。土山惨淡远复远，坡路曲折盘车劳。二车回正辕接轡，继下三车来嶮嶙。过桥已有一乘歇，解牛离轭童可晒。黄衫乌巾驱举鞭，经险就易将及前。毂轮傍侧辐可数，蹄角搀错卷箱联。古丝昏晦三尺绢，画此当是展子虔。（展子虔，历仕北齐北周，入隋为朝散大夫，帐

内都督。善画，尤长人物山水。人物描法甚细，山水咫尺千里；画马亦入神。唐张彦远谓“展则车马为胜”。）坐中识别有公子，意思往往疑魏贤。（南唐时，京兆卫贤擅楼观殿宇、盘车水磨。）子虔与贤皆妙笔，观玩磨灭穷岁年。涂丹抹青尚欺俗，旱龙雨日犹卖钱。是亦可以秘，疑亦不可捐。为君题卷尾，愿君世世传。（《集》五十）

沈括《梦溪笔谈》十七：书画之妙，当以神会，难可以形器求也。谢赫云：“卫协之画，虽不该备形妙，而有气韵，凌跨群雄，旷代绝笔。”（南齐谢赫有《古画品录》。谓画有六法，以“气韵生动”居首。晋卫协作道释人物，冠绝当代。世目为画圣。）又欧文忠《盘车图》诗云：“古画……见画。”此真为识画也。

《王直方诗话》：文忠公《盘车图》诗云：“古画……见画。”东坡作《韩干画马图》诗云：“韩生画马真是马，苏子作诗如见画。世无伯乐亦无韩，此诗此画当谁看！”又云：“论画以形似，见与儿童邻。赋诗必此诗，定知非诗人。诗画本一律，天工与清新。”又云：“少陵翰墨无形画，韩干丹青不语诗，此画此诗今已矣，人间驽骥漫争驰。”余每诵数过，殆欲常以为法也。（《宋诗话辑佚》上）

葛常之《韵语阳秋》十四：欧阳文忠公诗云：“古画……见画。”东坡诗云：“论画……诗人。”或谓二公所论，不以形似，当画何物。曰，非谓画牛作马也，但以气韵为主尔。谢赫云：“卫协之画，虽不该备形妙，而有气韵，凌跨雄杰。”其此之谓乎！陈去非《墨梅》诗云：“含章檐下春风面，造化工成秋兔毫；意得不求颜色似，前身相马九方皋。”后之鉴画者，如得九方皋相马法，则善矣。

梅《和杨直讲夹竹花图》：从初李氏国破亡，图书散入公侯族。公侯三世多衰微，窥贸檐（担）头由婢仆。太学杨君固甚贫，直缘识别争来鬻。朝质终袍暮质琴，不忧明白铛无粥。（《宋诗钞》）

《昭昧詹言》十二：先写逆卷，题画老法。“爱其树老”五句删。

大弦声迟小声促

于刘功曹家，见杨直讲褒女奴弹琵琶，戏作呈圣俞①

【直讲，唐置，掌佐博士助教，以经术讲授。】

大弦声迟小声促，《琵琶行》：“大弦嘈嘈如急雨，小弦切切如私语。”十岁娇儿弹啄木。啄木不啄新生枝，惟啄槎牙一作“牙槎”枯树腹。花繁蔽日锁空园，树老参天杳深谷。不见啄木鸟，但闻啄木声。春风和暖百鸟语，山路谿确行人行。啄木飞从何处来，花间叶底时丁丁。林空山静啄愈响，行人举头飞鸟惊。一作“众鸟啁

嗽飞且惊”，行韵亦写声情，惊韵比中出比，故安石称之。娇儿身小指拨硬，功曹厅冷弦索鸣。繁声急节倾四坐，为尔饮尽黄金觥。杨君好雅心不俗，太学官卑饭脱粟。粗米仅脱麴壳。不精凿者。娇儿两幅青布裙，三脚木床坐调曲。奇书古画不论价，盛以锦囊一作“古锦裁囊”装玉轴。披图掩卷有时倦，卧听琵琶仰看屋。富弼上神宗手疏论王安石新政有“老臣无所告诉，但仰屋窃叹”语，见《宋史》本传。客来呼儿旋梳洗，满额花钿贴黄菊。虽然可爱眉目秀，无奈长饥头颈缩。宛陵诗翁勿谓渠，人生自足乃为娱，此儿此曲翁家无。

① 目录：诗作于嘉祐二年（1057）。永叔年五十一，在京师。

刘功曹，敞也。永叔为敞墓志，称其尝判尚书考功。（有和作，见《三刘文集》）

《韵语阳秋》十五：欧阳永叔《见杨直讲女奴弹琵琶》云：“娇儿两幅青布）裙…无奈长饥头项缩。”梅圣俞和篇亦云：“不肯那钱买珠翠，……他日求观龟壳缩。”亦可以想见风采矣。

韩愈《听颖师弹琴》：昵昵儿女语，恩怨相尔汝。划然变轩昂，勇士赴敌场。浮云柳絮无根蒂，天地阔远随飞扬。喧啾百鸟群，忽见孤凤凰。跻攀分寸不可上，失势一落千丈强。嗟余有两耳，未省听丝篴。自闻颖师弹，起坐在一旁，推手遽止之，湿衣泪滂滂。颖（师）尔诚能，无以冰炭置我肠！

《昭昧詹言》十二：闲谈可爱。起句点，次句冒写，以下只写此句。“娇儿身小”句束，横截作章法。收，入议。吴评云：欧诗时有词多之病。

刘敞奉同永叔《于刘功曹家听杨直讲女奴弹啄木见寄》之作：空林多风霜霰零，啄木朝饥悲长鸣，口虽能呼心不平。谁弹琵琶象其声，雌雄切直相丁宁，欲飞未飞皆有情。琵琶八十有四调，此曲独得传玄妙。翠鬟小女自绝殊，能承主欢供客娱。转关挥拨意淡如，坐人虽多旁若无。醉翁引觞不汝余，诗老弹铗归来乎。两君韵高尚如此，何况枥上之马渊中鱼。我生不晓世俗乐，倾卧江城更寂寞。中园有时闻啄木，虽有高下无宫角。木声犁然当人心，焱氏之风殆可学。渊明无弦非无意，白发秋来自少乐。得公新诗濯我愁，因问杨子更借不，我欲醉听江城楼。（《宋百家诗存·公是集》）

黄溪夜泊

楚人自古登临恨②，暂到愁肠已九回。万树苍烟三峡暗，杜甫《秋兴》之一：“玉露凋伤枫树林，巫山巫峡气萧森。”满川明月一猿哀。第四句翻用袁山松所记：“巴东三峡巫峡长，猿鸣三声泪沾裳”语意。非乡况复惊残岁，慰客偏宜把酒杯。行见江山一作“山河”。《唐书》：张说谪岳州，诗益凄惋。人谓得江山之助。且吟

咏，不因迁谪岂能来。元稹《以州宅夸于乐天》结云：“我是玉皇香案吏，谪居犹得住蓬莱。”李绅《新楼诗序》谓本是题壁诗，原作“我是玉京天上客。”

① 目录：诗作于仁宗景祐四年（1037）。永叔年三十一。去年降为峡州夷陵县令，十月到官。此《夷陵九咏》之六。

柳宗元有《游黄溪记》：谓是村名。

② 《楚辞·九辩》：悲哉，秋之为气也，登山临水送将归。坎廪兮，贫士失职而志不平。廓落兮，羁旅而无友生。惆怅兮而私自怜。

初至夷陵，答苏子美见寄

三峡倚崿嶢，同一作“南”迁地最遥。物华虽可爱，乡思独无聊。江水流青嶂，猿声在碧霄。野篁抽夏笋，丛橘长春条。未腊梅先发，经霜叶不凋。江云愁一作“悬”蔽日，山雾晦连朝。斫谷争收漆，梯林斗摘椒。花椒，落叶灌木，高丈许，山野自生。巴賁《风俗通》：“巴有賁人，剽勇。”《晋书音义》：“巴人呼赋为賁，因谓之賁人。”又賁布，麻质。船贾集，一作“巴江船贾至”蛮市酒旗招。时节同荆俗，民风载楚谣。俚歌一作“祠歌”成调笑，擦一作“祭”，一作“擦”。鬼聚喧嚣。夷陵之俗多淫奔，又好祠祭。每遇祠时，里民数百，共馐其余。里语谓之擦鬼。因此多成斗讼。得罪宜投裔，包羞分折腰。光阴催晏岁，牢落惨惊飙。白发新年出，朱颜异域销。县楼朝见虎，官舍夜闻鸮。寄信无秋雁，思归望斗杓。句本杜《秋兴》：“夔府孤城落日斜，每依北斗望京华。”须知千里梦，长绕洛川桥。末四语甚紧凑。乍读似冗，实不然。

① 目录：诗作于仁宗景祐三年（1036）。

《年谱》：是岁，永叔年三十。天章阁待制，权知开封府。范仲淹言事，忤宰相，落职，知饶州。永叔切责司谏高若讷。若讷以其书闻。五月，降为峡州夷陵县令。永叔自京师沿汴绝淮溯江，奉母夫人赴贬所。十月，至夷陵。

丁朝佐云：此卷《答苏子美见寄》云：“祭鬼聚喧嚣。”本注：“夷陵俗好祠祭。每遇祠时，里民数百，共馐其余。里俗谓之祭鬼。”诸本皆同。惟蜀本以“祭”为“擦”。朝佐按，《类篇》：擦，初葛切，挑取也，推也。有推食之义。蜀去峡近，故能知其方言。又吉州罗寺丞家京师旧本，亦作“擦”。按《集韵》：擦，桑葛切，散之也，有散福之义，二义皆通。今改作“擦一作‘擦’。”若作“祭”字，别无意义，本注岂应复言“里俗谓之祭鬼”也？

永叔《夷陵书事寄谢三舍人》：（一作“代书寄舍人三丈”）春秋楚国西偏境，陆

羽《茶经》第一州。紫箨青林长蔽日，绿丛红桔最宜秋。道涂处险人多负，邑屋临江俗善游。腊市渔（一作“鱼”）盐朝暂合，淫祠箫鼓岁无休。风鸣烧入空城响，雨恶江崩断岸流。月出行歌闻调笑，花开啼鸟乱钩辀。（一本有“讼庭画地通人语，邑政观风间俚讴。土俗虽轻人自乐，山川信美客偏愁”四句）黄牛峡口经新岁，白玉京中梦旧游。曾是洛阳花下客，欲夸风物向君羞。（《宋诗钞》）

又：《寄梅圣俞》：青（一作“春”）山四顾乱无涯，鸡犬萧条数百家。楚俗岁时多杂鬼，蛮乡言语不通华。绕城江急舟难泊，当县山高日易斜。击鼓踏歌成夜市，邀龟卜雨趁烧（一作“春”）畲。丛林白昼飞妖鸟，庭砌非时见异花。惟有山川为胜绝，寄人堪作画图夸。（《宋诗钞》）

招许主客

【唐宋有主客郎中，员外郎，为礼部之属司，掌诸蕃朝贡接待给赐之事。】

欲将何物招嘉客，惟有新秋一味凉。更一作“静”扫广庭宽一作“开”百亩，少容明月放一作“吐”清光②。楼头破鉴看将满，第五句是诗的结构，所谓倒战而出也。瓮面浮蛆酒面浮沫也拨已香。仍一作“更”约多为诗准备，共防梅老敌难当。

① 目录：诗作于庆历八年（1048）。永叔年四十二。是年闰正月，徙知扬州。二月，至郡。

《集》十一有《初至颍州西湖种瑞莲黄杨，寄淮南转运吕度支，发运许主客》一长律，末云：“每到最佳堪乐处，却思君共把芳卮。”

梅《年谱》：是年，为国子博士。是时，盖欲以君赐荣亲，且以刁氏归亲，遂买舟南还。时欧公守维扬，留宿进道堂论文，又咏永叔文石砚屏。（有《五月过高邮三沟》诗）

② 《宋诗菁华录》：按：“少容”若作“多容”，更佳；第七句“多”字可改。（“少”当同“稍”，非“多少”之“少”，字较“多”字婉曲；老人似不免千虑之失。）

病告中怀子华、原父

狂来有意与春争，老去心情渐不能。世味惟存诗淡泊，生涯半为病侵陵。花明晓日繁如锦，酒拨浮醅酒未漉也绿似渥。水名，在今山东。《左传》：“有酒如渥。”自是少年豪横过，而今痴钝若寒蝇。

① 目录：诗作于仁宗嘉祐四年（1059）。永叔年五十三。

《年谱》：是年二月，免开封，转给事中，同提举在京诸司库务。是月，充御试进士详定官。

韩绛，字子华，灵寿人（灵寿，今保定），庆历中进士。历翰林学士，御史中丞。

《集》五有《与子华、原父小饮，坐中寄同州江十学士休复》：（至和元年〔1054〕作）句云：幸有二三友，相与文字间。

《集》十二有《答子华舍人退朝小饮官舍》云：玉阶朝罢卷晨班，官舍相留一笑间。与世渐疏嗟已老（一作“缘老态”），得朋为乐偶偷闲。红笺搦管吟红药，绿酒盈樽舞绿鬟。自是风情年少事，多惭白发与苍颜。（至和二年〔1055〕作）

《宋诗纪事》十二有永叔《寄韩子华》一绝句。

《外集》三《送韩子华》：嗟我久不见韩子，如读古书思古人。子华笔力天马足，驽骀千百谁可群！嗟予老钝不自笑，尚欲疾走追其尘。子华有时高谈骇我听，荣枯万物移秋春。所以不见令我思，见之如饮玉醴醇。

书怀感事寄梅圣俞

相别始一岁，幽忧有百端。乃知一世中，少乐多悲患。平声每忆少年日，未知人事艰。颠狂无所阂，落魄去羁牵。落魄，失业无倚也。三月入洛阳，春深花未残。龙门翠郁郁，伊水清潺潺。逢君伊水畔，一见已开颜。不暇谒大尹，相携步香山。龙门山之东自兹愜所适，便若投山猿。幕府足文士，相公方好贤。希深好风骨，迥出风尘间。师鲁心磊落，高谈羲与轩。子渐口若讷，诵书坐千言。彦国善饮酒，百盏颜未丹。几道事闲远，风流如谢安。子聪作参军，常跨破虎鞞。马鞍具子野乃秃翁，戏弄时脱冠。次公才旷奇，王霸驰笔端。圣俞善吟哦，共嘲为阆仙。惟予号达老，醉必如张颠。唐张旭洛阳古郡邑，万户美风烟。荒凉见宫阙，表里壮河山。相将日无事，上马若鸿翩。出门尽垂柳，信步即名园。嫩箨筠竹肤之坚质粉暗，绿池萍锦翻。残花落酒面，飞絮拂归鞍。寻尽水与竹，忽去嵩峰巅。青苍缘万仞，杳蔼望三川。伊、洛、河也。花草窥涧窈，崎岖寻石泉。君吟倚树立，我醉欹云眠。子聪疑日月近，谓若手可攀。共题一三醉石，留在八仙坛。水云心已倦，归坐正杯盘。飞琼许氏，王母侍儿。鼓震灵之簧。见《汉武内传》。始十八，妖妙犹双环。寒篁暖凤觜，银甲调雁弦。自制白云曲，西王母《白云谣》云：“白云在天，山陵自出。”始送黄金船。珠帘卷明月，夜气如春烟。灯花弄粉色，酒红生脸莲。东堂榴花好，点缀裙腰鲜。插花云髻上，展簟绿荫前。乐事不可极，酣歌变为叹。平声诏书走东下，丞相惟演时为枢密使忽南迁。送之伊水头，相顾泪潸潸。腊月相公去，君

随赴春官。送君白马寺，独入东上门。故府谁同在，新年独未还。当时作此语，闻者已依然。诗系少作，故排偶多，音律谐，无刻琢之句。

① 目录：诗作于仁宗景祐元年（1034）。永叔年二十八。

《年谱》：是年三月，西京秩满，归襄城。五月，如京师。

梅《年谱》：仁宗明道二年（1033），除德兴令。本年三十三岁，为河南主簿。

《年谱》：仁宗天圣八年（1030），试礼部翰林学士。晏公（殊）知贡举。公复为第一。三月，御试崇正殿，公甲科第十四名。五月，授将仕郎，试秘书省校书郎，充西京留守推官。（推官，唐置，为节度、观察两使之僚属。其后诸州皆置。亦曰军事推官。宋沿其制。）九年（1031）三月，公至西京。钱文僖公（惟演）为留守，幕府多名士。（《宋史》钱传：仁宗即位，拜枢密使。嗣加同中书门下平章事。天圣八年，判河南府。再改泰宁军节度使。泰宁在今福建境。）与尹（洙）师鲁、梅（圣俞）尧臣尤善，日为古文歌诗。遂以文章名冠天下。明道元年（1032），是春及秋，两游嵩岳。

《外集》一有《七交》七首，作于天圣九年。《尹书记》云：师鲁天下才，神锋凛豪俊。逸骥卧秋枥，意在騤騤迅。平居弄翰墨，挥洒不停瞬。谈笑帝王略，驱驰古今论。良工正求玉，片石胡为韞。《杨户曹》云：子聪江山稟，弱岁擅奇誉。盱衡恣文辩，落笔妙言语。胡为冉冉趋，三十滞公府。美璞思善价，浮云有夷路。大雅恶速成，俟命宜希古。《梅主簿》云：圣俞翘楚才，乃是东南秀，玉山高岑岑，映我觉形陋。离骚喻草香，诗人识鸟兽。城中争拥鼻，欲学不能就。平日礼文贤，宁久滞奔走。《王秀才》云：几道颜之徒，沈深务覃圣。采藻荐良璧，文润相辉映，入市羊驾车，谈道犀为柄。时时一文出，往往纸价盛。无为恋丘樊，遂滞蒲轮聘。《自叙》云：余本漫浪者，兹亦漫为官。胡然类鸱夷，托载随车辕！时士不俯眉，默默谁与言？赖有洛中俊，日许相跻攀。饮德醉醇酎，袭馨佩春兰。平时罢军檄，文酒聊相欢。

《集》二十八有《尹师鲁墓志铭》云：有兄源，字子渐，亦以文学知名。

《外集》十四有《尹源字子渐序》。（原字子渊，永叔为改之）苏子美有《尹子渐哀辞》。（《宋诗钞》）

富弼，字彦国，河南人。

《集》二十七有《张子野（先）墓志铭》（仁宗康定元年〔1040〕作）云：初，天圣九年，予为西京留守推官。是时陈郡谢希深，南阳张尧夫，与吾子野尚皆无恙。

于时一府之士，皆魁杰贤豪。日相往来，饮酒歌呼，上下角逐，争相先后，以为笑乐。而尧夫、子野退然其间，不动声气，众皆指为长者。予时尚少，心壮志得，以为洛阳东西之冲，贤豪所聚者多，为适然尔。其后去洛来京师，南走夷陵并江汉，其行万三四千里。山阻水崖，穷居独游，思从曩人，邈不可得。然虽洛人，至今皆以谓无如向时之盛。然后知世之贤豪不常聚，而交游之难得为可惜也。……子野为人，外虽愉怡，中自刻苦。遇人浑浑不见圭角，而志守端直，临事敢决。平居酒半，脱冠垂头，童然秃且白矣。予固已悲其早衰。而遂止于此，岂其中亦有不自得者耶？

张先，乌程人，天圣二年进士，官至秘书丞。工词，与柳永齐名。有弟充，见永叔所为墓志。诗中《次公》疑即指充。

杨杰，字次公，无为军人，嘉祐四年进士。是《宋诗纪事》二十二。

魏泰《东轩笔录》：钱文僖公晚年以使相留守西京。官属皆一时文士，游宴吟咏，未尝不同。洛下多水竹奇花，凡园囿之胜，无不到者。

眼有黑花，戏书自遣

【此亦小题大作一例，以花字为枢纽。题曰“戏书”，故不嫌小方耳。】

洛阳三见牡丹月，春醉往往眠人家。扬州一遇芍药时，夜饮不觉生朝霞。天下名花惟有此，樽前乐事更无加。如今白首春风里，病眼何须厌黑花。王禹偁表：“早年多病，眼有黑花。晚岁多忧，头生白发。”

① 目录：诗作于仁宗皇祐元年（1049）。永叔年四十三。

《年谱》：是年正月，自扬州移知颍州。二月，至郡，乐西湖之胜，将卜居焉。四月，转礼部郎中。八月，复龙图阁直学士。

首句谓天圣九年至明道二年（1032—1034）为西京留守推官时事；次句谓庆历八年（1048）知扬州时事。

《集》二《洛阳牡丹图》（庆历二年作）：洛阳地脉花最宜，牡丹尤为天下奇。…当时绝品可数者，“魏红”窈窕“姚黄”妃。

《集》七《谢观文王尚书惠西京牡丹》：（举正）……谓我尝为洛阳客，颇向此花曾涉猎。忆昔进士初登科，始事相公治吏牒。河南官属尽贤俊，洛城池（一为“苑”）簪相连接。我时年才二十余，每到花开如峡蝶。“姚黄”“魏红”腰带鞶，“

泼墨”齐头藏绿叶；“鹤翎”添色又其次，此外虽妍犹婢妾。念昔逢花必沽酒，起坐欢呼屡倾榼。而今得酒复何为？爱花绕之空百匝。（嘉祐三年〔1058〕作）

王安石

王安石，字介甫，临川属抚州人。后居金陵，亦号半山。登进士上第。签书淮南判官。再调知鄞县，通判舒州。召试馆职，不就；用为群牧判官。知常州，移提点江东刑狱。嘉祐三年（1058）入为度支判官。俄直集贤院。明年，同修起居注，知制诰，纠察在京刑狱。以母忧去。终英宗世，召不起。神宗为太子时，闻其名。即位，命知江宁府。数月，召为翰林学士兼侍讲。熙宁二年（1069），拜参知政事。变行新法，天下骚然。罢为观文殿大学士，知江宁府。再起为相，屡谢病。又罢为镇南今安徽怀宁节度使，同平章事，判江宁府。改集禧观使。封舒国公。元丰三年（1080），复拜左仆射，观文殿大学士。换特进。改封于荆。哲宗加司空。卒。赠太傅，谥曰文，配食孔庙，追封舒王。南渡后，始罢从祀。以上《宋史》本传安石少以意气自许，故诗语惟其所向，不复更为涵蓄。后从宋次道尽假唐人诗集博观而约取，晚年始悟深婉不迫之趣。以上《石林诗话》。其下云：“乃知文字虽工拙有定限，然亦必视初壮。虽此公，方其未至时，亦不能力强而遽至也。”然其精严深刻，皆步骤老杜所得。而论者谓其有工致，无悲壮，读之久，则令人笔拘而格退。余以为不然。安石遣情世外，其悲壮即寓闲淡之中。独是议论过多，亦是一病尔。

清蔡上翔《王荆公年谱考略》，杨希闵节要，并推论：（燕京大学排印本）先生生于真宗天禧五年（1021），卒于哲宗元祐元年（1086），年六十六（《宋史》本传作六十八）。（张元济影印元大德本〔母逢辰刊〕《王荆公诗注》，有桐庐詹大和甄老谱。）

明朱国桢《涌幢小品》：荆公生于临江（今江西清江县）。

《邵氏闻见录》：傅献简公云：“王荆公之生也，有獾入其室，俄失所在。故小字獾郎。”

《摊饭续谈》：王荆公初字介卿，见曾子固《怀友诗》。

宋周辉《清波杂志》：萧注字岩夫，临江新喻人。熙宁中上殿奏对罢，上问：“今臣僚孰贵？”曰：“文彦博。”又问其次，曰：“韩琦。”又问：“王安石何如？”注曰：“牛形人任重而道远。”……（又）曰：“安石牛耳虎头，视物如射；意行直前，敢当天下大事。”（宋张舜民《画墁录》亦载此）

宋佚名《道山清话》：黄庭坚尝言：“人心动则目动，王介甫终日目不停转。”

清褚人获《坚瓠集》：王介甫乃进贤（属南昌府）饶氏之甥，锐志读书。舅党以介甫肤理如蛇皮，目之曰：“行货亦欲求售耶？”介甫寻举进士，以诗寄之曰：“世人莫笑老蛇皮，已化龙鳞衣锦归。传语进贤饶八舅，如今行货正当时。”

《邵氏闻见录》：神宗尝问文定（张方平）识王安石否？曰：“安石视臣，大父行也。臣见其大父曰，安石发未卯，衣短褐巾，身疮疥，役洒扫事，一苍头耳。”故荆公亦不敢与之争辨。

《宋史》本传，安石少好读书，一过目终身不忘。其属文，动笔如飞，初若不经意；既成，见者皆服其精妙。友生曾巩携以示欧阳修。修为之延誉。擢进士上第。

《邵氏闻见录》：韩魏公知扬州，王荆公初及第，为金判。每读书达旦，略假寐，日已高；急上府，多不及盥漱。魏公见荆公少年，疑夜饮放逸。一日，从容谓荆公曰：“君少年，无废书，不可自弃。”荆公不答。退而言曰：“韩公非知我者。”

宋彭乘《墨客挥犀》：舒王性酷嗜书。虽寝食间，手不释卷，昼或宴居默坐，研究经旨。知常州，对客语，未尝有笑容。一日，大会宾佐，倡优在庭。公忽大笑。人颇怪之。乃共呼优人厚遗之，曰：“汝之艺，能使太守开颜，可赏也。”有一人窃疑公笑不由此，乘间启公，公曰：“畴日席上偶思《咸》、《常》二卦，豁悟微旨，自喜有得，故不觉发笑耳。”

《石林燕语》：王荆公性不善缘饰，经岁不洗沐。衣服虽敝，亦不浣濯。与吴冲卿同为群牧判官。时韩持国在馆中。三数人尤厚善，无日不过从。因相约每一两月，即相率洗沐定力院，家各更出新衣，为荆公番。号“拆洗王介甫”。公出浴，见新衣，辄服之，亦不问所从来也。

《东轩笔录》：吕惠卿尝语荆公曰：“公面有‘䵟’，用园葵洗之，当去。”荆公曰：“吾面黑耳，非‘䵟’也。”吕曰：“园葵亦能去黑。”荆公笑曰：“天生黑于予，园葵其如予何！”

《梦溪笔谈》：公面黧黑。门人以问医，医曰：“此垢污，非黑也。”进澡豆，令公颧面。公曰：“天生黑于予，澡豆其如予何！”

《观林诗话》：涪翁跋半山书云：今世唯王荆公字得古人法。自杨虚白以来，一人而已。今金陵定林寺壁，荆公书数百字，未见赏音者。

《石林燕语》：唐人初未有押字，但草书其名，以为私记，故号花书。韦陟五云体是也。余见唐诰书名，未见一楷字。今人押字，或多押名，犹是此意。王荆公押“石”字，初横一画，左引脚，中为一圈。公性急，作圈多不圆，往往窝匾，而收横画，又多带过。尝有密议公押“歹”字者。公知之，加意作圈。一日，书杨蟠差遣勅，作圈复不圆。乃以浓墨涂去，别作一圈。盖欲矫言者。杨氏至今藏此勅。

《邵氏闻见录》：安石虽高科有文学（于杨寔榜下第四人及第，见《默记》），本

远人，未为中朝士夫所服。乃深交韩、吕二家兄弟。韩、吕，朝廷之巨室也；天下之士不出于韩，即出于吕。韩氏兄弟，子华与安石同年高科。持国学术尤高，大臣荐入馆。吕晦叔亦与安石同年进士。子华、持国、晦叔争扬于朝，安石之名始盛。又结一时名德，如司马君实辈，皆相善。先是治平间，神宗为颖王，持国翊善。（翊善，官名。宋时太子亲王皆置翊善，以资讲授。）每讲经义，神宗称善。持国曰：“非某之说，某友王安石之说。”至神宗即位，乃召安石，以至大用。

《韵语阳秋》十三：晋谢安居金陵之冶城。洎废，李太白尝营园其上，赋诗云：“冶城访古迹，犹有谢安墩。梧桐识佳木，蕙草留芳根。”（吴旦生《历代诗话》五十七《金陵旧事》载谢公墩在冶城之尾。冶城本吴王夫差冶铸处。《世说》：王右军与谢太傅共登冶城。谢悠然远想，有高世之志。故名谢公墩。李太白将营园其上，故作诗云：“冶城访古迹，犹有谢公墩。”）后为王荆公之居。公为诗曰：“我名公字偶相同，我屋公墩在眼中。公去我来墩属我，不应墩姓尚随公。”至于叙其所居草木，则又有诗云：“千枚孙峯阳，万本母淇澳。满门陶令株，弥岸韩侯蕝。跳鳞出重锦，舞羽堕软玉。”此等句抑可以想象其林峦之盛。今复为瓦砾之场矣，可胜叹哉！（《谢安墩》二首见《文集》二十八，其二云：“谢公陈迹自难追，山月淮云只往时。一去可怜终不返，暮年垂泪对桓伊。”）

《避暑录语》：王荆公不耐静坐，非卧即行。晚居钟山谢公墩。自山距城适相半，谓之半山。尝畜一驴。每旦食罢，必一至钟山，纵步山间。倦则叩定林寺而卧。往往至日昃乃归。有不及终往，亦必跨驴半道而还。

《闻见近录》：王荆公领观使，归金陵，居钟山下。出即乘驴。余尝谒之，既退，见其乘驴而出，一卒牵之而行。问其指使，“相公何之？”指使曰：“若牵卒在前听牵卒；若牵卒在后，即听驰矣。或相公欲止则止，或坐松石之下，或田野耕凿之家，或入寺。随行未尝无书。或乘而诵之，或憩而诵之，仍以囊盛饼数十枚。相公食罢，即遣牵卒；牵卒之余，即饲驴矣。或田野间人持饭饮献者，亦为食之。盖初无定所，或数步复归，近于无心者也。”

宋陈岩肖《庚溪诗话》：王荆公介甫辞相位，退居金陵。日游钟山，脱去世故，平生不以势利为务。当时少有及之者。然其诗曰：“穰侯老擅关中事，长恐诸侯客子来。我亦暮年专一壑，每逢车马便惊猜。”既以丘壑存心，则外物去来，任之可也，何惊猜之有？是知此老胸中尚蒂芥也。如陶渊明则不然。曰：“结庐在人境，而无车马喧。”“问君何能尔，心远地自偏。”然则寄心于远，则虽在人境，而车马亦不能喧之。心有蒂芥，则虽擅一壑，而逢车马，亦不免惊猜也。

《石林诗话》：大抵荆公阅唐诗多，于去取之间，用意尤精。观《百家诗选》可见也。

《邵氏闻见录》：晁以道言：荆公与宋次道同为群牧司判官。次道家多唐人诗集。荆公尽假其本，择善者签贴其上，令吏抄之。吏厌书字多，辄移荆公所取长篇签置所不取小诗人。荆公不复更视。唐人众诗集，以经荆公去取皆废。今世所谓《唐百家诗选》曰荆公定者，乃群牧司吏人定也。

《石林诗话》：王荆公编《百家诗选》，尝从宋次道借本。中间有“暝色赴春愁”，次道改“赴”字作“起”字。荆公复定为“赴”字，以语次道曰：“若是‘起’字，人谁不能到？”次道以为然。（王士禛《论诗绝句》原注唐人《晚渡伊水》诗首句）

《诗人玉屑》十七：山谷云：“荆公暮年作小诗，雅丽精绝，脱去流俗；每讽味之，便觉沆瀣生牙颊间。”

《后山诗话》：诗欲其好，则不能好矣。王介甫以工，苏子瞻以新，黄鲁直以奇。而子美之诗，奇常、工易、新陈，莫不好也。

《王直方诗话》：陈无己云：“荆公晚年诗伤工。”

《石林诗话》：王荆公晚年诗律尤精严，造语用字，间不容发，然意与言会，言随意遣，浑然天成，殆不见有牵率排比处。

又：荆公诗用法甚严，尤精于对偶。

《艇斋诗话》：荆公诗及四六，法度甚严。汤进之丞相尝云：“经对经，史对史，释氏事对释氏事，道家事对道家事。”此说甚然。

《诚斋诗话》：五七字绝句，最少而最难工，虽作者，亦难得四句全好者。晚唐人与介甫最工于此。然鲜有四句全好者。

曾季狸《艇斋诗话》：绝句之妙，唐则杜牧之，本朝则荆公，此二人而已。

又：东湖（徐俯）云：“荆公绝句妙天下。”

《诗薮》外五：介甫五七言绝，当代共推；特以工致胜耳，于唐自远。五言“南浦随花去，回舟路已迷。暗香无处觅，日落画桥西。”颇近六朝。至七言诸绝，宋调全出，实苏、黄前导也。

《诗薮》：凡唐绝高者，大类汉人古诗，调极和平而格绝高。宋诸人绝句，议论俳谑者，既不必言；间有一二佳者，非音节失之浅促，则气象过于轩举。其有语意通

近者，又格调萎葳卑弱，仅作晚唐耳。

《诗薮》外五：六一虽洗削“西昆”，然体尚平正，特不甚当行耳。推轂梅尧臣诗，亦自具眼。至介甫创撰新奇，唐人格调始一大变。苏、黄继起，古法荡然。

又：欧视王，才颇宏而调杂；王视欧，格颇正而调偏。

贺黄公《载酒园诗话》：读临川诗，常令人寻绎于语言之外，当其绝诣，实自可兴可观，不惟于古人无愧而已。特推为宋诗中第一。其最妙者在乐府，五言古，七言律次之，七言古又次之；五言律，稍厌安排，七言律尤嫌气盛，然佳篇亦时在也。

《昭昧詹言》十二：向谓欧公思深，今读半山，其思深妙，更过于欧。学诗不从此入，皆粗才浮气俗子也。用意深，用笔布置逆顺深，章法疏密，伸缩裁剪，有阔达之境，眼孔心胸大，不迫猝浅陋易尽。如此乃为作家，而用字，取材，造句可法。半山有才而不深，欧公深而才短。

庄蔚心《宋诗研究》：诸人只称其小诗为工；但荆公的古诗，也是造语瑰丽，有典有则，大有力回万牛的气象。自有宋以来，能够各体俱工的，就要算他第一了。袁子才诗笔粗俗，素不赞美荆公，讥其凿险缁幽，自堕魔障。但于他“近无船舫犹闻笛，远有楼台只见灯”一联，则极为低首赞叹，以为常人所不能及。

《石林诗话》：薛肇明（昂）后被旨编公集。

南宋李壁《王荆公诗注》五十卷，有张元济影印元大德母逢辰刊本。又清乾隆张宗松清绮斋刊本。

魏鹤山《李石林临川诗注序》（元大德本此序）：石林于其丰容有余之辞，简婉不迫之趣，既各随义发明，若博文强志，瘦词险韵，则又为之证辨钩析，俾览者得以开卷瞭然。然公之学亦时有专己之癖焉；石林于此盖未始随声是非也。

《困学纪闻》翁注：屠继序按：李仁甫四子屋、塾、壁、墓俱有名。

壁字季章，号雁湖居士，登进士第，官参知政事。附和侂冑，以致丧师辱国。其人不足重。

荆公才较爽健，而情韵幽深，不逮欧公。三公皆从韩出，而雄奇排奭皆逊之。可见二公虽各用力于韩，而随才之成就，只得如此。

半山本学韩公，今当参以摩诘。此旨世人不解。

游土山示蔡天启秘校

定林瞰土山②，近乃在眉睫。谁谓秦淮广，正可藏一艓。朝予欲独往，扶惫强登涉。蔡侯闻之喜，喜色见两颊。呼鞍追我马，亦以两黥挟。《史记·范睢传》：“坐须贾于堂下，置莖豆其前，令两黥徒夹而马食之。”敛书付衣囊，裹饭随药笈。脩羽敝也阿兰若，远离处，闲静处。土木老山胁。鼓钟卧空旷，簞簞乐器所悬横曰簞，植曰簞。雕捷业。业，大版也。所以饰簞为悬也。捷业如锯齿，或曰画之。升堂廓无主，考考，击也。击谁敢辄。坡陀坡，陂字通。谢公冢，藏棹久穿劫③。百金买酒地④，野老今行馐。饷田食缅怀起东山，胜践此稠叠。于时国累卵，楚夏血常喋⑤。喋，《汉书·文纪》：颜师古注：“本字当作蹀，蹀谓履涉之耳。”外外谓苻坚，中谓桓温，高云。实备艰梗，中仍费调燮⑥。公能觉如梦，自喻一蝴蝶。见《庄子·齐物论》：“自喻适志。”桓温适自毙，苻坚方天厌。且可缓九锡，宁当快一捷。彼哉斗筭人，得丧易矜怯。妄言屐齿折，见《晋书·谢安传》吾欲刊史牒。伤心新城隤⑦，隤，土圯。归意终难愜。漂摇五城舟⑧，尚想浮河楫。千秋陇东月⑨，长照西州喋⑩。岂无华屋处，亦捉蒲葵箑⑪。刘禹锡《金陵怀古》：“淮水东边旧时月，夜深还过女墙来。”碎金凉可惜⑫，零落随秋叶。好事所传玩，空残法书帖⑬。清谈眇不嗣⑭，陈迹恍如接。东阳故侯孙⑮，少小同鼓篋⑯。一官初岭海⑰，仰视飞鸢跼⑱。穷归放款段，高卧停远蹀。蹀，蹈也。牵襟肘即见，著帽耳才掀⑲。掀，指按也，按，亦作压，意同。数椽危败屋，为我炊陈浥。湿也虽无膏污鼎，尚有羹濡箴⑳。纵言及平生，相视开笑靥。邯郸枕上事，且饮且田猎㉑。此用《诗·北山》句法。或昏眠委翳，或妄走超躐。或叫号而寤，或哭泣而魔。幸哉同圣时，田里老安帖。易牛以宝剑㉒，击壤胜弹铗。追怜衰晋末，此土方岌岌㉓。强偷须臾乐，抚事终愁蹀。惧貌予虽天戮民㉔，有械无接糒㉕。翁今贫而静，内热非复叶㉖。予衰极今岁，恍与鸡梦协㉗。委蜕亦何恨，吾儿已长鬣。《玉篇》：“长须也。”《左传》昭七年：“使长鬣者相。”此指次子雱。雱卒于熙宁九年，介甫年五十六。翁虽齿长我，未见白可镊。祝翁尚难老，生理归善摄。久留畏年少，讥我两咕噉。附耳小语也束火扶路还，宵明《拾遗记》：“北日明之国来贡其方物。有宵明草，夜视如列烛，昼则无光，自消灭也。”狐兔慑。蔡侯雄俊士，心憭形亦谍㉘。异时能飞鞚，马勒快若五陵侠㉙。胡为阡陌间，跼足仅相蹶㉚。谅欲交讐语，呿予不能嚼㉛。

①《年谱》：诗作于元丰元年（1078）至元丰三年（1080）间，元丰三年，介甫年六十。

查慎行《初日庵诗评》：“彼哉斗筭人”十八句，如读老杜《八哀诗》“幸哉同学时”八句，开阖极动宕，又极沈着。

《太平寰宇记》：江南东道升州上元县，土山，在县南三十里。按《丹阳记》：晋

太傅谢安旧隐会稽东山，因筑象之；无岩石，故谓土山也。有林木台观娱游之所。

《宋史·文苑传》：蔡肇，字天启，润州丹阳人，能为文，最长歌诗，初事王安石，见器重。又从苏轼游，声誉益显。第进士。

《宋史·职官志》：秘书省秘阁置直阁，以朝官充；校理，以京朝官充，掌缮写秘阁所藏。

《王直方诗话》：夏畸道言：蔡天启初见荆公，坐间偶言及卢仝《月蚀》诗，人难有诵得者。天启诵之终篇，遂为荆公所知。（李壁注引）

《石林诗话》：蔡天启云：荆公每称老杜“钩帘宿鹭起，丸药流莺啖”之句，以为用意高妙，五字之模楷。他日，公作诗，得“青山扞虱坐，黄鸟挟书眠”。自谓不减杜语，以为得意，然不能举全篇。

又：王荆公在钟山，有马甚恶，啼啮不可近，一日，两校牵至庭下，告公，请鬻之。蔡天启时在坐，曰：“世安有不调之马！第久不骑，骄耳。”即起，捉其驥一跃而上，不用衔勒，驰数十里而还。荆公大壮之，即作集句诗赠天启，所谓“蔡子勇成癖，能骑生马驹”者。后又有“身着青衫骑恶马，日行三百尚嫌迟。心源落落堪为将，却是君王未备知。”士大夫盛传荆公以将帅之材许天启。绍圣初，章申公当国，首欲进天启侍从。会执政有不悦者，乃出为永兴军路提举常平。因欲稍迁为帅。会丁内艰，不果。犹是荆公遗意也。

周紫芝《竹坡诗话》：王荆公作集句，得“江州司马青衫湿”之句。欲以全句作对，久而未得。一日，问蔡天启“江州司马青衫湿”可对甚句？天启应声曰：“何不对‘梨园子弟白发新’？”公大喜。

《艇斋诗话》谓蔡天启能暗诵韩文公《南山》诗，见知荆公。

介甫《成字说后，与曲江谭君（揆）丹阳蔡君（肇）同游齐安》诗（《集》二十九）有云：久苦诸君共此劳。

②李注：定林有上、下二寺。按《建康实录》：“上定林寺，宋元嘉十六年禅师竺法秀造。”在下定林寺之后。乾道（孝宗）间，僧善鉴重建下定林寺，在蒋山宝公塔西北。按，《塔寺记》：“宋元嘉元年，又置下定林寺，东去县一十五里。”

③高步瀛《唐宋诗举要》：《舆地纪胜》曰：“建康府：谢安墓在上元县东十里石子冈北。”《陈始兴王叔陵传》：“晋世王公贵人，多葬梅岭。及叔陵所生母彭氏卒，启求梅岭，乃发故太傅谢安旧墓，弃去安柩，以藏其母。”

④ 又：《晋书·谢安传》曰：又于土山营墅，楼馆竹林甚盛。每携中外子侄，往来游集。肴饌亦屡费百金。

⑤ 李注：庾翼病，表子爰之行荆州刺史，委以后任。何充曰：“桓温英略过人，有文武器干，西夏之任，无出桓温者。”观此则西夏即荆州之地。

⑥ 《唐宋诗举要》：《谢安传》曰：简文帝疾笃，桓温上疏，荐安宜受顾命。及帝崩，温入赴山陵。止新亭，大陈兵卫，将移晋室。呼安及王坦之，欲于坐害之。坦之甚惧，问计于安。安神色不变，曰：“晋祚存亡，在此一行！”既见温，坦之流汗沾衣，倒执手板。安从容就席，坐定，谓温曰：“安闻诸侯有道，守在四邻，明公何须壁后置人邪？”温笑曰：“正自不能不尔耳。”遂笑语移日。及温病笃，讽朝廷加九锡。使袁宏具草。安见辄改之，由是历旬不就，会温薨，锡命遂寝。

⑦ 又：《谢安传》曰：时会稽王道子专权，而奸谄颇相扇构。安出镇广陵之步丘，筑垒曰新城以避之。帝出祖于西池，献觞赋诗焉。安虽受朝寄，然东山之志，始末不渝，每形于颜色。及镇新城，尽金而行，造泛海之装。欲须经略粗定，自江道还东，雅志未就，遂遇疾笃。上疏清量宜旋旆。遂还都。闻当舆入西州门，自以本志不遂，深自慨失。又曰：新城筑埭于城北。后人追思之，名为召伯埭。

⑧ 李注：唐德宗时，浙江观察使韩滉于石头筑五城。五城即石城，冶城，台城，苑城，新城。

⑨ 《唐宋诗举要》：陇，垄之通借字，盖谓丘垄。以对下“西州”，或用“垄东”相配耳。

⑩ 又：《谢安传》曰：羊昙者，太山人，知名士也，为安所爱重。安薨后，辍乐弥年，行不由西州路。尝因石头大醉，扶路唱乐，不觉至州门。左右白曰：“此西州门。”昙悲感不已，以马策扣扉，诵曹子建诗曰：“生存华屋处，零落归山丘！”恸哭而去。

(11) 又：《谢安传》曰：安少有盛名，时多爱慕，乡人有罢中宿县者，还诣安。安问其归资，答曰：“有蒲葵扇五万。”安乃取其中者捉之。京师士庶竞市，价增数倍。

(12) 又：《谢安传》曰：桓温尝以安所作《简文帝谥议》，以示坐宾曰：“此谢安石碎金也。”

(13) 又：《谢安传》曰：安善行书。张怀瓘《书断》曰：安石隶、行、草并入妙。李注：阁帖中亦有公尺牋。

(14) 又：《谢安传》曰：尝与王羲之登冶城，羲之谓曰：“今四郊多垒，宜思自效；而虚谈废务，浮文妨要，恐非当今所宜。”安曰：“秦任商鞅，二世而亡，岂清言致患邪！”

(15) 又：“东阳故侯孙”，疑谓沈道原也。《梁书·沈约传》曰：“隆昌元年出为宁朔将军，东阳太守。梁高祖受禅，为尚书仆射，封建昌县侯。”故以为况。曾子固《仁寿县太君吴氏墓志铭》曰：“七子者，曰安仁、安道、安石、安国、安世、安礼、安上；女三人，长适沙县张奎，次适天长朱明之，次适扬州沈季长。”道原盖季长字也。介甫《疟起示道原诗》，李注曰：“道原姓沈，公之妹婿。”按：介甫又有《定林示道原》、《对棋与道原至草堂寺》、《同沈道原游八功德水》等诗，则此同游者为道原可知矣。

(16) 又：《礼记·学记》曰：入学鼓箠。郑注曰：鼓箠，击鼓警众，乃发箠出所治经业也。

(17) 又：韩退之《潮州刺史谢上表》曰：“岭海之阨。”按：岭谓五岭，海谓南海；唐之岭南道，宋之广南路也。

(18) 又：《后汉书·马援传》曰：援从容谓官属曰：“吾从弟少游常哀吾慷慨多大志，曰：‘士生一世，但取衣食裁足，乘下泽车，御款段马，为郡掾史，守坟墓，乡里称善人，斯可矣。致求盈余，但自苦耳。’当吾在浪泊、西里间，虏未灭之时，下潦上雾，毒气重蒸，仰视飞鸢跼跼堕水中。卧念少游平生时语，何可得也！”李贤注曰：款犹缓也，言形段迟缓也。跼跼，堕貌也。

(19) 李注：唐代宗时，禁民皂衫擗耳帽，以余官健。

(20) 《唐宋诗举要》：《曲礼》上曰：“羹之有菜者用挾。”郑注曰：挾犹箸也。今人或谓箸为挾提。《释文》曰：《字林》作策，云“箸也”。

1; 又：《庄子·齐物论》曰：梦饮酒者旦而哭泣，梦哭泣者旦而田猎。

2; 又：《汉书·循吏·龚遂传》曰：为渤海太守。民有带持刀剑者，使卖剑买牛，卖刀买犊。

3; 又：《广韵·三十三业》曰：岌岌，山貌。按：此犹言岌岌，危也。

4; 又：《庄子·大宗师》：丘（孔子），天之戮民也。郭注：是知进而不知退，则性命丧矣。《德充符》：天刑之，安可解乎！（无趾论孔子语）

5; 又：《庄子·在宥》曰：吾未知圣智之不为桤杨接榴也。司马（彪）云：接榴，桤楔。《释文》引崔（譔）注：桤桤梁也。

6; 又：《庄子·人间世》：叶公子高曰：“今吾朝受命而夕饮冰，我其内热欤？”（谓孔子语。受命，受命使齐也。）《释文》曰：叶公子高（叶音掇），楚大夫，为叶县尹，僭称公。

7; 又：《谢安传》曰：怅然谓所亲曰：“昔桓温在时，吾常惧不全。忽梦乘温舆，行十六里，见一白鸡而止。乘温舆者，代其位也。十六里止，今十六年矣。白鸡主西，今太岁在西，吾命殆不起乎？”寻薨。年六十六。（谢安卒于太元十年乙酉，介甫生于辛酉，故引白鸡事。）

8; 又：《说文》：僚，慧也。《庄子·列御寇》曰：形谍成光。郭注曰：举动便解而成光仪也。

9; 又：《汉书·游侠·原涉传》曰：郡国诸豪及长安五陵诸为气节者，皆归慕之。颜曰：五陵谓长陵、安陵、阳陵、茂陵、平陵也。

11; 又：《庄子·秋水》曰：公孙龙曰：“口呿而不合。”（公孙龙闻魏牟论庄子语：“口呿而不合，舌举而不下，乃逸而走。”）呿，司马云：开也。《天运篇》：孔子曰：“予口张而不能嚼。”（孔子见老聃：“予何规老聃哉。”下一语，归谓弟子。）《释文》曰：嚼，合也。

《唐宋诗举要》：吴先生（闳生）曰：著“鸡梦”一语，则前文凭吊谢公，皆以自况。此点睛法也。

又：奇险兀傲，韩公嗣音。

又：此诗之韵，凡三用之，而此首尤胜。（《再用前韵寄蔡天启》见《宋诗钞》及《集》二，《用前韵戏赠叶致远直讲》见《集》二，赠叶诗全咏围棋。

介甫《谢公墩》诗：走马白下门，投鞭谢公墩，昔人不可见，故物尚或存。问樵樵不知，问牧牧不言。摩挲苍苔石，点检屐齿痕。想此絺长檣，想此倚短辕，想此玩云月，狼藉盘与樽。井径亦已没，漫然禾黍村。摧藏羊昙骨，放浪李白魂，亦已同山丘，缅怀蒨兰荪。小草戏陈迹，甘棠咏遗恩；万事付鬼箴，耻荣何足论！天机自开阖，人理孰畔援？公色无惧喜，恍知福祸根。涕泪对桓伊，暮年无乃昏！（《宋诗钞》）

介甫又有《谢安》诗云：谢公才业自超群，误长清谈助世纷。秦晋区区等亡国，可

能王衍胜商君！（《韵语阳秋》八。）

又：《再用前韵寄蔡天启》诗：蔡侯东方来，取友无所挟；翛翛一囊衣，偶以一书笈。定林朝自炊，有匕或无筴；时时羹事藿，镬大苦难爨。骄顽遂敢侮，有甚观骈胁。淡然山谷中，变色未尝辄。始见类欺魄，寒暄粗酬接；从容与之语，烂漫无不涉。奇经可治疾，秘祝可解魔，巫医之所知，瞽史之所业，载车必百两，独以方寸摄。微言归易悟，疾若髭赴镊。天机信卓越，学等何足躐！纵谈及既往，每与唐许协。扬雄尚汉儒，韩愈真秦侠。好大人谓狂，知微乃如谍。惟初造文字，人惑鬼愁慑。秦愚既改“罪”，新眊仍易“叠”。六书遂失旨，隶草矜敏捷。谁珍坛山刻！共赏兰亭帖。东京一祭酒，收拾偶予愜。少尝妄思索，老懒因退怯。侯方习篆籀，寸管静尝握。深原道德意，助我耕且猎。昔功恐唐捐，异味今得馐。京师媚学子，追师尝劫劫；陆羸淮汴粮，水僦湖海艘。远求而近遗，如目不见睫。伪凤易悦楚，真龙反惊叶。闻予再三叹，往往心不厌。或自逸而走，或怯而不嗜；或嗤无郎漫，或訾白翁噉。铄金徒欲消，韞玉岂愁浥？贤愚有定分，咄汝无喋喋！跨鞍随我游，曳屣联我跼。照泉浥清泚，跂石缘嵬嶭；东坡数儵鱼，西崦追蛱蝶；翳林窥搏黍，藉草听批颊；黄寻远莲须，红阅邻杏靥。荏苒光景流，杨园忽无叶。扶病归未久，吾见喜宁帖；褰裳告我去，禄仕当随牒。萧晨秣款段，归骑得追蹶；谓言循东路，复出西域牒。行矣忍羁旅，无鱼勿弹铗。天闲久索骥，骏足方腾蹶；长驱勿骄矜，小踬亦勿慄。鹏飞九万里，勿借风一箴。溟波浩难穷，勉自养鳞鬣。爵禄实天械，功名为接□。宁能复与我，摇漾秦淮楫！附书勿辞频，隔岁期满篋！（《宋诗钞》）

沈辽有《德相送荆公三诗用元韵戏为之》，《德相所示论书聊复戏酬》，《德相惠新茶复次前韵奉谢》。（见《云巢诗钞》，《宋诗钞》）

明妃曲二首

明妃初出汉宫时，泪湿春风鬓脚垂。沈约诗：“聊承云鬓垂。”李贺诗：“弹琴看文君，春风吹鬓影。”低徊顾影无颜色，尚得君王不自持。此作联处似断，用笔甚健。归来却怪丹青手，入眼平生几曾有。意态由来画不成，当时枉杀毛延寿。“低徊”二句，吴闳生《古今诗约选》：“深文曲致。”“当时”句，吴云：“用意高绝。”全诗，吴云：“矜炼深雄，远胜欧公。”《昭昧詹言》十二：“归来二字掷。”一去心知更不归，可怜着尽汉官衣。寄声欲问塞南事，只有年年鸿雁飞。吴闳生：《古今诗约选》：《汉书·苏武传》：“教使者谓单于言，天子射上林中，得雁，足有系帛书，言武等在某泽中。”家人万里传消息，好在毡城莫相忆。君不见咫尺长门闭阿娇，人生失意无南北。

明妃初嫁与胡儿，毡车百两皆胡姬。含情欲说独无处，传与琵琶心自知。黄金捍拨春风手，《旧唐书·音乐志》：“旧琵琶皆以木拨弹之。太宗贞观，始有手弹之法

。”又《礼乐志》：“高丽伎琵琶以蛇皮为槽，厚寸余，有鳞甲。楸木为面，而象牙为捍拨。”一捍拨当弦，所以护之。查慎行《诗评》：“亦是一说，却未有人道。”弹看飞鸿劝胡酒。李注：“意不在胡。”嵇康《赠秀才入军诗》：“目送飞鸿，手挥五弦；俯仰自得，游心泰玄。”汉宫侍女暗垂泪，沙上行人却回首。汉恩自浅胡自深，人生乐在相知心。“乐莫乐兮新相知”，见《楚辞》。上句“悲莫悲兮生别离。”可怜青冢已芜没，尚有哀弦留至今。

①《年谱》：诗作于仁宗嘉祐四年（1059）。介甫年三十九，提点江西刑狱。

《后汉书·南匈奴传》：昭君字嫱（《前汉书·元帝纪》作墙），南郡人也。（李贤注：《前书》曰：“南郡秭归人。”）初，元帝时以良家子选人掖庭。时呼韩邪来朝。帝敕以宫女五人赐之。昭君入宫数岁，不得见御，积悲怨，乃请掖庭令求行。呼韩邪临辞，大会。帝召五女以示之，昭君丰容靓饰，光明汉宫；顾景裴回，竦动左右。帝见，大惊；意欲留之，而难以失信，遂与匈奴。生二子。及呼韩邪死，其前阏氏子代立，欲妻之。昭君上书求归。成帝敕令从胡俗。遂复为后单于阏氏焉。

《前书·匈奴传》：归王昭君，号宁胡阏氏。生一男。复株鞮单于复妻王昭君，生二女。

闻人倓《古诗笺》：王嫱报元帝书：“南望汉关，徒增怆结。有父有弟，望陛下幸少怜之。”

《汉书》：元帝后宫既众，乃令画工图之。欲有呼者，辄披图召之，其中常者，悉行货赂。王昭君姿容甚丽，志不可苟求。工遂毁其状。后匈奴来和，求美女于帝，帝以昭君充行。既召见而惜之。名字已去，不欲中改。于是遂行。

《琴操》：王昭君者，齐国王襄女也。年十七，献元帝。（《文选》石季伦《王明君词》注引）

《西京杂记》上：元帝后宫既多，不得常见，乃使画工图其形，按图召幸。诸宫人皆赂画工，多者十万，少者亦不减五万，独王嫱自恃容貌，不肯与。工人乃丑图之。遂不得见。后匈奴入朝，求美人为阏氏。于是上按图，以昭君行。及去，召见，貌为后宫第一，善应对，举止娴雅。帝悔之，而名籍已定，方重信于外国。故不复更人。乃穷案其事，画工尽弃市；籍其家资，皆巨万。

又：上以昭君行。及去，召见，貌为后宫第一，帝悔之，穷案其事，画工韩延寿弃市。

又：画工有杜陵毛延寿，为人形，丑好老少，必得其真。

《乐府古题要解》：天子穷究其事，画工杜陵毛延寿，安陵陈敞，新丰刘白、龚宽，下杜阳望、樊青，皆同日弃市，籍其资财。

《汉书·西域传》：武帝元封中，遣江都王建女细君为公主，以妻乌孙昆莫。

《乐府古题要解》：汉人怜昭君远嫁，为作歌诗。石崇有妓曰绿竹，善歌舞；以此曲教之，而自制《王明君歌》，其文悲雅。《唐宋诗举要》三据此谓：是所谓琵琶怨曲，皆后人所拟，非其自为矣。

《琴操》：王昭君，齐国王穰女，端正娴丽。年十七，献之元帝。元帝以地远不之幸，以备后宫，积五六年，帝每游后宫，昭君常怨不出。后单于遣使朝贺，帝宴之，尽召后宫，昭君乃盛饰而至。帝问欲以一女赐单于，谁能行者，昭君乃越席请往。时单于使在旁，帝惊恨不及。昭君至匈奴，单于大悦。昭君恨帝始不见遇，乃作怨思之歌。单于死，子世达立。昭君谓之曰：“为胡者妻母，为秦者更娶。”世达曰：“欲作胡礼。”昭君乃吞药而死。

石崇《王明君词》并序：王明君者，本是王昭君，以触文帝讳，改焉。匈奴盛，请婚于汉元帝。以后宫良家子昭君配焉。昔公主嫁乌孙，令琵琶马上作乐，以慰其道路之思。其送明君，亦必尔也。其造新曲，多哀怨之声，故叙之于纸云尔。诗云：“我本汉家子，将适单于庭。辞诀未及终，前驱已抗旌。仆御涕流离，辕马悲且鸣。哀郁伤五内，泣泪湿朱缨。行行日已远，遂造匈奴城。延我于穹庐，加我阏氏名。殊类非所安，虽贵非所荣。父子见陵辱，对之惭且惊。报身良不易，默默以苟生。苟生亦何聊，积思常愤盈。愿假飞鸿翼，乘之以遐征，飞鸿不我顾，伫立以屏营。昔为匣中玉，今为粪上英。朝华不足欢，甘与秋草并。传语后世人，远嫁难为情。”（《文选》二十七）

傅玄《琵琶赋序》：《世本》不载作者。故老云：汉送乌孙公主，念其行道思慕，使知音者于马上作之。

黄鲁直跋第一首，引王深父（回）语谓：孔子曰：“夷狄之有君，不如诸夏之亡也。”“人生失意”句非是。李注：黄以“子欲居九夷”解之。

李注：引范冲对高宗语谓：“诗人多作《明妃曲》，以失身胡虏为无穷之恨。安石则曰：‘汉恩自浅胡自深，人生乐在相知心。’然则刘豫不是罪过，汉恩浅而虏恩深也。孟子曰：‘无父无君，是禽兽也。’以胡虏有恩，而遂忘君父，非禽兽而何！”公语意固非；然诗人务一时为新奇，求出前人所未到，而不知其言之失也。

蔡上翔谓冲为祖禹之子。祖禹于元祐中以与修《神宗实录》获罪。

黄生《载酒园诗话》评：王介甫《明妃曲》二篇，诗犹可观，然意在翻案，如“家人（至）南北”。其后篇益甚。故遭人弹射不已。至高季迪长篇，则翻案愈奇。结句曰：“妾语还凭归使传，妾身没虏不须怜。愿君莫杀毛延寿，留画商岩梦里贤。”意则正矣。有此事否？恐终是文人之语，非儿女子之言也。余因思此题终不及储光羲“胡王知妾不胜悲，乐府皆传汉国词。朝来马上箜篌引，稍似宫中闲夜时。”大都诗贵入情，不须立异。后人欲求胜古人，遂愈不如古耳。

《宋诗菁华录》：“低徊”二句，言汉帝之犹有眼力，胜于神宗。“意态”句言人不易知。“可怜”句用意忠厚。末言君恩之不可恃。“汉恩”二句即“与我善者为善人”意；本普通公理，说得太露耳。二诗荆公自己写照之最显者。

欧阳修《明妃曲和王介甫作》：胡人以鞍马为家，射猎为俗。（李白《战城南》：胡人以杀戮为耕作。）泉甘草美无常处，鸟惊兽骇争驰逐。谁将汉女嫁胡儿？风沙无情貌如玉。身行不遇中国人，马上自作思归曲。推手为琵却手琶，胡人共听亦咨嗟。玉颜流落死天涯，琵琶却传来汉家。汉宫争按新声谱。遗恨已深声更苦。纤纤女手出洞房，学得琵琶不下堂；不识黄云出塞路，岂知此声能断肠！（《释名·释乐器》：批把本出于胡中，马上所鼓也。推手前曰批，引手却曰把，象其鼓时，固以为也。《类聚·乐部》四，引批把作琵琶。《古今诗约选》玉韵下云：“感叹深至。”肠韵下云：“寄托甚高。”姚姜坞曰：“后四句颇具唐人风趣。”方东树曰：“恩深，无一处是恒人胸臆中所有。”又曰：“以后一层作起，谁将句逆入明妃，玉颜二句逆入琵琶。收四语又用他人逆衬，所以为思深笔曲也。”）

又：再和《明妃曲》：汉宫有佳（一作“美”）人，天子初未识。一朝随汉使，远嫁单于国。绝色天下无，一失难再得；（首六语用李延年歌及白居易《长恨歌》语意）虽能杀画工，于事竟何益！耳目所及尚如此，万里安能制夷狄！汉计诚已拙，女色难自夸；明妃去时泪，洒向枝上花。狂风日暮起，飘泊落谁家。红颜胜人多薄命，莫怨东风当自嗟。（同上）

司马光和王介甫《明妃曲》：胡雏上马唱胡歌，锦车已驾白橐驼。明妃挥泪辞汉主，汉主伤心知奈何！宫门铜环双兽面，回首何时复来见。自嗟不若住巫山，布袖蒿簪嫁乡县。万里寒沙草木稀，居延塞外使人归；旧来相识更无物，只有云边秋雁飞。愁坐冷冷调四弦，曲终掩面向胡天；侍儿不解汉家语，指下哀声犹可传，传遍胡人到中土，万一他年流乐府；妾身生死知不归，妾意终期寤人主。目前美丑良易知，咫尺掖庭犹可欺。君不见白头萧太傅，被谗仰药更无疑。（《集》三）（刘敞有《同永叔和介甫昭君曲》，见《公是集》十八）

《石林诗话》中：昆陵张子厚善书。余尝于其家见欧阳文忠子棐以乌丝栏绢一轴，

求子厚书文忠《明妃曲》两篇，《庐山高》一篇。略云：先君平日未尝矜大所为文。一日，被酒，语棐曰：“吾诗《庐山高》今人莫能为，唯太白能之；《明妃曲》后篇，太白不能为，唯杜子美能之；至于前篇，则子美亦不能为，唯吾能之也。”

《唐宋诗举要》三：叔弼托永叔之言，谓杜子美亦不能为，因为过情之誉，黄山谷跋介甫此篇，谓可与李翰林、王右丞并驱争先，亦不免溢美。平心而论，实皆不失为佳构。永叔《再和明妃曲》云：“耳目所及尚如此，万里安能制夷狄！”议论既庸腐，词亦质直少味。介甫后篇云：“汉恩自浅胡自深，人生乐在相知心。”持论乖戾。范元长（冲）对高宗论此诗，直斥为坏人心术，无父无君。（李注引）虽不免深文周内，然亦物腐虫生，偏激之论，有以致之。李雁湖曰：“诗人务一时为新奇，求出前人所未道，而不知其言之失也。”可谓持平之论也。

介甫《明妃曲》：我本汉家子，早入深宫里。远嫁单于国，憔悴无复理。穹庐为室毡为墙，胡尘暗天道路长。去住彼此无消息，明明汉月空相识。死生难有却回身，不忍回看旧写真。玉颜不是黄金少，爱把丹青错画人。朝为汉宫妃，暮作胡地妾。（一作“今日汉宫妃，明朝胡地妾。”）独留青冢向黄昏，颜色如花命如叶。（《文集》三十六集句）

送程公辟守洪州

【李注本作“之豫章”】

画船插帜摇秋光，鸣铙梁简文帝《南郊颂序》：“鸣铙韵响。”传一作“伐”鼓《后汉书·南匈奴传》：“鸣钟传鼓于清渭之上。”《诗·采芣》：“铎人伐鼓。”水洋洋。豫章太守吴郡郎②，行指斗牛先过乡③。乡人出郭航酒浆，炰鳖脍鱼《诗·六月》：“炰鳖脍鲤”。炊稻梁。茭头肥大菱腰长，醕酬喧呼坐满床④。怪君三年滞《文集》作“寓”瞿塘⑤，又驱传马登太行⑥。纓旄脱尽归大梁⑦，翻然出走天南疆。九江左投贡与章⑧，扬澜吹漂浩无旁。老蛟戏水风助狂，盘涡忽坼千丈强⑨。《古诗笺》：“船帜铙鼓，言太守仪卫之盛。”《江赋》：“盘涡谷转。”君闻此语悲慨慷，迎吏乃前持一觞。鄱州历选多俊《文集》作《儒》良，镇抚时有诸侯王⑩。拂天高阁朱鸟翔⑪，西山蟠绕鳞鬣苍⑫。下视城堑真金汤⑬，雄楼杰屋郁相望。中户尚有千金藏，漂田《古诗笺》：“漂田，水田也。”种秔秔，稻之不粘而晚熟者，俗作粳。出穰穰⑭。《史记·淳于髡传》：“穰穰满家。”《诗》：“丰年穰穰。”沉檀珠犀杂万商，大舟如山起牙樯，一本无此句。杜甫《城西坡泛舟诗》：“春风自信牙樯动。”输泻交广流荆扬⑮。轻裙利屣列名倡⑯，春风踏谣能断肠⑰。平湖湾坞烟渺茫，树石珍怪花草香，幽处往往闻笙簧。地灵人秀古所藏⑱，胜兵可使酒可尝⑲。十州将吏随低昂⑳，谈笑指麾回雨旻㉑。非君才高力方刚㉒，岂能跨《文集》作“得”有此一方，无为听客欲沾裳。《水经注·江水》引《宜都记》：“巴东三峡巫峡长，猿鸣三声泪沾裳。”使君谢吏趣治装，

我行乐矣未渠央㉓。

① 据李注，诗当作于嘉祐七年（1062），介甫年四十二。《宋史·循吏传》：程师孟，字公辟，吴人，进士甲科。（《文集》八十一有《答程公辟议亲书》，盖以侄女聘小辟子。）累知南康军楚州。提点夔路刑狱。泸戎数犯渝州边。使者治所在万州，相去远，有警率浹日乃至。师孟奏徙于渝。夔部无常平粟，建请置仓。适凶岁，振民不足，即矫发他储，不俟报。吏惧，白不可。师孟曰：“必俟报，饥者尽死矣！”竟发之，徙河东路，为度支判官。知洪州。积石为堤，浚沟揭闸。无水患。

李注：公辟入为三司判官，刑部郎中，出知洪州。时嘉祐七年五月。

② 《太平寰宇记》：江南西路洪州，汉为豫章郡。

《元丰九域志》：江南西路洪州豫章郡，镇南军节度治南昌、新建二县。

《汉书·地理志》：吴地，斗分野也。今之会稽、九江、丹阳、豫章、庐江、广陵、六安、临淮郡，尽吴分也。

③ 王勃《滕王阁诗序》：龙光射牛斗之墟。

④ 韩愈《陆浑山火》诗：熙熙醕酬笑语言。

⑤ 《太平寰宇记》：瞿塘，在夔州东一里。连崖千丈，奔流电激，舟人为之恐惧。

⑥ 《礼记·玉藻》：士曰传遽之臣。郑注：传遽，以车马给使者也。

《太平寰宇记》：河东道泽州晋城县：太行山在县南三十六里。河北道怀河内县：太行山在县北二十五里。

⑦ 《汉书·苏武传》：武仗汉节，卧起操持，节旄尽落。

《太平寰宇记》：河南道开封府（原注曰：今理开封、浚仪二县）战国时为魏都。《史记·魏世家》云：“魏惠王自安邑徙都大梁。”即今西面浚仪县故城是也。

⑧ 《尚书·孔传》：江于此分为九道。

《水经·赣水篇》酈注引刘澄之曰：县东有章水，西有贡水。县治二水之间，合“赣”字，因以名县焉。《太平寰宇记》引《虔州图经》：章、贡二水合流为赣。其间置邑，因为赣县。

⑨ 韩愈《听颖师弹琴》诗：失势一落千丈强。

⑩ 李注：诸侯王谓滕王（元膺）。本朝太宗第六子元偓，亦尝为镇南节度、洪州管内观察处置等使。

(11) 王文考《鲁灵光殿赋》：朱鸟舒翼以峙衡。

王勃《登洪州滕王阁饯别序》：层台耸翠，上出重霄。飞阁翔丹，下临无地。

(12) 李注：柳子厚《马退山茅亭记》：“是山岑然起于莽苍之中，亘数百里。尾蟠荒陬，首注大溪。”亦言鳞鬣之类。

(13) 《汉书·蒯通传》：“皆为金城汤池。”洪州州城之西为大江，大江之外为西山。西山特高，虽隔江，下视州城如金汤。

(14) 《唐宋诗举要》三：漂田殆即葑田也。《农书》（卷上）曰：若深水藪泽，则有葑田。以木缚为田丘，浮系水面，以葑泥附木架上而种艺之。其木架田丘，随水高下浮泛，自不澹溺。

(15) 又：《古诗为焦仲卿妻作》曰：“交、广市鲑珍。”按：交州，后汉置。三国吴分立广州，而徙交州治龙编县。五代时自立为国。宋初内附，封交趾郡王。宋广南路广州，治南海、番禺二县。

《禹贡》：荆及衡阳惟荆州。又：淮海惟扬州。

(16) 《史记·货殖传》：赵女郑姬，揄长袂，蹑利屣。

(17) 《唐宋诗举要》三：李白：“踏谣，踏歌也。”按：《乐府诗集》卷八十二有崔液、谢偃、张说《踏歌词》，刘禹锡《踏歌行》。

(18) 王勃《登洪州滕王阁饯别序》：人杰地灵。

(19) 《世说新语·捷悟篇》注引《南徐州记》：徐州人多劲悍，号精兵。故桓温常曰：“京口酒可饮，箕可用，兵可使。”

(20) 《唐宋诗举要》三：《元丰九域志》：江南西路州六（洪、虔、吉、袁、抚、筠），军四（兴国、南安、临江、建昌）。诗曰十州，盖统州军而言。

㉑ 杜甫《奉寄章十侍御》诗：指挥能事回天地，训练强兵动鬼神。

《尚书·洪范》曰：曰雨曰暘。

《诗·北山》：膂力方刚，经营四方。

《诗·庭燎》郑笺：夜未央犹言夜未渠央也。《离骚》王注：央，尽也。

《昭昧詹言》十二：本意作夸美词，嫌浅俗应气无味。又己本洪州人，不便自夸其乡，亦不可谦贬，故托为吏词，以为曲折。与退之《泷吏》局同意异。公不便自谦自谀，皆托之人言。一宾一主，《解嘲》、《客难》之局，而用之于赠人，皆避浅俗平直也，足以为式。

又：起四句点叙。以下两段，入议夹写。收另作章法，应起。此应酬题，他手只夸地颂才德而已，此时俗应酬气，纵诗句佳而意思庸俗。此言用意也。至于格局，纵用奇势，亦终是气骨轻浮，盖不知深于律法者也。必于此用意，将欲赞，换入他人口气，则立意不同人。以不如意先作一曲折垫起，用两人作局阵，此乃深曲迷变，气骨不轻浮矣。纯是古文命意立局章法，所以为作家，跳出寻常庸人应酬套。此非深思有学人不能作，不同俗手，分别在此。

和平甫舟中望九华山二首

【张载华辑《诗评》中案云：一首（其二）笺注本题作“重和”。】

楚越千万山，雄奇此山兼。盘根虽巨壮，其末乃修纤。去县尚百里，侧身勇前瞻。萧条烟岚上，缥缈浮青尖。徐行稍复逼，所瞩亦已添。精神去亹亹，进貌气象来渐渐。高貌。《诗》：“渐渐之石，惟其高矣。”卸席取近岸，移船傍苍蒹。窥观坐穷哺，未觉晷刻淹。江空万物息，四面波澜恬。峨然九女鬟，争出一镜奁。卧送秋月没，起看朝阳暹。日光升也游氛荡无余，琐细得尽覘。陵空翠纛羽毛幢也，以犂牛尾为之，如斗或在駢头，或在衡。直，照影寒铍鋌。冢山顶木立绀发，崖林张紫髯。变态生倏忽，虽神讵能占。当留老吾身，少驻谁云餍。惜哉秦汉君，黄屋天子车以黄繒为裹上衡灊②。霍山在灊县，属庐州。等之事嬉游，舍此何其廉。我疑二后荒，神物久已厌。埋藏在云雾，不欲登昏憒。诳也，佞也。又疑避褒封，蔽匿以为谦。或是古史书，脱落简与籤。籤，同签，标识也。当时备巡游，今不在绀缣。缣，本亦黄色。终南秦之望，泰山鲁所詹③。天王与秩祭④，俎豆罗盐。苟能泽下民，维此远亦沾。方今东南旱，土脉燥不粘。尚吾肤寸侧手为肤，按指为寸。功，岂免窃食嫌。神莽吾难知，士病无能砭。文章巧傅会，智术工飞钳。《鬼谷子》有《飞钳篇》，谓纵横之学。荐宝互珪璧，论材自楠楸。《文集》作“楸楠”。楸，大木也。《司马相如赋》：“其树楸楠豫章。”苟以饰妇妾，谬云活苍黔。岂如幽人乐，兹山谢间阎。穴石左思《招隐》诗：“岩穴无结构。”作户牖，垂泉当门帘。寻奇出后径，览胜倚前檐。超然往不返，举世徒咕咕。《唐书·王叔文

传》：“咕咕小人。”高兴寄日月，千秋伴乌蟾。遐追商洛翁，四皓秦火不能炎。近慕楚穆生，楚，元王，高祖同父少弟，名交。竟脱楚人钳。吾意窃所尚，人谋谅难金。

谁谓九华远，吾身未尝詹。唱篇每起予，予口安能钳。忆在秋浦贵池西南八十里北，空江上新蟾。光洁写一镜，回环两堤奁。露坐引衣襟，衣领风行欹帽檐。维舟当此时，巨细得尽瞻。试尝论大略，次乃述微纤。此山广以深，包畜万物兼。嘘云吐雾雨，生育靡不渐。巍然如九皇^⑤，见《汉书》，谓神农以上诸皇。《汉书》：“高世比德于九皇”，注：“上古有人皇者九人。”德泽四海沾。此山相后先，各出群峰尖。毅然如九官，舜置九官，即禹等。《尚书·尧典》：九官，伯禹宅百揆，弃为后稷，契作司徒，皋陶为士，垂为共工，益作朕虞，伯夷作秩宗，夔典乐，龙纳言。温子昇《舜庙碑》：“九官咸事，百揆时叙。”罗立在堂廉。挺身百辟上，附丽无奸憊。此山高且寒，五月不觉炎。草树萋已绿，冰霜尚涵淹。颓然如九老，《唐书·白居易传》：“尝与胡杲、吉旼、郑据、刘真、卢真、张浑、狄兼谟、卢贞燕集，皆高年不事者，人慕之，绘为九老图。”白发连苍髯。此山当无云，秀色郁以添。姹然如九女^⑥，靓饰出重帘。珮环与中裙，绀玉青纨缣。远之妍西施，近或丑无盐。齐宣王后，齐女。变态不可穷，诗者徒咕咕。我初勇一往，役世难安恬。浪荒不走职，民瘼瘼，所苦患。当谁砭。乖离今数旬，梦想欲窥覩。自期得所如，何啻释囚钳。念昔太白巔，鄞有太白岭下视海日暹。竭来天柱在瀟游，屐齿尚苔粘。犹之健饮食，屡飧亦云饜。胡为慕攀踏，已惫且不嫌。岂其仁智心，山水固所潜。男儿有所学，进退不在占。功名苟不谐，廊庙等间阎。况乃抡椽杙，其谁辨榱桷。归欤岩崖居，料理带与签。得石坐兀兀，逢泉饮厌厌。安也取舍断在独，岂必询谋金。子语实慰我，宁殊邑中黔^⑦。玉枝将在山，当倚以葭蒹^⑧。诗力我已屈，锋铍子犹銛。扶复更一战，语汝其无谦。

①《年谱》：介甫庆历七年（1047，二十七岁）知鄞，皇祐二年（1050，三十岁）归临川。皇祐三年，通判舒州；至和元年（1054，三十四岁）归临川。诗殆作于皇祐三年也。

王安国，字平甫，介甫三弟。

李白改九子山为《九华山联句并序》：青阳县南有九子山，山高数千丈。上有九峰，如莲花。按图征名，无所依据，太史公南游，略而不书。事绝古老之口，复阙名贤之纪。虽灵仙往复，而赋咏罕闻。余乃削其旧号，加以“九华”之目。

《太平寰宇记》：九华山在池州青阳县南，旧名九子山。上有九峰，如莲花削成。唐李白改名。在今安徽青阳县西南四十里。

②《史记·秦始皇本纪》：二十六年，始皇还过彭城。乃西南渡淮水之衡山。

又：《封禅书》：（见封五年）上巡南郡，至江陵而东，登礼灋之天柱山。

《汉书·武帝纪》：（元封）五年冬，行南巡狩，登灋天柱山。

③《诗·閟宫》：泰山岩岩，鲁邦所詹。《传》：詹，至也。

④《公羊·僖公三十一年传》：三望者何？望祭也。然则曷祭？祭泰山河海。曷为祭泰山河海？山川有能润于百里者，天子秩而祭之。触石而出，肤寸而合，不崇朝而遍雨乎天下者，唯泰山尔。

⑤《汉书·郊祀志》：天子既闻公孙卿及方士之言，黄帝以上，封禅皆致怪物，与神通。欲放黄帝以接神人蓬莱，高世比德于九皇。（张晏曰：三皇以前有人皇。九首。韦昭曰：上古有人皇者九人。师古曰：韦说是也。刘敞曰：予谓董仲舒书言，周人推神农为九皇，此是矣。）

⑥石崇《楚妃叹》：既绌虞丘，九女是进。

《云笈七签》：明镜有三童九女侍之。

《乐府诗集》：刘向《列女传》曰：楚姬，楚庄王夫人也。庄王好狩猎毕弋，樊姬諫不止，乃不食禽兽之肉。王尝与虞丘子语，以为贤。樊姬笑之。王曰：“何笑也？”对曰：“虞丘子贤矣，未忠也。妾充后宫十一年，而所进者九人；贤于妾者二人，与妾同列者七人。虞丘子相楚十年，未闻进贤退不肖也。笑之不亦宜乎！”王于是以孙叔敖为令尹。

李白《望九华赠青阳韦仲堪》：昔在九江上，遥观九华峰。天河挂绿水，秀出九芙蓉。

⑦《左传·襄公十七年》：宋子罕諫平公筑台。民歌之曰：“邑中之黔，实慰我心。”（宋皇国父为大宰，为平公筑台，妨于农功。子罕请俟农功之毕。公弗许。筑者讴曰：“泽门之皙，实与我役，邑中之黔，实慰我心！”杜注：皇国父白皙而居近泽门，子罕黑色而居邑中。）

⑧《世说新语·容止篇》魏明帝使后弟毛曾与夏侯玄共坐，时人谓蒹葭倚玉树。

《诗评》：《南山》诗外，别开生面。（其二）

寄曾子固

吾少莫与合，爱我君为最。

君名高山岳，崿崿【山高险峻不齐也】嵩与太。

低心收翥同蠹友，似不让尘尘②。【尘，合也。】

又如沧江水，不逆沟畎浍。【畎，田间沟，浍，注沟曰浍。】

君身揭【举，担负。】日月，遇辄破氛霭。

我材特穷空，无用补仓廩。【刍藁之藏】

谓宜从君久，垢污得洮【颣也】汰。

人生不可必，所愿每颠沛。

乖离五年余，牢落【落落不群也，《陆机赋》：“心牢落而无偶。”又，阒寂也。】千里外。

投身落俗阱，薄宦自钳鉤。【在颈曰钳，在足曰鉤。】

平居每自守，高论从谁丐。

摇摇西南心，梦想与君会。

思君挟奇璞，愿售无良价。【兼用卞和事及《论语》待价而沽意】

穷阎抱幽忧，凶祸费禴禴。

除殃祭州穷吉士少，谁可媚诸妹③。

仍闻病连月，医药谁可赖。

家贫奉养狭，谁与通货贝。

诗人刺曹公，贤者荷戈殽④。殽也。

奈何遭平时，德泽盛汪濊。汪濊，深广也。

鸾凤鸣且下，万羽来翩翩。

飞声呦呦林间鹿，争出噬苹藟。《尔雅·释草》：“萍藟萧”，注：“今藟蒿也。”

乃令高世士，动辄遭狼狈。

人事既难了，天理尤茫昧。陆机《塘上行》：“无道有迁易，人理无常全。”

圣贤多如此，自古云无奈。

周人贵妇女，扁鹊名医滞⑤。李注：“字书下病也。”

今世无常势，趋舍唯利害。

而君信斯道，不闵身穷泰。

弃捐人间乐，濯耳受天籁。

谅知安肥甘，未肯顾糠粃。同檜，糠也。

龙螭虽蟠屈，不慕蛇蝉蜕。

令人重感奋，意勇忘身最。

小貌何由日亲炙，见《孟子》，亲承教化也。病体同砭石针艾。

功名未云合，岁月尤须惕。贪也，《左传》：“忼岁而惕日。”忼，亦贪也。怀思切劘切也。切劘犹言磋磨。效，中夜泪霏霏。君常尝许过我，早晚治车馱（软）。软，车毂之端，以金属帽之即輶。山溪虽峻恶，高眺发蒙肺。昧目不明也。又，不明貌，或从日。峰峦碧参差，木树青晦不明蔼。桐江路尤驶，飞浆下鸣濑。鱼村指暮火，酒舍瞻晨旆。清醪足消忧，玉鲫行可脍。行行愿无留，日夕伫倾盖。会将见颜色，不复谋蓍蔡。延陵古君子，议乐耻言郤。细事岂足论，故欲论其大。披披发鞭囊，鞬，马上盛弓矢器。囊，韬也，所以敛藏兵器。弓衣，甲衣，与受箭之器。懔懔见戈锐。探深犯严壁，破惑翻强廕。旃也，大将之麾也。旌旗也。《诗》：“其廕如林。”《左传》：“廕动而鼓。”离行步荃兰，偶坐阴松桧。宵床连衾幘，昼食共粗粝。兹欢何时合，清瘦见衣带。作诗寄微诚，诚语无彩绘。

① 诗疑作于知鄞时，子固尚未第也。

《宋史·曾巩传》：巩字子固，建昌南丰人。生而警敏，甫冠，名闻四方。欧阳修见其文，奇之。中嘉祐二年（1057）进士第。巩负才名，久外徙，世颇谓偃蹇不偶。一时后生辈锋出。巩视之，泊如也，拜中书舍人。寻掌延安郡王笺奏。丁母艰，去。卒年六十五。巩性孝友，父亡，奉继母益至，抚四弟九妹于委废单弱之中，宦学婚嫁，一出其力。为文章，上下驰骋，愈出而愈工。本原六经，斟酌于司马迁、韩愈。一时工作文词者，鲜能过也。少与王安石游。安石声誉未振，巩导之于欧阳修，及安石得志，遂与之异。

②《史记·李斯传》：太山不让土壤，故能成其大；河海不择细流，故能就其深。

③李注：子固择诸妹所归，皆希良士。

④《诗·曹风·候人》：彼候人兮，何戈与祲。《传》：言贤者之官不过候人。

⑤《史记·扁鹊传》：鹊名满天下。旁游六国。至邯郸，闻赵贵女病，即为带下医。随俗改变，无所滞碍。

介甫《得曾子固书因寄》：始吾居扬日，重问每见及：云将自亲侧，万里同讲习。子行何舒舒！吾望已汲汲！穷年梦东南，颜色不可挹！仁贤岂欺我？正恐事维縶。严亲抱忧衰，生理赖以给？不然航江外，天寒北风急？无乃山路恶，仆弱马行涩？孤怀未肯开，岁月忽如蛰。竭来高邮住，巷屋颇卑湿。蓬蒿稍芟除，茅竹随补葺。苟云御风气，尚恐忧雨汁。故人莫在眼，屡独开巾笈。忠信盖未见，吾敢诬兹邑。出关谁与语，念子百忧集！眺听聊自放，日暮城头立；徐归坐当户，使者操书入。时开识子意，如渴得美湑。骊驹日就道，玉手行可执。旧学待镌磨，新文得删拾。重登城头望，喜气满原隰。（《文集》十三）

又：《答曾子固南丰道中所寄》：吾子命世豪，学术穷无间。直意慕圣人，不问闵与颜。彼昏何为者，诬构来！应逮犯秋阳，动为人所叹。不恤我躬瘁，乃嗟天泽悭。令人念公卿，烨烨趋王班；泊无悯世意，狙猿而佩环！爱子所守卓，忧予不能攀；永矢从子游，合如扉上鹄。愿言借余力，迎浦疏潺潺；亦有衣上尘，可攀裨太山。大江秋正清，岛溆相萦弯；四盼浩无主，日暮烟霞斑。水竹密以劲，霜枫衰更殷。赏托亦云健，行矣非间关。相期东北游，致馆谁之湾。无为袭宁羸，悠然及温远！（《文集》十三）

又：《赠曾子固》：曾子文章众无有，水之江汉星之斗。挟才乘气不媚柔，群儿谤伤均一口。吾语群儿勿谤伤，岂有曾子终皇皇！借令不幸贱且死，后日犹为班与扬！（《文集》十三）

《诗评》中：“脱身”一联，已见第二十卷，“高论”二句亦再出。

定林

漱甘凉病齿，坐旷息烦襟。因脱水边屐，就敷岩（床）上衾。但留云对宿，仍值月相寻。真乐非无寄，悲虫亦好音。

介甫《定林寺》：众木凛交复，孤泉静横分；楚老一枝筇，于此傲人群。城市少美蔬，想今困惓焚。且凭东北风，持寄岭头云。（《文集》三）

又《题定林壁》：定林自有主，我为林下客。客主各有心，还能共岑寂。（《文集》三）

又《定林》诗：定林修木老参天，横贯东南一道泉。六月杖藜寻石路，午阴多处弄潺湲。（《集》三十）

又《定林所居》：屋绕湾溪竹绕山，溪山却在白云间。临溪放艇依山坐，溪鸟小花共我闲。（同上）

刘辰翁评：有輞川幽澹之趣。

《宋诗菁华录》：颇有王右丞“松风吹解带，山月照弹琴”意境。

壬辰寒食

客思似杨柳，春风千万条②。首二句十字格更倾寒食泪，欲涨冶城潮③。巾发雪争出，镜颜朱早凋。未知轩冕乐，但欲老渔樵。

① 皇祐四年壬辰（1052），介甫三十二岁，时通判舒州。惟诗似在金陵作。

② 李注：《后汉纪》：“千条万端”，言客思如柳条之多。

③ 《太平寰宇记》：江南东道升州上元县：古冶城在今县西五里；本吴铸冶之地，因以为名。

《唐宋诗举要》四：荆公之父（名益，字损之）为江宁府通判。仁宗宝元二年（1039）卒于官，葬于江宁牛首山（今江宁县南）。此诗殆皇祐四年省墓而作也。

纪昀曰：起四句奇逸。

《唐宋诗举要》四：风神跌宕，笔势清雄，荆公独擅。

《宋诗菁华录》：起十字无穷生清新，余衰飒太过。

次韵致远木人洲

迷子山前涨一洲②，木人图志失编收。年多但有柳生肘③，地僻独无茅盖头④。河侧鲍生干尚立⑤，江边屈子槁将投⑥。未妨他日称居士，能使君疑福可求⑦。

①《宋史·叶涛传》：涛字致远，处州龙泉人。进士乙科。（李注：熙宁进士乙科。）为国子直讲。免官。涛，王氏婿也，即往从安石于金陵，学为文词。

②《建康志》：迷子洲在城西南四十里，周围三十里。（李注引）

③《庄子·至乐》：支离叔与滑介叔，观于冥伯之丘，昆仑之墟，黄帝之所休。俄而柳生其左肘。其意蹶蹶然恶之。支离叔曰：“子恶之乎？”滑介叔曰：“亡，予何恶！生者，假借也；假之而生。生者，尘垢也。死生为昼夜。且吾与子观化，而化及我，我又何恶焉！”成疏：柳生者，易生之木。木者，棺槨之象。此是将死之征也。《庄子集释》郭嵩焘曰：《说文》：“瘤，肿也。”《玉篇》：“瘤，瘕肉。”《广韵》：“瘤，肉起疾。”《说文》亦以瘕为寄肉。瘤之生于身，假借者也。人之有生，亦假借也。皆尘垢之附物者也。柳瘤字一声之转。

④《传灯录》：泐山谓宜鉴：“是伊将来有把茅盖头，骂佛骂祖去。”

⑤《新序》：鲍焦，国之介士，衣敝肤见挈畚将蔬。遇子贡，弃其蔬而立，槁死于洛水之上。《庄子·盗跖》：鲍子立干，申子不自理，廉之害也。

⑥《楚辞·渔父》：屈原既放，游于江潭，行吟泽畔，颜色憔悴，形容枯槁。《史记·屈原传》：屈原至于江滨，被发行吟泽畔，颜色憔悴，形容枯槁。乃作《怀沙》之赋。遂自投汨罗以死。

⑦韩诗：偶然题作“木居士”，便有无穷祈福人。（《题木居士》二首之一，上二句云：“火透波穿不计春，根如头面干如身。”五百家注：张芸叟《木居士诗》序云：“耒阳县北沿流二三十里鰲口寺，即退之所题木居士在焉。”）

诗凡二首：其二云：机尔何年客此洲？飘流谁弃止谁收？无心使口肝使目，有干作身根作头。暴露神灵难寄托，祷祠村落几依投。纷纷剪纸真虚负，立槁安知富可求！

介甫《次叶致远韵》：生涯聊占水中洲，岂即乘桴逐圣丘？身与鳬飞仍雁集，心能茅靡亦波流。由来杞梓常先伐，谁谓菰蒲可久留！乘兴吾庐知未厌，故移修竹拟延

驹。（《文集》十七）

一作：知君聊占水中洲，去即东桴逐圣丘。忧国无时须问舍，得抵有兴即乘流。由来要路当先据，谁谓穷乡可久留？他日五湖寻范蠡，想能重此驻前驹。（同上）

又《叶致远置洲田以诗言志次其韵二首》，其一云：吟叹君诗久掉头，知君兴不负沧洲。土山欲为羊昙赌，且可专心学奕秋。（《文集》二十七）

又《又次叶致远韵二首》，其一首句云：“庵成有兴亦寻春。”其二云：“明时君尚富春秋，岂比衰翁远自投！智略未应施畎亩，上前他日望吾丘。”（同上）

李注：“立”与“投”皆本出处，用字工且严如此。

登宝公塔

倦童疲马放松门，自把长筇倚石根。江月转空为白昼②，岭云分暝与黄昏。鼠摇岑寂声随起③，鸦矫荒寒影对翻④。当此不知谁客主⑤，道人忘我我忘言⑥。

①《南史·陶弘景传》：时有沙门释宝志者，不知何许人。有于宋太始（明帝，465至471）中见之，出入钟山，往来都邑，年已五六十矣。齐、宋之交，稍显灵迹。被发徒跣，语默不伦。或被锦袍，饮啖同于凡俗。恒以镜铜剪刀镊属挂杖，负之而趋。或征索酒肴，或累日不食。预言未兆，识他心智，一日中分身易所。远近争赴，所居噂沓。梁武帝尤深敬事。虽剃须发，而常冠下裙帽纳袍，故俗呼为志公。好为讖记，所谓志公符是也。天监十三年（514）卒。

《建康志》：塔在蒋山。梁武帝天监十三年，以定林寺前冈独龙阜葬志公。永定公主以汤洳之资造浮屠五级于其上。十四年（515）即塔前建开善寺。（李注引）

②李注：王建《白紵歌》：“回昼为宵亦不寐”，此则反言之，音节类公此句。

③又：卢纶诗：“斗鼠摇松影。”

④又：杜诗：“雁矫衔芦内。”

⑤又《襄阳记》：司马德操尝诣庞德公，值其上冢。径入室，呼德翁妻子，使速作黍。须臾，德翁还，直入相就，不知何者是客也。

⑥《庄子·外物》：得意而忘言，吾安得忘言之人而与之言哉！陶诗：欲辩已忘言。

《冷斋夜话》引黄鲁直语，以“江月”二句为句中眼。

《诗评》中：具吞吐嘘噏之势，造化归其毫端。

介甫《题雩祠堂》（《文集》十四）题下注云：在宝公塔院。

又《北山三咏》其一《宝公塔》：道林真骨葬清霄，宰堵千秋未寂寥。宝势旁连大江起，尊形独受众山朝。云泉别寺分三径，香火幽人止一瓢。我亦鹜峰同听法，岁时光阴岂辞遥！（《文集》十七。余二咏为《觉海方丈》《道光泉》。）

又《重登宝公塔复用前韵二首》：空见方坟涌半霄，难将生死问参寥。（《庄子》：玄冥闻之参寥。注：参，高也；高邈寥旷，不可名也。）应身东返知何国，瑞象西归自本朝。遗寺有门非辇路，故池无钵但僧瓢。独龙下视皆陈迹，追数齐梁亦未遥。（《诗评》中：不必刻画志公，自然易移不得。）

碧玉旋螺恍隔霄，冠山仙冢亦寥寥。空余华构延风月，无复灵踪落市朝。帐座追严多献宝，供盘随施有操瓢。他方出没还如此，与物何心作迢遥！（《文集》十七）

《十驾斋养新录》十九：六朝以道人为沙门之称，不通于羽士。

思王逢原三首

布衣阡陌动成群，杜诗：“胡人高鼻动成群。”卓犖高才独见君。杞梓豫章蟠绝壑，骐驎古之良马，日行五千里。騊褭神马，日行万里。跨浮云。行藏已许终身共，生死那知半路分。便恐世间无妙质，鼻端从此罢挥斤。

蓬蒿今日想纷披，冢上秋风又一吹。妙质不为平世得，微言《汉书·艺文志》：“仲尼没而微言绝。”《晋书·卫玠传》：“微言之绪，绝而复续。”唯有故人知。庐山南堕当书案，湓水东来入酒卮。陈迹可怜随手《史记·淮阴侯列传》：“（钟离昧）曰：吾今日死，公亦随手亡矣。”尽，欲欢无复似当时。

百年相望济时功，岁路陆机《豫章行》：“前路既已多，后涂随年侵。”李善注：“喻寿命也。”何知向此穷。鹰隼奋飞凰羽李注；《闽中名士传》：“薛令作之诗自艾。”王家续云：“啄木嘴距长，凤凰毛羽短。若嫌松桂冷，任逐桑榆暖。”短，骐驎埋没马群空。中郎旧业无儿付，康子黔娄，其妻谥为“康”。见《高士传》。高才有妇同。想见江南原上墓，树枝零落纸钱风。

① 诗当作于嘉祐五年（1060）。介甫年四十岁。

《宋诗钞》：王令，字逢原，广陵人也。年十数岁，与里人满执中为友。（《宋诗钞·广陵集》中寄满子权诗最多）伟节高行，特立于时。王安石赴召，道由淮南。令赋《南山之田》诗往见之。安石大喜。期其材可与共功业于天下，因妻以其夫人之女弟。年二十八而卒。令诗学韩、孟，而识度高远，非安石所及，不第以瑰奇也。惜限于年耳。

介甫《王逢原墓志铭》：余友字逢原，讳令，姓王氏，广陵人也。始予爱其文章而得其所以言，中予爱其节行而得其所以行；卒予得其所以言，浩浩乎其将沿而不穷也。得其所以行，超超乎其将追而不至也。于是慨然叹，以为可以任世之重而有功于天下者，将在于此，余将友之而不得也。呜呼！今弃予而死矣！（《庄子·徐无鬼》：庄子送葬，过惠子之墓，顾谓从者曰：“自夫子之死也，吾无以为质矣，吾无与言之矣！”）悲夫！逢原……五岁而孤，二十八而卒。卒之九十三日，嘉祐四年（1059）九月丙申，葬于常州武进县南乡薛村之原。夫人吴氏，亦有贤行。于是方娠也，未知其子之男女。（《文集》九十七）

介甫《题王逢原讲孟子后》：逢原在常州江阴时，学者有问以《孟子》，而逢原为之论说，是以如是其详也。未几而逢原卒。故其书才终于一篇，而考之，时不同。盖其志犹未就也。虽然，观其说，亦足以概见之矣。若逢原，所谓“见其进未见其止”也。逢原卒于嘉祐己亥（1059）六月，后七年，讲义方行。（《文集》七十一）

《韵语阳秋》十八：王逢原以书上介甫，且以南山之诗求学于荆公，师资之礼已定。故逢原未死以前，荆公赠之诗曰：“榦楠豫章概白日，只要匠石聊穿裁。”逢原既死之后，荆公思之曰：“便恐世间无妙质，鼻端从此罢挥斤。”皆以师道自任也。然观逢原寄介甫诗云：“天门廉陛郁巍巍，势利宁无淡泊讥！岂与跼徒争有道？盖思吾党自言归。古人踽踽今何取？天下滔滔昔已非！终见乘桴去沧海，好留余地许相依！”则识度之远，又过荆公矣。

介甫《寄王逢原》云：申韩百家艺火起，孔子大道寒于灰。儒衣纷纷欲满地，无复气焰空煤炰。（炰，灰炰，煤也，俗谓之烟尘。）力排异端谁助我？忆见夫子真奇材。榦楠豫章概白日，只要匠石聊穿裁。我方官拘不得往，子有闲暇宜能来。语言相与入圣处，一取万古光芒回。（《文集》七）

又，《思王逢原》：自吾失逢原，触事辄愁思。岂独为故人？抚心良自悲，我善孰相我？孰知我瑕疵？我思谁能谋？我语听者谁？朝出一马驱，暝归一马驰；驰驱不自得，淡笑强追随。仰屋卧太息，起行涕淋漓。念子冢上土，草茅已纷披。婉婉妇且少，茕茕一女嫠。高义动闾里，尚闻致财资。嗟我衣冠朝，略能具饘糜。葬祭无所助，哀颜亦何施！闻妇欲北返，跂予常望之。寒汴已闭口，此行又参差！又说当产子，产子知何时！贤者宜有后，固当梦熊罴！天方不可恃，我愿适在兹！我疲学

更误，与世不相宜。宿昔心已许，同冈结茅茨。此事今已矣，已矣尚谁知！渺渺江与潭，茫茫山与陂；安能久窃食，终负故人期！（《文集》七）

《诗评》中：向读公所为逢原墓志，知其期待良厚。今观此诗（《思王逢原》）悲惋有甚于墓志者。如昌黎之于李元宾，眉山之于李台卿。能令千百世后读其诗文，恍闻叹息之声。

逢原《暑旱苦热》：清风无力屠得热，落日着翅飞上山。人固已惧江海竭，天岂不惜河汉干？昆仑之高有积雪，蓬莱之远常遗寒。不能手提天下往，何忍身去游其间！（《宋诗钞》）

《石遗室诗话》十七：读荆公集竟，摘句如下：如《寄王逢原七古》末四句云云。《酬朱昌叔七律》后四句（酬朱昌叔五首此其二。《文集》十七。）云：山蟠直渚输淮口，水抱长干转石头；乘兴舟舆无不可，春风从此与公游。《思王逢原》七律，后四句云：庐山南堕当书案，湓水东来入酒卮；陈迹可怜随手尽，欲欢无复似当时。两诗同一用笔用意，但一将来，一已往，一满意，一悲伤耳。

又二十四：学古人总要能变化。王荆公《思王逢原》云：“庐山南堕当书案，湓水东来入酒卮。”非从“沔水流中坐，岷山到此堂”来乎？（少陵《奉观严郑公厅事岷山沔江画图十韵》句）“青山扪虱坐，黄鸟挟书眠。”非从“钩帘宿鹭起，丸药流莺啼”来乎？（少陵《水阁朝霁奉简云安严明府》句）但“庐山”一联视“沔水”一联无不及；“钩帘”一联何等自然，“青山”二语则所谓是底言矣。

《与王逢原书》二：某顿首。读所辱书辞，见足下之材浩乎沛然，非某之所能及。问诸邑人，知足下之行，学为君子而方不已者也。惜乎某之行亟，不得久留，从足下以游，及求足下所称满君者而见之。所示藁副，辄留传玩。（《文集》七十五）

又：七：某顿首，逢原足下。方欲作书，而得所赐书，尤感慰！唯逢原所以教我，得鄙心所欲出者。穷僻无交游；所与议者，皆不出流俗之人。非逢原之教我，尚安得闻此！余更有所闻，悉望见教。今世既无朋友相告戒之道，而言亦未必可用。大抵见教者，欲使某同乎俗、合乎世耳；非足下教我，尚何望于他人。切无所惜也！（同上）

《答王逢原书》：某启。忽辱惠书，承以《论语》义见教。言微旨奥，直造孔庭。非极高明，孰能为之！仰美，仰美！近蒙子固、夷甫过我，因与二公同观，尤所叹服。（《文集》七十八）

《与王逢原书》：某顿首，逢原足下。比得足下于客食中，窘窘相造谢，不能取一日之闲，以与足下极所欲言者，而舟即东矣！间阅足下之诗，切有疑焉。不敢不以

告。足下诗有“叹苍生泪垂”之说。夫君子之于学也，固有志于天下矣，然先吾身而后吾人。吾身治矣，而人之治不治，系吾得志与否耳。身犹属于命，天下之治，其可以不属于命乎！孔子曰：“不知命，无以为君子。”又曰：“道之将行也欤？命也。道之将废也欤？命也。”孔子之说如此，而或以为君子之学，汲汲以忧世者，惑也，惑于此，而进退之行，不得于孔子者，有之矣。故有孔不暇暖席之说。吾独以圣人之心，未始有忧。有难予者曰：然则圣人忘天下矣？曰：是不忘天下也。否之象曰：“君子以俭德避难，不可荣以禄。”初六曰：“拔茅茹以其汇贞吉。”象曰：“拔茅贞吉，志在君也。”“在君”者，不忘天下者也；“不可荣以禄”者，知命也。吾虽不忘天下，而命不可必合，忧之其能合乎！《易》曰：“遁世无闷”，“乐天知命”是也。《诗三百》如《柏舟》《北门》之类，有忧也。然仕于其时，而不得其志，不得以不忧也。仕不在于天下国家，与夫不仕者，未始有忧；《君子阳阳》、《考槃》之类是也。借有忧者，不能夺圣人不忧之说。孟子曰：“伊尹视天下匹夫匹妇有不被其泽者，若已推而纳之沟中。”可谓忧天下也。然汤聘之，犹嚚嚚然曰：“我处畎亩之间，以乐尧舜之道。”岂如彼所谓忧天下者，仆仆自枉而幸售其道哉！又论禹、稷、颜回同道曰：“乡邻有斗者，被发缨冠而救之，则惑也。”今穷于下，而曰我忧天下，至于恸哭者，无乃近救乡邻之事乎？孔子所以极其说于知命不忧者，欲人知治乱有命，而进不可以苟，则先王之道得伸也。世有能谕知命之说，而不能重进退者，有矣，由知及之，仁不能守之也始得足下文，特爱足下之才耳。既而见足下衣衾屨缺，坐而语，未尝及己之穷。退而询，足下终岁食不荤，不以丝忽妄售于人。世之自立如足下者有几！吾以谓知及之，仁又能守之，故以某之所学报足下。（《文集》七十五）

梦张剑州

万里怜君蜀道归，相逢似喜语还悲。江淮别业依前处，日月新阡墓道，杜诗：“新阡绛水遥。”卜几时②。自说曲阿犹未稳③，即寻湓水去犹疑。茫然却是陈桥驿名，在河南开封东北。梦，昨日春风马上思。此倒戟而入作法。

① 曾巩《仁寿县太君吴氏墓志铭》：女三人，长适沙县张奎（《文集》卅二有《和文淑》诗，原注：“张氏女弟。”）李注：张名奎，公女弟之夫。

② 又《檀弓下》：公叔戌曰：“日月有时，将葬矣。”

③ 又皮日休记，张祐以曲阿地古朴，有南朝遗风，遂筑室种树而家焉。

《张剑州至剑一日以亲忧罢》：客舍飞尘尚满鞞，却寻东路想茫然。白头反哺秦乌侧，流血思归蜀鸟前。今日相逢知怅望，几时能与与流连！行看万里云西去，倚马春风不忍鞭。（《文集》二十四）

《寄张剑州并示女弟》（原注：时张以夫人丧，自剑州归。）剑阁天梯万里寒，春风此日白衣冠。乌辞反哺颠毛黑，鸟引思归口血丹。行路想君今眚瘦，相逢添我老悲酸。浮云渺渺吹西去，每到原头勒马看。（《文集》二十三。《韵语阳秋》十举二诗颈联云：所赋皆一时之事，而语意重复如此，何邪！）

《宋史·张奎传》：（此当是别一张奎，非介甫女弟之夫。）奎字仲野，先亢中进士。母病，辄割股肉和药以进，母遂愈。其后母卒，庐于墓，自负土，植松柏。官至给事中，枢密直学士。（奎为亢兄。亢传云：自言后唐河南尹全义七世孙，家于临濮。）

予求守江阴未得，酬昌叔忆江阴见及之作

黄田港北水如天，万里风樯看贾船。海外珠犀常入市，人间鱼蟹不论钱。李白诗：“清风明月不用一钱买。”高亭笑语如昨日，末路尘沙非少年。强乞一官绝未得，只君同病肯相怜②。

① 朱明之，字昌叔。王令有《送朱明之昌叔赴尉山阳》诗，见《宋诗钞》。

曾巩《仁寿县太君吴氏墓志铭》：女三人，次适天长朱明之。

《寄朱氏妹》：昔来高邮居，我始得朱子；从客谈笑间，已足见寄伟。行寻城阴田，坐钓渠下沚；归来同食眠，左右皆图史。（《文集》六）

《次韵酬朱昌叔五首》，其一云：点也自殊由与求，既成春服更何忧！拙于人合且天合，静与道谋非食谋。未爱京师传谷口，但知乡里胜壶头。（山名，在湖南桃源县西二百里。汉马援征五溪蛮，病卒于此。《石林诗话》上云：以谷口对壶头，其精切如此。）嗟予老矣无一事，复得此君相与游。（《文集》十七）

② 《吴越春秋》：伍子胥曰：“嚭与吾同怨，子不闻河上之歌者乎？‘同病者相怜！’”白居易赠刘梦得诗：顾我独狂多自哂，与君同病最相怜。

《与丁元珍书》：求郡固且止，甚荷见教。然某之所请，不为无辞。若执政不察，直以为罪，则某何敢解免！如欲尽其辞，而然后加之罪，则某事固有本末，非今日苟然欲避烦劳而求佚也。古者一道德以同俗，故士有揆古人之所为以自守，则人无异论。今家异道，人殊德，士之欲自守者，又牵于末俗之势，不得事事如古，则人之异论，可悉弭乎！要当择其近于礼义，而无大譴者取之耳。（《文集》七十五）

元珍以诗送绿石砚所谓玉堂新样者

玉堂新样世争传，况以蛮溪绿石镌。嗟我长来无异物②，愧君持赠有佳篇。久埋瘴雾看犹湿，久埋句，端州所寄，故云。一取春波洗更鲜③。还与故人袍色似④，论心于此亦同坚。同坚，阮籍《咏怀》：“如何金石交，一旦更离伤！”《国策》：“此所谓弃仇讎得石交者也。”《诗·柏舟》：“我心匪石，不可转也。”

① 丁宝臣，字元珍，时知端州。（《宋诗纪事》十三，《补遗》九，同见。）

② 《世说·德行篇》：王恭对王大曰：“丈人不悉恭，恭作人无长物。”

③ 江淹《别赋》：春草碧色，春水渌波，送君南浦，伤如之何！

④ 古诗：青袍似春草。

《次韵答丁端州》：莫嗟荒僻又离群，且喜风谣岭北闻。铜柱虽然蛮徼接，竹符还是汉家分。春风来逐衡阳雁，秋骑归看陇首云。想见会知南望苦，病骸今似沈休文。（《文集》二十四）

江上

江水漾西风，江花脱晚红①。离情被横笛，吹过乱山东。

① 谢庄《月赋》：洞庭始波，木叶微脱。

《苕溪渔隐丛话》：荆公小诗，如：“南浦随花去，回舟路已迷；暗香无觅处，日落画桥西。”（《南浦》，《文集》二十六）真可使人一唱而三叹也。《诗薮》：介甫五言（绝句）“南浦”云云，颇近六朝。

《石遗室诗话》十四：苏堪平日论诗，甚注意写景，以为不易于言情，较难于叙事。所举名句，若荆公之“南浦”云云，皆各极超妙者。

北陂杏花

一陂春水绕花身，花影妖娆各占春。

纵被春风吹作雪，绝胜南陌碾成尘。

《石遗室诗话》十七：读荆公集竟，摘句如下：数句及全首者，如“一陂”云云。以上荆公佳句，皆山林气重而时觉黯然销魂者。所以虽作宰相，终为诗人也。

《杏花》：石梁度空隙，茅屋临清烟。俯窥娇饶杏，未觉身胜影。嫣如景阳妃，含笑堕宫井。怊怅有微波，残妆坏难整。（《文集》一）

《次韵杏花三首》：其一：只愁风雨劫春回，怕见枝头烂熳开。野鸟不知人意绪，啄教零乱点苍苔。其二：心怜红蕊与移栽，不惜年年粪壤培。风雨无时谁会得，欲教零乱强催开。其三：看时高艳先惊眼，折处幽香易满怀。野女强簪看亦丑，少教憔悴逐荆钗。（《文集》三十二）

《宋诗菁华录》二：末二语恰是自己身分。

北山

北山输绿涨横陂，直堑回塘滟滟时。【堑，绕城水也；塘，圆曰池，方曰塘；滟，水动也，又水溢也。】

细数落花因坐久，缓寻芳草得归迟。

① 李注：北山即钟山。周顒隐处，孔稚圭作《北山移文》。

《唐宋诗举要》八：《舆地纪胜》曰：江南东路建康府钟山。《金陵览古》云：在上元县东北十八里。按《舆地志》云：蒋山古曰金陵，县名因此山。汉末，秣陵尉蒋子文死事于此，吴大帝为立庙。子文祖讳钟，因改蒋山。诸葛亮云：“钟山龙盘”是也。一名北山。

李注：《乐府·昆仑子》：坐久落花多。《离骚》：惜吾不及古人兮，吾谁与玩此芳草？

《北山有怀》：香火因缘寄此山，主恩投老更人间。伤心踟躕冈头路，明日春风自往还。（《文集》二十八）

《忆北山送胜上人》：苍藤翠木江南山，激激流水两山间。山高水深鱼鸟乐，车马迹绝人长闲。云埋樵声隔葱蒨，月弄钓影临潺湲。黄尘满眼衣可濯，梦寐惆怅何时还！（《文集》十）

《思北山》：日日思北山，而今北山去。寄语白莲庵，迎我青松路。（《文集》四）

《游钟山》：终日看山不厌山，买山终待老山间。山花落尽山长在，山水空流山自闲。（《文集》三十）

《北山三咏》：《宝公塔》，《觉海方丈》，《道光泉》。（《文集》十七）

《石林诗话》上：王荆公晚年诗律尤精严。如“含风鸭绿鳞鳞起，弄日鹅黄裊裊垂。”（此诗首二语云：南圃东冈二月时，物华撩我有新诗。）读之初不觉有对偶，至“细数落花因坐久，缓寻芳草得归迟”，但见舒闲容与之态耳。而字字细考之，若径隐括权衡者，其用意亦深刻矣。

《艇斋诗话》：荆公绝句云：“细数”云云。东湖晚年绝句云：“细落李花那可数？缓行芳草步因迟。”自题云：荆公绝句妙天下。老夫此句，偶似之邪？窃取之邪？学诗者不可不辨。予谓东湖之诗，因荆公之诗触类而长，所谓举一隅三隅反者也。非偶似之，亦非窃取之。

吴开《优古堂诗话》：前辈读诗与作诗既多，则遣词措意，皆相缘以起，有不自知其然者。荆公晚年闲居诗云，细数云云，盖本于王摩诘“兴阑啼鸟换，坐久落花多”（《过杨氏别业》），而其辞意益工也。（吴曾《能改斋漫录》八：谓荆公句本摩诘，辞意益工。）徐师川自谓荆公暮年金陵绝句之妙传天下。其前两句，与渠所作云：“细落李花那可数？偶行芳草步因迟”，偶作之邪？窃取之邪？喜作诗者，不可不辨。予尝以为王因于唐人，而徐又因于荆公，无可疑者。但荆公之诗，熟味之，可以见其闲适优游之意，至于师川，则反是矣。

吴可《藏海诗话》：“细数落花”、“缓寻芳草”，其语轻清。“因坐久”、“得归迟”，则其语典重。以轻清配典重，所以不堕唐末人句法中；盖唐宋人诗轻佻耳。

《苕溪渔隐丛话》前集二十三：《三山老人语录》曰：欧公“静爱竹时来野寺，独寻春偶过溪桥”。与荆公“落花”诗联皆状闲适，而王为工。

《石遗室诗话》十四：唐以前名句，多全联写景者。宋人除陆放翁、范石湖、杨诚斋诸家外，往往写景中带着言情；一联中或一句写景，一句言情，或两半句写景，两半句言情。岂好景果为前人写尽乎？抑亦厌赋体浅直，不如比兴深而曲耳。然景中带情，六朝、盛唐人已有的。如薛道衡之“人归落雁后，思发在花前”，杜甫之“感时花溅泪，恨别鸟惊心”，是也。宋人写景句脍炙人口者，如晏元献之“梨花院落溶溶月，柳絮池塘淡淡风”；林和靖之“疏影横斜水清浅，暗香浮动月黄昏”，“雪后园林才半树，水边篱落忽横枝”；梅圣俞之“春洲生荻芽，春岸飞杨花”，“野凫眠岸有闲意，老树著花无丑枝”；东坡之“竹外桃花三两枝，春江水暖鸭先知”；荆公之“坐看春苔色，欲上人衣来”，“细数”云云；山谷之“近人积水无鸥鹭，时有归牛浮鼻过”：亦不过代数人，人数语，视唐人传作之多，不及远甚。此外惟放翁之“小楼一夜听春雨，深巷明朝卖杏花”；“山重水复疑无路，柳暗花明又一村”；“云归时带雨数点，木落又添山一峰”；“白菡萏香初过雨，红蜻蜓

弱不禁风”：较多数联耳。其东坡之“帘前柳絮惊春晚，头上花枝奈老何”，“酒阑倦客惟思睡，蜜熟黄蜂亦懒飞”；陈简斋之“客子光阴诗卷里，杏花消息雨声中”：诗中皆有人在，则景而带情者矣。

杨柳

杨柳杏花何处好，石梁茅屋雨初干。

绿垂静路要深驻，红写清波（陂）得细看。

李注：李义山《柳下暗记》诗：“更将黄映白，拟作杏花媒。”

杜牧诗：“深感杏花相映红。”郑谷诗：“杏花杨柳年年好，不忍回看旧写真。”

出郊

川原一片绿交加，深树冥冥不见花。风日有情无处着，初回光景到桑麻。

《初夏即事》：石梁茅屋有湾（弯）碕，流水溅溅度两陂。晴日暖风生麦气，绿阴幽草胜花时。（《文集》二十七）

赵与虤《娱书堂诗话》：范石湖云：“尝蒙恩独引觞燕，寿王与行苑中亲诵后句，以为佳。”

《诗评》中：（三四）格调虽不高，要自耐人咀嚼。

介甫又有“春风取花去，酬我以清阴”之句。（《半山春晚即事》下二语云：翳翳陂路静，交交园屋深。〔《文集》十四〕）

勘会贺兰溪主

贺兰溪，洛京地名。陈绎买地筑居，于邨中问之。（《齐东野语》有记“勘会”改为“勘当”一条）

贺兰溪上几株松，南北东西有几峰。买得住来今几日，寻常谁与坐从容②。

①《宋史·陈绎传》：绎字和叔，开封人，中进士第。为馆阁校勘，集贤校理，刊定《前汉书》。英宗称其文学，以为实录检定官。（官至）大中大夫，以卒，年六十八。绎为政务摧豪党，而行与貌违。暮年谬为敦朴之状，好事者目为“热熟颜回”。

”。

②《与程公辟书》：比承故人远屈，殊以不获从容为恨！（《文集》四）

《回元少保书》二：程公辟想日得从容也。（《文集》七十八。《史记·张良传》：“所与从容言天下事甚众。”于鹄诗：“昨日山家春酒浓，野人相劝久从容。”）

《诗评》中：句句是问。

《升庵诗话》：绝句者，一句一绝。起于《四时咏》：“春水满四泽；夏云多奇峰；秋月扬明辉；冬岭秀孤松”是也。或以为陶渊明诗，非。杜诗：“两个黄鹂鸣翠柳”，实祖之。王维诗：“柳条拂地不忍折，松柏稍云从更长，藤花欲暗藏獐子，柏叶初齐养麝香。”宋六一翁亦有一首云：“夜深吹笛千山月，路暗迷人百种花。棋散不知人换世，酒阑无奈客思家。”（题为《梦中作》。《宋诗菁华录》云：“如有神助。”又谓：高妙为永叔平生所未曾有。）皆此体也。乐府有“打起黄莺儿”一首，意连句圆，未尝间断；当参此意，便有神圣工巧。

《石遗室诗话》十七：此首直不似绝句。

《宋诗菁华录》二：末二句竟开诚斋先路。

书湖阴先生壁

茆檐长扫静无苔，花木成畦手自栽。

一水护田将绿绕②，两山排闥送青来③。杜诗：“青惜峰峦过，黄知桔柚来”，又：“绿垂风折笋，红绽雨肥梅。”

①《唐宋诗举要》八：李注曰：“杨德逢也。”按介甫有《元丰行示德逢》。李注曰：“德逢姓杨，与公邻曲。”又引王直方《杂记》曰：“德逢号湖阴先生。”

次首云：桑条索漠柳（楝）花繁，风敛余香暗度垣；黄鸟数声残午梦，尚疑身在（属）半山园。

《寄杨德逢》：山樊老憺暑，独卧无所适。湖阴宛在眼，旷若千里隔。（《文集》一）

《示德逢》：先生贫敝古人风，沔想柴桑在眼中；怜愍鸡豚非孟子，勤劳禾黍信周

公。深藏组纆三千牍，静占宽闲五百弓。处世但令心自可，相知何藉一刘龚。（《文集》二十二）

《招杨德逢》：山林投老倦纷纷，独卧看云却忆君。云尚无心能出岫，不应君更懒于云。（《文集》二十八）

②李注：《汉书·西域传序》云：“自敦煌西至盐泽，往往起亭。而轮台渠犂皆有田卒数百人，置使者，校尉领护。”师古曰：“统领保护营田之事也。”又《西域传》下：“桑弘羊奏遣屯田卒诣故轮台以东，置校二（三）人分护。”

③《汉书·樊哙传》：樊哙乃排闥直入，大臣随之。

《石林诗话》中：荆公诗用法甚严，尤精于对偶。尝云：“用汉人语，止可以汉人语对；若参以异代语，便不相类。如‘一水’云云，皆汉人语也。”此惟公用之，不觉拘窘卑凡。如“周顒宅在（作）阿兰若，娄约身随（归）窳堵波”，（《与道原过西庄遂游宝乘》之作，下二句云：今日隐侯孙亦老，偶寻陈迹到烟萝。〔《文集》二十九〕）皆以梵语对梵语，亦此意。尝有人向公称：“自喜田园安五柳，但嫌尸祝扰庚桑”之句，以为的对。公笑曰：“伊但知柳对桑为的；然‘庚’亦自是数。”盖以十干数之也。

《韵语阳秋》二：荆公尝有诗曰：“功谢萧规惭汉第，恩从隗始诧燕台。”或谓公曰：“萧何万世之功，则‘功’字固有来处；若‘恩’字未见有出也。”荆公答曰：“韩集《斗鸡联句》，则孟郊云：‘受恩惭始隗。’”则知荆公诗用法之严如此。然“一水”云云，乃以樊哙“排闥”事对“护田”，岂“护田”亦有所出邪？有好事者为余言，一日有人面称公诗谓“自喜”云云，以为的对。公笑曰：“伊但知柳对桑为的对，然‘庚’亦是数。盖以十日数之也。余谓荆公未必有此意。使果如好事者之说，则作诗步骤，亦太拘窘矣。钱起《送屈突司马》诗云：“星飞庞统骥，箭发鲁连书。”人多称其工。余恨“庞统骥”出处无“星”字，而“鲁连书”有“箭”字也。赵给事中《晚归不遇》诗：“忽看童子扫花处，始愧夕郎题凤来。”前句不用事，后句用二事，皆非律也。

《历代诗话》五十七：《野客丛书》亦谓“护田”“排闥”皆西汉语也。余按此两语，公尝题金陵壁上，指示山谷，盖得意之句。它如“草深留翠碧，花远没黄鹂”，人只知“翠碧”“黄鹂”为精切，不知是四色也。“自喜”云云，皆足见其铢两。

《唐宋诗举要》八：此不过摘字，与《汉书》原意无关，亦盖偶合耳。石林所称，实皮肤之见。此诗佳处，决不在此。《韵语阳秋》云云，盖以《西域传》所言“护田”，与此诗无关耳。又谓有人称“五柳”“庚桑”云云，其说是也。《能改斋漫

录》卷八，谓此盖本五代沈彬诗“地隈一水巡城转，天约群山附郭来”。彬又本许浑诗“山形朝阙去，河势抱关来”。（《优古堂诗话》说同）按：此亦句法偶同耳，未必有意效之也。

送黄吉父将赴南康官

送黄吉父将赴南康官，归金溪【隋唐即临川】二首

柘冈在临川西路白云深，想子东归得重寻。亦见旧时红踯躅，花名为言春至每伤心。春至句，念乡里也。

还家一笑即芳辰，好与名山作主人。邂逅五湖乘兴往①，相邀锦绣谷中春②。

①

《国语·越语》：反至五湖，范蠡辞于王。遂乘轻舟以浮于五湖，莫知其所终极。

《史记·河渠书》“三江五湖”《正义》引韦昭曰：其实一湖，今太湖是也。

又《河渠书·正义》：游、莫、贡、菱、胥为五湖，并太湖东岸五湾。

②《庐山记》：谷中奇花异草，不可弹述。三四月间，红紫匝地，如披锦绣，故以为名。

《寄黄吉甫》：学兼文武在吾曹，别后应看虎豹韬。欲问庙堂谁镇抚，尚传边塞敢惊骚。旌旗急引飞黄下，（时发骑士南征）烽火遥传太白高。闻说荆人亦憔悴，家家还愿献春醪。（《文集》二十）

《我所思寄黄吉甫》：我所思兮在彭蠡，一奁寒晶镜千里。岸沙雪积山云委，云半飞泉挂龙尾。稍上寻源出奇诡，象图释迦祠老子。其徒翛然弃尘滓，虽未应真终适己。黄侯可与谈妙理，视弃荣官犹弊屣。每采紫芝求石髓，我欲从之勸游徙。（《文集》二）

原作三首。其三云：岁晚相逢喜且悲，莫占风日恨归迟。我如逆旅当去客，复（《诗评》中：“复”当作“后”）会有无那得知！

金陵即事三首

水际柴门一半开①，小桥分路入青苔。背人照影无穷柳，隔屋吹香并是梅。

结绮临春歌舞地，陈后主自居临春，张丽华居结绮，龚孔二贵妃居望仙，为三阁。荒蹊狭巷两三家。东风漫漫吹桃李，非复当时仗外花②。

昏黑投林晓更惊，背人相唤百般鸣③。柴门长闭春风暖，事外还能见鸟情④。

① 杜牧诗：绿树映青苔，柴门临水开。

② 李白诗：宫女如花满春殿，只今惟有鹧鸪飞。

③ 韩愈《闻莺》诗：谁人教解百般鸣？列子《黄帝篇》：太古圣人，备知万物情态，悉解异类音声。

④ 杜诗：农事闻人说，山光见鸟情。

李注：此诗吟讽不足，可入画图。

刘辰翁评：（第二首）无奇。（第三首）无名不为雅。

《石遗室诗话》十七：读荆公集竟，摘句如下：七言如：“絮飞度屋何许柳？花落填沟无数桃”；“背人照影无穷柳，隔屋吹香并是梅。”余尝语子培，荆公诗甚妖冶。子培曰：“何以言之？”余曰：“‘怊怅俯凌波，残妆坏难整。’不谓之妖冶，得乎？”（二语见《杏花》诗，《文集》一。）

《宋诗菁华录》一二两首第一首评云：荆公绝句，多对语甚工者；似是作律诗未就，化成截句。

又：余尝言荆公诗，有《世说》所称谢征西之妖冶，（见《世说·品藻》）沈子培极以为然。荆公功名士，胸中未能免俗，然饶有山林气。相业不得意，或亦气机相感邪？

《金陵》：金陵陈迹老莓苔，南北游人自往来。最忆春风石城坞，家家桃杏过墙开。（《集》三十）

午枕

午枕花前簟欲流①，日催红影上帘钩②。窥人鸟唤悠飏梦③，悠飏，言梦之远。隔水山供宛转愁④。

① 李注：簟文莹滑，如水之流。

② 杜诗：落日在帘钩。

③ 李注：陈羽诗：“迎门骚屑千家竹，隔水悠扬午夜风。”李商隐诗：“悠悠归梦惟灯见

④ 李注：孟东野诗：“清溪宛转水，修竹裴回风。”

《石遗室诗话》十七：荆公集摘句中有末二语。

泊姚江

山如碧浪翻江去②，水似青天照眼明③。唤取仙人来住此，莫教辛苦上层城④。

① 李注：《寰宇志》：余姚江在县五十步，阔四十丈，入明州。

② 又：太白诗：“下视千万峰，峰头如浪起。”

③ 又：柳诗：“洞庭春水去如天。”杜诗：“春水船如天上坐。”

④ 又《淮南子》：昆仑山上有层城，高万一千里。

《石遗室诗话》十七：荆公集摘句有首二语。

苏轼

苏轼，字子瞻，一字和仲，眉州眉山人。嘉祐二年（1057）进士，调福昌主簿。对制策，入三等，除大理评事，签书凤翔府判官。入判登闻鼓院。召试，直史馆。丁父忧。熙宁二年（1069）还朝，判官告院。权开封府推官。出判杭州，知密、徐、湖三州。以为诗谤讪，逮付台狱，谪黄州团练副使安置。筑室于东坡，自号东坡居士。移常州。哲宗立，复朝奉郎，知登州。召为礼部郎中，迁起居舍人。寻除翰林学士，兼侍读。拜龙图阁学士，出知杭州。召为翰林承旨。数月，知颍州、扬州。复召为兵部尚书，兼侍读。改礼部，兼端明殿翰林、侍读两学士。出知定州。绍圣初，贬宁远军节度副使、惠州安置。又贬琼州别驾，居儋耳。徽宗立，移舒州团练副使，徙永州。更三赦，遂提举玉局观，复朝奉郎。《苏诗编注集成》：《却扫编》曰：“立外州府观，旧惟西京崇福宫等，皆有提举管勾官。熙宁初，始诏杭州洞霄宫、成都玉局观等皆置。又增判三京留司、御史台、国子监员。盖以优士大夫之老疾不任职者，而王安石亦欲以真异议之人也。”予按宫观起于艺祖，其义乃补称京之所不逮者，故于其中设神御殿。因设提举、管勾、监丞事等官，安石纷纷妄设。乱其祖制，不通可笑。（《识余》四）建中靖国元年（1101），卒于常州，年六十六。南渡后，赠太师，谥文忠。以上据《宋史》本传子瞻诗气象宏阔，铺叙宛转，子美之后，一人而已。然用事太多，不免失之丰缛。虽其学问所溢，要亦洗削之功未尽也。而世之訾宋诗者，独于子瞻不敢轻议，以其胸中有万卷书耳。不知子瞻所重不在此也。加之，梅溪之注，斗钉其间，则子瞻之精神反为所掩。故读苏诗者，汰梅溪之注，并汰其过于丰缛者，然后有真苏诗也。

子瞻，仁宗景祐三年丙子（1036）十二月十九日乙卯时生于眉山。《宋史》本传：比冠，博通经史，属文日数千言。好贾谊、陆贽书。既而读《庄子》，叹曰：“吾昔有见，口未能言；今见是书，得吾心矣！”

又：嘉祐二年，试礼部。方时文磔裂诡异之弊胜。主司欧阳修思有以救之。得轼《刑赏忠厚论》，惊喜，欲擢冠多士。犹疑其客曾巩所为，但置第二。复以《春秋》对议居第一。殿试中乙科。后以书见修。修语梅圣俞曰：“吾当避此人出一头地。”闻者始哗不厌，久乃信服。

又：复对制策，入三等。自宋初以来，制策入三等，惟吴育与轼而已。

又：时安石创行新法。轼上书论其不便，曰：“臣之所欲言者，三言而已：愿陛下结人心，厚风俗，存纪纲。”

又：徙知湖州，上表以谢。又以事不便民者不敢言，以诗託讽，庶有补于国。御史李定、舒亶、何正言摭其表语，并媒蘖所为诗，以为讪谤，逮赴台狱，欲置之死。锻炼久之，不决。神宗独怜之，以黄州团练副使安置。三年，神宗数有意复用，辄

为当路者沮之。遂手札移轼汝州。有曰：“苏轼黜居思咎，阅岁滋深。人材实难，不忍终弃。”轼未至汝，上书自言饥寒，有田在常，愿得居之。朝奏，夕报可。

又：轼二十年间再莅杭，有德于民。家有画像，饮食必祝，又作生祠以报。

又：又贬琼州别驾，居昌化。昌化故儋耳地，非人所居，药饵皆无有。初僦官屋以居，有司犹谓不可。轼遂买地筑室，儋人运甓畚土以助之。独与幼子过著书以为乐。时时从其父老游，若将终身。

又：一时文人如黄庭坚、晁补之、秦观、张耒、陈师道，举世未之识。轼待之如朋侪，未尝以师资自予也。

又：自为举子至出入侍从，必以爱君为本。忠规谏论，挺挺大节，群臣无出其右。但为小人忌恶挤排，不使安于朝廷之上。

又：高宗即位，赠资政殿学士。孝宗寘其文左右，读之终日忘倦，谓为文章之宗。亲制集赞，赐其曾孙峤。遂崇赠太师，谥文忠。

《孔氏谈苑》：苏轼以吟诗有讥讪，言事官章疏狎上。朝廷下御史台差官追取。是时，李定为中书丞，对人叹息，以为人才难得，求一可使逮轼者，少不如意。于是太常博士皇甫僎（亦作遵。王文诰云：“僎”、“遵”通。）被遣以往。僎携一子二台卒，倍道疾驰。驸马都尉王诜，与子瞻游厚，密遣人报苏辙。辙时为南京幕官，乃亟走价往湖州报轼。而僎行如飞不可及。至润州，适以子病求医，留半日。故所遣人得先之。僎至之日，轼在告，祖无颇权州事。僎径入州解，具鞞袍、秉笏立庭下；二台卒夹侍，白衣青巾，顾盼狞恶。人心汹汹不可测。轼恐，不敢出，乃谋之无颇。无颇云：“事至于此，无可奈何，须出见之。”轼议所以服；自以为得罪，不可以朝服。无颇云：“未知罪名，当以朝服见也。”轼亦具鞞袍，秉笏立庭下。无颇与职官皆小幘立轼后。二卒怀台牒，挂其衣，若匕首然。僎又久之不语。人心益疑惧。轼曰：“轼自来殛恼朝廷多，今日必是赐死。死固不辞，乞归与家人诀别。”僎始肯言曰：“不至如此。”无颇乃前曰：“太博必有被受文字？”僎问：“谁何？”无颇曰：“无颇是权州。”僎乃以台牒授之。及开视之，只是寻常追摄行遣耳。僎促轼行；二狱卒就扎之。即时出城登舟。郡人送者雨泣。顷刻之间，拉一太守，如驱犬鸡。此事无颇目击也。

又：皇甫僎之追取苏轼也，乞逐夜所至，送所司寄禁。上不许，以为只是根究吟诗事，不消如此。其始弹劾之峻，追取之暴，人皆为轼忧之；至是，乃知轼必不死也。

《珊瑚钩诗话》：东坡死，李方叔谏之曰：“道大不容，才高为累。皇天后土，知

平生忠义之心；名山大川，还千古英豪之气。”可谓简而当矣。

《诗集》自注：仆顷以诗得罪。有诗移杭取境内所留诗。杭州供数百首，谓之“诗帐”。（周必大《二老堂诗话》：元丰己未（1079）东坡坐作诗讪谤，赴御史狱。当时所供诗案，今已印行，所谓《乌台诗案》是也。）

《明道杂志》：苏惠州尝以作诗下狱。自黄州再起，遂编历侍从。而作诗每为不知者咀味，以为有讥讪，而实不然也。出守钱塘，来别潞公，公曰：“愿君至杭少作诗，恐为不相喜者诬谤。”再三言之。临别上马。笑曰：“若还‘兴也’，便有‘笺云’。”时有吴处厚者，取蔡安州诗作注，安州遂遇祸。故有“笺云”之戏。

《舆地广记》：东坡谪惠州，有诗云，“为报先生春睡足，道人轻打五更钟。”诗传京师。章子厚曰：“苏子瞻尚尔快活？”乃贬昌化。

《瑞桂堂暇录》：东坡自海外归，人问其迁谪艰苦。东坡曰：“此骨相所招。小时入京师，有相者云：‘一双学士眼，半个配军头。异日文章虽当知名，然有迁徙不测之祸。’今悉符其语。”

《坡仙集》三十七：苏子瞻谪儋州，人以儋与瞻字相近也；子由谪雷州，人以雷字下有田字也；黄鲁直谪宜州，人以宜字类直字也：此章子厚呆谑之意。当时有术士曰：“‘儋’从立人，子瞻其尚能北归乎？‘雷’字‘雨’在‘田’上，承天之泽也，子由其未艾乎？‘宜’似‘直’字，有盖棺之意，鲁直其不返乎？”

《韵府》引志林：吾少时望见酒杯而醉，今亦能饮三蕉叶矣。

《全集》六十八：《题子明诗后》略同。鲁直跋谓：“往与东坡饮，一人家不能一大觥醉眠矣。”

《坡仙集》三十四：自谓“饮一盞而醉”。

《东皋杂录》：东坡多雅谑。

《晁氏客语》：东坡好戏谑，语言或稍过，范淳夫必戒之。东坡每与人戏，必曰：“勿令范十三知！”

《铁围山丛谈》：东坡公元祐时登禁林，以高才狎侮诸公卿，率有标目，殆遍也。独于司马温公不敢有所重轻。一日，相与共论免役差役利害，偶不合。及归舍，方卸巾弛带，乃连呼曰：“司马牛！司马牛！”

《悦生随钞》：东坡泛爱天下士，无贤不肖，欢如也。尝言上可陪玉皇大帝，下可陪卑田院乞儿。子由晦默少许可，尝戒子瞻择友。子瞻曰：“眼前见天下无一个不好人，此乃一病。”子由监筠州酒税，子瞻尝就见之。子由戒以口舌之祸。及钱之郊外，不交一谈，唯指口以示之。（《蓼花洲闲录》同）

张表臣《珊瑚钩诗话》一：东坡先生，人有尺寸之长，琐屑之文，虽非其徒，骤加奖借。如仲殊之曲，惠聪之琴，皆咨嗟叹美，如恐不及。至于士大夫之善，又可知也。观其措意，盖将揽天下之英才，提拂诱掖，教载成就之耳。

《茶余客话》：东坡生平不耽女色，而亦与妓游。凡待过客，非其人，则盛女妓；丝竹之声，终日不辍。有数日不接一谈。而过客私谓待己之厚。有佳客至，则屏妓衔杯，坐谈累夕。

《王直方诗话》：东坡平日最爱乐天之为人。故其诗云：“我甚似乐天，但无素与蛮。”又云：“吾似乐天君记取，华颠赏遍洛阳春。”又云：“他时要指集贤人，知是香山老居士。”又云：“定是香山老居士，世缘终浅道根深。”

《春渚纪闻》：晁丈无咎言：“苏公少时手抄经史，皆一通。每一书成，辄变一体，卒之学成而已。”

又：秦少章言：“公观书，夜常以三鼓为率。虽大醉归，亦必披展，至倦而寝。然自出诏狱之后，不复观一字矣。”

《老学庵笔记》：东坡在岭海间，最喜读陶渊明、柳子厚二集，谓之“南迁二友”。

《春渚纪闻》：先生尝谓刘景文曰：“某平生无快意事。惟作文章，意之所到，则笔力曲折，无不尽意。自谓世间乐事无逾此者。”

《宋史》本传：尝自谓：“作文如行云流水，初无定质，但常行于所当行，止于所不可不止。”虽嬉笑怒骂之辞，皆可书而诵之。其体浑涵光芒，雄视百代，有文章以来，盖亦鲜矣。

《坡仙集》三十四：坡少年有诗云：“清吟杂梦寐，得句旋已忘。”晚谪惠州复有一联云：“春江有佳句，我醉随渺莽。”

《书黄子思诗集后》：苏、李之天成，曹、刘之自得，陶、谢之超然，固已至矣。而李太白、杜子美以英玮绝世之资，凌跨百代，古之诗人尽废；然魏、晋以来，高风绝尘，亦少衰矣。李、杜之后，诗人继作；虽间有远韵，而才不逮意。独韦应物

、柳子厚发纤秣于简古，寄至味于淡泊，非余子所及也。

《诗颂》：冲口出常言，法度去前轨。人言非妙处，妙处在于是。字字觅奇险，节节累枝叶；咬嚼三十年，转更无交涉。

《臞翁诗评》：东坡如屈注天潢，倒连沧海，变眩百怪，终归雄浑。

元好问《论诗绝句》：奇外无奇更出奇，一波才动万波随。只知诗到苏黄尽，沧海横流却是谁！金入洪炉不厌频，精真那计受纤尘。苏门果有忠臣在，肯放坡诗百态新。

《后山诗话》：苏诗始学刘禹锡，故多怨刺；学不可不谨也。晚学太白，至其得意，则似之矣。然失于粗，以其得之易也。

《二老堂诗话》：苏文忠公诗，初若豪迈天成，其实关键甚密。

《刘后村诗话》：坡诗略如昌黎，有汗漫者，有谨严者，有丽缛者，有简淡者。翕张开阖，千变万态。盖自以其气魄力量为之，然非本色也。

《瓠北诗话》：以文为诗，自昌黎始。至东坡益大放厥词，别开生面，成一代之大观。

《二老堂诗话》：苏文忠公诗文，少重复者。惟“人生如寄耳”十数处用，虽和陶诗亦及之。盖有感于斯言。此句本起魏文帝乐府，厥后《高僧传》、《王羲之与支道林书》祖其语尔。

《朝野杂记》：孝宗在寒翠堂尝曰：“东坡以风月为无尽藏，信哉！”

《碧溪诗话》：子建称孔北海文章多杂以嘲戏。子美亦效俳谐体，退之亦有“寄诗杂诙俳”，不独文举为然。自东方生而下，称处士，张长史，颜延年辈，往往多滑稽语。大体材力豪迈有余，而用之不尽，自然如此。韩诗：“浊醪沸入口，口角如衔箝。”“试将诗义授，如以肉贯鼎。初食不下喉，近亦能稍稍。”皆谑语也。坡集类此不可胜数，皆斡旋其章而弄之。信恢刃有余，与血指汗颜者异矣。

杨时《龟山语录》卷二：为文要有温柔敦厚之气，对人主语言及章疏文字，温柔敦厚尤不可无。如子瞻诗多于讥玩，殊无惻怛爱君之意。

朱弁《风月堂诗话》：参寥与客评诗。客曰：“世间故实小说，有可以入诗者，有不可以入诗者。惟东坡全不拣择，入手便用。如街谈巷说，鄙俚之言，一经其手，

似神仙点瓦砾为黄金，自有妙处。”参寥曰：“老坡牙颊间别有一副炉鞴也，他人岂可学耶！”

王十朋注苏诗序：东坡先生之英才绝识，卓冠一世。平生斟酌经诗，贯穿子史，下至小说杂记，佛经道书，古诗方言，莫不毕究。故虽天地之造化，古今之兴替，风俗之消长，与夫山川草木禽兽、鳞介昆虫之属，亦皆洞其机而贯其妙。积而为胸中之文，不啻如长江大河、汪洋閎肆，变化万状。则凡波澜于一吟一咏之间者，讵可以一二人之学而窥其涯涘哉？

《陵阳室中语》：子瞻作诗，长于譬喻。如《和子由》诗云：“人生到处知何似？应似飞鸿踏雪泥。”《守岁》诗云：“欲知垂尽岁，有似赴壑蛇。”皆累数句也。如一联中，即“少年辛苦真食蓼，老境清闲如啖蔗”；如一句，即“雪里波稜如铁甲”之类，不可胜纪也。

《诗话》：吕丞相跋《杜子美年谱》云：“考其辞力，少而锐，壮而肆，老而严，非妙于文章，不足以至此。”余观东坡自南迁以后诗，全类子美夔州以后诗，正所谓‘老而严’者也。子由云：“东坡谪居儋耳，独善为诗，精深华妙，不见老人衰惫之气。”鲁直亦云：“东坡岭外文字，读之使人耳目聪明，如清风自外来也。”观二公之言如此，则余非过论矣。（《玉屑》十七引）

《彦周诗话》：东坡海南诗，荆公钟山诗，超然迈伦，能追李、杜、陶、谢。

《昭昧詹言》十二：坡公之诗，每于终篇之外，恒有远境，匪人所测。于篇中又各有不测之远境，其一段忽从天外插来，为寻常胸臆中所无有。不似山谷，仅能句上求远也。

《诗人玉屑》云：前人文章各自一种句法。“秋水今几竿”之类，自是东坡句法。“夏扇日在摇”，此（黄）鲁直句法也。

《漫叟诗话》云：东坡最善用事，既显而易读，又切当。

《庚溪诗话》：崇宁、大观间，蔡京当国，禁苏轼文辞墨迹而毁之。政和间，互弛其禁，求轼墨迹甚锐。一时士大夫从风而靡。光尧尽复轼官职。今上尤爱其文。乾道初，梁叔子任掖垣，兼讲席。一日宿直，召对。上因问曰：“近有赵夔等注轼诗甚详，卿见之否？”命内侍取以示之。乾道末，上遂为轼御制文集序赞，命有司与诗集同刊之。

《清波杂志》：崇宁、大观间，海外诗盛行。朝廷虽尝禁止，赏钱增至八十万，禁愈严而传愈多，往往以多相夸。士大夫不能诵坡诗，便自觉气索，而人或谓之不韵

。（《风月堂诗话》略同）

《老学庵笔记》：建炎以来，尚苏氏文章，学者翕然从之，而蜀士尤甚。亦有语曰：“苏文熟，吃羊肉；苏文生，吃菜羹。”

王文诰《诸家杂缀酌存》：黄山谷云：“东坡居士极不惜书，然不可乞。有乞书者，正色诘责之，或终不与一字。”

又云：“东坡简札，字形温润，无一点俗气。今世号能书者数家，虽规摹古人，自有长处；至于天然自工，笔圆而韵胜，所谓兼四子之有以易之，不与也。”

又云：“东坡先生尝自比于颜鲁公。以余考之，截长补短，两公皆一代伟人也。至于行、草、正书，风气皆略相似。”

又云：“古来以文章名重天下，例不工书。所以子瞻翰墨，尤为世人所重。今日市人持之以得善价；百余年后，想见其风流余韵，当万金购藏耳。”

《侯鯖录》：（黄）鲁直戏东坡曰：“昔王右军字为换鹅书，韩宗儒性饕餮，每得公一帖，于殿帅姚麟许换羊肉十数斤，可名二丈书为换羊书矣。”坡大笑。一日，公在翰苑，以圣节制撰纷冗，宗儒日作数简，以图报书；使人立庭下督索甚急。公笑谓曰：“传语本官，今日断屠！”

《韵语阳秋》五：叔党跋公书云：“吾先君子岂以书自名哉？特以其至大至刚之气发于胸中，而应之以手。故不见其有刻画妩媚之态，而端乎章甫，若有不可犯之色。少年喜二王书，晚乃喜颜平原，故时有二家风气。俗手不知，妄谓学徐浩，陋矣！”

《困学纪闻》：苏公之门，有客四人。黄鲁直、秦少游、晁无咎，则长公之客也，张文潜则少公之客也。文潜诗云：“长公波涛万顷陂，少公巉秀千寻麓。黄郎萧萧日下鹤，陈子峭峭霜中竹。秦文倩丽舒桃李，晁论峥嵘走珠玉。”可以见一时文献之盛。

梁同书《苏文忠公诗编注集成序》：公全盛时，黄山谷、陈无己、潘邠老、苏养直（庠）、韩子苍诸门人子弟，于诗已有撰述。其后赵尧卿（夔）、次公（彦材）、李德载、程季长诸人踵起，遂有四注、五注、八注、十注之作。而张南轩安国（孝祥）、吕伯恭（祖谦）、胡邦衡（铨）之流，皆有论著。至王龟龄（十朋）类聚一册，盖已几及百家矣。百家注失次，则施、顾注编之。施、顾注残佚，则查注补之，冯注合百家参之。

韩翃《苏文忠公诗编注集成序》：苏之有注，自永嘉王氏分类始，而以吴兴施氏（施元之，字德初。其子宿，字武子。）吴郡顾氏（顾禧，字景繁。）编年为正。然自元、明以来，宋刻散阙不全。至我朝，商邱宋氏（宋莘，字牧仲。）购之，毗陵邵氏（邵长蘅，字子湘。）补之，而后复行于世。嗣是海宁查氏（查慎行，字夏重。）得其影钞本，大兴翁氏（翁方纲，字覃溪。）得其宋刻本，桐乡冯氏（冯应榴，字星实。）亦见翁所藏本，皆有补注，各抒所得，不肯雷同剿说。其意或在夸多斗靡，揜驾前人；而问津苏海，不无派别。然是非损益，世固有定评也。予友王君见大，以武林名宿，宦学粤东。萃经擷史，下逮百家，亦既发为文词，取重当世。而于长公经世之学，尤所笃信。以为唐有李长源（泌）、陆敬舆，宋惟长公，不再睹矣。因尽通其所为文，复由文以通诗，遂有是编之作。计古今体诗四十五卷，帖子口号词一卷。诗之外创为《总案》，遴长公前后集，制、札、书、状、序、传、铭、记、词、赋、论、说，悉纳入之；事或未备，则佐以老苏、子由、叔党诸集，而系以诗之应入案者，合为编年。自长公始生，至于北归，综六十六年事，都为一通，厘为四十五案，以弁卷首；而分编之诗，汇收之注，咸于是取则焉。其立意也，不挠理解，不遏前功。诸注班论，惟归于是，苟有胶舛，虽子由明文，史家载笔，亦必勘正。其偏扬偏抑，委过谢过，矫驳矫眩之习，终是编不蹈一辞。

岁暮寄子由三首

岁晚相与馈问为馈岁，酒食相邀，呼为别岁，至除夜，达旦不眠为守岁，蜀之风俗如是，【合注，此数语本于周处《风土记》。】余官岐下，岁暮，思归而不可得，故为此三诗，寄子由①

馈岁

农功各已收，岁事得相佐。为欢恐无及，假物不论货。山川随出产，贫富称小大。真盘巨鲤横，发笼双兔卧。富人事华靡，采绣光翻座。贫者馈不能，微挚出春磨②。官居故人少，里巷佳节过。亦欲举乡风，独倡无人和。官居四句，《诗评》中“入情”。纪昀曰：“查初白谓归思自在言外。”

别岁

故人适千里，临别尚迟迟。人行犹可复，岁行那可追。问岁安所之，远在天一涯。已逐东流水，赴海归无时③。东邻酒初熟，西舍彘亦肥。且为一日欢④，慰此穷年悲。勿嗟旧岁别，行与新岁辞。去去勿复顾，还君老与衰。

守岁

欲知垂尽岁，有似赴壑蛇⑤。修鳞已半没，去意谁能遮。况欲系其尾⑥，虽勤知奈

何。儿童强不睡，相守夜讙哗。晨鸡且勿唱，更鼓畏添挝⑦。坐久灯烬落⑧，起看北斗斜。纪昀曰：“十字真景。”明年岂无年，心事恐蹉跎。努力尽今夕，少年犹可夸⑨。

①《总案》四：嘉祐七年壬寅（1062），公为凤翔府签判，年二十七。十二月，公以岁暮思归不得，有怀子由，寄《馈岁》、《别岁》、《守岁》诸诗。子由时留京师。

②王注：次公曰：“微挚，微斟之操挚也。”在官韵注，挚训握持。盖《周礼》“各以其贵宝为挚”是已。查注：“挚”与“贄”同。《曲礼》作“挚”。

③又：白居易诗：“去复去兮如长河，东流赴海无回波。”古乐府：“百川东到海，何时复西归？”李太白诗：“黄河之水天上来，东流到海不复回。”又：“东流不作西归水。”

④又：《列子·杨朱篇》：“舜、禹、周、孔，彼四圣者，生无一日之欢，死有万世之名。”谢灵运诗：“且尽一日娱”，韩退之诗：“无念百年，聊乐一日。”

⑤查注：李商隐《樊南甲集》：“赴壑而一去无返。”

⑥王注：《晋书·贾后传》：“后曰：‘系狗当系颈，今反系其尾。’”

⑦合注：《后汉书·祢衡传》注：“捶及挝，并击鼓杖也。”

⑧又：郑谷诗：“静灯微落烬。”

⑨王注：子仁曰：“白乐天诗：‘犹有夸张少年处，笑呼张丈唤殷兄。’”

纪昀曰：“三首俱谨严有格。”

又：此首（别岁）气息特古。

王文诰曰：“（守岁）通幅矫健。”

《栳城集》卷一有《次韵子瞻记岁暮乡俗三首》。

和子由踏青

春风陌上惊微尘，游人初乐岁华新。人闲正好路旁饮，麦短未怕游车轮。城中居人

厌城郭，喧阗晓出空四邻。歌鼓惊山草木动，簞瓢散野乌鸢驯。阮籍诗：“捐身弃中野，乌鸢为患害。”何人聚众称道人，遮道卖符色怒瞋。宜蚕使汝茧如甕②，宜畜使汝羊如麇。路人未必信此语，强为买服禳新春③。道人得钱径沽酒，醉倒自谓吾符神。

①《总案》曰：嘉祐八年癸卯（1063），公年二十八。正月，和子由《踏青》、《蚕市》二诗。

王注：次公曰：“子由《踏青诗叙》云：‘眉之东门十数里，有山曰蟆颐。山上有亭榭松竹，山下临大江。每正月人日，士女相与游嬉饮酒于其上，谓之踏青也。’”

王文诰曰：《栾城集》题作《记岁首乡俗》二首，故诗从岁首起；此意并该后篇也。

②王注：尧卿曰：“《太平广记》：园客者，济阴人。尝种五色香草，积数十年，服食其实。忽有五色蛾集香草上，客收而荐之以布，生华蚕焉。至蚕出时，有一女自来助客养蚕，亦以香草饲之。得茧百二十头。茧大如瓮。每一茧繅六七日乃尽。繅讫俱去。”

③王注：赵抃《成都古今记》：“三月三日，太守出北门，宴学射山。盖张伯子以是日上升，即此地也。男覩女巫会于此，写符篆以鬻人，云：‘宜田蚕，辟灾疫。’佩者戴者信以为然。”

纪昀曰：首尾两截，渺不相属，不喻其故。

《宋诗菁华录》：不甚高妙景物，大名家能写得恰如分际；小名家则非雅事不肯落笔矣。

苏辙《记岁首乡俗寄子瞻》二首，《踏青》云：江上冰消岸草青，三三五五踏青行。浮桥波水不胜重，野店压糟无复清。松下寒花初破萼，谷中幽鸟渐嚶鸣。洞门泉脉龙睛动，观里舟池鸭舌生。山下鉶罍沾稚孺，峰头鼓乐聚簪纓。缟裙红袂临江影，青盖骅骝踏石声。晓去争先心荡漾，莫归夸后醉纵横。最怜人散西轩静，暖暖斜阳著树明。（《栾城集》一）

戏子由

宛邱先生长如丘②。《集三十四》：《次韵赵景貺督两欧阳诗破陈酒戒》云：“千钟斯为尧，百榼斯为丘。”《集》四十一。《夜梦》：“自视汝与丘孰贤，《易》

韦三绝丘犹然。”宛邱举舍小如舟。常时低头诵经史，忽然欠伸屋打头③。斜风吹帷雨注面，先生不愧旁人羞。任从饱死笑方朔④，肯为雨立求秦优⑤。眼前勃蹊何足道，处置六凿须天游⑥。读书万卷不读律⑦，致君尧舜知无术⑧。劝农冠盖闹如云⑨，送老盐荠甘似蜜⑩。门前万事不挂眼⑪，头虽长低气不屈。余杭别驾无功劳⑫，画堂五丈容旂旄⑬。重楼跨空雨声远，屋多人少风骚骚。平生所惭今不耻，坐对疲氓更鞭箠⑭。道逢阳虎呼与言，心知其非口诺唯。居高志下真何益，气节消缩今无几。文章小技安足程⑮，先生别驾旧齐名。如今衰老俱无用，付与时人分重轻。

①《总案》六：熙宁二年己酉（1069），公年三十四。二月，还朝注官，仍居南园。王安石已专政。素恶公议论异己，仍以殿中丞直史馆，抑置官告院。而以子由为制置三司条例之属。熙宁三年庚戌（1070），公年三十五。二月，子由力诋新法，安石怒，将加以罪。陈升之解之。会张方平知陈州，辟为学官以去。

又七：熙宁四年辛亥（1071），公年三十六。正月，安石命权开封府推官，将困之以事。公决断精敏，声闻益远。二月，上神宗书。三月，再上神宗书。六月，以太常博士直史馆、通判杭州。七月出都，赴陈州。十一月二十八日，到杭州通判任，居于北厅。沈立为杭州守。时方行青苗、免役、市易，浙西兼行水利、盐法，地方骚然。公常因法以便民，民赖以少安。使者所至，发摘官吏。公以学官无吏责，作《戏子由》诗。

②施注：郑玄注《礼记》云：“先生，老人教学者。故弟子于师皆称之。”

又《史记·孔子世家》：孔子长九尺有六寸，人皆谓之长人而异之。

③王注：唐进士张彖，志气高大，未尝低折于人。尝曰：“大丈夫有凌霄盖世之志，而拘于下位，若立身于矮屋中，使人抬头不得。”遂拂衣遁于嵩山。

④又：《前汉·东方朔传》：侏儒饱欲死，臣朔饥欲死。（尚遁“侏儒长三尺余，臣朔长九尺余”之语。）

⑤施注：《史记·滑稽传》：“优旃善为笑言。秦始皇时，置酒而天雨，陛楯者皆沾寒。优旃见而哀之。居有顷，殿上上寿。优旃临槛大呼曰：陛楯郎，汝虽长，何益？幸雨立！我虽短也，幸休居！于是始皇使陛楯者得半相代。”

⑥施注：《庄子·外物篇》：“心有天游。室无空虚，则妇姑勃蹊。心无天游，则六凿相攘。”（勃蹊，反戾也。）

⑦王注：《南史》：“梁元帝之败，尽焚图书，曰：‘读书万卷，犹有今日。’”

唐沈全交《嘲诮词》：“评事不读律，博士不寻章。”

⑧施注：杜子美诗：“致君尧、舜上，再使风俗淳。”韩退之诗：“致君岂无术？自进诚独难。”

⑨王注：班固《西都赋》：“冠盖如云。”

⑩又：韩退之《送穷文》：“太学四年，朝糒暮盐。”

施注：杜子美诗：“送老白云边。”

(11)王注：韩退之诗：“吾老嗜读书，余事不挂眼。”

(12)施注：《晋书·职官志》：“州置刺史，别驾，治中，从事。”

(13)又《史记·秦始皇本纪》：作前殿阿房，上可以坐万人，下可建五丈旗

(14)合注：韩退之诗：“疲氓坠将拯。”

《总案》七：《上文侍中论榷盐书》云：“轼在余杭时见两浙之民以犯盐得罪者，一岁至万七千人，而莫能止。”又《上韩丞相论灾伤手实书》云：“轼在钱塘，每执笔断犯盐者，未尝不流涕也。”是时盐法极峻。穷民犯盐，例皆徒配。

(15)施注：杜子美贻柳少府诗：“文章一小技，于道未为尊。”《吕氏春秋》：“后世以为法程。”《文选·陆佐公新漏刻铭》：“为世作程。”

又《乌台诗案》：“任从饱死”二句，意取《东方朔传》及《滑稽传》，言弟辙家贫官卑，而身材长大，所以比东方朔，陞楯郎；而以当今进用之人，比侏儒优旃也。“读书万卷”二句，是时朝廷新兴律学，轼意非之，以为法律不足以致君于尧、舜，今时又专用法律而忘诗书。故言我读万卷书，不读法律，盖闻法律之中，无致君尧、舜之术也。“劝农冠盖”二语，以讥讽朝廷新开提举官，所至苟细生事，发谪官吏，惟学官无吏责也。“平生所惭”二句，以讥讽朝廷盐法太急也。“道逢阳虎”二句，是时张靓、俞希旦作监司，意不喜其为人，然不敢与争议，故毁诋之为阳虎也。

纪昀曰：何至以孔子自比！即以诗论，亦无此理；无论贾祸也。

子由《次韵子瞻见寄》：我将西归老故丘，长江欲济无行舟。宦游已如马受轭，衰病拟学龟藏头。三年学舍百不与，糜费廩粟常惭羞。矫时自信力不足，从政敢谓学

已优！闭门却扫谁与语！昼梦时作钧天游。自从四方多法律，深山更深逃无术。众人奔走我独闲，何异端居割蜂蜜！怀安已久心自知，弹劾未至理先屈。余杭军府百事劳，经年未见持干旄。贾生作傅无封事，屈平忧世多《离骚》。烦刑弊法非公耻，怒马奔车忌鞭箠。藐藐何自听谆谆，谔谔未必贤唯唯。求田问舍古所非，荒畦弊宅今余几？出从王事当有程，去须藩内嫌无名。扫除百忧唯有酒，未退聊取身心轻。

和子由木山引水

蜀江久不见沧浪，江上枯槎远可将。去国尚能三犊载，汲泉何爱一夫忙。崎岖好事人应笑，冷淡为欢意自长。遥想纳凉清夜永，窗前微月照汪汪。

①《总案》二：嘉祐六年辛丑（1061），公年二十六。于宜秋门内得南园，奉宫师徙居其中。宫师以木山三峰置庭前，凿池引水，约任孜与其弟伋来同游饮。老泉全集答二任诗云：“庭前三小山，本是山中楂；堂前凿方池，寒泉照谿沔。玩此可竟日，胡为踏朝衙！何当子来会，酒食相邀遮；闲居各无事，数来饮流霞？”

又五：英宗治平元年甲辰（1064），公年二十九。十二月，和子由《木山引水》。老泉全集，《木假山记》云：木之生或蘖而殤，或拱而夭。幸而至于任为栋梁，则伐。不幸而为风之所拔，水之所漂，或破折，或腐。幸而得不破折，不腐，则为人之所材，而有斧斤之患。其最幸者，漂沉汨没于湍沙之间，不知其几百年；而其激射啮食之余，或仿佛于山者，则为好事者取去，强之以为山。然后可以脱泥沙而远斧斤。而荒江之濱，为樵夫野人所薪者，何可胜数。则其最幸之中，又有不幸者焉。予家有三峰，非徒爱其似山，而又有所感焉。中峰魁岸踞肆，意气端重，若有以服其旁之二峰。二峰者，庄栗刻峭，凛乎不可犯；虽其势服于中峰，而岌然无阿附意。吁，其可以有所感也夫！

次首云：千年古木卧无梢，浪卷沙翻去似瓢。几度过秋生藓晕，至今流润应江潮。泫然疑有蛟龙吐，断处人言霹雳焦。材大古来难适用，不须郁郁慕山苗。

苏辙《木山引水》：引水穿墙接竹梢，谷藏峰底大容瓢。将流旋滴庐山瀑，已尽还来海上潮。乱点落池惊睡觉，半山含润沃心焦。瓦盆一斛何胜满，溢去犹能浸菊苗。

檐下枯槎拂荻梢，山川迢递费公瓢。幽泉细细流岩鼻，盆水瀾瀾涨海潮。但爱坚如湖上石，谁怜收自灶中焦。苍崖寒溜须佳荫，尚少冬青石茁苗。（《栲城集》二）

梅圣俞赋诗云：空山枯楠大蔽牛，霹雳夜落鱼鳧洲。鱼鳧水射几千秋，蠹肌烂髓沙荡流。苏子见之惊且喜，买于溪叟凭貂裘。

《木山》并叙：吾先君子尝蓄木山三峰，且为之记与诗。上人梅二丈圣俞见而赋之。今三十年矣。而犹子千乘又得五峰益奇。因次圣俞韵，使并刻之其侧。（《集》三十）

和子由论书

一题作“次韵子由论书”

吾虽不善书，晓书莫如我。苟能通其意，常谓不学可②。貌妍容有颦③，璧美何妨椭④。端庄杂流丽，刚健含婀娜。好之每自讥，不谓子亦颇。书成辄弃去，缪被旁人裹。体势本阔落，结束入细么⑤。子诗亦见推，语重未敢荷。迩来又学射，力薄愁官箠⑥。官箭十二把，吾能十一把箭耳。多好竟无成，不精安用伙⑦。何当尽屏去，万事付懒惰。吾闻古书法，守骏莫如跛⑧。世俗笔苦骄，众中强嵬𩇑⑨。钟张忽已远⑩，此语与时左。《诗评》中：“苟能”二句，直足以文为诗，何意不达。“端庄”二句，读此十字，知少陵“瘦硬”未是定评。裹字叶未稳。“吾闻”四句，所谓宁拙毋巧。

① 《总案》五：英宗治平元年甲辰（1064），公年二十九。时夏人大举犯边，公方有转饷之役。复观德于射圃，和子由《善射》诗。复以岐阳十五碑寄之，并和子由论书。

② 王注：尧卿曰：“鲁直常谓东坡心通，得于翰墨之外。”合注：何焯曰：“张怀瓘云：‘古之名手，但能其事，不能言其意。今仆虽不能其事，而辄言其意’，公用以发端。”

③ 邵注：《庄子·天运篇》：“西施病心而𦔐其里。”

④ 王注：次公曰“《尔雅》：‘𦔐，小而椭。’注：‘即小贝。’椭谓狭而长。”

⑤ 邵注：班彪《王命论》：“么麽不及数子。”注：“细小曰麽。”

⑥ 自注：官箭十二把，吾能十一把箭耳。合注：《考工记》：“斡胡之箝。”

⑦ 王注：《前汉书·陈涉传》：“客曰：‘伙！涉之为王沈沈者！’注：‘楚人谓多为伙。’”合注：《后汉书·马融传》：“郑君博而不精。”

⑧ 查注：《长公外纪》：“赵子固云：‘徐会稽之浊在跛偃，李北海之浊在欹斜。’”

⑨ 王注：尧卿曰：“𩇑𩇑，不安帖貌。”《说文》谓马摇头曰“𩇑”。

⑩
又：程綬曰：“钟繇、张芝也。”查注：子敬之不及逸少，犹逸少之不及钟、张。

《诸家杂缀酌存》：黄山谷云：“东坡云：‘大字难于结密而无间，小字难于宽绰而有余’，此确论也。”

又：魏了翁题跋云：“文忠公自谓作大字不如小字，虽亦有之；然其英姿杰气，有非笔墨所能管摄者，则无问大小，一也。”

苏辙《子瞻寄云岐阳十五碑》：堂上岐阳碑，吾兄所与我。吾兄自善书，所取无不可；欧阳弱而立，商隐瘦且椭；小篆妙诘曲，波字美婀娜。谭藩居颜前，何类学颜颇？魏华自磨淬，峻秀不包裹。九成刻贤俊，磊落杂么麽。英公与襄、鄂，戈戟闻自荷。何年学操笔，终岁惟箭筈。书成亦可爱，艺业嗟独伙。余虽谬学文，书字每慵惰。车前驾骐驎，车后系羸跛。逾年学举足，渐亦成駉𩇑。古人有遗迹，短不及鏤。愿从兄发之，洗砚处兄左。（《栾城集》一）

《次韵和子由闻予善射》：中朝鸾鹭自振振，岂信边隅事执戟！共怪书生能破的，也如骁将解论文。穿杨自笑非猿臂，射隼常思逐马军。观汝长身最堪学，定如髯羽便超群。（《集》四）

六月二十七日望湖楼醉书

黑云翻墨未遮山②，白雨跳珠乱入船③。卷地狂风忽吹散，望湖楼下水如天④。《南濠诗话》：“望湖亭有石刻第一首，翻作堆。”

放生鱼鳖逐人来⑤，无主荷花到处开⑥。水枕能令山俯仰，风船解与月徘徊⑦。

乌菱白芡不论钱⑧，乱系青菰裹绿盘⑨。忽忆尝新会灵观⑩，滞留江海得加餐⑪。

献花游女木兰桡⑫，细雨斜风湿翠翘⑬。无限芳洲生杜若⑭，吴儿不识楚词招⑮。

未成小隐聊中隐⑯，可得长闲胜暂闲⑰。首二句实复。我本无家更安往⑱，故乡无此好潮山。

① 《总案》七：熙宁五年壬子（1072），公年三十七，在杭州通判任。六月二十七日，登望湖楼，醉中作诗。

王注：洪朋曰：“《图经》：望湖楼一名看经楼；（太祖）乾德七年（969），忠懿王钱氏建，去钱塘一里。”查注：《西湖游览志》：“楼在昭庆寺前，一名先德楼。”

② 施注：杜子美《茅屋歌》：“俄顷风定云墨色。”

③ 又：白乐天《悟真寺诗》：“赤日闲白云。”又《三游洞序》：“水石相薄，跳珠溅玉。”

④ 施注：柳子厚《别宗一》诗：“桂岭瘴来云似墨，洞庭春尽水如天。”李贺《贝宫夫人》诗：“空光帖妥水如天。”

⑤ 王注：张栻曰：“（真宗）天禧四年（1020），太子太保判杭州王钦若奏，以西湖为放生池，禁捕鱼鸟，为人主祈福。”

⑥ 又：杜子美诗：“桃花一簇开无主。”

⑦ 施注：李太白《月下独酌》诗：“我歌月徘徊。”

⑧ 又：杜子美《峡隘》诗：“朱桔不论钱。”查注：咸淳《临安志》：“菱初生，嫩者名沙角，硬者名馄饨。湖中生如栗样者，极鲜。鸡头古名芡，又名鸡壅。今钱塘之梁渚、泓头，仁和之藕湖、临平湖，所产特佳；西湖尤胜。可筛为粉。”

⑨ 王注：韩退之诗：“平池散芡盘。”合注：刘禹锡诗：“青菰寒菽非适口。”

⑩ 施注：欧阳文忠公《食鸡头》诗：“凝祥池锁会灵园。”注云：“京师卖五岳观鸡头最佳。”查注：《汴京遗迹志》：“会灵观在南薰门外，宋（真宗）祥符五年（1012）建。初名五岳观，观成，赐名‘会灵’。南有奉灵园，东有凝祥池。”

(11) 又《史记·太史公自序》：留滞周南。古乐府《饮马长城窟行》：上有加餐饭，下有长相忆。

(12) 又：任昉《述异记》：“木兰川在寻阳江中七里州中，有鲁班刻木兰为舟，至今犹在。”唐皇甫冉《润舟南郭》诗：“萦回枫叶岸，留滞木兰桡。”

(13) 又：张志和《渔父词》：“青箬笠，绿蓑衣，斜风细雨不须归。”刘禹锡《武陵书怀》诗：“拾羽翠翘翻。”合注：《七启》：“扬翠羽之双翘。”李义山诗：“我为分行近翠翘。”皆言首饰也。

(14) 王注：屈原《九歌》：“采芳洲兮杜若，将以遗兮下女。”《遁斋闲览》云：“杜若，山姜也。”

(15) 施注：杜子美诗：“梦归归未得，不用《楚辞》招。”

(16) 王注：王康琚《反招隐》诗：“大隐隐朝市，小隐隐薜萝。”施注：白乐天《中隐》诗：“大隐住朝市，小隐入邱樊。邱樊太冷落，朝市太嚣喧；不如作中隐，隐在留司官。似出复似处，非忙亦非闲；唯此中隐士，致身吉且安。”

(17) 施注：白乐天《和裴相闲行》诗：“偷闲意味胜长闲。”查注：韩退之诗，“尽瘁年将久，公今始暂闲。”

(18) 施注：杜子美《陪郑八丈南史饮》诗：“此身那得更无家。”

张道南《苏亭诗话》十六：纪昀云：“五首皆不失风调，（其四）更饶情致。”

王文诰按：随手拈出，皆得西湖之神，可谓天才。（王本上有《和蔡准郎中见邀游西湖》三首，七古。）

《宋诗菁华录》选第二第五二首。

《栾城集》四有《次韵子瞻望湖楼上五绝》。

宿水陆寺，寄北山清顺僧二首

草没河堤雨暗村，寺藏修竹不知门。拾薪煮药怜僧病②，扫地烧香净客魂③。农事未休侵小雪，佛灯初上报黄昏。年来渐识幽居味，《临安志》“幽”作“闲”思与高人对榻论④。

长嫌钟鼓聒湖山，此境萧条却自然。乞食远村真为饱⑤，无言对客本非禅。披榛觅路冲泥入，洗足关门听雨眠。遥想后身穷贾岛，夜寒应耸作诗肩⑥。

① 《总案》八：熙宁五年壬子（1072）十月，公赴汤村开运盐河。雨中督役，夜宿水陆寺，寄怀北山清顺。

王本前有《汤村开运盐河，雨中督役》诗。查注：咸淳《临安志》：“仁和县有汤村镇市。”又云：“前沙河在菜市门外太平桥外沙河北水陆寺前入港。河通汤镇赭山岩门盐场。东坡尝于此督役开河。”

查注：《冷斋夜话》：“西湖僧清顺，字颐然，清苦多佳句。”荆公游湖上，爱之。东坡亦与游，多唱和。

《五月十日与吕仲甫……僧清顺……同泛湖于北山》（集六）查注：《西湖志》：“自宝云山葛岭栖霞岭一带，统谓之北山。以其在西湖之北也。”

② 合注：《后汉书·承宫传》：“为诸生拾薪。”温庭筠诗：“煮药石泉清。”

赵彦传《今体诗钞注略》二：补《乌台诗案》，卢秉提举盐事，开运河。轼言农事未休，而役夫千余人。故云：“盐事星火急，谁能卹农耕！”

③ 王注：潘大临曰：“《国史补》：‘韦应物性高洁，鲜食寡欲，所在焚香扫地而坐。’”

④ 合注：韦应物诗：“对榻过清夜。”

⑤ 邵注：晋陶渊明有《乞食》诗。

⑥ 又《唐书》：贾岛字浪仙，初为浮屠，名无本。韩退之有《送无本归范阳》诗。

王注：韩退之诗《石鼎联句》序：“弥明袖手竦肩而高吟。”

纪昀曰：（次首）三四放平，愈有身分。

王文诰曰：题云“是日”，必当有此（次首五六）二句，方是真境。即“乞食”“无言”一联，语中有骨，并不平也。

《栾城集》四有《次韵子瞻雨中督役夜宿水陆寺》二首。次首三四云：已因无食聊从仕，深处劳生不问禅。

饮湖上初晴后雨二首

朝曦迎客宴重冈，晚雨留人入醉乡②。此意自佳君不会，一盃当属水仙王③。湖上有水仙王庙。

水光潋滟晴方好，山色空蒙雨亦奇④。欲把西湖比西子，淡妆浓抹总相宜。

① 《总案》九：熙宁六年癸丑（1073），公年三十八。正月二十一日，病后，陈襄邀往城外寻春。有饷官法酒者；约陈襄移厨湖上。初晴复雨，山色空蒙，并记以诗

。（《总案》八：熙宁五年，沈立除审官院以去。陈襄自陈州来代。）

② 王注：援曰：“唐王绩作《醉乡记》。”

③ 查注：《西湖游览志余》：“水仙王庙在孤山南麓。”

④ 王注：《文选》谢玄晖诗：“空蒙如薄雾。”

《诗评》中：（水光二句）多少西湖诗被二语扫尽，何处着一毫脂粉颜色！

王文诰曰：此是名篇，可谓前无古人，后无来者。公凡西湖诗，皆加意出色，变尽方法。然皆在《钱塘集》中。其后帅杭，劳心灾赈，已无复此种杰构；但云：“不见跳珠十五年”而已。

《宋诗菁华录》：（选次首）后二句遂为西湖定评。

新城道中

东风知我欲山行，吹断檐间积雨声。

岭上晴云披絮帽②，树头初日挂铜钲③。

野桃含笑竹篱短，溪柳自摇沙水清。

西崦人家应最乐④，煮芹烧笋饷春耕。

① 《总案》九：熙宁六年癸丑（1073）正月二十七日，行部富阳、新城。二月，早发新城。微雨初霁，道逢西崦饷耕，欣然有作。及亭午，策马溪边，山城在望。有“细雨足时茶户喜，乱山深处长官清”句。时晁君成为令，盖美之也。

王注：唐高宗永淳元年（682），分富春西境置新城，号上县。皇朝仍之。距杭州之西南一百三十三里。

② 王注：韩退之诗：“晴云如擘絮。”杜牧诗：“晴云似絮惹低空。”《汉书·周勃传》：“勃下廷尉，太后以冒絮提文帝。”晋灼曰：“《巴蜀异志》谓头上巾为冒絮。”查注：应劭曰：“陌额絮也。”颜师古曰：“冒，覆也。老人所以覆其头。”

③ 王注：次公曰：“铜钲，今所谓锣也。”

④又：次公曰：“杜子美有《赤谷西崦人家诗》。”

纪昀曰：起有神致。三四句恶，不必曲为之讳。

范成大《新岭》诗云：“瞳瞳赤帜张，昱昱金钲上。”本此诗第四句。

本题共二首，其二云：“身世悠悠我此行，溪边委辔听溪声。散材畏见搜林斧，疲马思闻卷旆钲。细雨足时茶户喜，乱山深处长官清。人间歧路知多少，试向桑田问耦耕。”

《栞城集》五有《次韵子瞻新城道中》，系次首和作。

山村

烟雨蒙蒙鸡犬声，有生何处不安生。但教黄犊无人佩②，布谷何劳也劝耕③。

老翁七十自腰镰④，惭愧春山笋蕨甜。岂是闻韶解忘味，尔来三月食无盐⑤。

杖藜裹饭去匆匆⑥，过眼青钱转手空⑦。赢得儿童语音好，一年强半在城中⑧。

①《总案》九：熙宁六年癸丑，二月，作《山村》诗。

②王注：《汉书》：龚遂为北海太守，民有带持刀剑者，使卖剑买牛，卖刀卖犊，曰：“何为带牛佩犊？”

③又：次公曰：“布谷，鸟名，其声云然，俗云催耕鸟也。”查注：《乌台诗案》：“《山邨》第二首，言是时贩私盐者，多带刀杖，故取《前汉》龚遂事。意谓但将盐法宽平，令人不带刀剑，而买牛买犊，则自力耕，不劳劝督，以讥讽朝廷盐法太峻不便也。”

王文诰曰：本集《上文侍中论榷盐书》云：“轼在余杭时，奸民以兵杖护送，吏士不敢近者，常以数百人为辈。特不为他盗，故上下通知而不以闻耳。”可与《诗案》互证。

④查注：元结诗：“老公七十自腰镰，将引儿孙行时稼。”合注：《古乐府》：“腰镰八九月，俱在束薪中。”

⑤王注：《论语》：“子在齐闻韶，三月不知肉味。”（《述而》）

查注：《乌台诗案》：“第三首，意言山中之人饥贫无食，虽老，犹自采笋蕨充饥。时盐法太峻，僻远之人，无盐食，动经数月。若古之圣人，则能闻韶忘味，山中小民，岂能食淡而乐乎！亦以讥盐法太峻也。”

王文诰曰：本集《上文侍中论榷盐书》云：“私贩罚重而官盐贵，则民之贫而懦者，或不食盐。往在浙中，见山谷之人有数月食无盐者。”。据此文，则诗为实录矣。

⑥ 王注：《庄子·让王篇》：“原宪藜杖，应门裹饭。”

⑦ 王文诰曰：公奏状：“每见散青苗钱，则县中酒库暴增；乡民有徒手而归者，可为流涕。”

⑧ 查注：《乌台诗案》：“第四首，意言百姓虽得青苗钱，立便于城中浮费使却。又言乡村之人，一年两度复秋税，又数度请纳和预买钱，今此更添青苗助役钱。因此庄家幼小子弟多在城市，不著次第，但学得城中语音而已。以讥讽朝廷新法青苗助役不便也。”

合注：子由诗云：“似恐田家忘帝力，多差使者出催耕。”又：“近来南海波尤恶，未许乘槎自在游”等句，亦系讥讽时政，而当时独免于指摘，岂有幸有不幸耶？

纪昀曰：语多露骨，不为佳作。

本题共五首，其一云：竹篱茅屋趁谿斜，春入山村处处花。无象太平还有象，孤烟起处是人家。

其五云：窃禄忘归我自羞，丰年底事汝忧愁！不须更待飞鸢堕，方念平生马少游。

《栾城集》五有《次韵子瞻山村五绝》。

於潜女

青裙缟袂於潜女，两足如霜不穿屨②。

觶【觶角上张，一作觶用。】沙髻发丝穿柠③，蓬沓障前走风雨④。

老溷宫妆传父祖⑤，至今遗民悲故主。

苕溪杨柳初飞絮⑥，照溪画眉渡溪去。

逢郎樵归相媚妩⑦，不信姬姜有齐鲁⑧。

①《总案》九：熙宁六年癸丑，三月，行部於潜，作《於潜女》诗。

②王注：李太白诗：“屣上足如霜，不著雅头袜。”邵注：李太白诗：“一双金齿屐，两足白如霜。”

③王注：次公曰：“韩退之《月蚀》诗：‘赤鸟司南方，尾秃翹觮沙。’柠当作杼；字书柠同楮字耳，于‘丝穿’之下无义。杼，《说文》曰：‘机之持纬者。’‘丝穿杼’言鬓如丝之穿杼也。”（《苏亭诗话》五：《六书故》：“觮，角本大也。”俗谓披张为觮沙。）

④《於潜令刁同年野翁亭》自注：於潜妇女皆插大银栳，长尺许，谓之“蓬沓”。

⑤王注：厚曰：（李德载）“老溲，吴王溲也。杜牧之诗：‘老溲即山铸，后庭千蛾眉。’此指吴越王钱氏也。”查注：《晋书·陆机传》：“我父祖名播四海，宁不知耶？”杜子美诗：“塞上得阮生，迴继先父祖。”

⑥合注：《名胜志》：“苕溪源出天目山，东流临于潜界。”

⑦邵注：《旧唐书》：“太宗大笑曰：‘人言魏徵举动疏慢，我但觉其妩媚耳。’”

⑧王注：程天祐曰：“齐女姜姓，鲁女姬姓。”

纪昀曰：老溲二句，横亘中间，殊无头绪。

僧清顺新作垂云亭

江山虽有余，亭榭苦难稳。登临不得要，万象各偃蹇②。惜哉垂云轩，此地得何晚。天功争向背，诗眼巧增损③。路穷朱栏出，山破石壁狠。海门浸坤轴④，湖尾抱云巘⑤。葱葱城郭丽⑥，淡淡烟村远⑦。纷纷鸟雀去，一一渔樵返。雄观快新获，微景收昔遁。道人真古人，啸吟慕嵇阮⑧。空斋卧蒲褐，芒屨每自捆⑨。天怜诗人穷，乞与供诗本。我诗久不作，荒涩施鉏垦。从君觅佳句，咀嚼废朝饭。

①《总案》九：熙宁六年癸丑，游宝岩院，清顺新作垂云亭，记以诗。

王注：李錞曰：“《杭州图经》：宝岩院，（唐明宗）天成二年（927）钱氏建。其亭馆有借竹轩，垂云亭；亭乃诗僧清顺作。”查注：《西湖游览志余》：“东坡一

日游僧舍，壁间见小诗云：‘竹暗不通日，泉声落如雨。春风自有期，桃李乱深坞。’问谁所作。或以清顺对。即日求得之，声名顿起。”（《志林》：祥符寺清顺闍黎，予诗友也。）咸淳《临安志》：“宝岩院旧名垂云，治平二年（1065）改额。僧清顺作垂云亭借竹轩。陈述古《垂云亭》诗云：‘小亭巉绝出云间，万象升沉不得闲。莫怪诗翁头白早，时来向此写湖山。’”

②王注：次公曰：“《左传·哀公六年》：‘彼皆偃蹇’，盖傲慢不随之貌。”

邵注：《左传》注：“偃蹇，骄傲。”《楚辞·离骚》：“偃蹇”注：“高貌。”

③合注：《史记·吕不韦传》：“有能增损一字者，予千金。”

④王注：杜子美诗：“安知有苍池，万顷浸坤轴！”合注：王昌龄诗：“残月生海门。”

⑤合注：陶宏景《许长史旧馆坛碑》：“通气云巘。”

⑥王注：《后汉光武纪论》：“苏伯阿望春陵郭，喟曰：‘气佳哉！郁郁葱葱然。’”

⑦合注：“《高唐赋》：‘溃淡淡而并入。’”

⑧王注：《晋书》：“周顗于王导坐傲然啸咏。导云：‘卿欲希嵇、阮耶？’”

⑨又《孟子》注云：“拊犹叩也。织屨欲使坚，故叩之也。”

纪昀曰：次句究是趁韵。（遁韵）置之韩集，不可复辨。力摹昌黎，而气机流走，仍是本色。

雪后书北台壁二首

黄昏犹作雨纤纤，夜静无风势转严。但觉衾裯如泼水，不知庭院已堆盐②。五更晓色来书幌，半夜寒声落画檐。试扫北台看马耳③，未随埋没有双尖。

城头初日始翻鸦，陌上晴泥已没车。冻合玉楼寒起粟，光摇银海眩生花④。遗蝗入地应千尺，宿麦连云有几家⑤。老病自嗟诗力退⑥，空吟冰柱忆刘叉⑦。

①《总案》十二：熙宁七年甲寅（1074）公年三十九。九月，告下，公以太常博士直史馆，权知密州军州事，罢杭州通守任。十月，王安石为吕惠卿所排。十一月三

日，到密州任。十二月，雪后，用禁体书北台壁，并和韵。（《总案》十：熙宁六年，李师中自文登移守齐州，辟子由为掌书记。子由至齐州。）

《唐宋诗举要》六：张清源《云谷杂记》三曰：“北台在密州之北，因城为台。马耳与常山在其南。东坡为守日，葺而新之。子由因请名之曰超然台。”《清一统志》曰：“山东青州府，超然台，在诸城县北城上。”

②又《世说新语·言语篇》曰：“谢太傅寒雪日内集，与儿女讲论文义，俄而雪骤下，公欣然曰：‘白雪纷纷何所似！’兄子胡儿曰：‘撒盐空中差可拟。’兄女曰：‘未若柳絮因风起。’”白乐天《对火玩雪诗》曰：“盈尺白盐寒。”

③又：子瞻《超然台记》曰：“南望马耳、常山。”按：《水经·潍水注》曰：“潍水又东北，涓水注之。水出马耳山，高百丈，上有二石并举，望齐马耳，故世取名焉。”《大清一统志》曰：“山东青州府：马耳山在诸城县西南五十里。”

④又：王注引李德载（厚）曰：“道经以项肩骨为玉楼，眼为银海，起粟谓冻起肉上为生粟。”又引赵彦材曰：“世传王荆公常诵先生此诗，叹云：‘苏子瞻乃能使事至此。’时其婿蔡卞曰：‘此句不过咏雪之状，妆楼台如玉楼，瀾漫万象若银海耳。’荆公哂焉，谓曰：‘此出道书也。’蔡卞曾不理睬，于‘玉楼’何以谓之‘冻合’，而下三字云‘寒起粟’；于‘银海’何以谓之‘光摇’，而下三字云‘眩生花’乎？‘粟’字盖使赵飞燕（外传）‘虽寒体无軫粟’也。”方虚谷曰：“玉楼为肩，银海为眼，用道家语，然竟不知出道家何书。盖《黄庭》一种书，相传有此说。”纪（昀）曰：“此因玉楼、银海，太涉体物，故造为荆公此说，以周旋东坡。其实只是地如银海，台似玉楼耳，不必曲为之说也。”

⑤又：王注引宋正辅（援）曰：“雪宜麦而辟蝗，故为丰年之祥兆。蝗遗子于地。若雪深一尺，则入地一丈。麦得雪则滋茂而成稔岁，此老农之也语。”《齐民要术》二引汜胜之书曰：“夏至后七十日，可种宿麦。”又曰：“冬雨雪止，以物辄蔭麦上，掩其雪，勿令从风飞去；后雪，复如此。则麦耐旱多实。”《尔雅翼》一曰：“麦比他谷独隔岁种，故号宿麦。”

⑥又：郑守愚《寄题方干处士诗》曰：“暮年诗力在。”

⑦又《新唐书·刘叉传》（附《韩愈传》）曰：“叉作《冰柱》、《雪车》二诗，出卢仝、孟郊右。”《韵语阳秋》三曰：“刘叉诗酷似玉川子。《冰柱》、《雪车》二诗，虽作语奇怪，然议论亦皆出于正也。”《冰柱诗》云：“不为四时雨，徒于道路成泥粗。不为九江浪，徒能汨没天之涯。”《雪车诗》谓：“官家不知民餒寒，尽驱牛车盈道载屑玉。载载欲何之？秘藏深宫，以御炎酷。”如此等句，亦有补于时，与玉川《月蚀诗》稍相类。

《历代诗话》五十八《示儿编》：王晋之与霍辨对谈，雪盈尺。王曰：“雪太深乎？”霍曰：“看北台、马耳果何如？”左右曰：“有两尖在。”坡盖用此。

纪昀曰：徒以窄韵得名，此禁体法。

王文诰曰：五更乃迟明之时，未应遽晓，而我方疑之；复因半夜寒声，渐悟为雪也。此乃以下句叫醒上句；其所以晓色之故，出落在下句也。诗之前半，但知雨作；余均架空，乃专为此二句地，须知前半不易着手也。合注谓上云“五更”，下云“半夜”，似倒，因从《七集》本及《梁溪漫志》所载，作“半月”，以月影方半解。阑入“月”字，全局打散；无论半月无声，又与雨矛盾也。所谓“寒声”者，雪大而有声也，其根在“势转严”三字内。或恐混雨，特以“无风”二字为界。听去但若无风之雨，而所卧“衾裯如泼”，亦在严字生根。此禁体法也。读者往往不喜“堆盐”一联，纪晓岚尤诋讥之。殊不知四句必要暗落“雪”字；非合前后联观之，不知其白战之妙也。

《唐宋诗举要》六：吴（闳生）曰：“（第一首三四）得雪之神。”又：“（第二首三四）清腴可爱。”

查注：按陆放翁云：“苏文忠公雪诗，用‘尖’、‘叉’二韵，王文公有次韵诗。议者谓非二公莫能为也。吕成叔乃顿和至百篇，字字工妙，无牵强凑泊之病。”据此，则“尖”、“叉”二韵，介甫当时皆有和章，今集中所载，止“叉”字韵六首耳。至吕成叔百篇，世无一传者。古人名作，湮没何可胜道，可发一叹？

子由次韵诗云：“麦苗出土正纤纤，春早寒官令尚严。雪复南山初半岭，风干东海尽成盐。来时瞬息平吞野，积久欹危欲败檐。强付酒樽判醉熟，更寻诗句斗新尖。”“点缀偏工乱鹄鸦，淹留亦解恼船车。乘春已觉矜余力，骋巧时能作细花。僵雁堕鸱谁得罪，败墙破屋若为家！天公爱物遥怜汝，应是门前守夜叉。”（《栾城集》五）（自注：是岁京师雪尤甚，乌鸢冻死如积。）

《谢人见和前篇》二首：已分酒杯欺浅懦，敢将诗律斗深严！“渔簑”句好应须画，柳絮才高不道盐。败履尚存东郭足，飞花又舞谪仙檐。书生事业真堪笑，忍冻孤吟笔退尖。（王文诰曰：二诗语多托讽，明系答安石者，当为下年作。王注：尧卿曰：郑谷《雪诗》：“江上晚来堪画处，渔人披得一簑归。”而段赞善小笔精微，摹为图画，先生常评此诗以为村舍学中语，然以其有实事，故引用之。）

九陌凄风战齿牙，银杯逐马带随车。也知不作坚牢玉，无奈能开顷刻花。得酒强欢愁底事，闭门高卧定谁家？台前日暖君须爱，冰下寒鱼渐可叉。（《集》十二）

《载酒园诗话》：苏语（玉楼二语）不免粗豪之累。

《石林诗话》：诗禁体物语，欧阳文忠公守汝阴，尝与客赋雪于聚星堂，举此令，往往（坐客）皆搁笔不能下。然此亦定法。若能者则出入纵横，何可拘碍？郑谷：“乱飘僧舍茶烟湿，密洒歌楼酒力微。”非不去体物语，而气格如此其卑。苏子瞻“冻合……生花”，超然飞动，何害其言玉楼、银海？韩退之两篇力欲去此弊，虽冥搜奇谲，亦不免有縞带银盃之句。杜子美“暗度南楼月，寒生北渚云”，初不避云月字。若“随风且开叶，带雨不成花”，则退之两篇，殆无以逾也。

游庐山次韵章传道

尘容已似服辕驹②，野性犹同纵壑鱼③。出入岩峦千仞表，较量筋力十年初④。虽无窈窕驱前马⑤，还有鸱夷挂后车⑥。莫笑吟诗淡生活⑦，当令阿买为君书⑧。

①《总案》十三：熙宁八年乙卯（1075），公年四十。三月，游庐山，周览庐敖洞、饮酒台、圣灯岩、三泉、障日峰诸胜，并有诗。

查注：陈沂《山东志》：“庐山在诸城县东南四十五里。”

又：“章传道名传，闽人。”（《集》九）

王文诰曰：本集《超然台记》云：“其东则庐山，秦人卢敖之所从遁也。”

合注：朱存理《铁网珊瑚》载此诗帖。首行云：“轼谨次传道先生游庐山高韵。”诗末又有“阅讫幸即付去人送公粥郎中，禹功太博，明叔教授，各乞一首。轼上。”

②王注：《汉书·田蚡传》：“汉武怒内史曰：‘公平生数言魏其武安长短，今日廷论，乃局促效辕下驹！’”

施注：《文选》孔稚圭《北山移文》：“抗尘容而走俗状。”

③又：《汉书·王褒传》，褒为《圣主得贤臣颂》云：“翼乎如鸿毛遇顺风，沛乎如巨鱼纵大壑”。

④又：韩退之赠郑兵曹诗：“樽酒相逢十载前，君为壮夫我少年。樽酒相逢十载后，我为壮夫君白首。”

⑤王十朋注：引次公曰：“窈窕驱前马。”言官妓引马。

施注：《仪礼》有执烛前马。

⑥ 王十朋注：《诗》：“命彼后车。”

施注：《汉书·陈遵传》，扬雄《酒箴》：“鸱夷滑稽，腹大如壶。尽日盛酒；人复借酤。常为国器，托于属车。”

⑦ 王十朋注：《全唐诗话》：裴令公居守东洛，夜宴半酣，公索句。元、白有德色。公为破题。次至杨汝士，曰：“昔日兰亭无艳质，此时金谷有高人。”白知不能加，遽裂之，曰：“笙歌鼎沸，勿作冷淡生活。”

⑧ 又：韩退之诗：“阿买不识字，颇知书八分。诗成使之写，亦足张吾军。”尧卿曰：“或问黄鲁直，阿买是退之何人？”鲁直云：“退之侄也。”

惠崇春江晚景

竹外桃花三两枝，春江水暖鸭先知。

蒌蒿满地芦芽短，正是河豚欲上时②。

① 《总案》二十六：元丰八年乙丑（1085），公年五十。十月二十日告下，以礼部郎中（自登州）召还。十二月抵京师，至礼部郎中任。告下，迁起居舍人。

施注：《图画见闻志》：“建阳僧（慧）惠崇尤工小景。善为寒汀（江）远渚，潇洒虚旷之家，人所难到。”

查注：《集绘宝鉴》：“建阳僧惠崇工画鹅、雁、鹭鸶。欧阳公以为九僧之一也。”

合注：《宋诗纪事》：“惠崇，淮南人。”（《举要》八：崔星实曰：“一作建阳人。”）

② 翁方纲注：《王渔洋诗话》：“《尔雅》：购，蒹蒻。《释草》：郭璞注：蒹蒻，蒹蒿也，生下田，初出可啖，江东用羹鱼。故坡诗云然，非泛咏景物也。”

施注：梅圣俞《河豚》诗：“春洲生荻芽，春岸飞杨花。河豚于此时，贵不数鱼虾。”

查注：苕溪渔隐云：“按《游仙杂录》：暮春杨花飞，此鱼大肥。江、淮人脍其肉，杂蒹蒿荻芽，淪而为羹。”

《西河诗词话》引唐人诗：“花间觅路鸟先知。”论“鸭先知”之失理。

纪昀曰：此是名篇，兴象实为深妙。

王文诰曰：此乃本集上上绝句，人尽知之，而固陵毛氏独不谓然。

张道南《苏亭诗话》：画有鸭则有鸭耳。

本题共二首，其二：两两归鸿欲破群，依依还似北归人。遥知朔漠多风雪，更待江南半月春。

《西河诗话》五：诗以雅见难。若裸私布秽，则狂夫能之矣。亦以涵蕴见难。若反唇戛膊，则市牙能之矣。又以不着厓际见难。若搬榼头翻锅底，则呆儿能之矣。然则为宋诗者，亦何难何能何才技而以此夸人？吾不解也。故曰台阁不能，且为堂皇；慎勿为草野，况藩溷乎！

尝在金观察许与汪蛟门舍人论宋诗。舍人举东坡诗“春江水暖鸭先知，正是河豚欲上时。”不远胜唐人乎？予曰：“此正效唐人而未能者。‘花间觅路鸟先知’，唐人句也。觅路在人，先知在鸟，以鸟习花间故也；此‘先’，先人也。若鸭则先谁乎？水中之物皆知冷暖，必先以鸭，妄矣。且细绎二语，谁胜谁负？若第以‘鸭’字‘河豚’字为不数见，不经人道过，遂矜为过人事，则江鳊土鳖皆物色矣。”时一善歌者在坐。观察顾曰：“诗贵可歌咏。若‘河豚’句似不便咏吟。试请善歌者歌之，能脱嗓否？”各笑而罢。

《举要》八：《渔隐丛话》前集卷三十一曰：“此正是二月景致，是时河豚已盛矣。但‘欲上’之语似乎未稳。”按陈子象（岩肖）《庚溪诗话》卷下曰：“此由海而上，近海处先得之。鱼至江左，则春已暮矣。江陵、毘陵无荻芽；秣陵等处则以荻芽芼之。然则圣俞所咏乃江左河豚鱼也。”（圣俞时令建德〔池州〕据此，则河豚上时各地不同。子瞻所咏殆与圣俞同耳。

《集》十四：《和文与可洋川园池三十首·寒芦港》云：“溶溶晴港漾春晖，芦笋生时柳絮飞。还有江南风物否？桃花流水鳊鱼肥。”（鳊鱼，鲃鱼。张志和《渔父词》：西塞山边白鹭飞，桃花流水鳊鱼肥。）

读孟郊诗二首

夜读孟郊诗，细字如牛毛②。寒灯照昏花，佳处时一遭。孤芳擢荒秽，苦语余诗骚③。水清石凿凿④，湍激不受篙。初如食小鱼，所得不偿劳。又似煮彭⑤，竟日持空螯。要当斗僧清，未足当韩豪⑥。人生如朝露，日夜火消膏⑦。何苦将

两耳，听此寒虫号⑧。不如且置之，饮我玉卮醪。

我憎孟郊诗，复作孟郊语。饥肠自鸣唤，空壁转饥鼠。诗从肺腑出，出辄愁肺腑。有如黄河鱼，出膏以自煮。尚爱铜斗歌⑨，鄙俚颇近古。挑弓射鸭罢，独速短簑舞。不忧踏船翻，踏浪不踏土。吴姬霜雪白，赤脚浣白纻。嫁与踏浪儿，不识离别苦。歌君江湖曲，感我长羁旅。

①《总案》十五：熙宁十年丁巳（1077），公年四十有二。二月，告下，以尚书祠部员外郎、直史馆、徙知徐州军州事。四月二十一日到徐州任。

又十六：元丰元年戊午（1078），公年四十三。黄庭坚自京上书，并以古风为贄。作报书。

查注：《旧唐书》：孟郊少隐于嵩山，称处士。留守郑余庆辟为宾佐。性孤僻寡合。韩愈一见以为忘形之契。尝称其字曰东野，与之唱和。（《唐诗纪事》：湖州人。《全唐诗》十四：小传：湖州武康人。）

②施注：杜子美《述古》诗：“秦时任商鞅，法令如牛毛。”

③又：韩退之《忆昨行》：“危辞苦语感我耳。”

④又《毛诗》：“白石凿凿。”

⑤查注：郭璞《尔雅》注：“螾即蟛蛄也。”《本草》：“蟹之最小者名蟛蛄，音越。吴人讹为彭。”

⑥王十朋注：續曰：“（僧）指如贾岛者也。岛初为僧，名无本，诗才与郊齐名。”次公曰：“或云斗九僧之徒，亦是。”

施注：《唐书》云：“韩愈一见孟郊，为忘形交。贾岛亦韩门弟子。”

⑦又《汉书·董仲舒传》：积恶在身，犹火之销膏而人不见也。

⑧查注：《本草》：“易旦一名寒号虫。”

⑨孟郊《送淡公》十二首之三：铜斗饮江酒，手拍铜斗歌。依是拍浪儿，饮则拜浪婆。脚踏小船头，独速舞短簑。笑伊《渔阳操》，空恃文章多。闲倚青竹竿，白日奈我何！

其四：短簑不怕雨，白鹭相争飞。短楫画菰蒲，斗作豪横归。笑伊水健儿，浪战求光辉。不如竹枝弓，射鸭无是非。

其五：射鸭复射鸭，鸭惊菰蒲头。鸳鸯亦零落，彩色难相求。依是清浪儿，每踏清浪游。笑伊乡贡郎，踏土称风流。如何卯角翁，至死不裹头。

其六：师得天文章，所以相知怀。数年伊洛同，一旦江湖乖。江湖有故庄，小女啼啾啾。我忧未相识，乳养难和谐。幸以片佛衣，诱之令看斋。斋中百福言，催促西归来。

其七：伊洛气味薄，江湖文章多。坐缘江湖岸，意识（一作“织”）鲜明波。铜斗短簑行，新章其奈何！兹焉激切句，非是等闲歌。制（一作“掣”）之附驿回，勿使余风讹。

贺裳《载酒园诗话》上：宋人多不喜孟诗。严沧浪曰：“孟郊之词刻苦，读之使人不欢。”又曰：“憔悴枯槁，其气局促不伸。退之许之如此，何耶？”《青箱杂记》曰：白乐天“无事日月长，不羁天地阔”，此达者之词也。东野“出门即有碍，谁谓天地宽！”（《赠崔纯亮》云：食荠肠亦苦，强歌声无欢。）此偏狭者之词也。苏颍滨亦指此为唐人工于为诗，陋于闻道。东坡亦有读孟诗曰：“何苦……厄醪。”愚意东野实亦诉穷叹屈之词太多；读其集频闻呻吟之声，使人不欢。但“跼天”“蹐地”《雅》亦有之；“终窶且贫”，《邶风》先有此叹。且尤不可与乐天比拟。乐天二十八而中春官，屡典名郡，分司东都，刑部侍郎，领河南尹，改少傅，以尚书终。其于遇合可谓荣矣。东野穷饿，不得安养其亲；五十始得一第，才尉溧阳，又困于秃令。此其身世何如而与白较！旁观者但闻人嘻笑而遂责向隅者耶！二苏皆年少成名，虽有谪迁之悲，未历饥寒之厄，宜有此不知痛痒之言。且韩诗虽气魄胜之，而深处不及。

黄生评：诗以言志。故观其诗而其人之襟趣可知。苟戚戚于贫贱，则必汲汲于富贵。人品如此，诗品便为之不高。虽声金石而词锦绣，何足取哉！

东野诗余亦不甚喜，以为陋于闻道，诚然。贺君曲为回护，似若以其悲苦愁叹为当然者。可知贺亦徧犹之士矣。

王文诰曰：郊《闻角》诗：“似开孤月口，能说落星心”，（《集》九《晓鹤》诗有此二语）公极赏之。是所谓“佳处时一遭”也。（《全集》六十七）

又：鲁直为公所压，故变此矫崛之体。而郊之避韩亦然。是所谓“得失寸心知”者。

又：公爱鲁直而不谅孟郊，无怪纷然学鲁直者多也。不知所避何人，可发一笑。

又：或以“我憎……郊语”为谑者。答曰：是所谓恶而知其美也。著此二句，郊之地位固在，因诗笔之妙也。

郑孝胥录贞曜先生诗，其五云：毕生独吟诗，得此物外身。中有感怀篇，惻怆难具陈。玉堂悲玄鸟，故国忘星辰。素日忽经天，鸱鸢不可因。忧时匪吾事，远念何酸辛！位卑惧为罪，言孙遇益屯。春晖一终曲，忠孝两断断。咄哉眉山叟，铜斗岂足论！（《石遗室诗话》一）

中秋见月和子由

明月未出群山高，瑞光万丈生白毫②。

一杯未尽银阙涌，乱云脱坏如崩涛。

谁为天公洗眸子，应费明河千斛水③。

遂令冷看世间人，照我湛然心不起。

西南火星如弹丸，角尾奕奕苍龙蟠④。

今宵注眼看不见，更许萤火争清寒⑤。

何人舣舟临古汴，千灯夜作鱼龙变⑥。

曲折无心逐浪花，低昂赴节随歌板⑦。

青萤灭没转山前，浪飏风回岂复坚⑧。

明月易低人易散，归来呼酒更重看。

堂前月色愈清好，咽咽寒蛩鸣露草⑨。

卷帘推户寂无人，窗下呶哑惟楚老⑩。

南都从事莫羞贫，对月题诗有几人。

明朝人事随日出，恍然一梦瑶台客。

①《总案》十七：元丰元年戊午八月十一日，黄楼成。十二日，长孙箴生。本集《与李公择书》云：“某辄有一孙，体甚硕重，决可以扶犁荷锄。想公亦为我喜也。八月十二日生，名楚老。迈往南京。”（王文诰按：本集墓志作“簠”，《栾城集》墓志作“箴”，必有一误。）和子由中秋见月所寄诗。

又十五：熙宁十年丁巳（1077）八月十六日，子由赴南京留守签判任。

②王文诰曰：《唐书》：“景星庆云为大瑞，其名物六十四。”此言月未出时光无所不备也。凡日月未出，皆有此光。

③施注：卢仝《月蚀诗》：“念此日月者，太阴太阳精；皇天要识物，日月乃化生。走天汲汲劳四体，与天作眼行光明。”

又：宋之问《明河篇》：“明河可望不可亲。”

④王注：卢仝《月蚀诗》：“东方苍龙，角插戟，尾曳风。”

施注：《文选》谢惠连诗：“皎皎天河明，奕奕星宿烂。”

⑤合注：杜子美诗：“欹倾烦注眼。”

施注：《维摩经》：“无以日光等彼萤火。”

⑥又《史记·项羽本纪》：“乌江亭长舣船待。”孟康曰：“附船著岸也。”

又《汉书·西域传赞》：“曼衍鱼龙角抵之戏。”

⑦自注：是夜贾客舟中放水灯。

施注：陆机《文赋》：“舞者赴节而投袂。”杜牧之《雪溪馆》诗：“万家相庆喜秋成，处处楼台歌板声。”

⑧合注：《说文》：“飏，风吹浪动也。”李洞诗：“浪飏南山影入檐。”

⑨又：马戴诗：“咽咽阴虫叫。”

⑩自注：近有一孙名楚老。

⑪施注：韩退之集（答刘正夫诗）：“事随日生（日出事生）。 ”

王注：李公垂《莺莺歌》：“恍然梦作瑶台客。”

王文诰曰：纪昀曰：“（西南二句）就‘月明星稀’语演开，脱尽体物窠臼。”又：“（明朝句）用武元衡语，无迹。”（武《夏夜作》：夜久喧暂息，池台惟月明。无因驻清景，日出事还生。）

苏辙《中秋见月寄子瞻》：

西风吹暑天益高，明月耿耿分秋毫。

彭城闭门青蟑合，卧听百步鸣飞涛。

使君携客登燕子，月色著人冷如水；

筵前不设鼓与钟，处处笛声相应起。

浮云卷尽流金丸，戏马台西山郁蟠；

杯中绿酒一时尽，衣上白露三更寒。

扁舟明月浮古汴，回首逡巡陵谷变。

河吞巨野入长淮，城没黄流只三版；

明年筑城城似山，伐木为堤堤更坚。

黄楼未成河已退，空留遗迹令人看。

城头见月应更好，河流深处今生草。

子孙幸免鱼鳖食，歌舞聊宽使君老。

南都从事老更贫，羞见青天月照人。

飞鹤投笼不能出，曾是彭城座中客。

（《栾城集》）

东风未肯入东门

正月二十日与潘、郭二生出郊寻春，忽记去年是日同至女王城作诗，乃和前韵①

东风未肯入东门，走马还寻去岁村。

人似秋鸿来有信，事如春梦了无痕②。

江城白酒三杯酹，野老苍颜一笑温。

已约年年为此会，故人不用赋招魂③。

① 《总案》十九：元丰二年己未（1079），公年四十四。八月十八日赴台狱。十二月二十九日，准敕，责授检校尚书水部员外郎，充黄州团练副使，本州安置，不得签书公事。

又二十：元丰三年庚申（1080）二月一日，到黄州贬所，寓定惠院。五月二十九日，家累到黄，迁居临皋亭。亭在回车院中；院即监司行馆，为三司按临所居。

又二十一：元丰四年辛酉（1081）正月二十日，往歧亭（本集《与杨元素书》云：“陈季常在州界百四十里。”）潘丙、古耕道、郭邁送至女王城东禅庄院。元丰五年壬戌（1082），公年四十七。正月二十日与潘丙、郭邁（郭字兴宗，汾阳人，侨居黄州。）出郭寻春，和去年是日同至女王城诗。

王文诰曰：公与朱康叔书云：“某与潘丙解元至熟，最有文行。”

又祭任师中文云：“进士潘丙。”考丙字彦明，大临之叔也。家近东坡。公因是求得地，并营雪堂。古耕道雒阳无他长，家南陂之下，有修竹十亩。古能审音。郭邁字兴宗，侨居于黄者也。喜为挽歌辞，好义。以上三人皆朝夕相从者也。

查注：《名胜志》：“去黄州十里有永安城，俗谓之‘女王城’。初，春申君相楚，受淮北十二县之封；盖‘楚王城’之讹耳。在唐为禅庄院。”

② 施注：《礼记》：“季秋之月，鸿雁来宾。”又：白乐天诗：“来如春梦几多时。”

③ 王注：次公曰：“《楚辞》，宋玉怜哀屈原忠而斥弃，愁懣山泽，魂魄放佚，厥命将落，故作《招魂》。”

王文诰曰：纪昀曰：“三四新警。”

《正月二十日往歧亭，郡人潘、古、郭三人送余于女王城东禅庄院》：十日春寒不出门，不知江柳已摇村。稍闻决决流冰谷，尽放青青没烧痕。数亩荒园留我住，半瓶浊酒待君温。去年今日关山路，细雨梅花正断魂。

《六年正月二十日复出东门，仍用前韵》：岂惟见惯沙鸥熟，已觉来多钓石温。

赵彦传《今体诗钞》注略二：公答秦太虚书，有潘生者，作酒店樊口。棹小舟径至店下，村酒亦醇酽。

二月三日点灯会客

【王文诰曰：据诗乃正月作。】

江上东风浪接天，苦寒无赖破春妍。

试开云梦羔儿酒②，快泻钱塘药玉船③。

蚕市光阴非故国④，马行灯火记当年⑤。

冷烟湿雪梅花在，留得新春作上元。

① 《总案》二十二：元丰六年癸亥（1083），公年四十八。正月三日，临皋亭点灯会客作诗。

② 王注：次公曰：“（羔儿酒）即今之羊羔酒。”

③ 又：子仁曰：“药玉船盖以药煮石而似玉者也，可作酒杯。先生又有独酌试药玉船诗。”（诗见《集》三十四，题为《独酌试药玉滑盏》云云。王注，次公曰：“药玉之法，以锡及石末和合为之也。”）

④ 又：次公曰：“蜀中春月，村市聚为欢乐，谓之蚕市。”

施注：《成都记》：“蚕丛氏每春劝民农桑，但鬻蚕具，谓之蚕市云。”

⑤ 王注：次公曰：“马行者，东京繁华之处，夜市灯火最盛。”

施注：马行在汴京旧城之东北隅，盖鬻马之区，百贾之所会也。

王文诰曰：首二句皆正月江上气象，二三月（合注作三月）非“苦寒无赖破春妍”

时也。亦不得如合注以追忆论也。今首定为正月作。

又《栳城集》题为《记岁首乡俗寄子瞻》二首，其一《蚕市》。《九域志》云：梓州有蚕丝山。每岁上春七日，仕女游此以析蚕丝。据此，则蜀中风俗，皆以人日作蚕市也。此诗作于正月三日，故云“蚕市光阴”，无可疑矣。

又：结二句显系正月初三日所作。合注谓追忆当年景事。此诗并无本年当年界限。若如其说，则前四句皆属追忆，而次联乃指会客，情事与题不类。

《苏海识余》一：近阅《癸辛杂识》载高炳如语云：“银花以初九日来，时元宵将近，点灯会客。”而后知公以“点灯会客”为题，乃用当时熟习之语，所点信元宵灯也。其“马行灯火记当年”句乃记马行元宵之灯火。王注载马行夜市灯火最盛，脱却元宵，即失题旨。韩稚圭谓向马行头吹笛，若非妙手，不敢向马行头吹。亦见东京马行繁丽与樊楼一辙也。

书李世南所画秋景二首

野水参差落涨痕，疏林欹倒出霜根②。

扁舟一棹归何处，家在江南黄叶村。

人间斤斧日创夷③，谁见龙蛇百尺姿。

不是溪山成独往，何人解作挂猿枝④。

①《总案》二十七：哲宗元祐元年丙寅（1086），公年五十一。七月，诏差供奉官宣召入学士院。二十九：元祐二年丁卯（1087），公年五十二。七月，告下，兼侍读。

查注：《画继》：“李世南，字唐臣，安肃人。明经及第，终大理寺丞。长于山水。东坡题其秋景平远。余尝见其孙皓云，此图本寒林障，分作两轴。前三幅尽寒林，东坡所以有‘龙蛇姿’之句。后三幅尽平远，所以有‘家在江南黄叶村’之句。其实一景，而坡作两意。”

合注：《续通鉴长编》：“元祐三年二月宣德郎李世南迁一官，以详定元祐敕令式成书，推恩也。”先生二年作诗，正世南在京修书时矣。

《举要》八：《画继》载此诗，“扁舟”作“浩歌”，曰：“‘浩歌’雕本皆以为‘扁舟’。其实画一舟子张颐鼓枹，作浩歌之态。今作‘扁舟’，甚无谓也。”步

瀛案：“扁舟”字胜，邓公寿说似泥。

查注：李端叔《姑溪集》：故人李世南画秋山、林木、平远三首和韵，第一首云：“晚烟拂拂聚无痕，瘦骨稜稜已彻根。细路萦纡饥马疾，举头新月是前村。”第二首云：“曾经岁月几华夷，雨貌风颜茂晚姿。自是雪霜心共老，笔头聊复戏孙枝。”第三首云：“霜清木落见沙洲，洲上人家半在舟。射雁归来鱼满笥，瓮中先与问扶头。”又按先生原作当有洲字韵一首，今缺。

② 合注：杜子美诗：“欹倒衰年废。”

③ 邵注：创夷、疮痍同。《后汉书》：“命军吏察夷伤。”注：“金疮曰夷。”

④ 王注：李太白诗：“山光摇积雪，猴影挂寒枝。”

次韵曹辅寄壑源试焙新茶

仙山灵草湿行云，洗遍香肌粉末匀②。

明月来投玉川子③，清风吹破武林春。

要知冰雪心肠好，不是膏油首面新④。

戏作小诗君一笑，从来佳茗似佳人。

① 《总案》三十一：元祐四年己巳（1089），公年五十四。三月十六日告下，除龙图阁学士，充浙西路兵马铃辖，知杭州军州事。七月三日到杭州任。三十二：元祐五年庚午（1090），公年五十五。

施注：辅时为闽漕（福建转运判官）。

查注：黄儒《品茶要录》：“壑源在建溪。”《梦溪笔谈》：“建茶胜处曰郝源曾坑。又盂根山顶二品尤胜。李氏时号为北苑，置使领之。”

《茗溪丛话》：“北苑茶入贡之后，市无货者。惟壑源诸处私焙茶，其绝品可敌官焙。盖壑源与北苑为邻，山阜相接，才二里余。其茶香甘在私焙之上。”

② 施注：《文选》宋玉《高唐赋》：“旦为朝云，暮为行雨。”

合注：崔珣诗：“粉落香肌汗未干。”

③王注：韩退之《李花诗》：“日光赤色照来好，明月暂入都交加。夜领张徹投卢仝，乘云共至玉皇家。”又卢仝《茶诗》：“手阅月团三百斤。”

卢仝诗：一碗喉吻润。二碗破孤闷。三碗搜枯肠。四碗发轻汗。五碗肌骨清。六碗通仙灵。七碗吃不得，惟觉两腋习习清风生。

④《潜确类书》：历代贡茶皆碾末作饼，国朝始用芽茶。（刘禹锡：“添炉烹雀舌”，芽茶也。）

王注：尧卿曰：“造茶者以膏油涂之，以欺不知茶者。”共父曰：“《品茶要录》云：沙溪之园民杂以松黄饰其首面，试时虽鲜白而不能久。”子翬曰：“《茶录》：茶色贵白，而饼茶多以珍膏油其面。善别茶者以肉理润者为重。”

查注：熊蕃《北苑贡茶录》：“南唐初造研膏，继造蜡面。”

《诗评》中：结句由“膏油首面”四字来。

聚星堂雪并叙

元祐六年十一月一日祷雨张龙公，得小雪，与客会饮聚星堂。忽忆欧阳文忠公作守时，雪中约客赋诗，禁体物语，于艰难中特出奇丽。尔来四十余年莫有继者。仆以老门生继公后，虽不足追配先生，而宾客之美殆不减当时。公之二子又适在郡。故辄举前令，各赋一篇。

窗前暗响鸣枯叶，龙公试手行初雪。

暎空先集疑有无，作态斜飞正愁绝②。

众宾起舞风竹乱，老守先醉霜松折③。

恨无翠袖点横斜，只有微灯照明灭④。

归来尚喜更鼓永，晨起不待铃索掣⑤。

未嫌长夜作衣稜，却怕初阳生眼缬⑥。

欲浮大白追余赏，幸有回飙惊落屑。

模糊桧顶独多时，历乱瓦沟裁一瞥⑦。

汝南先贤有故事，醉翁诗话谁续说⑧。

当时号令君听取，白战不许持寸铁⑨。

①《总案》三十三：元祐六年辛未（1091），公年五十六。八月告下，除龙图阁学士，知颍州军州事。三十四：八月二十二日到颍州任。十月二十五日遣陈师道迨往迎张龙公，作祈雨文。（《全集》六十八，有《书颍州祷雨诗》一文。）十一月一日祷雨张龙公得小雪。与赵令畤、陈师道、欧阳棐、辩兄弟会饮聚星堂，和欧阳修禁体韵。

施注：欧阳文忠公《集古跋尾》，《张龙公碑》，唐赵耕撰，云：“君讳路斯，为宣城令，罢归。每夕出，常体冷且湿。夫人石氏异而询之。公曰：‘吾龙也。’后与九子复为龙。”（《集》三十四《祷雨张龙公诗》）

查注：王明清《挥麈后录》：“东坡撰《昭灵侯庙碑》：‘南阳张公，讳路斯，颖上人也。’”（同上）

《总案》三十四：本集《书颍州祷雨诗》云：“元祐六年十月，颍州久旱。闻颖上有张龙公神祠极灵异，乃斋戒，遣男迨与州学教授陈履常往祷之。”

又：子由所作《欧阳文忠公神道碑》，合考本集诗文，修之子成立者四人：发，承议郎。奕，光禄丞。棐字叔弼，朝奉大夫。辩字季默，承议郎。公守颍时，发、奕已下世；棐、辩居薛夫人之丧，犹未禫除。故公至皆在家也。

查注：《名胜志》：“欧阳文忠公守颍时，于州治起聚星堂。与侯官王回深父、临江刘攽贡父、州人常秩夷甫、六安焦千之伯强，为日夕燕游之所。欧阳文忠公原作诗云：‘新阳力微初破萼，客阴用壮犹相薄。朝寒稜稜风莫犯，暮云綷綷止还作。驱驰风云初惨淡，炫晃山川渐开廓。光芒可爱初日照，润泽终为和气烁。美人高堂晨起惊，幽士虚窗静闻落。酒炉成径集瓶罍，猎骑寻踪得狐貉。龙蛇扫处断复续，猊虎团成呀且攫。共贪终岁饱麴麦，岂恤空林饥鸟雀。沙墀朝贺迷象笏，桑野行歌没芒屨。乃知一雪万人喜，顾我不饮胡为乐？坐看天地绝氛埃，使我胸襟如洗滌。脱遗前言笑尘杂，搜索万象窥冥漠。颖虽陋邦文士众，巨笔人人把矛槊。自非我为发其端，冻口何由开一噱？’”

王注：《庐陵集》载《雪诗》注云：“时在颍州作。”其序曰：“玉、月、梨、梅、练、絮、白、舞、鹅、鹤、银等字，皆请勿用。”

②施注：白乐天《送兄弟回雪夜诗》：“顷刻堪愁绝。”

③ 合注：何焯曰：“杜子美诗：‘雪里江船渡，风前径竹斜。’”王注：韩退之诗：“张君名声坐所属，起舞先醉长松摧。”

④ 施注：白乐天《雪夜诗》：“对雪画寒灰，残灯明复灭。”

⑤ 王注：水公曰：“铃索掣，太守有铃阁也。”（铃阁，将帅治事之所，官府亦称之。）李太白《猛虎行》：“掣铃交通二千石。”

⑥ 施注：庾信《捣衣诗》：“花须醉眼纈。”

查注：《苕溪渔隐丛话》：“东坡诗：‘却怕初阳生眼纈’，观此则不独醉眼可也。”按《说文》：“纈，结也。”《增韵》：“文纈也。”

⑦ 王注：白乐天《雪中即事诗》：“平时山雪白模糊。”

又：韩退之《咏雪诗》：“飘飏还自弄，历乱竟谁催？”

合注：白乐天诗：“繁声注瓦沟。”《庄子·徐无鬼篇》：“譬之犹一覩也。”

《释文》又作“瞥”。《世说》：“道壹道人从都下还东山，经吴中。会雪下，曰：‘郊邑正自飘瞥，林岫便已皓然。’”

⑧ 王注：次公曰：“《三国志》多引《汝南先贤传》。今颍州，汝南之地也，故用‘汝南先贤’字。”

又：次公曰：“《庐陵集》中有《诗话》上、下一卷。诗话自醉翁始。今举文忠公前令，故云尔。”

⑨ 施注：《文选》李少卿《答苏武书》：“兵尽矢穷，人无尺铁，犹复徒首奋呼，争为先登。”

贺裳《载酒园诗话》：欧公在颍州作《雪诗》，戒不得用玉、月、鹤、银等字。后四十年，子瞻继守颍州，复举前事，请客各赋一篇。客诗不传；两公之什具在，殊不足观。固知钓奇立异，设苛法以困人，究亦自困耳。

《诗评》中：“（“众宾”二句）向非禁体物语，此等妙句亦未必出。

纪昀曰：（首四语）句句恰是小雪，体物神妙，不愧名篇。”

《昭昧詹言》十二：本色正锋。起八句樵写细景如画。“归来”四句，虚字语病。“奇丽”，公自云。

《渔隐丛话》：自二公赋诗之后，未有继之者，岂非难措笔乎？

神屠不目全

新渡寺席上次赵景貺、陈履常韵送欧阳叔弼，比来诸君唱和，叔弼但袖手旁睨而已，临别忽出一篇，颇有渊明风致，坐皆惊叹①

神屠不目全②，妙颊惟妆半③。

更刀乃族庖④，倚市必丑悍⑤。

平生魏公筹⑥，忽斫郢人堦⑦。

诗书亦何用，适道须此馆⑧。

多言虽数穷⑨，微中或排难⑩。

子诗如清风，蓼蓼发将旦⑪。

胡为久避匿，绮语真自患⑫。

许时笑我痴⑬，隔屋相咏叹。

竟识彦道不，绝叫呼百万⑭。

清朝固多士，人门子皆冠⑮。

莫言清潁水，从此隔河汉⑯。

异时我独来，得鱼杨柳贯⑰。

持归不忍食，尺素解悽断⑱。

中有清圆句，铜丸飞柘弹⑲。

春愁结凌渐，正待一笑泮。

百篇倪寄我(20)，呻吟郑人缓㉑。

①《总案》三十四：元祐六年（1091）十一月同赵令畤、陈师道至新渡寺餞送欧阳棐赴阙，作诗。

施注：赵景贶，名令畤，以承议郎签书判官，在东坡颍州幕府。为著说，改字德麟。（《集》三十四《复次韵谢赵景贶陈履常见和，兼简欧阳叔弼兄弟》）

合注：《续通鉴长编》：“元祐七年（1092），正月，右朝请郎欧阳棐为礼部员外郎，正与先生相别还京时也。”

②王注：《庄子·养生主》：“庖丁为文惠君解牛，释刀对曰：‘臣所好者道也，进乎技矣。始臣解牛之时，所见无非牛者。三年之后未尝见全牛也。今臣以神遇而不以目视。’”

③又《南史·后妃传》：梁元帝徐妃以帝眇一目，每知帝将至，必为半面妆以俟。次公曰：意取唐蒋凝应宏词，为赋止四韵，遂曳白而去。顷刻播于人口。或称之曰：“白头花钿满面，不若徐妃半妆。”

④王注：《庄子·养生主》：“良庖岁更刀，割也；族庖月更刀，折也。”

⑤王注：次公曰：“韩退之诗：‘倚市难藏拙，吹竽久混真。’”

《史记·货殖传》：夫用贫求富，……刺绣文不如倚市门。

⑥邵注：《晋书·魏舒传》：“（舒）累迁后将军，钟毓长史，毓每与参佐射，舒常为画筹而已。后遇朋人不足，以舒满数。毓初不知其善射。舒容范闲雅，发无不中。举坐愕然，莫有敌者。”

⑦《庄子·徐无鬼》：郢人垺漫其鼻端若蝇翼，使匠石斫之。匠石运斤成风，听而斫之。尽垺而鼻不伤，郢人立不失容。

⑧《论语》：可与共学，未可与适道。《诗·缁衣》：适子之馆兮。

⑨《老子》：多言数穷，不如守中。

⑩
王注：《史记》，太史公曰：“天道恢恢，岂不大哉？谈言微中，亦可以解纷。”

施注：《史记·鲁仲连传》：“为人排患释难。”《旧唐书·张濬传》：“张濬志欲排难解纷。”

(11) 王注：《汉书·李寻传》云：“日者，众阳之长，人君之表也。故曰：将旦清风发，群阴伏。”

施注：《庄子·齐物论》：“大块噫气，其名为风。作则万窍怒呿。而独不闻之寥寥乎？”

(12) 王注：厚曰：“乐天《白氏文集记》：寓兴放言，缘情绮语者，亦往往有之。”（《俱舍论》：十恶之七日绮语。”《新译》云：“杂秽语。”《大乘义章》七：“邪言不正，其犹绮色；从喻立称，故名绮语。”）

(13) 施注：陈后主诗：“见面无多日，闻名尔许时。”

王注：《晋书》：“顾恺之与谢瞻连省，夜于月下长咏。瞻每遥赞之，恺之弥自力忘倦。瞻将眠，令人代己。恺之不觉有异，遂申旦。时号痴绝。”

(14) 《晋书》八十三：“（袁）耽字彦道，少有才气，倜傥不羁，为士类所称。桓温少时游于博徒，资产俱尽，尚有负，进思自振之方，莫知所出，欲求济于耽，而耽在艰试以告焉。耽略无难色，遂变服，怀布帽，随温与债主戏。耽素有艺名，债者闻之而不相识，谓之曰：‘卿当不办作袁彦道也。’遂就局，十万一掷，直上百万。耽投马绝叫，探布帽掷地，曰：‘竟识袁彦道不？’其通脱如此。”

(15) 王注：《陈书》：“高祖谓蔡凝曰：‘我欲用义兴主婿钱肃为黄门郎，卿意何如？’凝曰：‘黄散之职，故须人门兼美，惟陛下裁之。’”

(16) 又《灵怪集》：织女谓郭於曰：“河汉隔绝，无可复知。”

(17) 《石鼓文》乙：其鱼维何？维魮维鲤。何以橐（苞）之？维杨及柳。（苞，一释贯。）

(18) 《饮马长城窟行》：呼童烹鲤鱼，中有尺素书。

(19) 施注：《西京杂记》：“长安五陵人以柘木为弹，真珠为丸，以弹鸟雀。”何逊《轻薄篇》：“柘弹隋珠丸。”车^{#143369}《驄马篇》：“柘弹落金丸。”白乐天《人觜鸟诗》：“主人憎慈鸟，命子削弹弓。弦续会稽竹，丸铸荆山铜。”（沈约称王筠诗如弹丸脱手）

(20) 施注：杜子美《八仙歌》：“李白一斗诗百篇。”

《庄子·列御寇》：“郑人缓也，呻吟（吟咏之谓）裘氏之地，只三年，而缓为儒。”

纪昀曰：“不目全”不妥。“馆”字趁韵。又：前半牵掇，后半生姿。

病中夜读朱博士诗

病眼乱灯火，细书数尘沙。

君诗如秋露，净我空中花②。

古语多妙寄，可识不可夸。

巧笑在頿頿③，哀音余掺挝④。

曾坑一掬春⑤，紫饼供千家。

悬知贵公子，醉眼无真茶。

崎岖烂石上，得此一寸芽⑥。

緘封勿浪出，汤老客未嘉⑦。

① 查注：朱博士即朱逊之。

《集》三十四：《赠朱逊之》并《引》。合注：“逊之名勃，见《志林》。”《引》云：“元祐六年（1091），九月，与朱逊之会议于颍。或言洛人善接花，岁出新枝，而菊品尤多。逊之曰：‘菊当以黄为正，余可鄙也。’昔叔向闻骊蔑一言，知其为人。予于逊之亦云。”（王文诰曰：朱勃会议乃陈州开丈八沟事。）

② 施注：《圆觉经》：“譬彼病目，见空中花及第二月。”

王注：次公曰：“诗意谓当眼昏病苦中，文书细字如尘沙之烦碎。忽得朱君之诗，清冷如露，一扫病眼之昏花。其诗是古语，而中藏妙旨，可以默识而不可以诵咏夸衒。”

③ 又：《诗·硕人》：“巧笑倩兮。”注：“倩，如口辅。”《正义》曰：“辅，

近颊也。笑之貌美在于口辅。”頰，普丁切。《广韵》：“面色。”宋玉《神女赋》：“頰薄怒以自持兮，曾不可乎犯干。”注：“頰，怒色青貌。”又，《楚辞·远游》：“玉色頰以满颜。”注：“盛气貌。”按：《楚辞》本作晚颜。王注：“面目光泽以鲜好也。”补曰：“頰，美貌，普茗、普经二切，晚，泽也，音万。”

④《后汉书·祢衡传》：衡方为《渔阳参挝》。注引《文士传》曰：“衡击鼓作《渔阳参挝》，鼓声甚悲。易衣毕，复击鼓参挝而去。至今有《渔阳参挝》，自衡始也。”又云：“参挝是击鼓之法。”

《世说新语》：衡为《渔阳参挝》。

庾信《夜听捣衣》：“声烦《广陵散》，杵急《渔阳参》。”《谈苑》祢衡《鼓歌》：“边城晏开《渔阳参》，黄尘萧萧白日暗。”徐锴云：“参，三挝鼓也。”

⑤施注：宋子安《东溪试茶录》：“佛岭东南曰曾坑，今属北苑。茶少甘而多苦，色亦重浊。”

⑥王注：陆羽《茶经》云：“上者生烂石，中者生栎壤，下者生黄土。”《茶论》云：“白茶自为一种，与常茶不同。其条敷阐，其叶莹薄。崖石之间偶然生出；所生处不过一二株耳。”

⑦查注：《茶经》：“三沸以上，水老不可食。”孟蜀人毛文锡《茶谱》：“腾波鼓浪，水气全消，谓之老汤。”《太平清话》：“蔡君谟汤取嫩不取老，盖为团饼茶发耳。”

王文诰按：纪昀曰：“忽入比体作收，常意化为新意。”今据赵次公谓，以颜色譬其诗，则巧笑起于頰颊；以音乐譬其诗，则哀音出于《参挝》。乃知比体作收之说非也。

《诗评》中：曾坑一段乃是比体。以知味况知音，世无其人，勿轻示也。

四州环一岛

行琼、儋间，肩輿坐睡，梦中得句云，千山动鳞甲，万谷酣笙钟，觉而遇清风急雨，戏作此数句①

四州环一岛②，百洞蟠其中。

我行西北隅，如度月半弓③。

登高望中原④，但见积水空。

此生当安归，回顾真途穷。

眇观大瀛海，坐咏谈天翁⑤。

茫茫太仓中，一米谁雌雄⑥。

幽怀忽破散，咏啸来天风。

千山动鳞甲，万谷酣笙钟。

安知非群仙，钧天宴未终⑦。

喜我归有期，举酒属青童⑧。

急雨岂无意，催诗走群龙。

梦云忽变色，笑电亦改容⑨。

应怪东坡老，颜衰语徒工。

久矣此妙声，不闻蓬莱宫⑩。

①《总案》三十八：哲宗绍圣元年甲戌（1094），公年五十九。十月二日，责授宁远军节度副使，惠州安置，不得签书公事贬所。四十一：绍圣四年丁丑（1097），公年六十二。四月章惇复祖述群小讪谤之说，重议公罪。十七日儋耳太守方子容来吊，出告身，责授琼州别驾，昌化军安置，不得签书公事。十九日公置家惠州，遂挈过行。抵广州，与迈处置后事。迈、过、箴、符、籀皆江边痛哭诀别。六月达琼州岸，遂赁舆行，过琼城之东郭，至澄迈。发昌化，肩舆坐睡，忽得句云：“千山……笙钟。”觉而遇清风急雨，作“四州环一岛”诗。七月二日到昌化军贬所，僦官屋数椽以居。昌化军使张中至，见官屋敝败，饬役修补，俾公安居。

②王注：次公曰：“四州，言琼、崖、儋、万也。”

查注：《元和郡县志》：“汉武帝始置珠崖儋耳二郡。”《九域志》：“广南西路琼山郡，军事治琼山县，同下州昌化军、万安军、朱崖军为四州。”《琼州志》：“黎母山在琼州南界。黎人居山四旁，内为生黎，外为熟黎。大抵四州各占岛之一陲。而山极高，洞极深，生黎之巢，人迹罕至。”

③ 合注：唐太宗诗：“弦虚半月弓。”

王文诰：“四州环一岛”者，谓五指山，生黎据其中，而四州在四隅也。自琼州由东路至北为万，再北至崖。此非公所经也。自琼州西路至北为儋，又极北为崖。公但由澄迈至儋而止。故月“如度月半弓”，象其形也。

④ 王注：阮籍《咏怀诗》：“登高望九州，悠悠分旷野。”

杜诗：万籁真笙竽。

施注：《晋书·桓温传》：“登平乘楼眺瞩中原，慨然云云。”

⑤ 《识余》曰：东坡在儋耳，因试笔尝自书云：“吾始至海南，环视天水无际，凄然伤之曰：‘何时得出此岛耶？’已而思之，天地在积水中，九州在大瀛海中，中国在少海中，有生熟不在岛者？覆盆水于地，芥浮于水，蚁附于芥，茫然不知所济。少焉水涸，蚁即径去。见其类，出涕曰：‘几不复与子相见！’岂知俯仰间有方轨八达之路乎？念此可以一笑。戊寅九月十二日与客饮薄酒小醉，信笔书此纸。”（《外纪》）

邵注：《史记·孟子传》：“驺衍谓中国名曰赤县神州。内自有九州，禹之序九州是也，不得为州数。中国外如赤县神州者九，乃所谓九州也。于是有裊海环之，人民禽兽莫能相通。乃有大瀛海环其外，天地之际焉。”

⑥ 王注：《庄子·秋水篇》：“北海若曰：‘计中国之在海内，不似稊米之在太仓乎？’”

⑦ 施注：《列子·周穆王篇》：“王及化人之宫，实以为清都紫微；钧天广乐，帝之所居。”

《史记·赵世家》：赵简子疾，五日不知人，大夫皆惧。医扁鹊视之，出，董安于问。扁鹊曰：“血脉治也，而何怪！在昔秦缪公尝如此，七日而寤。寤之日，告公孙支与子舆曰：‘我之帝所甚乐。……’”居二日半，简子寤。语大夫曰：“我之帝所甚乐，与百神游于钧天，广乐九秦万舞，不类三代之乐，其声动人心。”

《文选》：张衡《西京赋》：“昔者大帝悦秦缪公而觐之，飧以钧天广乐。”

⑧ 王注：次公曰：“青童，神仙青童君也。”

施注：《墉城集仙录》及《魏夫人传》：“夫人斋于别寝，青童来降。命东华玉女

烟景珠击西盈之钟。”

⑨ 李白：《梁甫吟》：我欲攀龙见明主，雷公砰訇震天鼓。帝旁投壶多玉女。三时大笑开电光，倏烁晦冥起风雨。阊阖九门不可通，以额扣关阍者怒。

⑩

《汉书·郊祀志》：使人入海求蓬莱、方丈、瀛州。此三神山者，其传在渤海中。

《雍录》：大明宫本太极宫之后苑，高宗改名蓬莱宫，取后蓬莱池为名。

纪昀曰：以杳冥诡异之词，抒雄阔奇伟之气，而不露圭角，不使粗豪。故为上乘。源出太白而运以己意，不袭其貌。故能各有千古。

又：（登高……途穷）有此四句一顿挫，下半首乃折宕有力。凡古诗长篇，第一要知顿挫法。

又：（举酒属青童）下，此一层烘托得好。长篇须如此展拓，方不单薄。

又：结处兀傲得好。一路来势既大，非如此收裹不住。

王文诰按：《桃榔庵铭》：“蝮蛇魑魅，出怒入娱。”与“梦云笑电”同一炉锤。盖非极困迫无聊中亦不轻出也。“妙声”句虽为找足“群仙”诸语，实乃自为评赏，赞叹欲绝也。

汲江煎茶

活水还须活火烹②，自临钓石汲深清。

大瓢贮月归春瓮，小杓分江入夜瓶。

雪乳已翻煎处脚③，松风忽作泻时声。

枯肠未易禁三碗，坐听荒城长短更④。

① 《总案》四十二：绍圣五年戊寅（1098），公年六十三。四月，章惇、蔡京遣董必至雷，按段讽所发雷守张逢等款接两公及（子由）强夺民居事。复议遣官过海治张中修伦江驿事。彭子民涕泣而谏，必悟。

至是小使赴儋，逐公出之。公无地可居，偃息城南南污池之侧，桃榔林下，就地筑

室。僇人运甓畚土以助之。客有王介石者，躬其劳辱。物器或不给，邻里咸致所有。张中来观，亦助畚鍤。事皆集。五月屋成，名曰桄榔庵。摘叶书铭，以记其处。

② 施注：《固话录》：“活火，谓炭之焰也。”

查注：《溪诗话》：“唐赵璘《因话录》载其家兵部君性嗜茶，能自煎。尝谓人曰：‘茶须缓火灸，活火煎。’坡有‘活水还须缓火煎’，恐亦如此。”施氏原注亦引此条，末云：“活火，谓炭之焰也。”

③ 王注：次公曰：“烹茶论脚者尚矣。”《茶谱》：“袁州之界桥，其茶名甚著，不若湖州之研膏紫笋，烹之有绿脚垂下也。”

施注：《茶录》：“凡茶汤多茶少则脚散，汤少茶多则脚聚。”

④ 王注：次公曰：“言其捃数之寡者为短，多者为长也。”

查注：杨诚斋极赏此诗，谓一篇之中句句皆奇，一句之中字字皆奇。

《诚斋诗话》：东坡《煎茶诗》云：“活水还须活火烹，自临钓石汲深清。”第二句七字而具五意：水清，一也。深处清，二也。石下之水，非有泥土，三也。石乃钓石，非寻常之石，四也。东坡自汲，非遣卒奴，五也。“大瓢贮月归春瓮，小杓分江入夜瓶”，其状水之清美极矣。“分江”二字，此尤难下。“雪乳已翻煎处脚，松风忽作泻时声”，此倒语也，尤为诗家妙法。即少陵“红稻啄余鹦鹉粒，碧梧栖老凤凰枝”也。“枯肠未易禁三碗，卧听山城长短更”，又翻却卢仝公案。仝吃到七碗，坡不禁三碗。山城更漏无定，“长短”二字有无穷之味。

纪昀曰：细腻而出以脱洒。细腻易于粘滞，如此脱洒为难。

澄迈驿通潮阁

余生欲老海南村，帝遣巫阳招我魂②。

杳杳天低鹧没处，青山一发是中原。

① 《总案》四十三：元符三年庚辰（1100），公年六十五。正月九日，哲宗崩，端王佖立。皇太后权同处分军国事。大赦天下。四月，叙复元祐臣僚。皇长子生，大赦天下。五月，从韩忠彦言，元祐臣僚生者蒙恩宜甄，死者诏复。七月，皇太后归政，赦天下。五月，告下，仍以琼州别驾廉州安置，不得签书公事。六月，遂与过行。宿澄迈驿，题通潮阁诗。

查注：《太平寰宇记》：“澄迈县在旧崖州西九十里。隋置县，以迈山为名。”按《志》：“县西又有澄江，故名。”《旧志》：“通潮阁一名通明阁，在澄迈县西。”

《举要》八：苏轼尝憩其上，有诗，其后胡铨和之，李光书扁。

②施注：《楚辞》宋玉《招魂》：“帝告巫阳曰：‘有人在下，我欲辅之。魂魄离散，汝筮与之。’巫阳对曰：‘掌梦上帝，其命难从。若必筮予之，恐后之谢不能复用巫阳焉。’乃下招曰：（魂兮归来！）”

③又韩退之寄元十八诗：“乘潮簸扶胥，近岸指一发。”

《举要》八：《渔隐丛话》后集卷三十曰：“《澄迈驿通潮阁诗》云：‘杳杳天低鹄没处，青山一发是中原。’《伏波将军庙碑》有云：‘南望连山，若有若无，杳杳一发耳。’皆两用之。其语倔奇，盖得意也。”

纪昀曰：（杳杳天低鹄没处，青山一发是中原。）神来之句。

本题共二首，其一：倦客愁闻归路遥，眼明飞阁俯长桥。贪看白鹭横秋浦，不觉青林没晚潮。

赠诗僧道通

雄豪而妙苦而腴②，只有琴聪与蜜殊③。【钱塘僧思聪总角善琴，后舍琴而学诗，复弃诗而学道，其诗似皎然而加雄放。安州僧仲殊，诗敏捷立成，而工妙绝人远甚。殊辟谷，常啖蜜。】

语带烟霞从古少，【李太白云：“他人之文，如山无烟霞，春无草木。”】

气含蔬笋到公无④。【谓无酸馅气也。】

香林乍喜闻薝卜⑤，古井惟惭断辘轳⑥。

为报韩公莫轻许，从今岛可是诗奴⑦。

①《总案》四十三：元符三年庚辰七月四日，至廉州贬所。八月十日，告下，迁舒州团练副使，永州居住。二十九日，公与过行。九月至广州。十月，迈、迢、簪、符、籥及家累皆至。十一月，得旨，复朝郎，提举成都玉局观，在外州军任便居住。四十五：徽宗建中靖国元年辛巳（1101），公年六十六。正月十三日，皇太后向

氏崩。以曾布为山陵使，赵挺之为御史中丞，建议绍述，复攻元祐旧臣。五月一日至金陵。黄寔寄到子由书，望公归许甚切。至仪真。闻朝局事，绍述复炽。公决议归毗陵。六月，抵毗陵。遂上表请老，以本官致仕。七月二十八日，公薨。

查注：《诗人玉屑》及《竹林诗话》皆作惠通。

王文诰按：周益公题跋作道通，并云是北归所作。

《竹坡诗话》：聪闻复，钱塘人。松园老人谓余言，东坡倅钱塘时，聪方为童行试经。坡谓坐客言，“此子虽少，善作诗。近参寥子作昏字韵诗，可令和之。”聪和篇立成，云：“千点乱山横紫翠，一钩新月挂黄昏。”坡大称赏，言不减唐人。因笑曰：“不须念经，也做得一个和尚。”是年聪始为僧。

《总案》三十三：元祐六年辛未，公年五十六。三月十八日，泊吴江。十九日晚，仲殊来见，为书琴梦事，文见本集。

《西清诗话》：东坡言僧诗要无蔬笋气，固诗人龟鉴。今时误解，便作世网中语，殊不知本分家风，水边林下气象，盖不可无。若尽洗去清拔之韵，使与俗同科，又何足尚！齐己云：“春深游寺客，花落闭门僧。”惠崇云：“晓风飘磬远，暮雪入廊深”之句，华实相副，顾非佳句耶！天圣间，闽僧可士，有送僧诗云：“一钵即生涯，随缘度岁华。是山皆有寺，何处不为家！笠重吴天雪，鞋香楚地花。他年访禅室，宁惮路歧赊！”亦非肉食者能到也。（《玉屑》二十）

②王注：刘禹锡《答柳子厚书》云：“新文吟而绎之。顾其辞甚约而味邈然以长，端而曼，苦而腴。”

③《全集》十：有《送钱塘僧思聪归孤山序》及《思聪名说》（《小童彭》九）。《坡仙集》二十四：有《答闻复上人》。又三十四：有一则过聪见赏及还俗事，同卷有仲殊一则，谓“善词书，小调尤胜”。

④查注：《石林诗话》：“近世僧学诗者极多，皆无超然自得之趣，往往掇拾摹仿士大夫所残弃。又自作一种体，格律尤俗，谓之酸馅气。子瞻有《赠惠通诗》云：‘语带烟霞从古少，气含蔬笋到公无。’尝语人云：‘颇解“蔬笋”语否？为无酸馅气也。’闻者无不失笑。”

⑤《本草纲目·木部》：“卮子花名薝卜。”苏颂曰：“卮子二三月生白花，花皆六出，甚芬香。俗说即西域薝卜也。”

《维摩经》：如入薝卜林中，唯嗅薝卜，不嗅余香。

《玄应音义》：“瞻博花或作瞻波花，亦作瞻卜，此云金色花。”《大论》云：“黄花树也。树形高大，花亦甚香，其气逐风弥远也。”

⑥ 孟郊诗：妾心古井水，波澜誓不起。

⑦ 王注：次公曰：“岛，贾岛也，初为浮屠，名无本。可则可朋也。韩退之赠无本诗而称之，故言‘莫轻许’。‘诗奴’则杜牧作李贺诗集序所谓‘奴仆命骚’之意。”无可，岛从弟。诗与岛齐名。（编者按：《唐诗纪事》卷七十四《僧可朋》：“可朋，丹稜人。欧阳炯以之比孟郊、贾岛。”）

黄庭坚

黄庭坚，字鲁直，分宁人。游灊皖山谷寺石牛洞，乐其胜，自号山谷老人。天下因称山谷，以配东坡。过涪，又号涪翁。第进士，历知太和。哲宗召为校书郎，《神宗实录》检讨，官起居舍人。除秘书丞，国史编修官。绍圣间出知宣、鄂。章、蔡论《实录》多诬，责问。条对不屈，贬涪州别驾，安置黔州。即日上道，投床大鼾，人以是贤之。徽宗起监鄂州税。历知舒州。丐郡得太平州，旋罢。尝忤赵挺之；及相，喉除名编管宜州。卒年六十一。以上本传宋初诗承唐余。至苏、梅、欧阳变以大雅。然各极其天才笔力，非必锻炼勤苦而成也。庭坚出而会萃百家句律之长，究极历代体制之变，自成一家，虽只字半句不轻出，为宋诗家宗祖。江西诗派皆师承之。以上刘克庄《江西诗派》小序史称自黔州以后句法尤高，实天下之奇作；自宋兴以来，一人而已。非规模唐调者所能梦见也。惟本领为禅学，不免苏门习气，是用为病耳。

《山谷全书》：删补《黄文节公年谱》：仁宗庆历五年乙酉（1045）公生。是岁癸未月丙寅日壬辰时公生于分宁县修水故居，盖六月十二日也。皇祐三年辛卯（1051）公年七岁，已能作诗。《桐江诗话》载公七岁作牧童诗云：“骑牛远远过前村，吹笛风斜隔岸闻。多少长安名利客，机关用尽不如君。”皇祐西年壬辰，公年八岁。《西清诗话》载公作诗《送人赴举》有云：“送君归去玉帝（《别集》作“明主”）前，若问旧时黄庭坚，谪在人间今八年。”嘉祐四年己亥（1059），公年十五岁，游学淮南。是时公母舅李公择在淮南。公择名常。

《本传》：既孤，从舅尚书李公公择学。公择尝过家塾，见其书帙纷错，因乱抽架上书问之，无不通。大惊，以为一日千里也。

《宋稗类钞》：黄鲁直年十七八时自称清风客。俞清老见而目之曰：“奇逸通脱，真骥子堕地也。”

《年谱》：嘉祐八年癸卯（1063），公年十九岁。以乡贡进士入京师。英宗治平元年甲辰（1064），公年二十岁。春以赴礼部试尝留京师。

《孙公谈圃》：黄鲁直得洪州解头，赴省试。公（指孙升）与乔希圣数人待榜。相传鲁直为省元，同舍置酒。有仆自门被发大呼而入，举三指。问之，乃公与同舍三人，鲁直不与。坐上数人皆散去，至有流涕者。鲁直饮酒自若。饮酒罢，与公同看榜，不少见于颜色。公尝为其（指山谷）妇翁孙莘老言，甚重之。后妻死，作发愿文，绝嗜欲，不御酒肉。至黔州命下，亦不少动。公在归州日，见其容貌愈光泽。留贬所累年，有见者无异仕宦时。

《年谱》：治平三年丙午（1066），公年二十二岁。是秋再赴乡举，诗以“野无遗

贤”命题。主文衡者庐陵李洵，读先生诗中两句云：“渭水空藏月，傅岩深锁烟。”击节称赏，以谓此人不惟文理冠场，异日当以诗名擅四海。见周益公（必大）跋山谷先生与李彦诚帖。彦诚名忱，盖仲同之孙。治平四年丁未，公年二十三岁。春以赴礼部试留京师，登张唐卿榜第三甲进士第，除汝州叶县尉。

《曲洧旧闻》：黄鲁直于相国寺得宋子京《唐史藁》一册，归而熟观之。自是文章日进。此无他，见其窜易句字，与初造意不同，而识其用意所起故也。

《年谱》：熙宁五年壬子（1072），公年二十八岁。试中学官，除北京国子监教授。

《本传》：熙宁中诏举四京学官。有司考其文章优等，遂除大名府国子监教授。留守太师文潞公才之，留再任。用荐者改著作佐郎。

《宋史》：山谷在大名，司马温公见之，称曰：“庭坚好学有文。”即荐引与范祖禹等同校定《资治通鉴》。

《年谱》：元丰三年庚申（1080），公年三十六岁，入京。改官，授知吉州太和县。秋自汴京归江南，十月游山谷寺。哲宗元祐元年（1086），公年四十二岁。

《宋史》：是年三月司马光荐之。元祐二年，除著作佐郎。

《垂虹诗话》：王荆公见山谷《新寨诗》：“俗学近知回首晚，病躯方觉折腰难”之句，击节称叹，谓黄某清才，非奔走吏。除北京教授，即为文潞公所知。（冲雪宿新寨忽忽不乐，《垂虹诗话》。山谷尉叶县作。《外集》二载此作，无此二语。）

《眉山集》：东坡见鲁直诗文于孙莘老座上，耸然异之，以为非今世之人也。孙莘老言“此人人知之者少，子可为称扬之。”东坡笑曰：“此人如精金美玉，不即人而人即之，将逃名而不可得，何以我称扬为。”又云：“超轶绝尘，独立万物之表；馭风骑气，以与造物者游。”其举自代疏云：“瑰玮之词，妙绝当世；孝友之行，追配古人。”

《本传》：（庭坚）事母孝，有曾闵之行。安康（郡太君）卧疾弥年，公昼夜视颜色，手汤剂，衣不解带，时其疾痛痼痒而敬抑搔之；至亲滌厕，浣中裙云。遭母丧，哀毁过人，得疾几殆。既还葬，因庐墓侧终丧。先是苏公尝荐公自代，其略曰：“瑰玮之文，妙绝当世；孝友之行，追配古人。”世以为《实录》云。

《宋稗类钞》：富郑公初甚欲见黄山谷。及一见，便不喜。语人曰：“将谓黄某如

何，原来只是分宁一茶客！”

《挥麈后录》：明清兄弟儿时，先妣制道服，先人云：“须异于俗人者乃佳。旧见黄太史鲁直所服绝胜。”时在临安，呼匠者教令染之，久之始就，名之曰“山谷褐”。数十年来，则人人敷之，几遍国中矣。

《本传》：元祐中眉山苏公（轼）号文章伯。当是时，公（坚）与高邮秦少游、宛丘张文潜、济源晁无咎皆游其门，以文相高，号四学士。一文一诗出，人争传诵之，纸价为高。而公（坚）之文尤绝出高妙，追古冠今，烛后辉前。晚节位益显，名益高，世以配眉山苏公，谓之苏、黄。

又：先是眉山苏公子瞻见公（坚）诗于孙公莘老家，绝叹，以为世久无此作矣。因以诗往来。会苏公以诗抵罪，公（坚）亦罚金。

文乃翁《马洲山谷祠记》：其定交苏文忠公也，先之以《江梅》、《青松》二诗以寄意。至谓“但使本根在，弃捐果何伤！”师友之所相规儆者，非植党也。任注目录首列古风二首，云：东坡守徐州，山谷教授北京，初通书，并以此二诗寄意。东坡亦有报书及和章。以东坡集考之，盖元丰元年（1078）。洪炎編集，取此二篇冠诗之首。

《年谱》：元祐三年戊辰（1088），公年四十四岁。正月东坡知贡举，先生为参详。五月诏新除著作郎。黄庭坚依旧著作佐郎，以御史赵挺之论，故有是命。

《本传》：朝廷数议除美官，为言事者所梗，不果。

周必大《分宁县学山谷祠堂记》：中间翱翔馆殿才六年耳。右史之拜，复为韩川沮止。

范公偁《过庭录》：黄鲁直少轻物，与赵挺之同校举子一文卷，使“蟒蛇”。挺之欲黜之，诸公尽然，鲁直独相持。挺之诚其言，问曰：“公主此文，不识二字出何家。”鲁直良久曰：“出《梁武忏》。”赵以其侮己，大衔之。

《挥麈后录》：赵正夫丞相元祐中与黄太史鲁直俱在馆阁，鲁直以其鲁人，意常轻之。每庖吏来问食次，正夫必曰：“来日吃蒸饼。”一日聚饭行令，鲁直云：“欲五字从首至尾各一字，后合成一字。”正夫沉吟久之，曰：“禾女委鬼魏。”鲁直应声曰：“来力勅正整”，叶正夫之音。阖坐大笑。正夫又尝曰：“乡中最重润笔，每一志文成，则太平车中载以赠之。”鲁直曰：“想俱是萝卜与瓜瓞尔。”正失衔之切骨。其后排挤不遗余力，卒致宜州之贬。

《本传》：公（坚）风韵洒落，胸中恢疏，初无怨恩，谈笑谐谑，或以忤物。盖尝忤赵丞相正夫，而公（坚）不屑也。

周季凤《山谷黄先生别传》：移监德州德平镇。赵挺之倖德州。挺之希合提举官（黄《谱》十八：按《国史》，元祐三年十月苏轼言云云。提举官名杨景棻。）意，欲行市易法。先生以镇小民穷，不堪诛求，若行市易，必致星散。迁奉议郎。（《年谱》：元祐三年，挺之有憾于公，以德平镇日不肯奉承行市易事。）哲宗立，召为校书郎，《神宗实录》检讨官。礼部侍郎陆佃预修《实录》。（另《谱》，限一年成书。）先生欲书安石“勿令上知”之帖，佃力沮止之，而以为谤也。先生争辩甚苦。至曰：“审如公言，得非佞史乎？”（见陈纬《议谥》，与吕惠卿帖。）佃盖安石门人，且为官长；以是竟不得书，先生以此肇祸。然赖其言，事之本末因以尽传于世，朱子以为有天意者邪？

《别传》：说经虽尊荆公而遗程子。苏、程学术不同，其徒互相攻诋。先生独超然其间，无一语党同。

《渔隐丛话》：山谷在馆时，自号所居曰退听堂。（诗《内集》目录：堂在汴京醴池寺南。然此堂名，此后随所在揭之。）

《元祐党人传》卷四，《过庭录》等载：章惇、蔡卞与群奸论《实录》诋诬，俾前史官分居畿邑以待。摘千余条示之，谓为无验证。继而院吏考阅，悉有据依。所余才三十二事，殊细琐。庭坚书铁爪治河有同儿戏。至是首问焉。对曰：“庭坚时官北都，亲见之，真儿戏耳。”凡有问皆直辞以对。闻者壮之。（陈澧《辨疑》称为濬川耙，荆公所作。《外集·大同尧民游灵源庙》之一注，初选人李公义请为铁龙瓜，内侍黄怀信以为未尽，更为濬川耙，谓禹所用濬川者也，时王安石为相，信其说，乃置濬川司。本《名臣言行录》。又事具仲贲跋《承天塔记》。）

黄《谱》二十七：元符元年戊寅（1098），春初山谷在黔南以避外兄张向之嫌，迁戎州。按《实录》：绍圣四年（1097）三月，知宗正丞张向提举夔州路常平。十二月壬寅，诏庭坚移戎州安置。

《别传》：自涪归，道出江陵。作《承天院塔记》。其略云：“儒者尝论一佛寺之费盖中民万家之产，实生民谷帛之蠹。虽余亦谓之然。然自省事以来，观天下财力屈竭之端。国家无大军旅，勤民丁赋之政，则蝗旱水溢或疾疫连数十州。此盖生人之共业，盈虚有数，非人力所能胜者。”（下云：然天下之善人少，不善人常多，王者之刑赏以治其外，佛者之祸福以治其内，则于世教岂小补哉？苟儒者尝欲合而轧之，是真何理哉？《全书》别集二）文成，府帅马瑊饭诸部使者于塔下。环观先生书碑。尾但书作记者黄某，立石者马某而已。时闽人陈举，自台出漕，先生未尝与交也。举与李植、林虞相顾前请曰，某等愿托名不朽。先生不答。举由此憾之。

（举自台察出为转运判官，坚朝奉郎新知舒州事，荏平马城承议郎知府事，李植转运判官，林虞提举常平。）知先生与挺之有怨，挺之执政，遂以墨本上之，诬以幸灾谤国。其文初无幸谤之意。遂除名羁管宜州。

《程史》：党祸既起，山谷居黔，有人以屏图遗之者，绘双蝶翩舞，冒以珠丝，而队蚁憧憧其间。题六言于上曰：“胡蝶双飞得意，偶然毕命网罗。群蚁争收堕翼，策勋归去南柯。”崇宁间，又迁于宜。图偶为人携入京，鬻于相国寺肆，蔡（元长）客得之，以示元长。元长大怒，将指为怨望，重其贬。会以讞奏，仅免。

《冷斋夜话》：鲁直南迁，年已六十。亲故忧其祸大，又南方瘴雾，非菜肚老人所宜。鲁直笑曰：“宜州者，所以宜人也。”

洪炎《序》：谪黔戎时，或曰涪幡。在黔中又号黔安居士。至宜州又号八桂老人。

杨万里《宜州新豫章先生祠堂记》：山谷之贬宜州，崇宁甲申（1104）也，馆于城之戍楼曰小南门者。明年卒焉。予闻山谷之始至宜州也，有毗某氏馆之，太守抵之罪。有浮图某氏馆之，又抵之罪。有逆旅某氏馆之，又抵之罪。馆于戍楼，盖圉之也。卒于所馆，盖饥寒之也。

山谷《跋李资深书卷》：余谪宜州半载，官司谓不当居关城内。乃抱被入宿子城南予所僦舍喧寂斋。虽上雨旁风，市声喧聒，人不堪其忧；余以为家本农桑，使不从进士，则田间庐舍如是。既设卧榻，焚香而坐，与西邻屠牛之机相直。用三文买鸡毛笔书此。

《道山清话》：山谷在宜州，服紫霞丹，白云得力。

《韵语阳秋》十七：山谷平生为目所苦。故知东坡诗有“请天还我读书眼，欲载轩轅乞鼎湖”之句。其摄养禁忌之法，论之详矣。故《次韵元实病目诗》云：“道人常恨未灰心，儒士苦爱读书眼。要须玄览照镜空，莫作白鱼钻蠹简。”

山谷诗见《内集》云：题为《子瞻以子夏、丘明见戏，聊复戏答》。子瞻诗云：“诵诗得非子夏学，紬史正作丘明书。天公戏人亦薄相，故令幻翳生明珠。”

《程史》：太府丞余伯山（禹绩）之六世祖若著倅宜州日。固山谷谪居是邦，慨然为之经理舍馆，遂遣二子滋、汧从之游。一日，携纸求书。山谷问以所欲。拱而对曰：“先生今日举动，无愧东都党锢诸贤，愿写范孟博一传，许之。”遂默诵大书，尽卷仅有二三疑误。二子相顾愕服。山谷顾曰：“《汉书》固非能书记也，如此等传，岂可不熟？”

《老学庵笔记》：范寥言：鲁直至宜州，州无亭骚，又无民居可僦，止一僧舍可寓，而适为崇宁万寿寺，法所不许。乃居一城楼上，亦极湫隘。秋暑方炽，几不可过。一日，忽小雨。鲁直饮薄醉，坐胡床，自栏楯间伸足出外以受雨，顾谓寥曰：“信中，吾平生无此快也。”未几而卒。

《别集》：《濂溪诗序》云：“春陵周茂叔人品甚高，胸中洒落，如光风霁月。”（史容注谓诗为太和所作）

清宋调元《黄文节公犀津专祠记》：昔濂溪以主簿来宁，先生日就讲学，尊且信，曰：“光风霁月。”

太常寺（陈纬）议谥（恭帝德祐元年（1275）：濂溪周夫子阐明道学，上接孔、孟不传之秘。世固鲜有知者。虽以清献赵公（抃），亦几失之眉睫之间。（本《濂溪诗序》）而潘公兴嗣铭其墓，又止以善谈明理称之。惟公知其“人品甚高”，“光风霁月”（本朱子），用一语独能形容有道者气象。

《晁氏客语》：申公薨，范纯夫托山谷草遗表。表成不用。又尝托山谷草司马公休谢起碑楼表，窜改止余数字，以示山谷。略无忤色，但逊谢而已。

洪炎《豫章黄先生退听堂录序》：大抵鲁直于文章天成性得，落笔巧妙，他士莫逮。而尤长于诗。其发源以治心修性为宗本，放而至于远声利，薄轩冕；极其致，忧国爱民，忠义之气，藹然见于笔墨之外。

考功郎（赵景伟）复议：抑常遯先生心事而得其所以本然者。炉香隐几，万虑俱消；（《内集》五；贾天锡惠宝薰，乞诗，予以“兵卫森画戟，燕寝凝清香”十字作诗报之，其一云：“险心游万仞，躁欲生五兵。隐几香一炷，灵台湛空明。”）木落江澄，本根独在。（《外集》十一：登快阁有云：“落木千山天远大，澄江一道月分明。”）其遗物自得，虽“复却万方陈乎前不足入其室”。（《庄子》语）

宋文乃翁《马洲山谷祠记》：“炉香隐几，灵台空明”，养心莫善于寡欲之意也。“落木千山天远大，澄江一道月分明”，克己复礼归仁之学也。

《别传》：“炉香隐几，万虑俱消。”有孟氏养心之学。“木落江澄，本根独在。”有颜子克复之功。

周季风《黄先生全书序》：王直方谓其文邈然有二汉之风。陈无己谓其诗学杜甫而不为者。苏子瞻谓其行追配古人。余禹绩诸人谓其饥寒穷死，无愧东都党锢。是诚宋人也哉？又宋儒黄伯起称其著作合周、孔者居多，而流于庄周者无几，其语人曰：“读其书而不于其本心之正大不可泯者求之，岂惟不足以知之，恐亦自误。”予

故还之以告人。人不知以为何如？

清陈澧《辨疑》：世谓山谷著述先《庄子》而后《论》、《孟》。其说盖本公集中《庄子内篇论》在前，《论孟断篇》居后。以文章之次第议学问之醇疵，何其谬乎？公之尊崇孔孟，全集具在。而所称庄子，仅见于黄几复诗并墓志两篇。

《山谷外集诗注目录》：山谷自言欲仿庄周分其诗文为内外篇，意因有在，非去此取彼。

黄子耕曰：紫阳朱子云：“鲁直学以粗为向上，其诣力多得之释氏。”又云：“吾道千载不传之秘，至周子而后传。当时知其人品者惟山谷焉。谓山谷为不知道不可也。”又尝谓《东都事略》，叹曰：“黄氏在史馆时事，惜好处不尽著于世。”

明张元桢叙《山谷老人刀笔》云：此老教人动以制行、动以穷经为本，而又知著向上向里工夫。虽落于空寂，然亦高出乎鹜于字词绮语者。

明徐岱《黄先生全书序》：或云文伤元气，而直取其诗。或云诗及婢妮而性类于禅。禅学之尚，或有所托耳。

《辨疑》：世或以山谷通内典、交缁衣为嫌者，亦学究之迂谈也。二教溯其源总不外于一诚。说玄说空，无非不睹不闻时心境。道者曰耳目盗心，佛者曰六根六贼，与孔子克己之训互相发明。公事内典，实以其辅掖圣教，明心见性，通儒之学也。至于结纳僧禅，尤其取益之地。公昔不解“吾无隐乎尔”之义，问晦堂。时岩桂正放，堂曰：“闻木犀香否？”公曰：“闻。”堂曰：“吾无隐乎尔。”（《罗湖野录》：晦堂请山谷诠释而不然其说。）公少作诗多艳语（《扈虱新语》作“艳歌小词”），秀禅（法秀）戒之曰：“子以艳语动人淫心不止，士大夫笔墨之妙，甘施于此乎？”公于是痛戒绮语。故夫人之学业，务探其本源；于交游则期于节取。

《陵阳先生室中语》：古人作诗多用方言，今人作诗复用禅语，盖是厌恶尘旧而欲新好也。

《瀛奎律髓》：（山谷一生），流离跋涉八年矣，未尝有一诗及于迁谪。真天人也。

《韵语阳秋》十二：柳展如，东坡甥也。山谷作八诗赠之。其间有“寝兴与时俱，由我屈伸肘，饭羹自知味，如此是道否？”之句，是告之以佛理也。其曰：“咸池浴日月，深宅养灵根；胸中浩然气，一家同化元。”是告之以道教也。“圣学鲁东家，恭惟同出自；乘流去本远，遂有作书肆。”是告之以儒道也。

又二：鲁直谓东坡作诗未知句法。而东坡题鲁直诗（《全集》六十八）云：“每见鲁直诗，未尝不绝倒。然此卷甚妙，而殆非悠悠者所识，能绝倒者已是可人。”又云：“读鲁直诗如见鲁仲连、李太白，不敢复论鄙事。虽若不适用，然不为无补。”如此题识，其许之乎？其讥之也！鲁直酷爱陈无己诗，而东坡亦不深许。鲁直为无己扬誉，无所不至。而无己乃谓人言我语胜黄语，何邪？

《藏海诗话》：东坡豪，山谷奇，二者有余，而于渊明则为不足，所以皆慕之。

《邵氏闻见后录》：赵肯堂亲见鲁直晚年悬东坡像于室中，每蚤衣冠荐香，肃揖甚敬。或以同时声名相上下为问，则离席惊避曰：“庭坚望东坡，门弟子耳，安敢失其序哉！”今江西君子曰苏、黄者，非鲁直本意。

《拊掌录》：黄鲁直在荆州闻东坡下世。士人往吊之。鲁直两手抱一膝，起行独步。

《渔隐丛话》：元祐文章，世称苏、黄。然二公当时争名，互相讥诮。东坡尝云：“黄鲁直诗文，如螭蟠江珧柱，格韵高绝，盘餐尽废；然不可多食，多食则发风动气。”山谷亦云：“盖有文章妙一世，而诗句不逮古人者。”此指东坡而言也。

《清波杂志》：山谷在南康落星寺，一日凭栏，忽传坡亡，痛惜久之。已而顾寺僧拈几上香合在手，曰：“此香匾子自此却属老夫矣。”岂名素相轧而然？或传之过？（按坡逝世日山谷不能至南康）

《普闻诗论》：老杜之诗备于众体。近世所论，东坡长于古韵，豪迈大度。鲁直长于律诗，老健超迈。荆公长于绝句，闲暇清癯。其各一家也。

《藏海诗话》：七言律诗极难做，盖易得俗。是以山谷别为一体。

清盛炳纬《山谷全书序》：文以载道，诗以言志，其源实一。陈后山谓其学老杜而不为，犹知之未尽。其诗孕育于彭泽，追轂乎昌黎，而忠爱之忱则于老杜为近。同时惟子瞻为旗鼓相当。子瞻笔力奔放胜于黄，才似太白。黄诗韵味渊厚胜于苏，学似老杜。故宋之苏、黄，犹唐之李、杜。

方虚谷曰：后山精于律，而山谷尤宏大；古诗尤高。

《艇斋诗话》：山谷诗妙天下。然自谓得句法于谢师厚，得用事于韩持国（维）。此取诸人以为善也。

山谷作《黄氏二室墓志》云：庭坚之诗，从谢公得句法。

周季凤《黄先生全书序》：其父亚夫《伐檀集》二卷，句甚奇崛，世所谓山魃水怪著薜荔之体，真黄氏审言。

《娱书堂诗话》：黄亚夫庶《怪石》绝句云：“山鬼水怪著薜荔，天禄辟邪眠莓苔。钩帘坐对心语口，曾见汉唐池馆来。”

《韵语阳秋》三：谓此诗“人土脍炙，以为奇作。”

《艇斋诗话》：山谷论诗多取《楚辞》，东湖论诗多取《选》诗。

《朱少章诗话》：黄鲁直独用“昆体”，工夫而造老杜浑成之地，禅家所谓更高一著也。

山谷与方蒙书：近世少年多不肯治经术及精读史，乃纵以助诗，故致远则泥。（《后山诗话》）

《临汉隐居诗话》：黄庭坚喜作诗得名。好用南朝人语，专求古人未使之事，又一二奇字缀葺而成诗，自以为工。其实所见之僻也。故句虽新奇，而气乏浑厚。吾尝作诗题其编后，略云：“端求古人遗，琢抉手不停。方其拾玃羽，往往失鹏鲸。”盖谓是也。

洪《序》：鲁直昔尝作《退听序》云：诗非苦思不可为。余得第后始知此。今世所传录他诗，乃未第时为之者。

《全书》评黄：山谷尝谓诗不可强作，必待境而生。又谓须比律吕，列干羽，可歌可舞。

《冷斋夜话》：山谷云：诗意无穷，而人才有限。以有限之才，追无穷之意，虽渊明、少陵不得工也。然不易其意而造其语，谓之“换骨法”。窥入其意而形容之，谓之“夺胎法”。（郑谷诗：自缘今日人心别，未必秋香一夜衰。荆公菊诗：千花百卉凋零后，始见闲人把一枝。此换骨法。）

《诗人玉屑》八：乐天诗：“醉貌如霜叶，虽红不是春。”东坡诗：“儿童误喜朱颜在，一笑那知是酒红。”凡此之类，皆夺胎法也。李白云：“落月满屋梁，犹疑照颜色。”山谷簪诗云：“落日映江波，依稀比颜色。”此皆以故为新，夺胎换骨。卢仝诗云：“草石是亲情。”山谷点化之云：“小山作友朋，香草当姬妾。”

《野客丛书》：《禁齋》云：“鲁直有换字对句法，如曰：‘只今满坐且尊酒，后夜此堂空月明。’曰：‘田中虽问不纳履，坐下适来何处蝇？’前此未有人作此体

，自鲁直变之。”若溪渔隐曰：“此体出老杜，如‘宠光蕙叶与多碧，点缀桃花舒小红’，今俗语谓之拗句格。”仆谓此体非出于老杜，与杜同时如王摩诘，亦多是句。如云：“雨中草色绿堪染，水上桃花红欲燃。”此亦拗句格也。

《内集》十二《再次韵（杨明叔）引》云：因明叔有意于斯文，试举一网而张万目。盖以俗为雅，以故为新，百战百胜，如孙吴之兵。棘端可以破镞，如甘蝇飞卫之射，此诗人之奇也。明叔当自得之。

洪炎《序》：凡句法置字律令新新不穷，增出增奇。所谓包曹、刘之波澜，兼陶、谢之字量，可使子美分座，太白却行者耶？苏公尝评鲁直曰：“读鲁直诗……于世。”（《东坡全集》六十七：诗须要有为而作，用事当以故为新，以俗为雅，好奇务新乃诗之病。）苏公知鲁直者，然此评则未尽。夫诗人赋咏于彼，兴托在此，阐释优游而不迫切。其所感寓，常微见其端，使人三复玩味之，久而不厌；言不足而思有余，故可贵尚也。若察察言如老杜《新安》、《石壕》、《潼关》、《花门之什》，白公《秦中吟》、《乐游园》、《紫阁村诗》，则几于骂矣，失诗之本质矣。

《碧溪诗话》：山谷云：诗者，人之性情也；非强谏争于庭，怨骂于道，怒邻骂座之所为也。

《诚斋诗话》：初学诗者须学古人好语，或两字，或三字。入口便成诗句，不至生硬。要诵诗之多，择字之精；始乎摘用，久而自出肺腑，纵横出没，用亦可，不用亦可。（如山谷《猩猩毛笔》：“平生几两屐，身后五车书。”“平生”出《论语》，“身后”出张翰“使我有身后名”；“几两屐”，阮孚语；“五车书”，庄子言惠施。此两句乃四处合来。）

《诗话总龟》（卷九）：山谷谓龟父云：“甥最爱老舅诗中何等篇？”龟父举“蚁穴或梦封侯王，蜂房各自开户牖。”（《题落星寺》三首之一）及“黄尘不解浣明月，碧树为我生凉秋。”以为绝类工部。山谷云：“得之。”（《王直方诗话》）

《艇斋诗话》：山谷诗云：“十度欲言九度休，万人丛中一人晓。”（《赠陈师道》）曾吉父云：“此正山谷诗法也。”其说尽之。

《庚溪诗话》：山谷之诗，清新奇峭，颇造前人未尝到处，自为一家。此其妙也。至古体诗，不拘声律，间有歇后语，亦清新奇峭之极也。然近时学其诗者，或未得其妙处。每有所作，必使声韵拗戾，词语艰涩，曰，江西格也。此何为哉？吕居仁作《江西诗社宗派图》，以山谷为祖，宜其规行矩步，必踵其迹；今观东莱诗，多浑厚平夷，时出雄伟，不见斧凿痕。社中如谢无逸之徒亦然。正如鲁国男子善学柳下惠者也。

《玉屑》十二：晦庵云：苏、黄只是今人诗，苏才豪，黄费安排。

又：陈无己云：荆公晚年诗伤工，鲁直晚年诗伤奇。（《王直方诗话》）

《辨疑》：或谓山谷诗一以生硬为主。何所见之偏也！公诗祖陶宗杜，体无不备；而早年亦从事于玉溪生。故集中所登，慷慨沉雄者固多，而流丽芊绵者亦复不少。公有云：“宁律不谐而不使句弱，用字不工而不使语俗。”此则公之力追老杜者也。至晚年则又洗尽铅华，独标隽旨。凡风云月露与夫体近香奁者，洗剥殆尽。观其“桃李春风一杯酒，江湖夜雨十年灯”之句，文潜力称奇特。而公以为此犹砌合，不如“石吾甚爱之，勿使牛砺角。牛砺角尚可，牛斗残我竹”数语乃可云至。是其境诣实有快阁“江澄木落”之妙，而其襟怀殆与渊明同其夷犹冲淡。夫岂牛鬼蛇神如李贺辈之佶倔聱牙也邪？公诗虽时作硬语，而老朴中自饶丰致。

《昭昧詹言》十：山谷之不如韩、杜者，无巨刃摩天，乾坤摆荡，雄直挥斥，浑茫飞动，沛然浩然之气。而沉顿郁勃，深曲奇兀之致，亦所独得，非意浅笔懦调弱者所可到也。

又：诗文句意忌巧。东坡时失之此，遂开俗人。故作者宁朴无巧。至于凡近、习俗、庸熟，不足议矣。要之，惟学山谷，能已诸病。

又十二：山谷之妙，起无端，接无端，大笔如椽，转折如龙虎，扫弃一切，独提精要之语。每每承接处，中亘万里，不相联属，非寻常意计所及。长吉亦如是，但嫌节促，无舒博气，政与《公羊》、《穀梁》同病。

又：大抵山谷所能，在句法上远。凡起一句，不知其所从何来。

《臞翁诗评》：山谷如陶弘景祇诏入宫，析理谈玄，而松风之梦故在。

《江西诗派小序》：国初诗人，如潘阆、魏野，规规晚唐格调，寸步不敢走作。杨、刘则又专为“昆体”，故优人有“寻扯义山”之诮。苏、梅二子，稍变以平淡豪俊，而和之者尚寡。至六一、坡公，巍然为大家数，学者宗焉。然二公亦各极其天才笔力之所至而已，非必锻炼勤苦而成也。豫章稍后出，会粹百家句律之长，究极历代体制之变，蒐猎奇书，穿穴异闻，作为古律，自成一家，虽只字半句不轻出。遂为本朝诗家宗祖。在禅学中比得达摩，不易之论也。其《内集》诗尤善，信乎其自编者。

宋调元《重刻黄文节公全书序》：尝读《大雅堂记》而知先生所得力已。其言曰：“妙处乃在无意于文”，又曰：“广之以《国风》、《雅》、《颂》，深之以《离骚》、《九歌》。”紫阳谓其“并不蹈古人町畦”。东坡以为“如见……鄙事”。

陆鹅湖比之优钵昙花。罗鹤林以“不向如来行处行”称之。“学老杜而不为”，后山之瓣香也。“争精微于一字”，虚谷之法眼也。在宋诸贤论之审矣。西江作《宗派图》，配飨杜陵，转非先生意也。

清冯咏《江西诗派论》：西江诗闢自渊明。今人不宗渊明而宗山谷者，山谷可派而渊明不可派也。且夫水之势盛则众流并纳，诗之派盛则百家同归。图中所载人不产于江西而以江西派之，学不出于山谷而以山谷派之。故曰出异归同。然则诗固莫盛于江西乎？非也。诗三百篇，海也，所谓测之莫量其深，望之不见其广，无远不集，靡幽不通者也。其他汉、魏、六朝、唐、宋之诗，万壑争流，而不以派名。非发源者不弘，以杨波者不众也。

每篇之中，每句逆接，句句远来。山谷于变化中甚少讲究，由未尝知古文也。

又：山谷死力造句，专在句上弄远。成篇之后，意境皆不甚远。

元好问《论诗》绝句：古雅难将子美亲，精纯全失义山真。论诗宁下涪翁拜，未作江西社里人。

张之洞《摩围阁诗》：黄诗多槎牙，吐语无平直。三反信难晓，读之鲠胸臆。如佩玉琼琚，舍车行荆棘。又如佳茶薺，可啜不可食。子瞻与齐名，坦荡殊雕饰。（《石遗室诗话》十一）

《全书》评黄：东坡跋山谷小书云：鲁直以平等观作欹侧字，以真实相出游戏法，以磊落人书细碎事，可谓三反。

《诚斋诗话》：高崇初作黄字，天下翕然学黄字。

《本传》：东坡云：“坚楷法研媚，自成一家。”游荆州，得石本兰亭，爱玩之不去手。因悟古人用笔意，作小楷日进，曰：“他日当有知我者。”草书尤奇伟。坚没后人争购其字，一纸千金云。

《独醒杂志》：东坡尝与山谷论书。东坡曰：“鲁直近字虽清劲，而笔势有时太瘦，几如树梢挂蛇。”山谷曰：“公之字固不敢轻议，然间觉褊浅，亦甚似石压虾蟆。”二公大笑。

《避暑录话》：鲁直诗中岁焚去三之二，自名《帚尾集》。其后稍自喜，以为可传，故复名《敝帚集》。

《王直方诗话》：山谷旧所作诗文，名以《焦尾》、《弊帚》。少游云：每览此编

，辄怅然终日，殆忘食事，邈然有二汉之风。今交游中以文墨称者，未见其比。所谓珠玉在傍，觉我形秽也。（《玉屑》十八）

许尹《黄陈诗集注序》：二公之诗其用事深密，杂以儒佛、虞初稗官之说，《雋永》、《鸿宝》之书，牢笼渔猎，取诸左右。

钱文子《芄室史氏注山谷外集诗序》：山谷之诗与苏同律，而语尤雅健，所援引者乃多于苏。

《詹言》十：（姚姜坞先生）又曰：“《宋史·艺文志》有陈逢寅注二十卷，而不及任渊、史容。”树按，任注甚疏漏，史更劣。

建炎本洪炎承洪师胡直儒（少汲）命编《豫章集》，三十卷，佚。（《全书》有与胡少汲书）

《外集》：山房李彤编（《目录》：彤盖山谷伯舅之子。）三十六卷。

《别集》：公诸孙黄辑。紫阳弟子。《宋史》四二三有传。

嘉靖本 宁州周季麟于邱琼山得所藏之三十六卷，周季凤又得友人潘南屏于内阁中抄宋蜀人所献正、外、别三集，外加以简尺年谱诸集，凡九十七卷。内有简尺二卷，年谱三十卷。名《山谷全书》，刻于宁州。

万历本 重刻三集于宁州。以简尺即书札类，不宜另立卷帙。于是择其文之有关系者编入书中；并采公向有《刀笔集》行世，其书札内之有遗者，悉为补入。

缉香堂本 清乾隆元和宋调元刻于宁州。（光绪本陈右铭序，谓嘉庆钁版。）除简尺、年谱、校勘外，总计正集三十二卷，外集二十四卷，别集十九卷，公父所著《伐檀集》二卷，序传目次等四卷，凡八十一卷。题《黄文节公全集》。（删节年谱附注诗篇）

以上据光绪黄菊秋（寿英）刻《山谷全书》所载缉香堂凡例。黄，善化人，刺宁州。光绪本有《刀笔》十卷。

翁刻本 清翁方纲校上内府本。

山谷内集诗，任渊注。外集诗，史容注。别集诗，史温注。陈三立刻本。

内集诗二十卷，任渊注，日本古时翻雕宋本。

外集诗十七卷，史容注；别集诗二卷，史温注。朝鲜活字本，遇宋帝皆空格，亦原于宋本。杨守敬跋云：“通校三集，注中翁本误字不可胜举。良由覃溪所得是传钞本，虽较胜明刊，而与宋本固不可同日语也。”此本有世界书局影印本。

《年谱》，黄迨作，三十卷。诗注本（附目录）全书本（删补）《适园丛书》本（度宗咸淳进士。年谱自序作于宁宗庆元五年（1199）。《适园丛书》本张钧衡跋，谓万历甲寅（1614），陈以志改并为十四卷，以庆元己未为咸淳己未。翁覃溪刻于南昌，止为辨咸淳己未为庆元己未，余一仍周谱之旧。）杨希闵《豫章十二家年谱》。

《纪河间诗话》一：涪翁五言古体大抵有四病，曰腐，曰率，曰杂，曰涩；求其完篇，十不得一。要之，力开窔奥，亦实有洞心而駭目者；别择观之，未尝无益也。涪翁七言古诗大抵离奇孤矫，骨瘦而韵逸，格高而力壮。印以少陵家法，所谓具体而微者。至于苦涩卤莽，则涪翁处处有此病，在善抉择耳。涪翁七言绝佳者往往断绝孤迥，骨韵天拔，如侧径峭崖，风泉泠泠。然粗莽支离，十居七八；又作平调率无味。人固有能有不能耳。涪翁五言古诗皆多不成语，殆长吉所谓“强回笔端作短调”耶？五六言绝大抵皆粗莽不成诗。

《昭昧詹言》十一：诗道性情，只贵说本分语。如右丞、东川、嘉州、常侍，何必深于义理，动关忠孝？然其言自足有味，说自家话也。不似放翁、山谷，矜持虚骄也。四大家绝无此病。

又：学诗从山谷入，则造句深而不袭。从欧、王入，则用意深而不袭，章法明辨。

张戒《岁寒堂诗话》上：王介甫只知巧语之为诗，而不知拙语亦诗也。山谷只知奇语之为诗，而不知常语亦诗也。（欧阳公诗专以快意为主，苏端明诗专以刻意为工。）

奉和文潜赠无咎

篇末多见及，以既见君子云胡不喜为韵①

龟以灵故焦，雉以文故翳②。本心如日月，利欲食之既③。后生玩华藻，照影终没世④。安得八紘置，以道猎众智⑤。

谈经用燕说，束弃诸儒传⑥。滥觞虽有罪，末派弥九县⑦。张侯真理窟，坚壁勿与战⑧。难以口舌争，水清石自见⑨。

野性友麋鹿，君非我同群⑩。文明近日月(11)，我亦不如君。十载长相望，逝川水沄

运(12)。何言谈绝倒，茗碗对炉薰(13)。

北寺锁斋房，尘钥时一启(14)。晁张跼然来，连璧照书几(15)。庭柏郁葱葱，红榴罅多子(16)。时蒙吐佳句，幽处万籁起(17)。

先皇元丰末，极厌士浅闻(18)。只今举秀孝，天未丧斯文(19)。晁张班马手，崔蔡不足云(20)。当今横笔阵，一战静楚氛1；。

张侯窘炊玉，僦屋得空垆2；。但见索酒郎，不见酒家胡3；。虽肥如瓠壶，胸中殊不粗4；。何用知如此，文采似於菟5；。

荆公六艺学，妙处端不朽6；。诸生用其短，颇复凿户牖7；。譬如学捧心，初不悟己丑8；。玉石恐俱焚，公为区别不9；。

吾友陈师道，抱独门扫轨0；。晁张作荐书，射雉用一矢11；。吾闻举逸民，故得天下喜12；。两公阵堂堂，此士可摩垒13；。

① 《目录》第二卷：元丰八年乙丑（1085），山谷四十一岁。按《实录》：是岁三月哲庙即位。四月丁丑（十六）以秘书省校书郎召到京师。时当在六七月。元祐元年丙寅（1086），是岁山谷在馆中。（按《实录》：十月丙戌除《神宗实录》检讨官，集贤校理。）

《目录》第三卷：《次韵答张文潜惠寄》：文潜名耒。按《实录》：是岁十二月试太学，录张耒为秘书省正字。此诗盖夏初方到太学供职所作。（《内集》六：《以团茶洮州绿石砚赠无咎文潜》云：晁子志囊可以括四海，张子笔端可以回万牛自我得二士，意气倾九州。）

《目录》第四卷：本诗，按《实录》：元祐二年四月乙巳（1087，四十三岁），徐州布衣陈师道充徐州州学教授。观此诗陈师道之篇，以为逸民，盖犹未得官也。而诗又有“红榴罅多子”之句。宜以为元年秋所作。

② 老杜诗：“漆有用而割，膏以明自煎。”此用其意。（《庄子》：“山木自寇也，膏火自煎也。”《咏怀诗》：“膏火自煎熬，多财为患害。”）《周礼》：“天龟曰灵属。”《左传》曰：卫侯将如五氏，卜“过之？”龟焦。《尔雅》：“素质五采皆备成章曰翬。”注云：“翬亦雉属。”潘安仁《射雉赋序》曰：“习媒翬之事。”李善注曰：“翬者，所隐以射者也。”

③ 《孟子》曰：“此之谓失其本心。”退之《送高闲序》曰：“利欲斗进，有得有丧。”《春秋》桓公四年、襄公二十四年皆书：“日有食之，既。”杜预注云：“

既，尽也。”刘原父《请观欧阳永叔五代史诗》曰：“仲尼日月也，薄食为之既。”《论语》曰：“君子之过也如日月之蚀焉。”东坡谓本心者，道心也。

④《鲁论》曰：“后生可畏。”《扬子》曰：“今之学者非独为之华藻也，又从而绣其鞶帨。”《文选·潘正叔诗》云：“玩尔清藻，味尔芳风。”《博物志》曰：“山鸡有美毛，自爱其色，终日映水，目眩则溺死。”《汉书·司马迁传》曰：“鄙没世而文采不表于后。”“没世”字本出《鲁论》。

⑤《文选》张平子《思立赋》曰：“结典籍而为罟兮，欧儒墨以为禽。”此用其意。曹子建《与杨德祖书》曰：“吾王设天网以该之，顿八絃以掩之。”《扬子》曰：“猎德而得德。”盖学道者恶众智之为害，故欲猎而去之。

⑥此句指熙宁经学穿凿之弊。《韩非子》曰：“先王有郢书而后世多燕说。”又曰：“郢人有遗燕相国书者。当是时，夜书，火不明。因谓持烛者曰‘举烛’云；而过书‘举烛’，‘举烛’非书意也。燕相受书而说之，曰：‘举烛者，尚明也；尚明者，举贤而用之。’燕相白王，大说。国以治。治则治矣，非书意也。今世学者多此类。”退之诗：“《春秋》《五传》束高阁。”

⑦言非荆公之罪，诸儒穿凿，遂至失其本源。《家语》曰：“夫江始出于岷山，其源可以滥觞。及其至江津，不舫舟，不避风，不可以涉，非惟下流多故耶？”退之诗：“东都渐弥漫，派别百川导。”《后汉书·光武赞》曰：“九县飘回，三精雾塞。”

⑧《晋书·刘惔传》：“简文帝曰：‘张凭勃率为理窟。’”《汉书·项羽传》：“汉王坚壁不与战。”

⑨《汉书·张良传》曰：“此难以口舌争也。”《古乐府·艳歌行》曰：“夫婿从门来，斜倚西北眄。语卿‘且勿眄，水清石自见’。”

⑩潘岳《关中记》曰：“辛孟年七十，与麋鹿同群游，世谓之鹿仙。”刘孝标《绝交论》：“欢与麋鹿同群。”《论语》：“鸟兽不可与同群。”

(11)言张侯文采可以入侍。《易》曰：“文明以止，人文也。”《汉书·萧曹赞》曰：“依日月之末光。”

(12)逝川见《鲁论》。沄沄，沸流貌。《楚辞·九思·哀岁》：“流水兮沄沄。”退之诗：“浪波沄沄去，松柏在高岗。”

(13)《选》诗：“何言相遇易？此欢信可珍。”《晋书·卫玠传》：“王澄每闻玠言

，辄叹息绝倒。语曰：‘卫玠谈道，平子绝倒。’”韩、孟联句曰：“茗碗纤纤捧。”

(14) 北寺谓汴京酺池寺（酺池，梁孝王作。）山谷寓几研于此。《金滕》曰：“启钥见书。”

(15) 《庄子·徐无鬼》曰：“夫逃虚空者藜藿柱于鼯鼯之径，跟位其空，闻人足音跣然而喜矣。又况乎昆弟亲戚之警欬其侧者者乎？”《晋书·夏侯湛传》：湛与潘岳同舆接茵，时谓连璧。

(16) 《后汉书·光武帝纪》曰：“气佳哉！郁郁葱葱。”《蜀都赋》曰：“榛栗罅发。”（《文选》作櫨栗罅发）此借用其字。

(17) 《晋书·胡毋辅之传》：“王澄曰：‘彦国吐佳言如锯木屑。’”又《孙绰传》：“作《天台山赋》，示范荣期。每至佳句，辄云：‘应是我辈语。’”唐人常建诗：“曲径通幽处。”《庄子·齐物论》：“子游曰：‘敢问天籁？’子綦曰：‘夫吹，万不同。’”老杜诗：“万籁真笙竽。”

(18) 《实录》：《吕公著传》曰：“时科举专用王安石经义，士无自得学。而朝庭文词之官渐艰其选。神宗以答高丽书不称旨，盖尝以为言。”又东坡答张文潜书亦曰：“近见张子厚，言先帝晚年甚患文字之陋，欲稍变取士法，特未暇尔。”《汉书·儒林传序》曰：“小史浅闻，莫能究宣。”

(19) 元祐元年四月诏执政大臣各举文学，政事，行谊之臣可充馆阁之选者三人。于是毕仲游及晁补之、张耒等皆召试学士院。《晋书·孔坦传》曰：“秀孝到，不策试，普加除署。”秀孝谓秀才、孝廉也。此借用。《鲁论》曰：“无之未丧斯文也。”

(20) 崔、蔡谓瑗、邕。刘禹锡作《柳子厚集序》云：“韩退之曰：‘雄深雅健，似司马子长，崔、蔡不足多也。’”《文选》沈休文《恩幸传论》曰：“西京许、史盖不足云。”

1; 《法书》：卫夫人有《笔阵图》。老杜诗：“笔阵独扫千人军。”

2; 《左传》曰：“一战而霸。”又曰：“楚氛甚恶。”

《战国策》曰：“苏秦之楚，三日乃得见王。曰：‘楚国之食贵于玉，薪贵于桂。今使臣食玉炊桂。’”《汉书·司马相如传注》曰：“卖酒之处，累土为垆以居酒气，形如锻垆。”据张文潜集，有《初到都下供职寄黄九》诗曰：“僦舍酒家楼，

推垆卷其旗，鼠壤败晨炊，守翁噪群儿。”

3; 此句以戏文潜。老杜诗：“马上谁家白面郎？临阶下马坐人床。不通姓字粗豪甚，指点银瓶索酒尝。”《玉台新咏》载辛延年《羽林诗》曰：“昔有霍家姝，姓冯名子都。依倚将军势，调笑酒家胡。胡姬年十五，春日独当垆。”

4; 《汉书·张苍传》曰：“身长大肥白如瓠。”《蜀志·张裔传》：“雍闾假鬼教曰：‘张府君如瓠壶，外虽泽而内实粗，不足杀，令缚与吴。’”

5; 《谷梁》曰：“何用见其是齐侯也？”又《后汉书·邓晨传》：“光武曰：‘何用知非仆耶？’”《左传》曰：“楚人谓虎于菟。”

6; 王安石，元丰三年（1080）封荆国公。初熙宁六年（1073）三月命知制诰吕惠卿修撰经义，以安石提举。子雱同修撰。八年所撰《诗》、《书》、《周礼》义成，送国子监镂板颁行之。元丰三年八月，安石又上改定误字焉。《左传》：“叔孙豹曰：‘其次立言，虽久而不废，此之谓不朽。’”

7; 《世说》曰：“周弘叔巧于用短，杜方叔拙于用长。”此借用其字。孔安国注《鲁论》曰：“吾党之小子，于大道妄作穿凿，以成文章。”唐玄宗《孝经序》曰：“希升堂者必自开户牖。”注云：“言穿凿也。”

8; 《庄子》：“师金曰：‘西施病心而瞶其里。其里之丑人见而美之，归亦捧心而瞶其里。’”

9; 《书》曰：“火炎昆岗，玉石俱焚。”《鲁论》曰：“譬诸草木，区以别矣。”

10; 陈师道，字履常，一字无己，徐州人，文行甚高。来京师，枢密章惇欲一见之而不可。退之诗曰：“吾友柳子原，其人艺且贤。”渊明诗曰：“顾我抱兹独，傴俛四十年。”《后汉书·杜密传》曰：“刘胜闭门扫轨，无所于及。”

11; 《易》旅之六五曰：“射雉一矢亡，终以誉命。”象曰：“终以誉命，上逮也。”王弼注云：“射雉以一矢而复亡之，明虽有雉终不可得矣。”此云“用一矢”，言为国之有人材，犹射雉之有矢也。《世说》注引虞预《晋书》：“陆机荐戴渊于赵王伦曰：‘盖闻繁弱登御，然后高墉之功显。’”按《易》：“公用射隼于高墉之上，获之，无不利。”繁弱，弓名也。山谷盖用此意，但改“射隼”为“射雉”，“繁弱”为“一矢”耳。

12; 《鲁论》曰：“举逸民，天下之民归心焉。”《云汉》诗：“天下喜于王化复行。”

13; 两公谓晁、张。孙子曰：“勿击堂堂之阵。”《左传》曰：“致师者御靡旌，摩垒而还。”注云：“摩，近也。”老杜诗：“气摩屈、贾垒，目短曹、刘墙。”

《宋诗钞》：张耒，字文潜，号柯山，人称宛丘先生，楚州淮阴人。少善属文，游学于苏辙，辙爱之。因得从轼游，称其汪洋冲澹，有一唱三叹之声。第进士。属陈时，二苏及黄、晁诸人相继殁，惟耒尚存，士人就学者众，分日载酒肴事之，其名益甚。子瞻谓“秦得吾工，张得吾易。”谩相压也、要在秦、晁以上。

又：晁补之，字无咎，济州巨野人。年十七，从父官杭州，著《七述》，言钱塘山川风物之丽。时东坡为通判，正欲作赋，见之，称叹曰：“吾可阁笔矣。”由是知名。举进士。（见张耒作晁墓志）

又：陈师道，初学于曾（南丰），后见黄鲁直诗，格律一变。鲁直谓其读书如禹之治水，知天下之脉络有开有塞，至于九川涤源，四海会同者。作文知古人关键，其诗深得老杜之法，今之诗人不能当也。（略见答王子飞书，全书正集十八。）

张耒赠无咎以“既见君子，云胡不喜”为韵八首，其五：诗坛李杜后，黄子擅奇勋。平生执羁勒（勒，马缰也。），开府与参军。举世秉笔徒，吟哦谩云云。安知《握奇》（《握奇（机）经》，谈兵者所祖。）律，一字有风云？其七：黄子少年时，风流胜春柳。中年一钵饭，万事寒木朽。室有僧对谈，房无妾侍帚。此道人人事，谁令余独不？

山谷尝写答邢居实诗及此诗与徐师川曰：“后八诗颇得意者，故谩录往。或与潘、洪诸友读之。”

《渔隐丛话后集》三十二：后山谓鲁直作诗过于出奇，诚哉是言也。如“本心如日月，利欲食之既。”出奇之过也。

《和邢惇夫秋怀十首》之九：吾友陈师道，抱瑟不吹竽。文章似杨、马，欬唾落明珠。因穷有胆气，风壑啸于菟。秋来入诗律，陶谢不枝梧。（《内集四》）

我诗如曹邨

子瞻诗句妙一世，乃云效庭坚体，盖退之戏效孟郊、樊宗师之比，以文滑稽耳，恐后生不解，故次韵道之，子瞻《送杨孟容》诗云，我家峨眉阴，与子同一邦，即此韵①

【王注苏诗引次公曰：鲁直云：子瞻诗句妙一世，乃收敛光芒入此窘步以见效云云。】

我诗如曹郃，浅陋不成邦②。

公如大国楚，吞五湖三江③。

赤壁风月笛，玉堂云雾窗④。

句法提一律，坚城受我降⑤。

枯松倒涧壑，波涛所舂撞⑥。

万牛挽不前，公乃独力扛⑦。

诸人方嗤点，渠非晁张双⑧。

袒怀相识察，床下拜老庞⑨。

小儿未可知，客或许敦庞⑩。

诚堪婿阿巽，买红缠酒缸⑪。

①《目录》列本诗于元祐元年下（山谷四十二岁）。

②《左传》：“季子观乐，自郃以下无讥焉。”注曰：“季子闻郃、曹二国歌，不复讥之，以其微也。”《周礼·大宗伯注》云：“子男不执圭者，未成国。”《诗·衡门》注曰：“言浅陋也。”

③《周礼·职方氏》：扬州，其川三江，其浸五湖。左太冲《吴都赋》曰：“或吞江而纳汉。”

④谓东坡无穷达之异也。东坡谪黄州凡五年，尝游赤壁，有前后赋。按鄂州蒲圻县有赤壁山，黄州亦有之。杜牧之诗：“何人教我吹长笛，与倚春风弄月明。”元祐元年东坡自中书舍人迁翰林学士。东坡集《武昌西山》诗序云：“元祐元年十一月二十九日，与翰林承旨邓圣求会宿玉堂，偶话旧事，因为此诗。”太白诗：“归来桃花岩，得憩云窗眠。”退之诗（《华山女》）：云窗雾阁事恍惚。”山谷题东坡赞曰：“东坡之酒，赤壁之笛。”又东坡《赤壁赋》曰：“客有吹洞箫者。”赤壁之笛，意取此乎？

⑤老杜诗：“觅句新知律。”退之《樊宗师铭》曰：“由汉迄今用一律。此借用其字，言自提一家之军律也。”《汉书》曰：“武帝遣公孙敖筑塞外受降城。”

⑥ 枯松以自况。太白《蜀道难》曰：“枯松倒挂倚绝壁。”退之诗：“洪涛舂撞禹穴幽。”按《礼论·学记注》曰：“舂容，谓重撞击也。”

⑦ 老杜《古柏行》曰：“大厦如倾要梁栋，万牛回首丘山重。”退之诗（《病中赠张十八》）：龙文百斛鼎，笔力可独扛。”

⑧ 老杜戏为绝句曰：“今人嗤点流传赋，不觉前贤畏后生。”按干宝《晋纪总论》曰：“盖共嗤点以为灰尘。”晁无咎、张文潜皆苏公门下士。

⑨ 《选》诗：“一心抱区区，惧君不识察。”《蜀志·庞统传注》引《襄阳记》曰：“诸葛孔明为卧龙，庞士元为凤雏，司马德操为水镜，盖皆庞德公题品之语也。德公，襄阳人，孔明每至其家，独拜于床下。”

⑩ 终上句相知之意，且欲为其子求婚于苏氏，抑东坡或尝以此许之也。山谷在黔中与王泸州帖云：“小子相今年十四，骨气差庞厚。以此帖观之，在京师时三四岁矣。”（黄《谱》二十六：相小名小德，小字四十。《内集》十有《嘲小德》诗，末云：“解著《潜夫论》，不妨无外家。”《左氏》成十六年传曰：“民生敦庞。”

(11) 阿巽盖苏迈伯达之女，东坡之孙。山谷虽有此言，其后契阔，竟不成婚，嫁范子功之孙湜。湜字箕叟，敷文学士。苏符仲虎，伯达之子也，其言云尔。《说文》曰：“甗，瓶也。”今人订婚者多以红彩缠酒壶云。

《宋诗菁华录》：起四句论者谓有微词，理或然也。诸人四句言本不足附苏门，而苏乃降格纳交。

苏轼《送杨孟容》：我家峨眉阴，与子同一邦。相望六十里，共饮玻璃江。江山不违人，遍满千家窗。但苦窗中人，寸心不自降。子归治小国，洪钟噫微撞。我留侍玉座，弱步欹丰扛。后生多高才，名与黄童双。不肯入州府，故人余老庞；殷勤与问讯，爱惜双眉庞。何以待我归？寒醅发春缸。（纪昀曰：以窄韵见长。）

《举要》一：韩退之有答孟郊诗，洪善庆曰：“规模背时利，文字觑天巧，此效东野。酬樊宗师云：梁惟西南屏，山厉水刻屈，此效宗师。”查注谓《送杨孟容诗》在元祐元二年（1087，四十三岁），冯星实、王见大皆从之。鲁直此诗亦当在二年。子瞻《李委吹笛诗序》曰：“东坡生日（1080，元丰五年），置酒赤壁矶下”云云，赤壁笛当指此。扬子云《解嘲》曰：“历金门上玉堂有日矣。”

赣上食莲有感

莲食大如指，分甘念母慈②。

共房头(左角右耳)(左角右耳)③，更深兄弟思。

实中有么荷，拳如小儿手④。

令我念众雏，迎门索梨枣⑤。

莲心政自苦⑥，食苦何能甘。

甘餐恐腊毒，素食则怀惭⑦。

莲生于【一作“淤”】泥中，不与泥同调⑧。

食莲谁不甘，知味良独少⑨。

吾家双井塘⑩，十里秋风香。

安得同袍子，归制芙蓉裳⑪。

①《目录》第一卷：元丰四年辛酉（1081，山谷三十七岁。）至六年癸亥（1083）山谷在太和凡三年。至元丰癸亥移监德州德平镇。赣上即虔州，与吉邻郡，江西外台所在。山谷或以白事至此。

②《尔雅》：“荷，芙蕖，其华萏菀，其实莲，其根藕；其中的，的中薏。”注曰：“莲谓房也，的，莲中实也。”《南山有台诗疏》引陆玕《草木疏》云：“枸树似白杨，有子著树端大如指。”此借用其字。诗意谓拇指也。《晋书·王羲之传》曰：“率诸子，抱弱孙，有一味之甘，割而分之，以娱目前。”“念母”字见《诗·渭阳》序。

③《王子年拾遗记》曰：“西王母见穆天子，进素莲，一房百子。”《诗》曰：“其角”；“角多貌。通作澱。《诗·小雅》：“尔羊来思，其角澱澱。”《传》：“澱澱，和也。羊以善触为患，故言其和，谓聚而不相触也。”《笺》：“又作”；“亦作戢。”

④么荷谓小叶。太白诗曰：“初拳几枝蕨。”《图经本草》曰：“菰根岁久者中心生白台如小儿臂，谓之菰手。”此句颇采其意。

⑤祢正平《鹦鹉赋》曰：“悯众雏之无知。”渊明《归去来》曰：“稚子候门。”又《责子诗》曰：“通子垂九龄，但觅梨与栗。”公诗有“蕨芽已作小儿拳”之句，张阁见之云：“此忍人也。”时阁蔬食诵经，故有此语。王直方云：“今此亦云

么荷拳如小儿手，两用皆有妙处。

⑥《尔雅》：“的中薏”注曰：“中心苦。”《晋书·谢安传》曰：“正自不能不尔耳。”

⑦《国语·周语》下曰：“厚味实腊毒。”韦注：“厚味，喻重禄也。腊，亟也。厚味者，其毒亟也。”《诗·伐檀》曰：“不素餐兮。”

⑧《维摩经》曰：“譬如高原陆地，不生莲华；卑湿淤泥，乃生此花。”《选》诗曰：“异伐可同调。”

⑨《中庸》曰：“人莫不饮食也，鲜能知味也。”《晋书》桓伊歌曰：“为臣良独难。”

⑩双井在洪州分宁县。

(11)《诗》曰：“岂曰无衣，与子同袍。”此借用。王介甫《次俞秀老韵》亦曰：“解我葱珩脱‘孟劳’（刀名），暮年甘与子同袍。”《离骚》曰：“制芰荷以为衣，集芙蓉以为裳。”

《全书》正集一据黄《谱》十二。赣上即今赣州。元丰四年公自吉安往南安试举人，过此而作。其孝友慈爱之意，蔼然可思。篇中“甘餐恐腊毒，素食则怀惭”二句，作“投劾去未能，窃禄以怀惭”，又“安得同袍子”句，作“安得免簪绂”，见公真迹，与集中十数字不同。黄《谱》作“冠纓”。“谁不甘”作“谁云多”。

《艇斋诗话》：山谷《赣上食莲诗》，读之知其孝弟人也。东湖每喜诵此诗。

以小团龙及半挺赠无咎，并诗，用前韵为戏

我持玄圭与苍璧，以暗投人渠不识②。

城南穷巷有佳人，不索宾郎常晏食③。

赤铜茗碗雨斑斑，银粟翻光解破颜④。

上有龙文下棋局，探囊赠君诺已宿⑤。

此物已是元丰春，先皇圣功调玉烛⑥。

晁子胸中开典礼，平生自期莘与渭⑦。

故用浇君磊隗胸，莫令鬓毛雪相似⑧。

曲几团蒲听煮汤，煎成车声绕羊肠⑨。

鸡苏胡麻留渴羌，不应乱我官焙香⑩。

肥如瓠壶鼻雷吼⁽¹¹⁾，幸君饮此勿饮酒！

① 《目录》第二卷：元丰八年乙丑（1085，山谷四十一岁），春夏山谷在德平。按《实录》：是岁三月哲宗即位。四月丁丑（十六日）以秘书省校书郎召到京师，时当在六七月。

本诗前有《谢（李清臣）送碾壑源拣牙》诗，即此韵。

《谈苑》曰：“建州茶李氏别令取其乳作片，或号曰金挺。”

② 《书》曰：“禹锡玄圭。”《周礼》曰：“以苍璧礼天。”柳子厚《新茶诗》：“圆方丽奇色，圭璧无纤瑕。”《汉书·邹阳传》曰：“明月之珠，夜光之璧，以暗投人于道，众莫不按剑相盼者，何则？无因而至前也。”“渠”，犹晋人言伊，盖梁、陈以来语。

③ “佳人”，谓无咎，山谷后诗（卧陶轩）有云：“城南晁正字。”《南史》：“刘穆之少贫，好往妻兄江氏家乞食，食毕，求槟榔。江氏戏之曰：“槟榔消食，君乃常饥，何忽须此？”《战国策》颜觸曰：“晚食以当肉。”《新序·刺奢篇》曰：“晏进粢粢之食，瓜瓠之羹。”

④ 韩、孟联句曰：“茗碗纤纤捧。”欧公诗：“小雨斑斑作燕泥。”“银粟”，谓茗花。老杜诗：“将军且莫破愁颜。”乐天诗：“一放狂歌一破颜。”

⑤ “棋局”，谓团茶下隐隐有此文，盖蔑痕。《庄子》曰：“肱篋探囊。”《鲁论》曰：“子路无宿诺。”

⑥ 《易·蒙卦》曰：“蒙以养正，圣功也。”《尔雅》曰：“四气和谓之玉烛。”注云：“道光照。”

⑦ 《易·系辞》曰：“观其会通以行其典礼。”此借用。言典章文物开陈于胸次也。《孟子》曰：“伊尹耕于有莘之野。”《史记·齐世家》：“西伯遇太公于渭之

阳。”老杜诗：“自比稷与契。”

⑧《世说》卷一：“王逊问王忱：‘阮籍何如司马相如？’忱曰：‘阮籍胸中磊隗，故须浇之；言同相如，惟有酒异。’”退之诗：“两鬓雪白趋埃尘。”刘禹锡诗：“今宵帝城月，一望雪相似。”

⑨柳子厚有《斩曲几》文。王介甫诗：“独坐隐团蒲。”魏武《苦寒行》曰：“羊肠阪诘曲，车轮为之摧。”注引《吕氏春秋》：“九山曰太行羊肠，其山盘纡如羊肠，在太原晋阳北。”乐天诗：“梦寻来路绕羊肠。”

⑩俗人煮茶，多以此二物杂之。《拾遗记》曰：“晋有羌人姚馥，但言渴于酒，群辈呼为渴羌。”“官焙”即建溪北焙。

(11)

退之《石鼎联句序》曰：“道士倚墙，鼻息如雷鸣。”元稹诗：“鼻息吼春雷。”

《王立之诗话》：东坡见山谷此句云：“黄九恁地，怎得不穷！”故晁无咎复和云：“车声出鼎绕九盘，如此佳句谁能识？”

《詹言》十二：先皇句不归，掷。开典礼三字掷。

吴其濬《植物名实图考》二十五：水苏即鸡苏，泽地多有之。昔人煎鸡苏为饮，今则紫苏盛行，而菜与饮皆不复用鸡苏矣。《雩娄农》曰：“东坡诗：‘道人解作鸡苏水，稚子能煎莺粟汤。’”

又《长编》十二：《草木经》：“水苏味辛微温，主下气，辟口臭，去毒，辟恶气。久服通神明，轻身耐老。”

《广雅疏证·释草》：匏，瓠也。今按瓠自有甘苦二种。瓠通作壶。匏之转声为瓢。瓠之叠韵为瓠芦。匏也，瓢也，瓠也，瓠芦也，实一物也。瓠芦或作壶卢，或作瓠葵。至陆佃则直以《诗传》匏谓之瓠为误，而云“长而瘦上曰瓠，短颈大腹为匏”，真不通之论矣。

鲍照《梅花落》：中庭杂树多，偏为梅咨嗟。何君何独然？念其霜中能作花，露中能作实，摇荡春风媚春日；念尔零落逐寒风，徒有霜华无霜质。

《古诗笺》：《画慢录》：“丁晋公始制为凤团。后为龙团，天圣中又为小团，其品迥嘉于大团。”

叶廷勋曰：《东溪试茶录》：“茶受水则光泽，其面涣散如粟，谓之冷粥面。”

《韵语阳秋》五：世言团茶始于丁晋公，前此未有也。庆历中蔡君谟为福建漕，更制小团以充岁贡；元丰初下建州，又制密云龙以献，其品高于小团，而其制益精矣。

戏答赵伯充劝莫学书及为席子泽解嘲

叔盎延赏

平生饮酒不尽味，五鼎馈肉如嚼蜡②。

我醉欲眠便遣客，三年窥墙亦面壁③。

空余小来翰墨场，松烟免颖傍门窗④。

偶随儿戏洒墨汁，众人许在崔杜行⑤。

晚学长沙小三昧，幻出万物真成狂⑥。

龙蛇起陆雷破柱，自喜奇观绕绳床⑦。

家人骂笑宁有道，污染黄素败粉墙⑧。

诚不如南邻席明府，珠网锁砚蜗书梁⑨。

怀中探丸起九死，才术颇似汉太仓⑩。

感君诗句唤梦觉，邯郸初未熟黄粱⑪。

身如朝露无牢强，玩此白驹过隙光⑫。

从此永明书百卷，自公退食一炉香⑬。

① 《目录》第六卷：元祐二年丁卯（1087，山谷四十三岁），是岁山谷在史局。按《实录》：正月辛未，山谷为著作佐郎。

② 《孟子》曰：“繆公之于子思也，亟问，亟馈鼎肉。”《楞严》曰：“当横陈时，味如嚼蜡。”《汉书·主父偃传》曰：“丈夫生不五鼎食，死则五鼎烹耳。”注

谓牛羊豕鱼麋。

③《南史·陶潜传》曰：“潜若先醉，便语客云：‘我醉欲眠卿可去。’”宋玉《登徒子好色赋》：“此女登墙窥臣三年，至今未许也。”《传灯录》：“达摩寓止嵩山少林寺，面壁而坐，终日默然。”

④《选》诗：“粲粲翰墨场。”鲍照《飞白书铭》曰：“沾此瑶液，染彼松烟。”“免颖”，见退之《毛颖传》。

⑤《汉书·周亚夫传》：“文帝曰：‘向者霸上、棘门如儿戏耳。’”卢仝《示添丁》云：“忽来案上翻汁，涂抹诗书如老鸦。”按《王子年拾遗记》云：“浮提国献神通善书二人，出肘间金壶，壶中有墨汁如淳漆。洒地及石，皆成篆隶科斗之字。罗叔景、赵元嗣者，与伯英并时见称于西州，而矜巧自与，众颇惑之。故伯英自称上比崔、杜不足，下方罗、赵有余。”崔谓崔瑗，杜谓杜度。

⑥《国史补》曰：“长沙僧怀素自言得草圣三昧。”《传灯录》：“毗婆尸佛偈曰：‘身从无相中受生，犹如幻出诸形象。’”

⑦《阴符经》曰：“地发杀机，龙蛇起陆。”《世说》曰：“夏侯玄常倚柱读书，时暴雨霹雳破所倚柱，衣服焦然。玄色不变，读书如故。”此并借用，以言草书之变态。《墨薮》云：“蔡邕得用笔法，大叫欢喜。”《晋书·刘毅传》：“尝聚樗蒲，掷雉，大喜，褰衣绕床叫。”太白作《怀素草书歌》曰：“吾师醉后倚绳床，须臾扫尽数千行。”

⑧《书断》曰：“张芝字伯英，性好书。凡家之衣帛，皆书而后练。”《北史》：“卢询祖于黄素楷书勋簿。”东坡诗：“书窗浣壁常遭骂。”任华《怀素草书歌》曰：“粉壁摇晴光，素屏凝晓霜，待师挥洒兮不可忘。”

⑨席君盖京师医者，与山谷寓舍相邻。山谷书帖中所谓席三，即其人也。《文选》左太冲诗：“南邻击钟磬。”《汉书·龚遂传》曰：“明府且止。”杜牧之诗：“蜗涎蠹画梁。”老杜诗云：“虫书玉佩藓。”

⑩《汉书·尹赏传》曰：“相与探丸为弹。”《史记·扁鹊传》曰：“臣非能生人也；此当生者，越人能使之起耳。”《楚辞》曰：“虽九死其犹未悔。”《史记》：“太仓公淳于意受公乘阳庆禁方，为人治病决死生，多验。”

(11)《异闻集》卷一：道者吕翁经邯郸道上。邸舍中有少年卢生自叹其贫困，言讫思寐。时主人方炊黄粱为饌。翁乃探怀中枕以授生。枕两端有窍。生梦中自窍入其家，见其身富贵五十年老病而卒。欠伸而悟，顾吕翁在傍，主人炊黄粱尚未熟。

(12)《汉书·苏武传》曰：“人生如朝露，何久自苦如此。”《维摩经》曰：“是身如芭蕉，中无有坚。”《遗教经》曰：“世实危脆，无牢强者。”《庄子》曰：“人生天地之间，如白驹之过郤，忽然而已。”

(13)《传灯录》：“杭州永明寺智觉禅师延寿著《宗镜录》一百卷。”其《序》曰，“举一心为宗，照万法如镜。编联古制之深义，撮略宝藏之圆诠。”云云。《羔羊诗》曰：“自公退食。”《传灯录》：“守安禅师颂曰：‘南台静坐一炉香，亘日凝然万虑忘。’”

《同子瞻韵和赵伯充团练》注：伯充宗室子。武卫大将军康州团练使，善画马。

《戏答陈元舆（轩）》：官饔同盘厌腥膩，茶瓿破睡秋堂空。自言不复蛾眉梦，枯淡颇与小人同。

《发愿文》：我从昔来，因痴有爱。饮酒食肉，增长爱渴。入邪见林，不得解脱。今者对佛发大誓愿，愿从今日尽未来世不复淫欲，愿从今日尽未来世不复饮酒，愿从今日尽未来世不复食肉。（《全书·内集》二十九）

观伯时画马礼部试院作

仪鸾供帐鬻虱行，翰林湿薪爆竹声，风帘官烛泪纵横②。

木穿石槃未渠透，坐窗不遨令人瘦，贫马百鬻逢一豆③。

眼明见此玉花骢，径思着鞭随诗翁，城西野桃寻小红④。

①《目录》第九卷：元祐三年戊辰（1088，山谷四十四岁），是岁山谷在史局。其春东坡知贡举，山谷与李公麟等皆为其属。

黄《谱》二十三 元祐三年戊辰 正月东坡知贡举，先生为参详。

按题大学试院云：元祐二（？）年正月乙丑（十七日）锁太学，试礼部进士四千七百三十二人。三月戊申（初一日）奏号进士五百人，宗室二人。子瞻、莘老知贡举，熙叔、鲁直（五人）参详，君貺、无咎（十四人）点检试卷。是日侍御史日晏不来，为子发书。

②上三句言供拟之寒陋也。供张弊坏，卒徒以为卧具，故有鬻虱之行于其间。《国朝会要》曰：“仪鸾司在拱宸门外嘉平坊，掌奉供帐之事。翰林司在大宁门内，掌供御酒茗汤果，及游幸宴会，内外延设。”《神异经》曰：“山臊畏爆竹声。后

汉巴祇与客暗坐，不燃官烛。”李商隐诗曰：“风帘残烛隔霜清。”老杜诗曰：“四座泪纵横。”

③言锁宿甚久，出院未有期，郁郁自苦，如贫马之得瘦。《真诰》曰：“太极老君与傅先生木钻，使穿一石槃，厚五尺许。积四十七年而石穿，遂得神丹。”《庭燎诗》注曰：“夜未央，犹言夜未渠央也。”《音义》曰：“渠，音其遽反。”元次山诗曰：“岂欲皂枥中，争食𪔐与𪔐？”自注云：“𪔐，糠中可食者，下没反。牛马食余草节曰𪔐，下谏反。”按《集韵》：“𪔐音何间反，莖余草也，又侯裊反。”

④老杜诗：“吾与汝曹俱眼明。”又《丹青引》曰：“先帝天马玉花驄。”（一本作“五花驄”）《晋书·刘琨传》曰：“常恐祖生先吾着鞭。”诗翁谓东坡。老杜诗：“点注桃花舒小红。”

《目录》第七卷：伯时名公麟。

《咏李伯时摹韩幹三马次苏子由韵简伯时兼寄李德素》（《内集》七）：李侯画隐百僚底，初不自期人误知。戏弄丹青聊卒岁，亦如阅世老禅诗。

《次韵子瞻和子由观韩幹马因论伯时画天马》（《内集》七）：曹霸弟子沙苑丞，喜作肥马人笑之。李侯论幹独不尔，妙画骨相遗毛皮。况我平生赏神骏，僧中云是道林诗。

《丛话》前集四十八：《禁裔》谓之促句换韵。其法三句一换韵，三叠而止。此格甚新，人少用之。

纪昀曰：此法本之嘉州《走马川》诗。嘉州又本之《峰山碑》，但碑是四言耳。（《苏诗编注集成》卷三十五按）

《詹言》十二：起三句极言供奉之陋，当一传。收入题，神化，极言贫困。此是在试院作。坡和尤妙。

苏轼《次韵黄鲁直画马试院中作》：“少年鞍马勤远行，卧闻𪔐草风雨声，见此忽思短策横。十年髀肉磨欲透，那更陪君作诗瘦！不如芋魁归饭豆。门前欲嘶御史驄，诏恩三日休老翁；羡君怀中双桔红。”查注：“本集书试院诗后云：‘元祐三年正月二十一日领贡举事。辟李伯时为考校官。三月初，考校既毕，待诸厅参会。伯时苦水悸，欲作马以排闷。鲁直诗先成，余次韵；蔡天启、晁无咎、舒尧文、廖明略皆继。’”

翁方纲曰：“贫马”句比兴，夹写7入题无迹。

送王郎

酌君以蒲城桑落之酒，泛君以湘累秋菊之英②。

赠君以黟川点漆之墨，送君以阳关堕泪之声③。

酒浇胸次之磊隗，菊制短世之颓龄④。

墨以传万古文章之印，歌以写一家兄弟之情⑤。

江山万里俱头白，骨肉十年终眼青。

连床夜语鸡戒晓，书囊无底谈未了⑥。

有功翰墨乃如此，何恨远别音书少。

炒沙作糜终不饱，镂冰文章费工巧⑦。

要须心地收汗马，孔孟行世日杲杲⑧。

有弟有弟力持家，妇能养姑供珍鲑⑨。

儿大诗书女丝麻⑩，公但读书煮春茶。

①《目录》第一卷：元丰七年甲子（1084，山谷四十岁），是岁山谷监德州德平镇。有《发愿文》，盖七年三月过泗州僧伽塔所作。到官当在夏秋也。

王纯亮字世弼，山谷之妹婿，见于黄氏世谱。

②庾信诗：“蒲城桑落酒。”按《续古今注》云：“索郎酒桑落时美，故因以为名。”《齐民要术》载酿桑落酒法，亦以九月。或云：“桑落，河名，非也。”杜诗：“坐开桑落酒。”《汉书》扬雄作《反骚》曰：“钦吊楚之湘累。”注谓屈原赴湘死，故曰湘累。《楚辞》曰：“夕飧秋菊之落英。”

③黟音伊，汉旧县，今属歙州。《墨谱》云：“江南黟、歙之地有李廷珪墨尤佳。廷珪本易水人，唐末渡江居歙，造墨有名。”萧子良《答王僧虔书》云：“仲将之墨一点如漆。”王维诗：“劝君更尽一杯酒，西出阳关无故人。”李商隐诗：“断

肠声里唱阳关。”堕泪碑，见《晋书·羊祜传》。

④《庄子》曰：“喜怒哀乐不入于胸次。”渊明诗：“菊为制颓龄。”班固《幽通赋》：“道修长而世短。”

⑤印，如释氏所谓传佛心印。《诗》曰：“以写我忧。”

⑥《文选·赵景真答嵇茂齐书》曰：“鸣鸡戒旦。”颜师古注《急就章》曰：“有底曰囊，无底曰橐。”

⑦《楞严经》曰：“若不断淫修禅定者，如蒸砂石欲成其饭，经百千劫，只名热沙。何以故？此非饭，本砂石成故。”佛书又云：“譬如说食，终不能饱。”《盐铁论》曰：“内无其质而外学其文，若画脂镂冰，费日损功。”《考工记》曰：“工有巧。”

⑧谓道义战胜，胸中开明，乃晓然见圣贤用心处。《史记·晋世家》：“文公曰：‘矢石之难，汗马之劳，此复受次赏。’”孟子曰：“子夏、子张、子游以有若似圣人，欲以所事孔子事之。”曾子曰：“不可。江汉以濯之，秋阳以暴之，皜皜乎不可尚矣。”注曰：“秋阳，周之秋，夏之五月六月，盛阳也。皜皜，甚白也，皜音杲。”《诗》曰：“其雨！其雨！杲杲出日。”山谷《答王雱书》（《正集》十八《与王子予书》）曰：“想以道义敌纷华之兵战胜久矣。古人云：‘并敌一向，千里杀将。要须心地收汗马之功，读书乃有味。’”

⑨老杜《同谷歌》云：“有弟有弟在远方。”《南史·庾杲之传》：“谁谓庾郎贫？食鲑常有二十七种。”鲑，户佳反，《切韵》：“鱼名，出《吴志》。”

⑩《礼记》曰：“治其丝麻。”

《王直方诗话》：“读书头欲白，相对眼终青。”“身更万事已头白，相对百年终眼青。”“看镜白头知我老，平生青眼为君明。”“故人相见尚青眼，新贵如今多白头。”“江山万里将头白，骨肉十年终眼青。”“白头逢国土，青眼酒尊开。”此坡、谷所作也。其用“青眼”对“白头”者非一，而工拙亦各有差。老杜亦云：“别来头并白，相见眼终青。”

欧阳修《奉送原甫侍读出守永兴》：酌君以荆州鱼枕之蕉，赠君以宣城鼠须之管。酒如长虹饮沧海，笔若骏马驰平坂；爱君尚少力方豪，嗟我久衰欢渐鲜。文章惊世知名早，意气论交相得晚。鱼枕蕉，一举十分当复盏。鼠须管，为物虽微情不浅。新诗醉墨时一挥，别后寄我无辞远。（集八）

《丛话》：永叔送原甫出守永兴诗云：“酌君……平坂。”黄鲁直送王郎诗云：“酌君……之情。”近时学者以谓此格独鲁直为之，殊不知永叔已先有也。（《玉屑》八）

《留王郎》：生涯得如此，旧学更光新。郢人怀妙质，聊欲运吾斤。（《内集》一）

寄黄几复

【原注云：乙丑年德平县作。】

我居北海君南海，寄雁传书谢不能②。

桃李春风一杯酒，江湖夜雨十年灯③。

持家但有四立壁，治病不蕲三折肱④。

想得读书头已白，隔溪猿哭瘴溪藤。

①山谷尝有跋云：（黄《谱》十八，按成都续帖，先生草书此诗跋云云。）几复在广州四会，予在德州德平镇，皆海滨也。山谷古诗《谢公定和二范秋怀五首邀予同作》（《内集》四）亦云：“四会有黄令。”

②《左传·僖公四年》曰：“君处北海，寡人处南海，惟是风马牛不相及也。”刘禹锡诗：“谪在三湘最远州，边鸿不到水南流。”按《楚辞·招魂》：巫阳曰：“谢不能”，王逸注颇失其义。若《汉书·项籍传》，陈婴谢不能，则此诗所用之意。

③两句皆记忆往时游居之乐，今既十年矣。《晋书·张翰传》曰：“使我有身后名，不如即时一杯酒。”

④《汉书·司马相如传》曰：“家徒四壁立。”《左传·定公十三年》：“齐高强曰：‘三折肱知为良医。’”此借用，言其谙练世故，不待困而知也。

东坡诗：“读书头欲白，相对眼终青。”老杜诗《九日》：“殊方日落玄猿哭，故国霜前白雁来。”四会在广东，故云瘴溪。

《王直方诗话》：张文潜尝谓余曰：黄九似“桃李春风一杯酒，江湖夜雨十年灯。”真是奇语。若溪渔隐曰：汪彦章有“千里江山渔笛晚，十年灯火客毡寒”之句，

效山谷体也。余亦尝效此体，作一联云：“钓艇江湖千里梦，客毡风雪十年寒。”（《玉屑》十八）

《普闻诗论补》：初二句为破题，第三第四句为颌联。大凡颌联皆宜意对。春风桃李但一杯，而想象无聊，屡空为甚；飘蓬寒雨十年灯之下，未见青云得路之便，其羁孤未遇之叹具见矣。其意句亦就境中宣出。桃李春风，江湖夜雨，皆境也。昧者不知，直谓境句，谬矣。（《说郛》六十七）

《次韵几复和答所寄》，山谷旧跋此诗云：丁卯岁几复至吏部改官，追和予乙丑在德平所寄诗也。（目录）海南海北梦不到，会合乃非人力能。地褊未堪长袖舞，夜寒空对短檠灯。相看鬓发时窥镜，曾共诗书更曲肱。作个生涯终未是，故山松长到天藤。（《内集》八）

黄《谱》一：几复名介，豫章西山人。先生作几复墓志，（集三十一）载几复年甚少则有意于六经。方士大夫未知读《庄》《老》时，几复为余言云云。则是几复与先生少年交游。盖几复自熙宁九年（1076）同学究出身，为长乐尉，广州教授，楚州推官，知四会县。仕于岭南者十年。元祐三年（1088）没于京师。

《环溪诗话》：山谷桃李云云言四件事。（《今体诗钞》注略）

《詹言》二十：一起浩然，一气涌出，五六一顿。结构与前一样笔法。

《举要》：吴（闳生）曰：“黄诗起处每飘然而来，亦奇气也。”

《宋诗菁华录》：次句语妙，化臭腐为神奇也。三四为此老最合时宜语；五六则狂奴故态矣。

《赠送张叔和》：我提养生之四印，君家所有更赠君：百战百胜，不如一忍，万言万当，不如一默；无可简择眼界平，不藏秋毫心地直。我肱三折得此医，自觉两踵生光辉。（内集四）

《普闻诗论补》：论曰：“诗家云：炼字莫如炼句，炼句莫若得格，格高本乎琢句，句高则胜矣。天下之诗莫出于二句：一曰意句，二曰境句。境句则易琢，意句难制。境句人皆得之，独意不得其妙者，盖不知其旨也。所以鲁直、荆公之诗出于流辈者，以其得意句之妙也，何则？盖意从境中宣出。鲁直寄黄诗云云。”

次韵杨君全送酒

扶衰却老世无方，唯有君家酒未尝②。

秋入园林花老眼，茗搜文字响枯肠③。

酹头夜雨排檐滴④。杯面春风绕鼻香⑤。

不待澄清遣分送，定知佳客对空觞。

①《目录》第十三卷：元符三年庚辰（1100，山谷五十六岁），是岁山谷在戎州。五月，徽宗即位。五月复宣德郎（黄《谱》二十七：据山谷公道微使君手书真迹作宣义郎）。监鄂州在城盐税。山谷既得放还，以江涨未能下峡。七月自戎舟行，省其姑于青神。十月改奉议郎，签书宁国军节度判官。十一月自青神复还戎。十二月发戎州，过江安，为石信道挽留，遂作岁于此。

又：君全名琳，青神人。山谷有中岩题字云：元符三年九月己巳，王元直携酒，帅杨君全景山酌张子谦介卿、黄鲁直于慈姥之东堂。此诗盖是时所作，故有“秋入园林花老眼”之句。（介卿名祉，父闇，娶山谷之姑。）

②《汉书·食货志》曰：“酒所以扶衰养疾。”《史记·汉武帝纪》：“李少君以却老方见上。”退之诗：“断送一生唯有酒。”《左传》：“颖谷封人曰：‘未尝君之羹。’”

③卢仝《茶歌》云：“三碗搜枯肠，惟有文字五千卷。”

④《玉篇》：“酹与酢同，侧射反。”《切韵》云：“压酒具也。”欧公诗：“寒醅美新酹。”

⑤卢仝诗：“一片新茶破鼻香。”乐天诗：“独有病眼花，春风吹不落。”

赠李辅圣

交盖相逢水急流②，八年今复会荆州。已回青眼追鸿翼，肯使黄尘没马头③。旧管新收几妆镜，流行坎止一虚舟④。相看绝叹女博士，笔研管弦成古丘⑤。原注云：“女博士谓辅圣后房孔君也，于文艺无所不能，皆妙绝。”

①《目录》第十四卷：建中靖国元年辛巳（1101，山谷年五十七岁），是岁正月解舟江安。三月至峡州。改知舒州。四月至荆南，泊家沙市。又召以为吏部员外郎。时病痼初愈，辞免恩命，乞知太平州。留荆南待命，遂逾冬焉。

②言卒然相遇，不容少停，如流波之急也。《文选·乐府诗》：“车马若川流。”

③上句用嵇康诗“目送归鸿”之意。《文选》陆士衡诗：“愿假归鸿翼，翻飞曲江汜。”下句谓不复浮沉京洛风尘间也。

④旧管，新收，本吏文书中语，山谷取用，所谓以俗为雅也。贾谊《鹏赋》曰：“乘流则逝，得坎则止。”《庄子》曰：“泛若不系之舟，虚而遨游者也。”《易》曰：“乘木舟虚。”《刘子》：“虚舟触人，人不知怨。”

⑤《世说》：“殷中军问刘尹云云，一时绝叹以为名通。”又云：“袁虎作露布，手不辍笔。王东亭绝叹其才。”

《甄后传》曰：“后年九岁，喜书，辄用诸兄笔砚。兄言：‘当作女博士耶？’”太白诗：“晋代衣冠成古丘。”

《全书》别集十五《与辅圣书》：想能夙夜文章，以销往日好武之心。授官既无吏责，颇得一意于文字。

题伯时（画）顿尘马

竹头枪地风不举，文书堆案睡自语②。

忽看高马顿风尘，亦思归家洗袍袴③。

①元祐三年春礼部试院作。

②《战国策》：“秦王谓唐且曰：‘布衣之怒，免冠徒跣，以头抢地尔。’”司马迁书亦曰：“见狱吏则头抢地。”元稹诗：“满眼文书堆案边，眼昏偷得暂时眠。”

③老杜诗：“高马勿捶面。”韦应物诗：“乱发思一栉，垢衣思一换。”时山谷在试卷中，故有思归之语。

黄《谱》二十三：先生有此诗真迹，题作辘马。今观诗句乃云：“忽思马欲顿风尘，则是辘马无疑。”

竹枝词二首并跋

撑崖挂谷蝮蛇愁，入箐攀天猿掉头②。鬼门关外莫言远，五十三驿是皇州③。

浮云一百八盘萦，落日四十八渡明④。鬼门关外莫言远，四海一家皆弟兄⑤。

《古乐府》有巴东三峡巫峡长，猿啼三声泪沾裳。但以抑怨之音和为数叠。惜其声今不传。余自荆州上峡入黔中，备尝山川险阻，因作二叠与巴娘，令以《竹枝》歌之。前一叠可和云：“鬼门关外莫言远，五十三驿是皇州。”后一叠可和云：“鬼门关外莫言远，四海一家皆弟兄。”或各用四句入《阳关》、《小秦王》，亦可歌也。（绍圣二年四月〔十九〕甲申）

①《目录》第十二卷：绍圣二年乙亥（1095，山谷年五十一岁）。是岁山谷谪黔州。正月受命，与其兄元明出尉氏，许昌，由汉沔趋江陵，上夔峡。三月辛亥至下牢关。四月二十三日黔州，寓开元寺。

刘禹锡《竹枝词引》曰：“余来建平，里中儿联歌《竹枝》，吹笛击鼓以赴节，含思宛转，有淇、濮之艳。昔屈原居沅、湘，其民迎神，辞多鄙陋，乃为作《九歌》。故余亦作《竹枝词》九篇。（内集九）

②言山路险绝如此，即诗所谓“蛇倒退”、“胡孙愁”也。郭璞注《尔雅》云：“蝮蛇细颈大头焦尾，一名反鼻。”《楚辞》曰：“攀天阶而下视。”元稹《乐府》有梦上天诗曰：“攀天上天攀未得。”太白《蜀道难》曰：“猿猱欲度愁攀缘。”

③鬼门关在峡州路。《寰宇记》云：“黔州东北至东京三千八百六十五里。”谢玄晖诗：“春色满皇州。”

④一百八盘及四十八渡皆自峡州往黔中路名。山谷书萍乡县厅亦曰：“略江陵，上夔峡，过一百八盘，涉四十八渡。”

⑤子夏曰：“君子敬而无失，与人恭而有礼，四海之内，皆兄弟也。”《荀子》：“四海之内若一家。”

元明《题歌罗驿竹枝词》：尺五攀天天惨颜，盐烟溪瘴锁诸蛮。平生梦亦未尝处，闻有鸦飞不到山。风黑马踉（跑）驴瘦岭，日黄人度鬼门关。黔南去此无多远，想在夕阳猿啸间。（《全书》外集十）

翁刻别集补有《竹枝》二首咏夔州事，亦作于是年。

六月十七日昼寝

红尘席帽乌靴里，想见沧州白鸟双②。

马鬣枯萁喧午枕，梦成风雨浪翻江③。

①《目录》第十一卷：元祐四年己巳（1089，山谷年四十五岁）至八年癸酉（1093，山谷年四十九岁）夏，四年至六年皆在史局。六年六月特封母寿康县太君为安康郡太君，乞以转官恩回授也。山谷在京师，多与东坡唱和。四年夏东坡出知杭州，遂无诗伴。而山谷常苦眩冒，多在史局，又多侍母夫人医药。至六年六月，遂丁家艰。故此数年之间作诗绝少。诸诗多不可考，姑寄寓于此。

②《选》诗曰：“复协沧州趣。”又老杜诗：“河间双白鸥。”马缟《中华古今注》中：“席帽本古之围帽也，男女通服之。以韦为之，四周垂丝网之，施以珠翠。丈夫去饰。”吴处厚《青箱杂记》二：“国初犹袭唐风，士子皆曳袍重戴，出则以席帽自随。”

③闻马齕草声遂成此梦也。《楞严经》曰：“如重睡人眠熟床枕，其家有人于彼睡时捣练舂米。其人梦中闻舂捣声，别作他物，或为击鼓，或为撞钟。”此诗略采其意，以言江湖之念深；兼想与因，遂成此梦。

《石林诗话》：外祖晁君诚善诗，苏子瞻所谓“温厚静深如其为人”者也。黄鲁直尝诵其“小雨愔愔人不寐，卧听羸马齕残藟。”爱赏不已。他日得句云：“马齕枯萁喧午枕，梦惊风雨浪翻江。”自以为工，以语舅氏无咎曰：“吾诗实发于乃翁前联，余始闻舅氏言，不解风雨翻江之意。一日，憩于逆旅，闻旁舍有澎湃鞞鞞之声，如风浪之历船者，起视之，乃马食于槽，水与草齕齕于槽间而为此声，方悟鲁直之好奇。然此亦非可以意索，殆适相遇而得之也。”（《丛话》前集四十九引）

《白头吟》：𪗰（或云“ ”字之讹；音宜，露齿貌）如马噉萁，川上高士嬉。

临河道中

村南村北禾黍黄②，穿林入坞歧路长③。据鞍梦归在亲侧，弟妹妇女笑两厢④。甥侄跳梁暮堂下，惟我小女始扶床⑤。屋头扑枣烂盈㪷，嬉戏欢争挽衣裳⑥。觉来去家三百里，一园兔丝花气香。可怜此物无根本，依草着木浪自芳⑦。风烟雨露非无力⑧，年年结子飘路傍。不如归种秋柏实，他日随我到冰霜⑨。

①黄《谱》八：元丰二年己未（1079，山谷年三十五岁），先生是岁在北京已六年。《谱》十列此诗。

临河属开德，路由河堤。《外集》中有《曹村道中》诗云：“瓜田余蔓有荒垄，梨子压枝铺短墙。明月风烟如梦寐。平生亲旧隔湖湘。”是也。盖经行先曹村，后临河，故此诗有觉来去家三百里之句，指大名也。

② 苏词：“簌簌衣巾落枣花，村南村北响缲车。”白乐天《折臂翁诗》：“村南村北哭声哀。”

③ 《列子》：杨子之邻人亡羊。杨子曰：“何追者之众？”邻人曰：“多歧。”既反。问“获羊乎？”曰：“亡之矣。”曰：“奚亡之？”曰：“歧路之中又有歧焉，吾不知所之，所以反也。”谢元晖诗：“歧路多徘徊。”

④ 老杜诗：“苏侯据鞍喜。”《乐府·饮马长城窟行》：“梦见在我旁，忽觉在他乡。”“两厢”字见《毛诗》；两厢，庑也。韩诗：“两厢辅翬毼。”

⑤ 白乐天诗：“惟弄扶床女，时时强展眉。”杜牧之诗：“扶床乳女午啼饥。”贺方回诗：“何物系人心？三岁扶床女。”韩退之《卢君夫人墓铭》：“扶床坐膝，嬉戏欢争。”

⑥ 《诗·豳风》：“八月剥枣。”河东人以杖击枣谓之扑。太白诗：“儿女歌笑牵人衣。”杜少陵诗：“短衣数挽不掩胫。”

⑦ 《淮南子·说山训》曰：“千年之松下有茯苓，上有兔丝。”注云：“茯苓，千岁松脂也。兔丝生其上而无根，一名女萝。”《毛诗·鵲奔》：“鸛与女萝，施于松柏。”注云：“女萝，兔丝松萝也。”韩昌黎诗：“浮云柳絮无根本。”

⑧ 白乐天诗云：“等闲裁树木，随分占风烟。”

⑨ 《庄子》：“阖胡尝视其良，既为秋柏之实矣。”东坡《岁寒知松柏》诗：“永无秋实悲。”王介甫诗：“曾与蒿藜同雨露，终随松柏到冰霜。”山谷意谓如草木之依附，随即飘零，不若慕秋柏之梗介以阅冰霜也。

对酒歌答谢公静

我为北海饮，君作东武吟②。看君平生用意处，萧洒定自知人心③。南阳城边雪三日，愁阴不能分皂白④。摧轮浣蹄泥数尺⑤，城门昼闭眠贾客。移人僵尸在旦夕，谁能忍饥待食麦⑥。身忧天下自有人⑦，寒士何者愁填臆。民生正自不愿材，可乘以车可鞭策⑧。君不见海南水沉紫旃檀，碎身百炼金博山⑨。岂如不蓬斧斤赏，老大绝崖霜雪间。投身有用祸所集，何况四达之衢并先汲⑩。昨日青童天上回，手捧玉帝除书来⑪。一番通籍清都阙，百身书名赤城台⑫。飞升度世无虚日，怪我短褐趋尘埃。顾谓彼童子，此何预人事⑬；但对清樽即眼开，一杯引人着胜地⑭。传闻官酒亦自清，径须沽酒续吾瓶。南山朝来似有意⑮，今夜傥放春月明。

① 黄《谱》七：元丰元年戊午（1078，山谷年三十四岁），先生是岁在北京。谢师

厚居南阳。先生告假或因他故至南阳，在冬春间。公静名愔，师厚之子。

②《后汉书》：“孔北海云：‘坐上客常满，樽中酒不空。’”鲍明远《乐府》有《东武吟》。

③定自，晋人语也。《世说》：“谢太傅曰：‘定自佳，定自佳。’”

④《晋·天文志》：“庾翼书云：‘此天公愤愤无皂白之征也。’”

⑤魏武《苦寒行》曰：“车轮为之摧。”

⑥《左传·成公十年》：“晋侯梦大厉。觉，召桑田巫，巫言如梦。公曰：‘何如？’曰：‘不食新矣。’又曰：‘晋侯欲麦，使甸人献麦。将食，张；如厕，陷而卒。’”此借使。

⑦白乐天诗：“退身江海应无用，忧国朝廷自有贤。”

⑧《晋书·谢安传》：“正自不能不尔。”退之《祭子厚文》：“凡木之生，不愿为材。”《列女传》：“老莱子妻云：‘可食以酒肉者，可随以鞭捶。可授以官禄者，可随以斧钺。’”

⑨《本草》：“沈香门，白檀树出海南。”又云：“真紫檀旧在下品。”又云：“扶南国人言，众香共是一本，根是旃檀，节是沈水，叶是藿香，胶是薰陆。”《选》诗：“昔为百炼刚。”李白诗：“博山炉中沈香火。”

⑩《庄子》：“匠石归，栎社见梦曰：……且子求无所可用久矣，几死乃今得之，为予大用。使予也而有用，且得有此大也邪。”《尔雅》：“四达谓之衢。”《庄子》：“直木先伐，甘井先竭。”

(11)《列仙传》有青童君。《王莽传》：“是时争为符命封侯，其不为者相戏曰：‘独无天帝除书乎？’”此借用。

(12)《列子》：“穆王以为清都紫微，帝王之居。”刘禹锡诗：“金门通籍真多士，黄纸除书每日开。”《毛诗》：“人百其身。”《续仙传》：“司马承祯身居赤城，名在丹台。”《茆君传》云：“治赤城山。”

(13)退之《秋怀诗》：“顾谓汝童子，置书且安眠。”《晋书·谢玄传》：“子弟亦何预人事，而正欲使其佳。”

(14) 《世说新语》曰：“王卫军云：酒正自引人着胜地。”

(15) 王徽之云：“朝来西山有爽气。”

戏赠彦深

【原注云：李源字彦深，厚之弟，居南阳。】

李髯家徒壁立四，未尝一饭能留客②。

春寒茅屋交相风，【相风鸟以木或铜为之】

倚墙扞虱读书策③。

老妻甘贫能养姑，宁剪髻鬟不典书④。

大儿得渔不索鱼，小儿得襦不索襦⑤。

庾郎鲑菜二十七，太常斋日三百余⑥。

上丁分膳一饱饭，藏神梦诉羊蹴蔬⑦。

世传寒士有食籍，一生当饭百瓮菹⑧。

冥冥主张审如此，附郭小圃宜勤鉏⑨。

葱秧青青葵甲绿，早韭晚菘羹糝熟⑩。

充虚解战赖汤饼，芼以萍齏与甘菊⑪。【《外集》十有《自采菊苗荐汤饼二首》】

几日怜槐已着花，一心咒笋莫成竹⑫。【杜有《槐叶冷淘诗》，《唐书·食货志》：“贫者以蓬子为面，槐叶为齏。”】

群儿笑髯穷百巧，我谓胜人饭重肉⑬。

群儿笑髯不若人，我独爱髯无事贫。

君不见——

猛虎即人厌麋鹿，人还寝皮食其肉(14)。

濡需终与豕俱焦(15)，饫肥择甘果非福。

虫蚁无知不足惊，横目之民万物灵(16)。

请食熊蹯楚千乘，立死山壁汉公卿(17)。

李髯作人有佳处，李髯作诗有佳句。

虽无厚禄故人书，门外犹多长者车(18)。

我读扬雄逐贫赋(19)，斯人用意未全疏。

①《外集·目录》卷三：元丰元年戊午（1078，山谷三十四岁），是岁在北京。

②《蜀志·关羽传》：“马超来降，羽书与诸葛亮，问超人才可谁比类。亮答之曰：‘孟起当与益德并驱争先，犹未及髯之绝伦逸群也。’羽美须髯，故亮谓之髯。”（卷三）老杜云：“一饭未曾留俗客。”

③渊明《饮酒诗》：“弊庐交悲风。”《晋书·王猛传》：“桓温入关，猛被謁诣之，扞虱而言，旁若无人。”《曲礼》曰：“先生书策琴瑟在前。”

④《晋书·陶侃传》：“侃早孤，贫，为县吏鄱阳。孝廉范逵尝过侃。时仓卒无以待宾，其母乃截发得双髻，以易酒肴，乐饮极欢。”杜诗：“长者来在门，荒年自糊口。家贫无供给，客位但箕帚。俄顷羞颇珍，寂寥人散后，入怪鬓发空，吁嗟为之久。自陈翦髻鬟，鬻市充杯酒。”

⑤《晋书·韩康伯传》：“伯数岁，母为作襦。令捉熨斗而谓之曰：‘且着襦，寻当作复襦。’伯曰：‘不复须。火在斗中而柄尚热，今既着襦，下亦当暖。’”

⑥《后汉书·周泽传》：“为太常，尝卧疾斋宫。其妻哀泽老病，窥问所苦。泽大怒。以妻干犯斋禁，遂收送诏狱谢罪。时人为之语曰：‘生世不谐，作太常妻。一岁三百六十日，三百五十九日斋，一日不斋醉如泥。’”

⑦《周礼·大宗伯》：以脰膾之礼，亲兄弟之国。此言释奠分胙也。《启颜录》云：“有人常食蔬，忽食羊肉。梦五藏神曰：‘羊踏破菜园。’”

⑧《诗》：“疆场有瓜，是剥是菹。”菹，若今齏瓮也。（盐菜细切曰齏，全物曰

菹)又摘《礼记》“醯醢百瓮”字，以相谑也。又，《南史·庾杲之传》：“清贫自业，食唯有韭菹、□韭、生韭杂菜。任昉尝戏之曰：‘谁谓庾郎贫？食鲑尝有二十七种。’”《侯鯖录》：东坡曰：世传王状元未第时，醉坠汴河。河神扶出曰：“公有三百千料钱，若死，何处消散？”士有效之，佯醉落水，神亦扶出。士喜曰：“我料钱几何？”神曰：“有三瓮翁黄齏无处消散耳。”

⑨《庄子》：“孰主张是。”摘《苏秦传》：“附郭田二顷”字。

⑩《南史》：“齐周顒隐钟山。文思太子问菜食何味最胜？曰：‘春初早韭，秋末晚菘。’”《庄子》：“藜羹不糝。”(以米合羹曰糝)

(11)晋束晰《饼赋》曰：“玄冬猛寒，清晨之会，涕冻鼻中，霜凝口外，充虚解战，汤饼为最。”《内则》云：“雉兔皆有芼。”注云：“菜酿也。”《晋书·石崇传》云：“韭萍齏，是捣韭根杂以麦苗耳。”

(12)白居易《食笋诗》：“且食勿踟蹰，南风吹作竹。”

《从斌老乞苦笋》：“烦君便致苍玉束，明日风雨皆成竹。”(《内集》十二)

(13)《汉书·朱家传》：“食不重味。”《公孙弘传》：“弘曰：晏婴相景公，食不重肉。弘身食一肉脱粟饭。”

(14)《左传·襄公二十一年》：“州绰曰：‘二子者譬于禽兽，臣食其肉而寝处其皮矣。’”

(15)《庄子·徐无鬼篇》：“濡需者，豕虱是也。择疏鬣自以为广宫大囿，奎蹄曲隈，乳间股脚，自以为安室利处。不知屠者之一旦鼓臂布草操烟火，而已与豕俱焦也。”

(16)《庄子·天地篇》：“夫子无意于横目之民乎？”《书》：“惟人万物之灵。”

(17)《左传·文公元年》：“楚太子商臣以宫甲围成王。王请食熊蹯而死，弗听。”《后汉书·献帝纪》：“建安元年，车驾至洛阳。是时宫室烧尽，百官披荆棘，依墙壁间。州郡各拥强兵，而委输不至。郡僚饥乏，尚书郎以下自出采稻，或饥死墙壁间。”

(18)杜诗：“厚禄故人书断绝，长饥稚子色凄凉。”《汉书·陈平传》曰：“门多长者车辙。”

(19) 《逐贫赋》见（《扬雄传》）。

过家

络纬声转急②，田车寒不运。

儿时手种柳，上与云雨近。

舍旁旧佣保③，少换老欲尽。

宰木郁苍苍，田园变畦畛④。

招延屈父党，劳问走婚亲⑤。

归来翻作客⑥，顾影良自哂。

一生萍托水⑦，万事雪侵鬓。

夜阑风陨霜⑧，干叶落成阵。

灯花何故喜⑨，大是报书信。

亲年当喜惧，儿齿欲毁龋⑩。

系船三百里，去梦无一寸。

① 《外集·目录》卷十二：元丰六年癸亥（1083，山谷三十九岁），是岁在太和，十二月移监德平镇。

② 《炙毂子杂录》云：“莎鸡。”《古今注》：“一名促织，一名络纬，一名蟋蟀。络纬谓其鸣如纺绩织纬也。”

③ 《司马相如传》：“与庸保杂作。”（颜注：“庸即谓赁作者，保谓庸之可信任者也。”）

④ 宰木，谓墓木也。《公羊传·僖公三十三年》：“宰上之木拱矣。”注：“宰，冢也。”《举要》一：曹子建《赠白马王彪诗》曰：“山树郁苍苍。”《周礼·遂人》：“沟上有畛。”又《说文》曰：“畛，井田间陌也。”

⑤ 《举要》一：《广韵》二十一震曰：“亲，亲家，七遴切。”

⑥ 唐刘长卿诗：“旧业今已无，还乡反为客。”

⑦ 刘伶《酒德颂》：“俯观万物，扰扰焉如江海之载浮萍。”

《举要》：《楚辞·九怀·尊嘉》曰：“窃哀兮浮萍，泛淫兮无根。”王逸注曰：“自比如萍生水濒，随水浮游，乍东西也。”

⑧ 《春秋》：定公元年冬十月：“陨霜杀菽。”《国语》：“驷见而陨霜，陨霜而冬裘具。”

⑨ 杜诗：“灯花何太喜，酒醪正相亲。”

⑩ 《论语·里仁》：“子曰：‘父母之年不可不知也，一则以喜，一则以惧。’”
《周礼·秋官·司厉》：“未龀者不为奴。”注：“毁齿也，男八岁，女七岁。”

《举要》：字字矜炼，佳处如食甘榄，味美于回。

赠别李端叔

我观江南山，如目不受垢。

忆食江南薇，子独于我厚。

在北思江山，如怀冰雪颜②。

千峰上云雨③，岑绝何由攀。

当时喜文章，各有儿子气④。

尔来颌须白，有儿能拜起⑤。

读书浩湖海，解意开春冰⑥。

成山更崇崛，顾我丑丘陵⑦。

白玉著石中，与物太落落⑧。

泾渭相将流，世不名清浊⑨。

乞言既不易，赠言良独难⑩。

古来得道人，挂舌屋壁间。

牧羊金华道，载酒太玄宅⑪。

支颐听晤语，愿君喙三尺⑫。

我行风雨夜，船窗闻远鸡。

故人不可见，故人心可知⑬。

① 《外集·目录》卷七：元丰三年庚申（1080，山谷三十六岁），是岁山谷入京，改官，授吉州太和县。

黄《谱》十一：是秋自汴京归江南。

李之仪字端叔，姑孰人，举进士。元祐中为枢密院编修官。东坡帅定武，辟置幕下。之仪时寓居芜湖。

② 杜诗：“试看他时冰雪容。”

③ 《列子·周穆王篇》：“化人之宫出云雨之上。”

④ 《汉书·高帝五王传》：“朱虚侯章尝入侍燕饮，高后儿子畜之。”

⑤ 《史记·三王世家》：“皇子赖天能胜衣趋拜。”

⑥ 《老子》云：“涣若冰将释。”《春秋序》：“若江河之浸，膏泽之润，涣然冰释，怡然理顺。”

⑦ 《论语》：“譬如为山，未成一簣，止，吾止也。”丑，类也。

⑧ 《老子》：“不欲琤琤如玉，落落如石。”

⑨ 《文选》：“曹子建诗：‘山峰高无极，泾渭扬浊清。’”注引毛萇诗云：“泾渭相入而清浊异。”

⑩《晋书·桓伊传》：为君既不易，为臣良独难。

(11)《列仙传》：“黄初平牧羊，遇道士引至金华山石室中。其兄初起寻见，问‘羊安在？’曰：‘在山东。’往视之，但见白石磊磊。初平叱之，石皆成羊。”扬雄，字子云，其赞云：“雄三世不徙官。及王莽篡位，雄复不侯。人希至其门。时有好事者载酒肴从游，学四科。”。

(12)《诗·陈风》云：“可与晤语。”《传灯录》：“《天台丰干禅师传》：‘居国清寺，厨中有二苦行寒山、拾得。二人执爨，终日晤语，潜听者都不解，独与师相亲。’”《庄子·徐无鬼》：“丘愿有喙三尺。”

(13)李陵《与苏武书》：“人之相知，贵知心。”

和张沙河招饮

张侯耕稼不逢年，过午未炊儿女煎②。

腹里难盈五车读，囊中能有几钱穿③。

况闻缁素尚黄葛，可怕雪花铺白毡④。

谁料丹徒布衣得，今朝忽有酒如川⑤。

①《外集·目录》卷五：元丰二年己未（1079，山谷三十五岁），是岁在北京。

黄《谱》九：沙河县属邢州，乃河北西路，去北京为不远。

②《史记·佞幸传》：“谚曰：‘力田不如逢年，善仕不如遇合。’”退之诗：“有时未朝飧，得米日已晏。隔墙闻欢呼，众口极鹅雁。”

③杜诗：“男儿须读五车书。”《后汉书·赵壹传》：“为诗曰：‘文籍虽满腹，不如一囊钱。’”杜诗：“囊空恐羞涩，留得一钱看。”

④太白《北风行》：“燕山雪花大如席。”老杜诗：“糝径杨花铺白毡。”

⑤《晋书·诸葛长民传》：“贫贱常思富贵，富贵必履危机。今日欲为丹徒布衣，岂可得耶？”《左传·昭公十二年》：“穆子曰：‘有酒如淮。’齐侯曰：‘有酒如澠’。”杜诗：“不有小舟能荡桨，百壶那得酒如川。（一作泉）”

《送张沙河游齐鲁诸邦》：张侯去沙河，三食邳下麦。布衣未可量，苍髯身八尺。

次韵外舅三首

次韵外舅（谢师厚）《喜王正仲三丈奉诏相南兵，回至襄阳，舍驿马就舟见过》三首①

汉上思见庞德公，别来悲叹事无穷②。

声名籍甚漫前日，须鬓索然成老翁③。

家酿已随刻漏下④，园花更开三四红。

相逢不饮未为得⑤，听取百鸟啼匆匆。

能来问疾好音传⑥，蹇步昏花当日痊⑦。

烹鲤得书增目力⑧，呼儿扶立候门前⑨。

游谈取重惭犀首⑩，居物多羸昧计然⑪。

惟有交亲等金石，白头忘义复忘年⑫。

语言少味无阿堵⑬，冰雪相看有此君。

灯火诗书如梦寐，麒麟图画属浮云⑭。

平章息女能为妇，欢喜儿曹解缀文⑮。

忧乐同科唯石友，别离空复数朝曛⑯。

① 《外集·目录》卷二：熙宁十年丁巳（1077，山谷三十三岁），是岁在北京。《外集》三：《次韵谢外舅病不能拜复官夏雨眠起之什》，又《次韵师厚病间十首》，皆元丰元年作。元丰二年山谷继室谢氏歿于官所。

正仲三丈谓王存，字正仲。元丰间修起居注。元祐初自右丞迁左丞。按《实录》：熙宁九年十一月诏，安南行营将士病疾者众，遣同知太常礼院王存祷南岳。自京师十一月被命，至衡山，回程必在次年。按陈无己《诗话》云：谢师厚废居于邓。王右丞存其妹婿也，奉使荆湖，枉道过之，夜至其家。师厚有诗云：“倒着衣裳迎户

外，尽呼儿女拜灯前。”黄《谱》七：相南兵恐是祷南岳。

② 庞德公，襄阳人。以况师厚。《垂虹诗话》云：“别来悲叹事无穷，张孝先光祖云：‘曾见亲札作“欢”字。’政如山谷改杜诗‘少年合开万卷余’，不可拘平侧也。”

③ 《汉书·陆贾传》：“贾游汉庭公卿间，声名籍甚。”《文选》：“文帝书：‘已成成翁，但未白头耳。’”

④ 晋何充字次道。刘惔云：见次道饮，令人欲倾家酿。

⑤ 唐李敬方诗：“相逢不饮空归去，洞口桃花也笑人。”（《复斋漫录》引）

⑥ 《维摩经》曰：“佛告文殊师利，汝行诣维摩问疾。”

⑦ 《圆觉经》：“譬彼病眼见空中花。”

⑧ 《孟子》：“既竭目力焉。”

⑨ 《归去来兮》云：“稚子候门。”

⑩ 犀首，公孙衍也，《史记》有传。

(11) 《史记·货殖传》：“越王勾践困于会稽，乃用范蠡、计然。”注：“计然，范蠡师也。”《汉书·张汤传》：“居物致富，与汤分之。”

(12) 金石交见《韩信传》。阮籍诗：“如何金石交。”“忘年”、“忘义”见《庄子·齐物篇》。

(13) 韩愈《送穷文》：“凡所以使吾面目可憎，语言无味者，皆子之志也。”晋王衍妻郭氏贪鄙。衍嫉之，口未尝言钱。见钱称阿堵物。

(14) 《汉书》：“单于入朝，上思股肱之美，图画其人于麒麟阁。”

(15) 息女见《汉书·高帝纪》。老杜送封主簿诗序：“余与主簿平章郑氏女子，垂欲纳采。书至，女子已许他族。”《汉书·刘韵传赞》：“缀文之士。”杜诗：“汝更小年能缀文。”

(16) 潘安仁诗：“投分寄石友。”韩诗：“吾徒幸无事，庶以穷朝曛。”李白诗：“

举迹倚松石，谈笑迷朝曛。”

登快阁

痴儿了却公家事②，快阁东西倚晚晴③。

落木千山天远大，澄江一道月分明④。

朱弦已为佳人绝，青眼聊因美酒横⑤。

万里归船弄长笛，此心吾与白鸥盟⑥。

①

《外集·目录》卷十：元丰五年壬戌（1082，山谷三十八岁），是岁山谷在太和。

快阁在太和。山谷《送吕知常赴太和丞》云：我去太和欲期矣。《吕君初得太和官》又云：快阁六月江风寒。《今体诗钞注略》二：程实之纪，阁最一郡之胜，在太和东南城上。邑令沈遵名曰快阁。《豫章诗话》：快阁在太和县治东澄江上。

②《晋书·傅咸传》：“夏侯骏弟济素与咸喜，与咸书曰：‘江海之流混混，故能成其深广也。天下大器非可稍了，而相观每事欲了。生子痴，了官事，官事未易了也。了事正作痴，复为快耳。’”

③唐李涉《感兴》：随氏造宫阙，峨峨倚云烟。

④老杜《天河诗》：“常时任显晦，秋至辄分明。”李白诗：“水寒夕波急，木落秋山空。”柳子厚诗：“木落寒山静，江空秋月明。”杜甫《登高》：“无边落木萧萧下。”李白《金陵城西楼月下吟》：“月下沈吟久不归，古今相接眼中稀。解道‘澄江净如练’，令人长忆谢玄晖。”

⑤《礼记·乐记》：“清庙之瑟，朱弦而疏越，一唱而三叹，有遗音农矣。”《吕氏春秋·本味篇》：“伯牙鼓琴，钟子期听之。方鼓琴而志在太山，钟子期曰：‘善哉乎鼓琴，巍巍乎若太山。’少选之间而志在流水，钟子期又曰：‘善哉乎鼓琴，汤汤乎若流水。’钟子期死，伯牙破琴绝弦，终身不复鼓琴，以为世无足复为鼓琴者。”用子期伯牙事，不知谓谁。汉武帝《秋风辞》：“怀佳人兮不能忘。”《文选》六臣注：“佳人，谓群臣也。”《今体诗钞注略》：“按公怀李德素诗：‘古来绝朱弦，盖为知音者。’”《晋·阮籍传》：“籍又能为青白眼。嵇喜来吊，籍作白眼喜弟康闻之，乃赍酒挟琴造焉。籍大悦，乃见青眼。”

⑥ 马融《长笛赋》：“可以写神喻意，溉盥污秽，澡雪垢滓矣。”伏滔《长笛赋》：“近可以写情畅神，穷足以怡志保身。”《列子·黄帝篇》：“海上之人有好鸥鸟者，每旦之海上，从鸥鸟游。鸥鸟之至者百住而不止。其父曰：‘吾闻鸥鸟皆从汝游，汝取来吾玩之。’明日之海上，鸥鸟舞而不下也。”夏文庄（竦）诗：“忘机不管人知否，自有沙鸥信此心。”

《吕氏童蒙训》：或称鲁直“桃李”云云为极至，鲁直以犹砌合。如《快阁》诗已见成就。

吴曾《能改斋漫录》：吕居仁爱豫章少年时作太和县楼诗“落木”云云。

《岁寒堂诗话》：杜子美登慈恩寺塔云：“回首叫虞舜，苍梧云正愁。惜哉瑶池饮，日晏昆仑丘。”此但言其穷高极远之趣尔。南及苍梧，西及昆仑。然而叫虞舜，惜瑶池，不为无意也。《白帝城最高楼》云：“扶桑西枝对断石，弱水东影随长流。”使后来作者如何措手！山谷《登快阁》诗云：“落木千山天远大，澄江一道月分明。”此但以远大、分明之语为新奇，而究其实，乃小儿语也。

《养一斋诗话》：“落木”二句奇语。姚鼐云：“豪而有韵。此能移太白歌行于七律内者。”方东树曰：“起四句且叙且写，一往浩然。五六对意流行，收尤豪放。此所谓寓单行之气于排律之中者。”吴闿生曰：“意态兀傲。”

奕棋二首呈任公渐

【选其二】

偶无公事客休时，席上谈兵校【一作“角”】两棋。

心似蛛丝游碧落，身如蜩甲化枯枝②。

湘东一目诚甘死，天下中分尚可持③。

谁谓吾徒犹爱日，参横月落不曾知④。

① 《外集·目录》卷一：熙宁四年辛亥（1071，山谷二十七岁），是岁在叶县。

② 乐天《长恨歌》：“上穷碧落下黄泉。”退之联句：“化蛊枯槁枝。”言蝉也。蝉亦曰蜩，《诗》：“五月鸣蜩”也。

③ 《南史》：“王伟为侯景谋生。伟作檄云：项羽重瞳，尚有乌江之败；湘东一目

，宁为赤县所归？”

《史记·高祖本纪》：“项羽与汉王约，中分天下，割鸿沟。谓持棋白黑皆不可动也。”

④《后汉书·王符传》：“圣人深知力者民之本，国之基也，故务省徭役，使之爱日。”“月落参横”，见柳子厚《龙城录》。

翁刻《外集补》四有《行役县西喜雨寄任公渐大夫》一首，末云：“令尹眉头想豁开。”山谷时为县尉，疑任为令。

其一：偶无公事负朝喧，三百枯棋共一樽。坐隐不知岩穴乐，手谈胜与俗人言。簿书堆积尘生案，车马淹留客在门。战胜将骄疑必败，果然终取敌兵翻。

〔注〕：评诗者谓山谷此二句则苦思忘形，较胜负于一着，与王荆公措意异矣。荆公诗云：“莫将戏事扰真情，且可随缘道我赢。战罢两奁收黑白，一枰何处有亏成？”（《和叶致远直讲》）

戏赠陈季张

气清语不凡，郭与陈季优。

季子有美质，明月悬高秋。

词谈贯百家，炙毂出膏油②。

放声寄大块，肆情无去留。

方圆付自尔，规矩为疮疣。

当其说荒唐，众口莫能咻③。

书案鼠篆尘，衾蔬满床头。

居不省家舍，那问犬马牛④。

吾尝观圣人，与世为献酬。

道通众人行，智欲万物周。

微言观季子，颇亦有意不。

季子捧腹笑，吾岂搢绅囚⑤。

吾将乘扶摇，南与大鹏游。

相羊九万里，厌则下沧洲⑥。

黄子失所答，如耕不能耰⑦。

井蛙延海螯，乐事擅一丘⑧。

束牲盟伯夷，固自取揶揄⑨。

无心以触物，爱子如虚舟。

维楫苟不存，倾覆当谁尤。

尚思济来者，非但自为谋。

① 黄《谱》三：熙宁四年辛亥（1071，山谷二十七岁），先生是岁在叶县。有《寄季张》、《赋陈季张北轩杏花》、《从陈季张求竹竿引水入厨》、《题季张竹林村》、《陈氏园咏竹》及《呈王明复陈季张》诸诗，云：“并原载《外集》”。

天朗气清，见《兰亭集叙》。《外集》二有《郭明甫作西斋于颍尾请予赋诗二首》，《目录》及黄《谱》五均列于熙宁四年。第二首云：东京望重两并州，遂有汾阳整缀旒。翁伯入关倾意气，林宗异世想风流。君家旧事皆青史，今日高材未白头；莫倚西斋好风月，长随三径古人游。（《宋诗钞》八）

② 《史记·荀卿传》：“齐人颂曰：‘炙毂过髡。’”《集解》：《别录》曰：“过字作‘輶’，輶者，车之盛膏器也。炙之虽尽，犹有余流者。言淳于髡智不尽，如炙輶也。”《索隐》：“过是器名，音如字，谓盛脂之器名。‘过’与‘锅’字相近，盖即指器也。”

③ 《孟子·滕文公》：“一齐人傅之，众楚人咻之。”赵注：“咻之者，灌也。”

④ 《左传》：“风马牛不相及也。”

⑤ 《庄子·天下篇》：“其在于《诗》、《书》、《礼》、《乐》者，邹、鲁之士

，搢绅先生，多能明之。”

⑥《庄子·逍遥游》：“北冥有鱼，化而为鸟，其名为鹏。鹏之徙于南冥也，抟扶摇而上者九万里。”

⑦耨，覆种也。

⑧《庄子·秋水》：“井蛙不可以语于海者，拘于虚也。”又：“坎井之蛙谓东海之螯曰：且夫擅一壑之水而跨峙坎井之乐，此亦至矣。夫子奚不时来入观乎？东海之螯左足未入而右膝已褻矣。”《汉书·叙传》：“渔钓于一壑，则万物不奸其志；栖迟于一丘，则天下不易其乐。”《晋书·谢安传赞》：“太保沈浮，旷若虚舟；任高百辟，惟情一丘。”

⑨《吕氏春秋·介立篇》：“武王使叔旦就胶鬲于次四内，而与之盟曰：加富三等，就官一列。又使保召公就微子开于共头之下，而与之盟曰：世为长侯，守殷常祀；相奉桑林，宜私孟诸。伯夷、叔齐闻之，相视而笑曰：嘻！异乎哉！此非吾所谓道也。今周割牲而盟以为信，杀伐以要利。以此绍殷，是以乱易暴也。不若避之以洁吾行。二子北行，至首阳之下而饿焉。”

秋怀二首

秋阴细细压茅堂，吟虫啾啾昨夜凉。

雨开芭蕉新间旧，风撼萸簪宫应商②。

砧声已急不可缓，檐影既短难为长。

狐裘断缝弃墙角，岂念晏岁多繁霜。

茅堂索索秋风发，行绕空庭紫苔滑。

蛙号池上晚来雨，鹊转南枝夜深月③。

翻手覆手不可期，一死一生交道绝④。

湖水无端浸白云，故人书断孤鸿没⑤。

①黄《谱》六：熙宁八年乙卯（1075，山谷三十一岁），先生是岁在北京。

②《文选·吴都赋》：“其竹则簣簣。”注引《异物志》曰：“簣簣生水边，长数丈，围一尺五六寸，一节相去六七尺或一丈。”

③曹操《短歌行》：“月明星稀，乌鹊南飞。绕树三匝，何枝可依？”

④杜诗：“翻手作云覆手雨，纷纷轻薄何须数！”《汉书》：“一死一生，乃知交情；一贫一富，乃知交态；一贵一贱，交情乃见。”

⑤杜诗：“江东日暮云。”又：“厚禄故人书断绝。”

以右军书数种赠丘十四

丘朗气如春景晴，风暄百果草木生。

眼如霜鹘齿玉冰，拥书环坐爱窗明。

松花泛砚摹真行，字身藏颖秀劲清，

问谁学之果兰亭。我昔颇复戏墨卿②，

银钩蚕尾烂箱簏③，赠君铺案粘曲屏。

小字莫作痴冻蝇，乐毅论胜遗教经④。

大字无过瘞鹤铭，官奴作草欺伯英⑤。

随人作计终后人，自成一家始逼真。

卿家小女名阿潜，眉目似翁有精神。

试留比书他日学，往往不减卫夫人⑥。

①黄《谱》十一：元丰三年庚申（1080，山谷年三十六岁），是岁入京改官，授知吉州太和县。

《外集》八有《从丘十四借韩文二首》。其一云：“同安得见丘迟”，同安，舒州也。其二云：“中有先君手泽，丹铅点勘书诗。莫惜借行千里，他日还君一鸱。”

②《长杨赋序》：“聊因笔墨之成文章，故藉翰林以为主人，子墨为客卿以讽。”

孟浩然诗：“离群会墨卿。”

③《书苑》：“晋索靖草书绝代，名银钩虵尾。”簾，竹器，箱属。

④《韵语阳秋》十四：“鲁直云：‘小字莫作痴冻蝇，《乐毅论》胜《遗教经》。’”又尝云：“《遗教经》或云羲之书，在楷法中小不及《乐毅论》；然清新方重，度越萧子云数等。则是小字中《乐毅论》为冠绝也。”米氏《书画史》云：“（夏侯玄）《乐毅论》（陈）智永跋云：‘梁世摹出，天下珍之。’”苏轼题跋：“尝见欧阳文忠公云：‘《遗教经》非逸少笔。’以其言观之，信若不妄。”

⑤《广川书跋》：“《瘞鹤铭》（梁天监十三年），华旧真逸撰，上皇山樵书，在润州焦山下。世谓王逸少书。欧阳公疑华阳居士唐顾况道号。然逸少，逋翁书皆不与此类。陶弘景尝居华阳观，自号华阳隐君。”《集古录》：“《润州图经》以为王羲之书，然类颜鲁公。右军有《官奴帖》。后汉张芝字伯英，善草书。”

⑥卫夫人名铄，晋卫恒从妹，李矩妻，王右军尝师之。

春近四绝句

闰后阳和腊里回，濛濛小雨暗楼台。

柳条榆荚弄颜色，便恐入帘双燕来。

亭台经雨压尘沙，春近登临意气佳。

更喜轻寒勒成雪，未春先放一城花。

小雪晴沙不作泥，疏帘红日弄朝晖。

年华已伴梅梢晚，春色先从草际归。

梅英欲尽香无赖，草色才苏绿未匀。

苦竹空将岁寒节②，又随官柳到青春。

①黄《谱》二：熙宁二年己酉（1069，山谷二十五岁），是岁在叶县。是岁闰十一月，故附此。原载《外集》。

②苦竹，地下有粗根茎，横卧蔓延，干高五六丈，各节有二个平行之环状隆起，笋

初夏始生。

迎醇甫夫妇

陈甥归约柳青初，【一作“饮屠酥”】

麦陇纤纤忽可锄。

望子从来非一日，

因人略不寄双鱼。

园中鸟语劝沽酒②，

窗下日长宜读书。

策马得行休更秣，【一作“远嫁萧郎亲发白”】

已令童稚割生刍③。【一作“平安行李莫徐徐”。】

① 黄《谱》三：熙宁三年庚戌（1070，山谷二十六岁），是岁在叶县。按别本题云：“遣人迎陈六夫妇。”而后篇又有《送醇甫归蔡》，及《送陈氏女弟寄别陈氏妹》诸诗，必醇甫夫妇无疑，但先后归耳。盖先生之妹适陈塑，尝寓于蔡，醇甫当是其字。

② 鸟语谓提葫芦。

③ 《诗·白驹》：“生刍一束，其人如玉。”

雪中连日行役戏书简同僚

简书催出似驱鸡②，闻道饥寒满屋啼。

炙背宵眠楮火③，嚼冰晨饭萨波耆。

风如利剑穿狐腋，雪似流沙饮马蹄。

官小责轻聊自慰，犹胜擐甲去征西。

① 黄《谱》五：熙宁四年辛亥作。

② 《诗·小雅》：“岂不怀归？畏此简书。”

③ 韦庄诗：“湄湘炉前拥布裘。”

客自潭府来称明因寺僧作静照堂求予作

客从潭府渡河梁，藉甚传夸静照堂②。

正苦穷年对尘土，坐令合眼梦湖湘。

市门晓日鱼虾白，邻舍秋风桔柚黄。

去马来舟争岁月，老僧原不下胡床。

① 黄《谱》四：熙宁四年作。

② 名声藉甚，见《史记·陆贾传》。